


INSTITUTIONES
IURIS PUBLICI ECCLESIASTICI

VOL. III.






FELIX S. R. E. Card. CAVAGNIS

INSTITUTIONES
IURIS PUBLICI ECCLESIASTICI

EDITIO QUARTA ACCURATIO

VOLUMEN III.

COMPLECTENS LIB. IV.



ROMAE
DESCLÉE, LEFEBVRE ET SOC.

S. SEDIS ET S. RITUUM CONGREGATIONIS TYPOGRAPHI
Piazza Grazioli (Palazzo Doria)

1906

32463


PROPRIETAS LITERARIA

IMPRIMATUR

FR. ALBERTUS LEPIDI, O. P. S. P. A. Magister.

IMPRIMATUR

IOSEPH CEPPETELLI, Patr. Const., Vicesgerens.



LIBER QUARTUS

PARTIS SPECIALIS SECUNDUS.

QUAESTIONES SPECIALES DE DIRECTA COMPETENTIA POTESTATIS ECCLESIAE.

1. Exposuimus parte prima lib. 1^o principia generalia quae determinant competentiam Ecclesiae, circa ea quae ad eius finem referuntur sive directe, sive indirecte.

Modo facienda est evolutio et applicatio huiusmodi principiorum quae positive eius competentiam dimetiuntur.

2. Singula genera obiectorum quae ad Ecclesiae competentiam pertinent, sunt deducenda ex principio generali, quod ita enuntiari potest: *Quidquid directe refertur ad finem spiritualem, ad Ecclesiae potestatem per se spectat.* Videamus igitur quaenam referantur ad hunc finem spiritualem et quidem directe. Referri ad aliquem finem directe, est ad illum referri ex sui natura, et non per accidens, adeo ut vel sit impedimentum ad illum consequendum (et tunc refertur contrarie); vel medium ex sui natura necessarium ad illum consequendum, sive adaequatum sive inadaequatum, proximum vel remotum (et tunc refertur positive).

Finis autem spiritualis, qui est finis proprius Ecclesiae, est remote et ultimo salus aeterna, proxime et immediate sanctificatio.

3. Igitur spectat ad Ecclesiae competentiam quidquid directe ad hominum sanctificationem humano ministerio praestandum est.

Etsi enim homines formaliter sanctificentur per ipsam gratiam gratum facientem, tamen plures causae concurrunt: 1^o et semper ipse Deus, qui est causa sanctificationis efficiens et principalis; 2^o ipse homo sanctificandus, si adultus sit; qui cooperatur gratiae Dei actuali; 3^o ordinario habetur et ministerium humanum et est omnino necessarium pro infante; (dicimus ordinario quia sacramentorum susceptio est medium a Deo constitutum pro hominis sanctificatione in voto saltem necessaria, et ecclesiastica praedicatio est normale medium pro eius conversione ad fidem).

4. In adulto autem gratia fidem subaudit actualem; insuper bona opera praecedentia, concomitantia et subsequenta suae infusioni requirit, ut respective acquiratur, conservetur, augeatur. Ex his deduci potest generalissime circa duo considerari posse actionem Ecclesiae; 1^o circa ea quae credenda sunt, idest circa doctrinam, seu fidem, seu dogmaticum magisterium; 2^o circa ea quae agenda sunt, idest circa mores, seu, ut dicitur, circa disciplinam, in sua amplissima significatione sumptam.

5. Verum haec pars subdividitur; vel enim attenditur quod ab ipsis fidelibus proxime praestandum est ob suam sanctificationem, vel quod Ecclesia constituit ut ipsa suam actionem ordinate et utiliter exercere possit, seu pro sua organizatione et interiori constitutione, qua posita sequuntur et leges speciales praescriptae ipsis ministris Ecclesiae pro diverso suo gradu, in quo

pars insignis consistit iuris canonici, dum pro iure publico sufficit adnotare ipsum ius competens Ecclesiae organizandi seipsam et singulis gradibus adsignandi respondentia iura et onera, cum relativis fidelium obligationibus et iuribus.

A fidelibus agnoscenda et servanda sunt et ea quae pro Ecclesiae organizatione statuta sunt cum tandem referantur ad eorundem sanctificationem, sed immediate et magis proxime respiciunt ipsum ministerium, ut expedite et idonee exerceri possit activitas Ecclesiae; ideoque librum hunc in tria capita dividimus: 1^o de potestate Ecclesiae quoad fidem; 2^o quoad mores, quod proprie sanctificationem dicimus fidelium; 3^o quoad suam organizationem.

CAPUT I.

DE POTESTATE ECCLESIAE QUOAD FIDEM SEU DOCTRINAM.

Fides est ab Ecclesia 1. proponenda; 2. conservanda.

Quoad 1^{um} possumus considerare ius Ecclesiae relate ad extraneos et relate ad suos, ad quos et 2^{um} refertur.

ARTICULUS I.

DE POTESTATE ECCLESIAE PRAEDICANDI CATHOLICAM DOCTRINAM INFIDELIBUS ET ACATHOLICIS.

6. Quoad infideles, habet Ecclesia a suo divino Fundatore ius praedicandi et proponendi fidem cunctis gentibus. Hinc ius mittendi suos Apostolos in universum

mundum, absque quolibet placito humano. Etsi autem homines nequeant cogi ad fidem suscipiendam, tamen Ecclesia ius habet eam praedicandi eis qui audire voluerint. Et viceversa ius est singulis hominibus amplectendi fidem.

7. Ex his sequitur iniuria agere eos qui missionarios quomodolibet impediunt, vexant, aut converti volentibus obstacula opponunt. Hinc ius est Ecclesiae implorandi vim armatam principum christianorum ut utrosque defendant et adversantes puniant; ut enim vidimus lib. primo partis primae de vi armata agentes, ius est Ecclesiae eam a principibus christianis implorandi, et eis pro sua facultate officium est eandem concedendi pro tuitione iurium eiusdem sive ab internis sive ab externis impugnationibus intra limites tunc indicatos.

8. Et notandum est idem ius esse quoad acatholicos; etsi enim hi per baptismum in infantia susceptum, habitum fidei receperint, tamen per haeresim formalem, illum amiserunt; hinc etsi de iure sint Ecclesiae subditi, tamen fidem proprie non habent.

Idem dicatur de schismaticis, quia etsi fidem conservent, eam tamen vivam non modo non habent sicut ceteri peccatores, sed neque habere possunt ratione sui status socialis, seu schismatis, ideoque ad Ecclesiam revocandi sunt. Notum autem est ipsos ut plurimum esse et haereticos, quia summi Pontificis auctoritatem et necessitatem eidem parendi facile negant, ut suam inobedientiam iustificent.

Igitur et Ecclesiae ius est praedicandi rectam fidem et docendi unitatis necessitatem, atque ipsis infidelibus vel acatholicis ius est fidem atque unitatem Ecclesiae amplectendi.

9. Cum autem salus aeterna sit negotium maxime

individuale, hinc quisque usum rationis assecutus fuerit, ius habet et officium ea praestandi quae pro eius consecutione necessaria sunt. Et ipsi enim dictum est: « qui non crediderit, condemnabitur ». Hinc quisque habens usum rationis, est in hoc sui iuris; et proinde non indiget consensu parentum; si enim non crediderit aut baptizatus non fuerit, seu si veram Ecclesiam ingressus non fuerit, non modo parentes eius qui impedierunt, sed et ipse damnabitur.

Idem dicatur de servis, servituti propriae dictae obnoxiiis, qui repugnantia dominorum suorum non excusabuntur.

Igitur Ecclesia quae ius et officium habet adiuvandi singulos salvari volentes, ius et officium habet hos suscipiendi, invitis quoque parentibus vel dominis; et quoniam status civilis christianus officium habet iura Ecclesiae armata vi defendendi, hinc adistentiam suam converti volentibus et Ecclesiae ministris praebere tenetur.

10. Adversarii Ecclesiae id traducunt ceu laesivum sive dominicae, sive praesertim patriae potestatis: sed immerito; qui enim habet usum rationis, ius et officium habet tendendi per se ad vitam aeternam; et in hoc non cadit sub dominica aut paterna potestate, ex dictis.

Etenim etsi in eo lumen rationis non sit ita firmum ut ei permittenda sit plena libertas circa negotia humana, tamen circa rectam fidem amplectendam, est ei facultas debita, cum capax sit peccati mortalis, meriti et demeriti.

Neque paritas est cum negotiis humanis, quae sunt contingentia pro salute aeterna, ideoque ut melius praestentur et res humanae magis ordinatae procedant, exigí potest non modo rationis sufficientia sed matu-

ritas; verum pro salute aeterna acquirenda vel amittenda, ex ipsa rei natura sufficit usus rationis simpliciter.

Hinc est puerum esse adhuc a Deo commissum paternae potestati pro reliquis negotiis, etsi usum rationis attigerit, sed non pro salute sua aeterna simpliciter inspecta; ideoque non laedit patriam potestatem si in hoc sibi consulat.

Hinc iniustae leges quorundam statuum quae saltem exigunt pubertatem ut contra parentum vel tutorum voluntatem quis catholicam suscipiat religionem: non enim ad peccandum pubertas, sed simpliciter usus rationis requiritur.

11. Sed dicunt: tunc ob civium paritatem idem ius concedendum erit et puero catholico amplectendi acatholicam religionem.

Resp. hoc ius neque in puero neque in grandaevo agnosci posse; nec enim par est conditio veritatis et erroris. Difficultas autem innititur falso supposito, idest indifferentismo status civilis, nempe eodem modo esse respiciendum ad omnes religiones, qui error lib. primo partis primae iam refutatus est. Quid autem ob anormalem societatis conditionem, auctoritas civilis in materia religiosa tolerare possit aut debeat, pariter expositum est eodem libro I. partis I^{ae}.

ARTICULUS II.

DE IURE PRAEDICANDI CATHOLICIS.

12. Vidimus de iure praedicandi fidem acatholicis eosque suscipiendi in unitatem Ecclesiae; modo de iure Ecclesiae quoad catholicos relate ad doctrinam. Hoc est principium: *Ius est Ecclesiae rectam doctrinam*

fidelibus proponendi eosque in ea efficaciter instituendi ac conservandi.

Hinc 1^o Ecclesia exclusive novas definitiones fidei edit, et errores damnat, sola iudicans de definitionum aut damnationum opportunitate; item alias notas theologicas inurit; hinc Ecclesiae est ius dogmaticum positivum, seu definiendi quae vera, et negativum, seu reprobandi quae falsa. Neque praetextu perturbationis publicae quae ex novis definitionibus sequi possent, valet auctoritas civilis sese immiscere; hoc enim non aufert Ecclesiae competentiam directam, sed ad summum ostendit conflictum inter bonum spirituale et temporale, qui quidem conflictus esset per accidens et ex malitia humana; sed tunc ex theoria de conflictu inter duas societates iam exposita lib. primo part. 1^{ae}, sequitur societatem superiorem seu Ecclesiam praevallere debere, idest bonum spirituale esse prosequendum non obstante quocumque damno temporali.

Et quoniam Ecclesiae ius est proponendi fidelibus suam doctrinam efficaciter, idest ita ut eam de facto facile suscipiant, hinc Ecclesiae est:

2^o Ius negativum removendi quaecumque profectui rectae doctrinae obstant aut propagationi falsae doctrinae favent, et speciatim ius est prohibendi libros qui falsam doctrinam quomodolibet suadere possunt.

13. Et quoniam doctrina ab Ecclesia proponitur ut efficaciter suscipiatur, idest ut fides sit *viva*, et ei conformentur opera, hinc:

3^o Ius est Ecclesiae removendi quaecumque huic vitalitati doctrinae propositae adversantur, et in specie non modo prohibendi libros qui intellectum possint pervertere, sed et qui voluntatem quomodolibet seducere: hinc quoad libros, generalis formula: *ius est Ecclesiae prohibendi fidelibus libros qui noxii evadere possint.*

14. Contra hanc librorum prohibitionem praeter difficultates iam examinatas agendo generatim de iure censurae lib. I. part. I^{ae}, obiciunt principium: nitimur in vetitum cupimusque negata; ideoque asserunt librorum prohibitionem tantum acuerе desiderium eosdem perlegendi, ideoque facilius fideles exponere acriori seductioni, atque inutiliter peccata multiplicare.

Respondemus, verum quidem esse multos exinde occasionem sumere magis peccandi; sed 1^o Ecclesia hoc non obstante iudicavit expedire librorum prohibitionem eamque in usu habuit ab antiquissimis temporibus; Ecclesiae autem, quae sollicita est eorum quae saluti animarum expediunt, iudicium certe ut fundatum habendum est.

2^o Ratio obiecta militat adversus quascumque prohibitiones, rerum periculosarum praesertim, ideoque cum nimis probet, nihil probat.

3^o Resp. directe, multos quidem legem positivam Ecclesiae offendendo gravius peccare, sed timoratos ab iis legendis abstinere ideoque non perverti, qui secus perverterentur; hinc prohibitio librorum et ex paritate rationis rerum omnium periculosarum, expedit saluti fidelium, ideoque sapienter ab Ecclesia adhibetur.

Ex eodem principio, nempe ius esse Ecclesiae removendi quae efficaci rectae doctrinae propositioni et susceptioni adversantur, sequitur:

4^o Ius Ecclesiae praeventivum quoad librorum et doctrinae propositionem. Etenim facilius occurritur malo praeveniēdo quam compescendo, ut apparet applicando rationes quas lib. I. part. I^{ae} generice proposuimus de iure praeventionis competente publicae auctoritati. Hinc ius est I. exigendi a fidelibus ut praeventivae censurae subiiciant libros qui de rebus religiosis vel cum eis connexis agunt.

II. Approbandi eos qui de religione publice docere aut disputare voluerint.

15. Obiic. ius praeventivum impedimento esse pluribus bonis consequendis; etenim difficiliorem reddit librorum publicationem aut doctrinae publicam propositionem, quod retardat scientiarum progressum.

Resp. si difficilius doctrina sive scripto sive viva voce proponitur, tamen maturius et securius; melius autem est a malo certo cavere, quam cum mali periculo bonis quibusdam non necessariis abundare. Iamvero ex magisterio Ecclesiae, tuto populus christianus possidet doctrinam et institutionem in re religiosa et morali necessariam; interest autem quammaxime ne in hac pervertatur, non autem necessaria est ulterior cultura; bona tamen est, dummodo eius procuratio non sit cum periculo eius quod necessarium est; iamvero ad hoc periculum praecavendum tendit ius praeventivum Ecclesiae.

Uterius quoniam ius est Ecclesiae et officium instituendi populum fidelem efficaciter in recta doctrina, hinc non modo ei ius est eandem definiendi et auctoritative proponendi ac removendi et praeveniendi quae contrarium suadent, sed etiam:

5º. Ius est Ecclesiae ea ratione instruendi fideles doctrinamque inculcandi ut facile eandem addiscant, eaque imbuantur intellectu et voluntate; idest ius ei est vere instituendi fideles in christiana doctrina; hinc exigendi ut praedicationem ecclesiasticam frequentent et in christiana doctrina proficiant. Aliud enim est edere definitiones fidei in conciliis aut alia documenta magisterii ecclesiastici, aut prohibitiones librorum vel approbationes eorundem ac doctorum, et aliud curare ut singuli fideles efficaciter instituantur in christiana doctrina; illud ius et officium quoddam est genericum

et potius theoreticum; hoc magis practicum et quotidianum; ideoque quamvis adhuc spectet doctrinam, tamen magis accedit ad rationem practicam.

Id praesertim verificatur de pueris qui frequentiori indigent instructione. Sed quoniam non sufficit res semel didicisse, verum oportet earundem saepius meminisse, hinc et adulti tenentur frequentare ecclesiasticam praedicationem, etiam ex eo quod oportet sit proportionata aetati et evolutioni.

16. Et quoniam proponitur ut efficaciter influat in mores fidelium, hinc Ecclesia iudicat de magis opportuna ratione pro huiusmodi effectu. Hinc ius habet et eam proponendi sub forma *missionum*, quod videretur inutiliter adnotatum nisi saeculo praesertim XVIII et etiam superiori, ut paucis abhinc annis in Helvetia, gubernia quaedam imbuta spiritu regalistico et iansenistico missiones prohibuissent asserendo sufficere parochorum instructiones; missiones autem populum indebite accendere ideoque nimias esse. Quod tam enorme est, ut videretur incredibile.

Cum autem fidelium institutio in sana doctrina extra ecclesiam, praesertim fiat in scholis, hinc de eis loquendum est speciatim.

ARTICULUS III.

DE SCHOLIS.

Nostra aetate multae et difficiliores propositae quaestiones. Considerare possumus 1^o ius Ecclesiae negativum curandi ne in iisdem attentetur doctrinae christianae;

2^o ius positivum promovendi religiosam culturam in scholis sive laicis, sive clericorum.

§ 1.

Ius negativum Ecclesiae in fideles circa scholas.

17. Competit Ecclesiae ius negativum 1° interdicendi fidelibus accessum ad scholas quascunque in quibus periculum sit perversionis quoad fidem (et quod de fide dicimus, ex paritate iuris semper intelligendum est etiam de moribus). Hinc

2° ius invigilandi ne in quacunque schola aliquid contra christianam doctrinam tradatur.

3° Exigendi ut in societate catholica removeantur et puniantur qui ei contrarium aliquid attentaverint.

4° Ex iure negativo invigilandi, in nonnullis saltem circumstantiis socialibus, oriri potest ius praeventivum, prohibendi scilicet docendi munus eis qui ab Ecclesia examinati non fuerint et idonei reperti in fide et moribus, etsi non doceant materias religiosas, ex magna facilitate abusus, praesertim in prima puerorum institutione (1).

§ 2.

*Ius positivum Ecclesiae circa scholas
pro laicis fidelibus.*

18. Consideremus I. ius positivum tradendi in scholis religiosam institutionem pro laicis. Possumus constituere hoc generale principium: *Ius positivum Ecclesiae desumendum est a necessitate (et utilitate) fidelium; ideoque ius est Ecclesiae ea positive praestandi in instructione quae necessaria sunt (et utilia) pro eorumdem recta religiosa institutione.*

Ex principiis autem generalibus, in mentem revocamus Ecclesiam ipsam esse iudicem competentem

(1) Granclaude, tit. de Magistris, § 4.

huius relativae necessitatis. Igitur quidquid ipsa iudicaverit, servandum est. Hoc si res auctoritative consideretur; sed inquiramus scientifice, quid sit necessarium.

19. Possumus considerare 1. ius Ecclesiae circa scholas a se non institutas sed a fidelibus, sive a privatis sive a publica auctoritate civili; 2. ius Ecclesiae instituendi scholas suas.

In antecessum ius et officium patris determinemus, deinde scholae significationem.

Quoad I. sumimus ut extra controversiam positum inter catholicos, patrisfamilias ius et officium esse instituendi filios suos in recta christiana doctrina. Est officium, quia tenetur filios in vera religione instituere; est ius, quia cura filiorum cum nascuntur et sibi consulere nequeunt, est a naturae auctore, ipsis patribus directe et immediate concredita. Quando autem patrem nominamus, matrem quoque intelligimus, servato ordine qui in familia regnare debet, et in parentum defectu, eos qui ipsorum vices gerunt. Iamvero cum quilibet christianus sit sub Ecclesiae vigilantia et positiva directione pro adimplemento officiorum quae ut christianus habet, hinc et paterfamilias pro christiana institutione filiorum suorum. Haec Ecclesiae potestas ab ea exercetur in fideles, modo familiari, donec res privata remanet; ad modum societatis perfectae, cum sit publica; idest cum auctoritas Ecclesiae sit pastoralis, ideoque paterna et regalis, in singulos invigilat eosque dirigit et corrigit, ad modum patris vel principis prout expedierit et requisierit negotium de quo agitur.

20. Igitur ius est Ecclesiae positivum designandi quatenam sint pueris veritates religiosae tradendae. Iamvero ius et officium patrum est instituendi filios in eis quae ad vitam recte traducendam necessaria sunt

in ordine sive spirituali sive temporali; verum huic muneri tum per se, tum per alios, sub propria tamen vigilantia ac responsabilitate, providere possunt. Imo in pluribus expedit, praesertim in litterarum et artium institutione; saepe enim ipsi patres non satis sunt periti, saepius autem curis domesticis distrahuntur. Quidam divites ad id provident, sibi adiunctis magistris, qui omnino singulariter suos instruunt filios; quam institutionem, si appellare velimus scholam, domesticam tamen dicemus, distinctam a privata quae plures in communi curat; verum hic casus est omnino exceptionalis.

21. Ad succurrendum communi necessitati, scholae institutae sunt, seu loca in quibus pueri plures in communi instituuntur. Quarum scholarum pro diverso scopo, plures gradus sunt. Et I. considerare possumus scholas populares, seu, ut dicimus, elementares et primarias; deinde scholas speciales, pro iis qui instructionem non omnibus commune desiderant, quae rursus in secundarias et superiores dividuntur.

QUAESTIO PRIMA.

DE SCHOLIS PRIMARIIS.

Iamvero quaeritur I. an in scholis popularibus sint pueri instituendi et in re religiosa aut tantum in reliquis quae ad vitam civilem referuntur.

22. Recenseamus errores qui de hac re habiti sunt.

Etiam paganis sapientibus compertum fuit pueros maxime in bonis moribus esse instituendos, et mentis instructionem non esse separandam a voluntatis educatione, imo huic inservire debere. Cum autem moralitatis pars essentialis et fundamentalis sit religio, hinc in religione pueros quammaxime esse instituendos, quae institutio absque respondentis instructione religiosa ha-

beri nequit. Multo magis theoretice et practice obtinuit apud christianos, pueros in ipsa revelata religione, utpote unice vera et efficaci, esse in scholis instituendos et instruendos.

Etiam protestantismus, quamvis poneret principia quae logice ad rationalismum ducerent, tamen ab initio revelatae doctrinae necessitatem potius exaggeravit quam excluderet.

Sed principium privatae interpretationis sacrarum litterarum, logice ad rationalismum ducere debebat et vere duxit. Etenim hominis ratio erat quae 1^o iudicare debebat de inspiratione sacrorum librorum; 2^o eos interpretari; quid si persuaderi non posset de eorundem divinitate? Eos reiecisset ut reiecit, et in eis id unice approbasset quod in arte suo verum iudicasset. Sed quid ulterius si de existentia ipsius Dei persuaderi non potuisset? Profecto neque eam admisisset.

Uterius quidam magis logice processerunt et neque de moralitatis necessitate se persuaderi posse affirmaverunt; hinc ex principio semel constituto neminem obligari posse ad ea servanda de quibus ipse persuasus non esset, logice descendisset socialis anarchia et status perpetuae hostilitatis inter homines, ut propugnavit Hobbesius. Sed quoniam necessitas socialitatis nimis sentitur et maxime practica est, hinc generatim reiecerunt has illationes extremas, et moralitatis necessitatem si non logice, tamen utiliter defenderunt. Verum moralitatem a religione praescindere debere dixerunt et proposuerunt principium de educatione quam laicam dicunt; hoc enim nomine indicatur sententia illorum qui contendunt in scholis primariis utique tradendam esse educationem, sed mere moralem, praescindentem a religione. Item instituta impia adsociatio instructionis primum in Belgio, deinde alibi, quae vulgo dicitur

« Lega dell'insegnamento », hoc imbuta anticatholico spiritu.

Quidam magis moderati exigunt educationem etiam religiosam, sed mere naturalem; alii et christianam, sed indeterminatam, adeo ut tradantur tantum dogmata cuilibet, ut aiunt, confessioni christianae communia, et vigilantiam negativam limitant ad excludenda dogmata contraria naturali religioni et christianae in genere.

Contra hos dicimus 1^o puerorum instructionem ab educatione separari non posse, quod nunc adversarios non habet; 2^o educationem moralem et religiosam esse oportere; 3^o hanc religiosam institutionem, inter catholicos, catholicam esse oportere.

Ex his facile ius Ecclesiae hac in re descendit.

Prob. I^{um} breviter.

23. Scopus scholae primariae non est tantum mentem in civilibus instruere, sed etiam personam educare, seu voluntatem in bono instituere; hoc de facto; ratio autem ob quam haec unio instructionis et educationis in scholis primariis ut necessaria habita est, est 1^o experientia, quae ostendit, et prudentum iudicium comprobavit, instructionem traditam separatim ab educatione, parum aut nihil proficere in puerorum recta institutione, idest ipsam rectam educationem impossibilem aut difficiliorem reddere. Educatio autem est praestantior quam instructio; illa enim considerat hominis personam, seu hominem ut moralitatis capacem, hinc necessaria est absolute; haec quatenus a morali instructione distinguitur est per se indifferens.

Hinc traditio instructionis subordinanda est educationi, et proinde si experientia constat hanc minus efficaciter tradi separatim, cum appositae scholae habentur pro illa, profecto haec separatio non est admittenda.

24. 2^o Ratio intrinseca huius inseparabilitatis in casu consistit in ipsa unitate personae humanae, in qua harmonice evolvi debent facultates; et quoniam pars essentialis, est pars moralis, hinc in prima evolutione quae omnibus necessaria est, primum locum tenere debet; si autem in schola pueri tantum audiant quae ad mentis in civilibus institutionem referuntur, cum magni ea faciant quae in scholis accipiunt, facile putant hominis nobilitatem in iis consistere et facile cetera spernunt.

Ut ait summus Pontifex Leo XIII, in sua praeclara Epistola quam de hac re dedit ad eminentissimum Cardinalem urbis Vicarium, die 26 Iunii 1878, nequit in pueris renovari iudicium Salomonis ut intelligentia separatim a voluntate excolatur: « Questo esige altresì
« la natura del fanciullo... non si può in nessun patto
« rinnovare sopra il fanciullo il giudizio di Salomone
« e dimezzarlo con un taglio irragionevole e crudele
« tra la sua intelligenza e la volontà; mentre si prende
« a coltivare la prima, fa d'uopo avviare la seconda
« al conseguimento degli abiti virtuosi e dell'ultimo
« fine. Chi nell'educazione trascura la volontà concen-
« trando tutti gli sforzi alla coltura della mente, giunge
« a fare dell'istruzione un'arma pericolosa in mano
« dei malvagi... ».

Igitur scopus scholae est non modo in civilibus instruere, sed et educare.

Probatur II^{um}.

25. Educatio non modo moralis, sed et religiosa sit oportet; imo moralis sine religione haberi nequit, cum, ut ostenditur in ethica, et nos quoque lib. I. partis primae indicavimus, Deus sit principium efficax obligationis moralis eiusque vindex.

Probatur III^{um}.

26. Religio vera et plene efficax est tantum catholica quae in gente catholica, ut talis, lege agnoscitur. Hinc catholica educatio, et religiosam catholicam institutionem complectatur necesse est; ideoque in scholis popularibus catholicorum a ceteris institutionibus non est separanda.

Id importat duo: 1^o. magistrum imbutum esse spiritu catholico eoque suam educationem informare; 2^o inter materias addiscendas recenseri et instructionem religiosam, seu, ut dicimus, catechismum.

Hinc necessitas instructionis religiosae prob. 1^o ex eius necessitate pro recta educatione quae in scholis acquiri debet, quaeque sine ea impossibilis est. Sed 2^o probari potest et ex argumento quo primum assumptum probatum est, idest: pueri indigent et instructione religiosa; magni autem faciunt quae in scholis accipiunt: si igitur non videant haberi ut necessariam pro integro systemate suae institutionis, eam facile spernent. Ergo tradenda est et ut praerequisitum educationis. Igitur religio est inculcanda ut educatio et ut instructio; sed primum argumentum est maioris momenti.

Ex his apparet summum Pontificem Leonem XIII. in superius laudata epistola, merito reprehendisse eam publicam dispositionem, qua catechismus exhibetur ut materia libera, adeo ut iis tantum tradatur qui illum desiderant. Etenim praeterquam facile quidam genitores possunt ex negligentia hanc petitionem praetermittere, id minuit catechismi efficaciam: « Non si
« riesce infatti a capire come gli autori della malau-
« gurata disposizione non si sieno avveduti della si-
« nistra impressione che deve fare sull'animo del fan-
« ciullo il veder posto l'insegnamento religioso in con-
« dizioni così diverse dagli altri. Il fanciullo che per

« essere stimolato ad uno studio diligente ha bisogno
« di conoscere l'importanza e la necessità di ciò che
« gli viene insegnato, quale impegno potrà avere per
« un insegnamento, verso del quale l'autorità scolastica
« si mostra fredda ed ostile, tollerandolo a malincuore?... »

27. Eamdem doctrinam inculcat idem Summus Pontifex in encyclica *Nobilissima Gallorum Gens*, die 8 Februarii 1884, in qua expresse damnat scholas *mixtas* seu *neutras*, in quibus nempe magister abstinet a quavis doctrina religiosa, saltem determinata, tradenda eiusque institutio nullo religioso spiritu, saltem determinato, imbuatur, et moralitate a religione praescindente contentus est. Talis enim institutio, non modo ut supra adnotavimus manca est et imperfecta, sed etiam evadit facile hostilis verae religioni. Cum enim magister eligatur, praescindendo ab eiusdem religiositate, multi tale suscipiunt officium, qui de re religiosa non recte sentiunt, sive ex defectu fidei, sive quia adhaerent systematibus positive dissonantibus a dogmate catholico. Cum autem permultae materiae, praesertim morales, iuridicae, sociales et historicae, intime connectantur cum re religiosa, sequitur eos qui vera religione carent, facile quoque errare in connexis materiis tradendis, aut factis [humanis diiudicandis. Etenim etsi obiective quaelibet veritas sit independens a nostra sentiendi ratione, non sunt independentia a principiis generalioribus quae sequimur iudicia nostra circa particulares materias. Aliter enim de iuribus et officiis, et de actionum honestate et pulchritudine pronuntiat qui rectam de Deo, de vita futura, de fine hominis et de ordine supernaturali doctrinam tenet, et aliter qui contrariis principiis imbuatur. Est autem moraliter impossibile, eum qui tales materias pertractat habitualiter abstineat a quovis iudicio pronuntiando,

quod diversimode concipiendum est pro diversa sentiendi ratione circa fundamentales doctrinas. Eius igitur docendi ratio non modo erit incompleta, sed etiam facile falsa.

28. Ob huius veritatis practicam necessitatem factum est ut Summus Pontifex abundantius adhuc de eadem ageret in encyclicis litteris, *Militantis Ecclesiae*, quas die 1 aug. anni 1897. dedit ad Episcopos Austriae, Germaniae et Helvetiorum tertio volvente saeculo ab exitu B. Petri Canisii.

29. Cum vero in dominio Canadensi exarsisset quaestio circa easdem scholas neutras in Manitobensi regione decretas, idem Summus Pontifex Leo XIII, litteras dedit, *Affari vos*, die 8 Decembris eiusdem anni 1897. in quibus hoc argumentum ex professo pertractat et absolvit.

Posito tamen principio scholas populares pro catholicis oportere catholico imbui spiritu et catholicam tradere iuventuti institutionem, Canadenses hortatur utantur iis concessionibus quas lege, vel usu, vel hominum facilitate obtinerent, etsi non ad universam extenderentur regionem, sed ad aliqua tantum loca, dummodo res ita essent compositae ut omne periculum perversionis proximum removerent.

Ubi vero alia nulla mederi ratione incommodis liceret, eos obsecratur ut aucta liberalitate munificentiaeque pergant occurrere, scholas nempe privatas catholicas instituendo.

30*. De hac materia multa auctoritativa documenta prostant in Collectanea S. C. de Propaganda Fide (1) cap. XV. *de scholis*, pag. 192-206, ubi referuntur decreta et acta eiusdem S. C. ab anno 1659 ad an. 1883. Vide

1) Romae, Typis eiusdem S. C. an. 1893,

praesertim instructionem huius S. C. *Pluries*, approbatam a S. S. die 24 nov. 1875. Vide etiam litteras Em̃i Card. Praefecti huius S. C. ad Card. Archiepiscopum Quebecensem, *Sacra haec congregatio*, quae referuntur in volumine XXVIII actorum S. Sedis pag. 381. sine data, sed sunt diei 14 Maii anni 1895.

In eodem volumine pag. 567 adsunt etiam responsiones ad dubia super decretum Concilii plenarii III baltimorensis, sub numº. 196.

31. Volumine autem XXIV eorundem actorum pag. 622 habentur aliae litterae circulares, eiusdem Card. Praefecti S. C. de Propaganda ad Ordinarios Americae Septentrionalis, *Amplitudo Tua*, die 3 maii 1892. Superiora enim acta et decreta referuntur ad *regulam*, nempe in scholis tradendam esse institutionem positive catholicam; hae litterae e contra respiciunt *exceptionem*, nempe conventionem initam ab Archiepiscopo S. Pauli in iisdem Statibus, pro scholis *de Faribault et Stillwater*, et litterae citatae monent: « attentis peculiaribus adiunctis, nec non modo et pactis quibus conventio inita « fuit, sequens edendum censuerunt (Cardinales S. C.) « decretum eadem die a Summo Pontifice approbatum: « Firmis in suo robore manentibus decretis Conciliorum « Baltimorensium super scholas parochiales, conventio « inita a R. P. D. Ioanne Ireland (Archiepiscopo) relate « ad scholas de Faribault et Stillwater, perpensis omnibus circumstantiis, tolerari potest ».

Ubi enim publicae scholae sunt neutrae, generatim non licet eas frequentare ob insufficientem religiosam institutionem, imo ob periculum proximum perversionis; ideoque scholae privatae a catholicis instituendae sunt, quas in Statibus Foederatis Americae Septentrionalis, *parochiales* appellant. Sed aliquando id impossibile vel nimis onerosum evadit; ideoque si insuffi-

cientiae institutionis religiosae in scholis traditae, aliter suppleri possit et periculum perversionis removeri, tolerari seu permitti poterit earumdem frequentatio. His consuluerat Archiepiscopus S. Pauli in citatis locis; inierat enim conventionem cum auctoritate municipali, per quam scholae neutrae tradebantur personis ad institutum religiosum pertinentibus, quae episcopi auctoritatem in omnibus, etiam in libris designandis, agnoscebant: igitur perversionis periculum remotum erat; nihil enim docuissent quod apprime non consentiret cum doctrina catholica, etsi in schola abstinere debuissent ab expressa huius expositione; sed insufficientiae institutionis religiosae pro catholicis pueris supplebatur extra scholam, immediate ante vel post, per specialem instructionem religiosam et religiosos actus (missam, preces, etc.)

32*. In tuto igitur posita necessitate religiosae institutionis in scholis puerorum, videamus de iure Ecclesiae competente in hac materia.

Quatenus institutio religiosa datur ut educatio, schola saltem cadit sub vigilantia Ecclesiae, ut supra dictum est de negativo eius iure; vigilantia enim etsi sit quid positivum, tamen cum ad id tendat ne quid minus rectum tradatur, eius ius inter negativa recensemus. Quatenus autem est instructio religiosa, magis positivum fit munus Ecclesiae, nempe praescribit quatenam sint pueris tradenda, et per consequens etiam scholas visitat ut verificet traditam institutionem; hinc legislationes christianae solent parochis, qui repraesentant auctoritatem ecclesiasticam in suo gradu magis immediato cum populo, ius concedere scholas has visitandi et interrogandi pueros de re religiosa; dicimus christianas, quia et apud acatholicos id solet adhuc obtinere, quia principium de schola laica satis recens est.

33*. Huc faciunt responsiones sacrae Congregationis Concilii Archiepiscopo Solonae interroganti:

I. An clericos tam minorum quam maiorum ordinum ad officium ludimagistri a communitatibus conductos cogere possit ut pueros rudesque scholares doctrinam christianam edoceant.

II. An idem cogere possit ludimagistros laicos itidem a communitatibus conductos.

III. An idem cogere possit ludimagistros sive clericos sive laicos a nemine conductos.

IV. Qua poena praefatos ludimagistros cogere possit.

Sacra Congregatio reposuit posse prius hortando et deinde praecipiendo, die 17 Iulii 1688, relata a Benedicto XIV. Instit. IX.

34*. Inutile est adnotare nos hic agere de eo quod per se praestandum est in societate catholica; quid autem in statu mixtae religionis, vel quid pro subditis acatholicis status catholici, non inquirimus, cum tunc agatur non de iure per se, sed de iure per accidens, vel de eo quod prudenter potest ad praxim reduci. Sed in statu mixto 1° nunquam catholici cogendi ad frequentandas scholas in quibus aliquid tradatur contra ipsorum religionem; 2° catholicis permittendum est scholas suas habere; imo ex aerario publico eis subveniendum est, ne contra iustitiam et aequitatem sociale cogantur tributa solvere tantum pro scholis publicis, quibus uti non possunt, ut fusius infra adnotabitur.

DIFFICULTATES.

35. Prima pars ratiocinationis institutae impugnari posset, dicendo educationem tradendam esse extra scholam, ab instructione mentis separatam; etenim illa ad patris officium spectat.

Verum animadvertimus ad patris officium seu matris, spectare et primam instructionem mentis. Hinc puerorum institutor semper loco patris stat. Hinc tenetur ex ipsa rei natura, ita pueros instruere ut obligationi patris satisfaciat. Iamvero id educationem importat, et quidem ex dictis religiosam et inter catholicos catholicam. Etenim non agitur de eo qui instruit in una determinata speciali materia, ex. gr. in mathesi, qui profecto positive respicere ad educationem non tenetur, sed de eo qui simpliciter mentis evolutionem loco patris procurat, vel melius (ut res se habent apud nos et universim) de eo qui evolutionem pueri fundamentalem et universam curat. Minister Portalis quando Napoleon I. restauravit in scholis religionis doctrinam dixit: « Tempus est ut theoriae taceant » coram factis. Nequit dari instructio sine educatione, « et educatio sine moralitate ac religione. Magistri docuerunt deserto, quia imprudenter dictum est de religione in scholis sermonem non esse habendum » (1).

36. Modo analogo resolvitur obiectio quae contra secundam partem proponi posset, idest educationem moralem in scholis tradi posse, et religiosam extra scholam, quoniam obiective distinguuntur officia erga Deum et cetera erga se et proximum.

Antequam respondeamus praemitto, ex allatis argumentis duo esse constituta, idest 1^o ipsam educationem spiritu religioso informatam esse oportere;

2^o quoniam religiosa educatio supponit religiosam instructionem, eam quoque in programme, ut aiunt, popularis instructionis, comprehendere oportere.

Iamvero cum educatio religiosa debeat informare educationem moralem, nullo modo est ab ea separabilis.

(1) Thiers, *Hist. du Consulat*, liv. 24. pag. 321.

non tantum quia esset incompleta, sed quia esset falsa et inefficax, cum, ut ex *ethica* adsumimus, non modo religio sit pars moralitatis; sed reliquae moralitatis fundamentum, ut lib. 1^o part, 1^{ae} diximus, sine quo non subsistit, et a quo praescindendo, hoc ipso falsa est, cum aliud non verum fundamentum esset adsignandum.

Igitur magister qui numquam loqueretur de Deo et officiis erga eumdem, cum loquitur de honestate, falso spiritu imbueret suos discipulos: hinc haec pars est inseparabilis a reliquis.

37. Quoad instructionem vero religiosam, notamus necessarium non esse catechismum tradi in ipsa schola, ab ipso magistro aliarum materiarum; potest enim tradi, et forsitan utilius, in Ecclesia et a viro ecclesiastico specialiter deputato, dummodo sit pars programmatiss obliatoria, quae ut praecipua habeatur, adeo ut discipuli eam ut necessariam ad felicem exitum examinum, et maximi momenti considerent.

Igitur haec pars est separabilis quoad locum et personam docentis, quamvis non ab integro systemate instructionis, de quo tantum solliciti sumus.

38. Circa tertiam partem, si qui contenderet sufficere institutionem religiosam in genere, aut ad summum christianam, pariter animadvertimus:

1. quoad institutionem in religione mere naturali eam esse 1. falsam, quatenus negaret esse attendendam religionem revelatam aut de ea sileret, silentium enim aequivaleret ignorantiae;

2. incompletam, si tantum in genere diceret esse servandam religionem revelatam, sed non indicaret quid ipsa doceret; hinc inefficax esset nisi suppleretur. Instructio autem religiosa suppleri potest extra sy-

stema scholasticum quamvis minus efficaciter, sed educatio male suppletur.

II. Quoad institutionem christianam in genere, 1. eadem animadverti possunt, cum et ipsa sit aut falsa aut saltem incompleta; 2. ob dissidia exorta vel exoritura, principia communia omnibus confessionibus christianis ita exilia sunt et multo amplius fieri possunt, ut fere evanescant.

QUAESTIO SECUNDA.

DE CATECHISTA APPROBANDO VEL DESIGNANDO.

39. Ius positivum Ecclesiae ex dictis complectitur:

1°. adsignationem materialium tradendarum seu catechismi.

2°. Visitandi scholas, ut videat an eius praeceptis satisfiat.

3°. Referri potest ad personam, de quo in praesenti quaerimus. Et distinguendum inter scholas elementares privatas seu a privatis institutas, et scholas publicas seu a publica auctoritate sive municipali sive gubernativa constitutas, aut his assimilatas.

Sit primo

NUM. 1.

De scholis primariis privatis.

40. Scholae privatae repraesentant auctoritatem patrumfamilias sive ab ipsis constitutae sint, quo casu apud nos rigore paternae dici solent, sive non; etenim per accessionem voluntariam veluti eas adoptant, cum magister privatus nullam aliam habeat auctoritatem docendi quam receptam a patribusfamilias. Iamvero patri ius est et officium naturale educandi et instituendi filios suos. Verum potest alios sibi substituere

sub sua tamen vigilantia atque responsabilitate. Cum enim sit non modo ius sed et officium generale relate ad moralem educationem et primariam ideoque omnibus necessariam institutionem, nequit eidem renuntiare.

Item potest coadiutores sibi adsumere. Huiusmodi sunt magistri, idest vel substituti vel coadiutores pro casuum diversitate.

41. Substituti sunt cum patris locum tenent, qui nihil praestat pro filiorum instructione et educatione; coadiutores sunt, cum illum adiuvant attendentem filiorum institutioni. Cum filii in collegiis ponuntur, magistri et alii institutores sunt potius substituti patris; etenim eius absentis vices gerunt; e contra cum filii vivunt in domo paterna et tantum frequentant scholas, et multo magis si in ipsa domo paterna magistros audiant; tunc enim neque scholas in sensu quaestionis, frequentare dici possunt; sumimus enim scholam prout distinguitur a domestica institutione, cuius vices gerit et insufficientiam supplet.

42. Tamen pater christianus habet coram Ecclesia officium educandi et instituendi filios conformiter christianae doctrinae; in hoc igitur est sub vigilantia Ecclesiae, quae insuper praescribit quatenam sint docenda: etenim paterfamilias, filios christiane educat et instituit praecise quatenus christianus pater est. Etenim officium eius naturale est ut eos instituat, recta institutione; rectam autem agnoscit christianam institutionem quatenus et ipse christianus est; et hoc eius officium fit iuridicum, idest obligatorium coram aliqua societate, quatenus pater membrum est eiusdem societatis. Igitur officium institutionis christianae in patre est necessaria extensio officii paterni, derivans a qualitate christianitatis quae in ipso est.

Sed homo quatenus christianus, est sub vigilantia non modo sed sub positiva directione Ecclesiae, sicut quatenus civis, est sub positiva directione societatis civilis. Ergo pater christiane instituit filios ea ratione quam Ecclesia praescripserit.

43. Ex quo apparet differentia quae intercedit inter relationem patriae potestatis ad Ecclesiam et ad civilem societatem; ad Ecclesiam enim refertur per se: etenim cum Ecclesia curet sanctificationem fidelium per media externa, immediate attingit omnes ipsorum respectus externos; hinc eos directe considerat in quovis statu sive patris sive filii, mariti et uxoris. E contra patria potestas non refertur directe ad societatem civilem, sed tantum indirecte, ex dictis in parte 1^a de autonomia familiarum, cum scopus societatis civilis non sit curare relationes patris et filii seu internas familiae, sed tantum externas eorumque impotentiae supplere; hinc corrigere excessus, supplere defectus, sed non directe sese negotiis familiaribus immiscere.

44. II. Ecclesia habet per se ius instruendi in christiana doctrina suos fideles, ideoque et filios familias. Hoc ius Ecclesiae non est exclusivum iuris paterni, sed cumulativum, quod sedulo notandum est; etenim Ecclesia ex dictis, habet ex fine suo ut homines sibi subditos sanctificet; est igitur eius obiectum directum et proprium quidquid exterius sanctificandum est; sed non excludit aliena iura, et adscribit sibi minores societates, integra manente ipsarum activitate et competentia, quae tantum ei subordinatur. Igitur et patrum iura intacta manent quamvis fiant Ecclesiae subiecta. Iamvero Ecclesia instituit fideles tamquam per organa sibi propria, per parochos aliosque ministros suos. Imo cum ex dictis patres christiane instituunt filios quatenus ipsi membra Ecclesiae sunt, hinc fit ut

sint organa naturalia Ecclesiae, quia iuris naturae est ut Ecclesia utatur opera patrum pro christiana institutione filiorum, cumulative cum aliis suis ministris. Hinc Ecclesia quae est societas maior, incorporat sibi familiam, quae est eius respectu societas minor, et sibi subordinat eius organismum eoque pro suo fine utitur.

Igitur Ecclesia et ius habet instruendi per se filios, et invigilandi atque exigendi ut a suis patribus instruantur, praescribendo quaenam docenda sint.

NUM. 2.

De magistris substitutis patri.

45. Hoc ergo officium patrum transfertur in magistros si eos sibi substituant; quos primo consideramus, qui proinde magistri habent erga Ecclesiam eam dependentiam quam habebant ipsi patres, imo maiorem. Etenim ius instituendi filios in patribus est naturale, et etiam instituendi eos christiane; fuit enim necessario ex extensione auctoritatis paternae, posita qualitate christianitatis in patre; est igitur naturale hypotheticum quamvis ab Ecclesia negative et positive dependens; ideoque sub eius vigilantia et directione. Potest igitur paterfamilias ab Ecclesia dirigi et corrigi, sed regulariter nequit removeri, nisi in casibus extremis, sicut requiritur et ut expolietur in reliquis, auctoritate paterna; etenim eius ius est naturale et proprium.

46. E contra magister substitutus patri, non habet ius proprium sed delegatum, neque naturale sed adventitium. Ergo non modo dirigi et corrigi, sed etiam removeri potest. Removetur autem a patre qui retractat delegationem; verum quoniam ipse pater est sub Ecclesiae directione et correctione, hinc et eius actus quo magistrum sibi substituit; si igitur male substituat, poterit ab Ecclesia obligari ad revocandam delegatio-

nem. Inno attento iure, poterit Ecclesia et directe hunc malum christianum ab hoc officio interdicere, seu eum **removere**.

Est igitur Ecclesiae ius integrum positivum quoad praescriptionem docendorum, et negativum quoad personarum designationem, quae patrifamilias substituantur.

47. Sed requireturne positiva approbatio huius personae ab Ecclesia?

Haec quaestio duplicem habere potest significationem; 1. an necessaria sit Ecclesiae missio ita ut ipsa designet personam; 2. an Ecclesia possit positivam approbationem praescribere, consensum suum dando designatis catechistis.

Quoad I. negative respondendum est; etenim magister patri substitutus, repraesentat auctoritatem paternam, etsi in materia hypothetice ei competente, quae auctoritas a patre est delegabilis. Retinet ergo magistri institutio naturam privatae et paternae institutionis, quae nullam auctoritatis publicae missionem importat, quamvis sit ei subordinata, eo modo quo exposuimus.

48. Quoad II. an Ecclesia possit exigere hanc positivam approbationem?

Resp. 1º generice; posset si esset moraliter necessaria, pro tuta institutione fidelium.

Etenim ius et officium Ecclesiae est supremum et plenum; si igitur res in eum statum devenirent in quo passim sufficiens cautio non haberetur rectae institutionis in magistris, puta quia plures essent male in fide sentientes, profecto hoc ius esset Ecclesiae; sicut enim eos remove-re post factum, ita et praevenire posset periculum ante factum; agitur enim, ut praediximus, de officio in eis accidentali et adventitio.

Sed 2º si loquamur iuxta communiter contingentia, respondemus negative, cum dicti magistri repraesentent auctoritatem patris, quae eius propria est et delegabilis.

49. Tamen notandum est scholas has paternas habere posse plures gradus; etsi enim iuridice sint semper paternae, tamen prout numerum vel minorem vel ampliorem instituendorum comprehendant, praesertim si omnibus volentibus privatus institutor operam suam offerat, accedent plus vel minus scholis publicis, non attento iure quo existunt, sed modo quo instituunt; hinc pro maiori sua numerositate, maiorem Ecclesiae vigilantiam merebuntur.

NUM. 3.

De magistris coadiutoribus.

50. Consideramus 2º magistros, coadiutores patris. Cum magistri sunt simpliciter patri substituti, oportet curent et religiosas puerorum instructionem, loco patris; sed cum tantum illum praesentem adiuvant, tunc pater quaedam potest per se. Iamvero hi coadiutores rursus vel sunt omnino domestici, idest et privata auctoritate docent et modo privato, ex gr. in ipsa domo patris vel inter paucos selectos filios, vel docent modo publico, ut fit in scholis quae a privato offeruntur cuilibet volenti, data compensatione.

Si primum, certe pater potest plura praestare per se; ideoque et religiosas instructionem sibi reservare, et aliquando utilius ut rem nobilissimam quam sibi reservando, ostendit a se haberi maximo in pretio. Loquimur semper de instructione religiosa; nam educationem et reliquam instructionem imbui oportere spiritu catholico, semper necessarium esse diximus,

neque in hoc separabilitas est possibilis, eam vetante ipsa materia.

Verum hunc casum quo magister modo privato coadiuvat patremfamilias, non consideramus; tunc enim ut praemonuimus, non habentur scholae proprie dictae, etsi habeantur magistri.

51. Si alterum haberetur, nempe magistros coadiutores docere modo publico, tunc et religiosa instructio est inter materias scholasticas adnumeranda, quia viget ratio quam supra attulimus in probatione generica primi et secundi principii. Igitur tunc instructio religiosa danda est non ex natura principii constituentis scholam (quod est auctoritas paterna), sed ex natura ipsius scholae quae modo publico datur et cum appareat destinata ad pueros universim instituendos in necessariis, si omitteret partem religiosam, deficeret, et si suppleretur extra, non tam efficaciter suppleretur ex dictis; ideoque per se, est danda inter scholasticas materias.

Ceterum ex scholis privatis quaedam esse possunt in quibus dubium erit an sint privatae tantum quoad principium eas constituens vel in ipsa ratione docendi ideoque locus prudenti aestimationi reliquendus erit et tutior pars adoptanda; agitur enim de efficacia medii pro fine necessario.

52. Ex his apparet obiici non posse, esse in potestate patrumfamilias filios per se educare vel alios subdelegare, ideoque posse vel totum vel partem subdelegare sui muneris; igitur posse et sibi reservare instructionem religiosam suorum, ceteris delegatis.

Resp. enim id verum esse, dummodo ipsa res religiosa detrimentum non patiatur. Iamvero cum filii ad scholas mittuntur quae ratione publica docent, si in eis non tradatur religiosa institutio, ipsa male extra

suppletur, ex dictis. Ergo tunc ex hypothesi liberum non est patribusfamilias huiusmodi scholas adoptare per se loquendo, idest si aliter melius filiis possint consulere.

53. Relate vero ad catechistarum coadiutorum patrum vigilantiam et directionem, competunt semper Ecclesiae eadem iura ac super magistros qui patribus substituantur; de quibus magistris universim observandum est eos vel catechismum docere ut quid accessorium, idest una cum aliis materiis, vel exclusive ad eum tradendum designatos esse. Etsi iura Ecclesiae vigilantiae ac directionis, sint eadem quoad utrosque, tamen quoad postremos qui ex professo cathechistae sunt, facilius erit et convenientius ut in ipsorum designatione approbatio Ecclesiae exquiratur.

NUM. 4.

De scholis publicis popularibus.

54. Scholas populares publicas dicimus quas auctoritas societatis civilis, sive sit gubernativa, sive provincialis, aut municipalis erigit pro communi institutione puerorum.

Iamvero hae scholae debent et religiosam institutionem tradere pueris et subiiciuntur vigilantiae Ecclesiae et eius directioni quoad materias tradendas in re religiosa, sicut ceterae, imo ob suam perfectam publicitatem et praestantiam, magis etiam.

Etenim etsi hae locum teneant patrumfamilias, non tamen ex facto eorundem, sed ex voluntate publicae auctoritatis: patres tantum quemdam assensum praestant si lex eos liberos relinquat; qui assensus valde minor est ac pro scholis a privatis institutis: etenim in his electioni locus est, imo cum ut plurimum et stipem aliquam collatam requirant, conatui cuidam patrum-

familias locum relinquunt; e contra scholae publicae gratuita; et nulli consensui locum relinquerent, si essent ex legis necessitate adeundae, ut pluribus in locis, quamvis ex iniuria exigitur.

55. Est iniuria; quia etsi societas civilis possit invigilare ut quisque paterfamilias muneri suo satisfaciat educandi filios suos, et pro necessitate eos corrigere aut substituere possit, non tamen potest iure coarctare illorum libertatem qui possunt et volunt filiis suis vel per se vel per sibi benevisos consulere.

56. Iamvero de scholis his publicis quaeritur an approbatio catechistae (vel magistri eius quoque fungentis officio) per se spectet ad Ecclesiam, vel auctoritate civili fieri possit, sub Ecclesiae vigilantia.

Ex una parte, pro affirmativa sententia militat designationem huiusmodi magistrorum fieri ab auctoritate publica seu sociali; pro re religiosa auctoritas socialis est ecclesiastica, non civilis.

57. Ex alia vero parte, pro negativa sententia militat, has scholas publica quidem auctoritate institui, sed loco patrum, qui cum sint sub vigilantia Ecclesiae, sed non indigeant eius missione pro religiosa filiorum institutione, ita neque ea indigere videtur publica civilis auctoritas, designando magistros qui locum patrum teneant. Auctoritas enim socialis per se religiosa, est utique ecclesiastica, non civilis, si de iure independenti sermo sit; hinc vigilantiae Ecclesiae locus est; item si iure proprio procedat, auctoritas socialis in re religiosa profecto non est auctoritas civilis, sed ecclesiastica; verum iure repraesentativo patrumfamilias procedere potest et auctoritas civilis, dummodo servet erga Ecclesiam eam dependentiam ad quam tenentur ipsi patresfamilias.

58. Circa hanc quaestionem, quaedam adnotamus. 1°

Indubium est Ecclesiae competere ius vigilantiae in hos magistros, eosque removendos esse eius iudicio, si christianam doctrinam pervertant.

Iamvero in praxi, ius vigilantiae et ius approbationis, eandem moraliter loquendo producunt securitatem; approbatio enim est consensus praestitus praesentato, tamquam idoneo; et distinguitur a designatione, quae inter idoneos, magis idoneum eligit.

2º Ut supra adnotavimus, si in concreto, ex specialibus locorum et temporum conditionibus, Ecclesia iudicet necessarium praescribere et positivam approbationem, ei id iuris esse. Huc facit declaratio sacrae Congregationis Concilii in Ferentina 4 Decemb. 1734: « Episcopum posse prohibere ludimagistris exercitium « scholae, quamvis nominati fuerint a communitatibus « laicorum, iisque competat eorum electio, bonorumque « administratio independenter, *nisi prius fuerint ab* « *Episcopo approbati* ». Imo et designatio personae competere potest Ecclesiae in casu infra notando.

Iamvero cum spiritus informans societatem civilem et praecise classes excultas erat catholicus, poterat praesumi in omnibus magistris, sufficiens cultura et bona fides in docendo; e contra si perversio in hoc habeatur, cessat praesumptio, et praecedens approbatio potest esse utilis vel necessaria.

3º Distinguendum inter magistrum qui cum ceteras tradat materias, et catechismum docet, et eum qui unice ad catechismum tradendum destinatur. Pro illo tantum approbatio poterit esse necessaria, quia principaliter destinatur ad reliquas materias edocendas: hinc ille designat qui principali providet, in tuto collocato iure accessorii. (Ex supradictis patet quo sensu instructio religiosa dicatur accessoria et secundaria; non ratione sui, sed quatenus est obiectum scholae,

quae schola principaliter dirigitur ad complexum cognitionum et educationis). Haec approbatio esse poterit generalis, si ex. gr. inter materias ab ipso exponendas in idoneitatis examine, et religio comprehendatur, a deputatis ecclesiasticis experimento subiicienda.

E contra, catechistae unice docentis catechismum designatio, ad auctoritatem Ecclesiae poterit pertinere, cum ad eam positivus concursus spectat ad eius nominationem.

59. His positis dicimus:

In scholis publicis positivam approbationem Ecclesiae requiri ad catechistae officium, sive sit unicum sive secundarium officium magistri.

Prob. ex supra allata ratione pro prima sententia, nempe scholae institutionem esse negotium publicum et sociale: ideoque pendere ab ea auctoritate cui competit cura negotii pro quo instituitur. Atqui religio pendet ab auctoritate ecclesiastica; ergo magistri quatenus ordinantur ad religionem tradendam pendent ab auctoritate ecclesiastica.

60. Ratio obiecta in argumento secundae sententiae negativae est falsa: aiebant enim auctoritatem civilem in scholis instituendis repraesentare auctoritatem paternam; sed non est verum; aliud enim est eam supplere insufficientiam patrum, aliud est eorum auctoritatem repraesentare; illud verum est, sed est commune et ceteris attributionibus auctoritatis civilis; ad id enim instituitur civilis societas, ut pluries dictum est, ut suppleat familiarum insufficientiam (qui scopus ad rem nostram refertur), et ut ipsarum reciprocas relationes ordinet. Verum in supplenda hac familiarum insufficientia, non procedit auctoritate patrum delegata, sed sua, idest publica. Igitur et quatenus providetur instructioni religiosae, proceditur auctoritate publica; sed

hanc propriam in re religiosa, societas civilis non habet, sed tantum ministerialem. Ergo positiva directio Ecclesiae et in catechistarum constitutione requiritur; qui positivus consursus erit designatio, si agatur de catechista ex professo, secus erit approbatio.

61. Verum si ex temporum conditionibus inter ordinarios magistros non facile inveniantur qui possint approbari, tunc ius erit Ecclesiae et exigendi constitutionem catechistae appositi.

Etenim ex utroque systemate adest utilitas diverso sub respectu. Cum magister docet ceteras materias et insuper catechismum, tunc si magister optimo est imbutus spiritu, discipuli considerant instructionem religiosam ut ceteris parem; imo ex magistri sollicitudine ut praestantiozem. Sed periculum est magistrum non esse catholico spiritu imbutum ideoque saltem negliger et pro forma in ea tradenda procedere, et proinde ineffaciter.

E contra si appositus aderit catechista ab auctoritate ecclesiastica designatus, hic et diligentior erit et magis peritus. Etsi enim sufficiens catechismi traditio fieri possit ab omnibus satis in re christiana edoctis, tamen exquisitior puerorum institutio, non communem in docendo peritiam exigit. Sed si ipsi scholares in religioso spiritu deficient, periculum est ne eius magisterium minoris faciant, utpote de materia supervacanea.

62. Quaeri ulterius potest an status teneatur ad expensas religiosae instructionis sustinendas, posito quod Ecclesia exigit appositum catechistam. Et respondetur affirmative, cum eius sit expensas pro publica prosperitate sustinere; iamvero ad eam scholae requiruntur, et natura scholae ex dictis importat religiosam institutionem, quae ex hypothesis exigit catechistam appositum.

63. Ceterum nemo non videt nostris temporibus eam esse socialem conditionem ut maxime necessarius sit Ecclesiae positivus interventus, ut scholae fiduciam patrumfamilias et Ecclesiae ipsius mereantur, sub respectu religioso, cuius interventus necessitas fit ad hominem magis evidens, ubi schola est obligatoria; tunc enim cum patribusfamilias non sit facultas aliter consulendi suorum institutioni, oportet, maximam securitatem exhibeant scholae publicae.

NUM. 5.

De scholis primariis privatis quae publicis assimilatae sunt.

64. Sunt et scholae a privatis institutae sed ad modum scholarum publicarum, quas cum Taparelli materialiter publicas vocare possemus, quae a lege, ex parte saltem, scholis formaliter publicis comparatae sunt pro effectibus civilibus. Cum autem pro effectu iuris indifferens sit an aliquid sit primitus a publica auctoritate constitutum, vel postea ab eadem loco publicae institutionis recognitum, hinc necesse est satisfaciat iisdem conditionibus coram societate tum civili tum ecclesiastica; et proinde in casu nostro, scholae a privatis institutae sed ad modum scholarum publicarum et a lege civili pro effectibus civilibus recognitae pro religiosa institutione necesse est positive ab Ecclesia pendeant. Quae dependentia est limitanda ad approbationem catechistae, et non ad designationem, cum privatis ius sit concurrendi publicae utilitati, dummodo idonei sint.

65. Hinc pariter notandum est esse posse casus in quibus difficile sit determinare an privatus instituens scholam, eam ut privatam velit haberi, idest ut oblatam in adiutorium patribusfamilias, ab eis unice vim retrahentem, vel ut publicae seu socialis institutionis

locum tenentem; ut a lege vim suam ac privilegia accipiat; sed nos de principiis, non de applicationibus solliciti sumus, et in praxi iudicium Ecclesiae erit attendendum.

66. Igitur reassumendo ius Ecclesiae circa personas, I. in scholis vere privatis per se est ius tantum negativum, excludendi repressive inidoneos.

II. In scholis publicis est ius positivum et praevenitivum approbandi qui cum aliis materiis docent et catechismum, et designandi catechistas ex professo eosque aliquando exigendi.

III. In scholis privatis sed aequiparatis ius est saltem approbandi.

QUAESTIO TERTIA.

DE SCHOLIS SECUNDARIIS ET SUPERIORIBUS.

67. Quaeritur deinde quod ius positivum sit Ecclesiae pro religiosa instructione impartienda in scholis non popularibus, sed specialibus, quae proinde ab iis frequentantur qui communem et omnibus necessariam instructionem religiosam iam accepisse praesumuntur. Iamvero notandum est, instructionem religiosam eadem non esse omnibus sufficientem; oportet enim sit proportionata reliquae instructioni; hinc maior cognitio religiosa necessaria est iis qui studiis ex professo attendunt.

68. Proinde hic non consideramus scholas omnino professionali, ex. gr. in arte aliqua liberali vel mechanica; etsi enim utile esse possit ut hi discentes, diligentius in religione instituantur, tamen si frequentent instructiones religiosas in Ecclesia traditas, potest eis sufficere, cum ipsorum scholae non sint nisi officinae ampliatae, ideoque proprie non collocent in classe civium magis exculta, etsi faciant in aliqua arte ma-

gis excultos; non enim cognitiones communes litterarum et scientiarum augent, quae etiam proximius cum quaestionibus religiosis connectuntur, ut videtur necessarium ut quis collocetur in classe civium magis excultorum. Ceterum si contrarium verificaretur, analogice ad ea quae dicturi sumus, facile argui posset.

69. Est autem principium generale semper prae oculis habendum, Ecclesiam posse quidquid ad salutem animarum necessarium putaverit; hinc non modo praecepta generalia condere potest pro omnibus fidelibus, sed et specialia pro determinata aliqua classe; hinc si viderit fideles alicuius professionis periculo damnationis exponi, potest tum eandem professionem interdici si periculum sit inevitabile et absque ratione sufficienti, tum remedia praescribere ut removeatur seu vincatur, inter quae et specialis instructio esse potest; id autem praecipit vel in foro interno vel per legem in externo prout fuerit natura periculi, idest vel personalis vel publici et communis alicui classi. Nobis autem mens non est aut facultas prosequendi omnes posibles hypotheses quae in rebus humanis possunt verificari, sed praecipuas, et praesertim concretas quae nunc verificantur.

70. Ab iis autem qui specialem suscipiunt litterariam et scientificam instructionem, et diligentior cultura religiosa requiritur, sicut et legis moralis ac civilis, adeo ut non excusentur ignorantia, ubi populares viri ea teguntur. Deinde nisi sint in religione satis versati, facile fiunt irreligiosi, et sophismatibus capiuntur quae adversus religionem audiunt seu legunt. Ii praesertim qui ex professo scientiis attendunt per superiorem instructionem, cum assuescant veritati admittendae non ex auctoritate, sed ex ratiocinio, oportet sufficientem

quoque illustrationem habeant et credibilitatis christianae religionis.

71. Ex his apparet ius esse Ecclesiae curandi ut ii qui instructionem supra popularem accipiunt, et relativa superiore religiosa instructione donentur. Quae superior instructio religiosa oportet sit pars obligatoriae scholasticae instructionis, ex rationibus adductis supra, de populari instructione, iisdem iuribus Ecclesiae servatis pro materiaram praescriptione et personarum approbatione aut designatione, prout scholae fuerint privatae aut publicae.

72. Cum autem apud nos obtineat scholas lyceales esse praeparatorias studiis professionum specialium, hinc donec christiano imbuta fuit spiritu legislatio, non modo catechismus diligentius tradebatur in gymnasio, sed et apologia christianae religionis, una cum philosophiae elementis. Per hanc institutionem completur instructio laica religiosa, ideoque videtur nihil amplius praescribendum pro scholis superioribus seu universitariis, dummodo catholico spiritu imbuti essent doctores earumdem, adeo ut scientiam hostilem religioni non traderent; ideoque et falsam.

73. Si non necessarium, expediret tamen quasdam relationes scientiarum sive naturalium sive praesertim moralium (ex. gr. oeconomiae publicae seu socialis) cum religione, item disquisitiones quasdam historico-religiosas, adhuc tradi, cum ob maiora studia et mentis maturitatem, tunc magis hae quaestiones religiosae intelligerentur, imo quaedam tunc tantum.

74. Deinde semper necessarium est scholares superiores frequentare verbum Dei, sicut ceteri, cum eo indigeant si non ad mentis instructionem, tamen ad eius meditationem et pro voluntatis pia motione. Imo cum et verbum Dei utilius suscipiatur si respondeat

speciali culturae et conditioni audientium, cumque scholares sint in speciali conditione mentis et morum, hinc valde expedit ut sibi propriam habeant diebus festivis Ecclesiam. Sicut autem Ecclesia ius habet invigilandi ut quisque fidelis suis satisfaciat religionis officiis eaque praescribendi quae opportuna videantur pro meliori eorundem adipleto, hinc et pro scholis superioribus speciales possent ab Ecclesia emanari dispositiones; Ecclesia enim non modo ius habet docendi fideles, sed et eos educandi ac providendi ut efficaciter satisfaciant suis obligationibus moralibus et religiosis. Haec quidem non attingunt praesens caput, quod de instructione agit, sed ad disciplinam referuntur; verum ob materiae affinitatem, cum de scholis agamus, hic adnotantur.

75. Hae dispositiones scolastico-religiosae non solent habere vim praecepti ecclesiastici simpliciter, adeo ut ex. gr. si alibi missam audiant, non satisfaciant praecepto sanctificationis diei festi, vel peccent non frequentando quam dicimus congregationem universitatis, sed potius vim habent praecepti disciplinaris scholastici, adeo ut removeantur a scholis publicis qui regulis huiusmodi non steterint, vel aliter poenis disciplinariis scholasticis multentur.

76. Hinc Ecclesia ius habet exigendi ab auctoritate civili competente ut relativae normae disciplinares scholasticae efficaces constituentur atque observentur.

Idem servata proportionem dicendum de scholis privatis analogis, ubi huiusmodi institutiones habentur.

§ 3.

De scholis clericalibus, seu de seminariis.

77. Vidimus de iure Ecclesiae in scholis non suis, seu sive a publica potestate sive a privatis constitutis pro laicorum institutione. Videamus modo de iure Ec-

clesiae habendi sibi scholas suas, seu a se institutas et gubernatas tum in ordine disciplinari tum instructionis, praescribendo nempe materias in eis tradendas et methodum litterariam aut scientificam in eis servandam.

Et quoniam hae scholae esse possunt aut pro clericorum institutione aut pro laicis, sit in praesenti de primis.

78. Ecclesia opus habet ministris, qui speciali indigent instructione et educatione. Et quoniam utrumque simul procuratur, hinc de scholis clericorum sub utroque respectu loquamur, ne ob diversum respectum, rem in duplici capite consideremus, eam dividendo cum brevitatis et unitatis detrimento.

Consideremus I. specialitatem instructionis clericalis; haec potest spectari in duobus; 1^o in instructione propria eorundem, seu in theologicis disciplinis; 2^o in ipsa instructione praeparatoria seu communi, idest, ut dicimus, gymnasiali et lyceali.

79. Usque ad nostra fere tempora, in instructione praeparatoria clericorum et laicorum apud nos nulla erat quoad materias earumque proportionem, discrepantia. Etenim clerici indigent linguae latinae cognitione et philosophica copiosa institutione; est enim philosophia quae et habitum severum scientiae tradit et veritates praeliminares revelatae theologiae; insuper indigent cognitione artis oratoriae et linguae maternae, ut in ea praedicare idonee valeant, nec non cognitione communi historiae et quadam institutione scientiarum naturalium; id expedit 1^o ob relationem sacrae theologiae cum ceteris scientiis; quomodo enim difficultates intelligere et solvere poterunt quae ex his scientiis desumuntur, nisi aliqualem earundem cognitionem habeant? 2^o. Idem requiritur ob status clericalis decorem,

ne saltem ignorent quae in conditione culturae nostrae a nemine civili possunt sine ignominia ignorari.

Etsi enim Apostoli profanis studiis, excepto sancto Paulo, non fuerint imbuti, tamen ipsorum factum non est ad exemplum trahendum, supplente in eis divina virtute; e contra Ecclesia etsi principalius fidere debeat divinae gratiae, tamen ex parte sua diligentiam humanam omittere non debet, sed in hoc sicut in reliquis, omnia media naturaliter idonea adhibere ut ministerium sacrum sit utile et honorabile; igitur oportet sacri ministri in nationibus civilibus praediti sint instructione quae ad civilitatis conditionem habetur necessaria.

80. Hoc per se loquendo; etenim si res in eum statum devenerint, quacumque tandem ex causa, ut sufficienti numero huiusmodi ministri haberi non possint, profecto et scientiarum humanarum imperiti poterunt assumi, dummodo de cetero utiles, cum substantia non sit accidentalibus sacrificanda et magis expediat populum christianum pios quamvis idiotas ministros habere quam nullos.

81. Iamvero fere usque ad dimidium saeculi superioris institutio gymnasialis et lycealis a legibus civilibus praescripta in universa Italia satisfaciebat conditionibus enumeratis pro clericis; hinc laicis et clericis eadem institutio respondebat, et simul poterant in scholis institui. Verum nunc et linguae latinae et quod magis est, philosophiae studium in scholis laicis imminutum est, et e contra auctae aliae institutiones in scientiis naturalibus adeo ut potiusquam simplex praeparatio communis videatur tradi proxima praeparatio et introductio ad has scientias. Hinc non satis respondet, ut dicitur, scholasticum programma civile, programmati ecclesiastico.

Igitur supplendum est illius deficientiae vel addendo postea novas scholas, vel lyceales aliter pro clericis ordinando; saltem addendo programmati civili necessarias materias, etsi velint servari omnes ab eodem praescriptae; illud est satis incommodum, cum longius faciat tempus studiorum, quod iam breve dici nequit; hoc magis expedit praesertim respective addendo necessarias pro clericis et auferendo superfluas ob temporis oeconomiam.

Igitur Ecclesia indiget semper et ubique scholis specialibus superioribus seu theologicis pro clericis; et alicubi et scholis secundariis propriis, sub respectu instructionis.

82. Verum II. semper indiget scholis clericalibus propriis etiam secundariis, sub respectu educationis. Si enim necessaria instructio, multo magis educatio clericalis. Iamvero non sufficit educatio christiana quae necessaria est clericis et laicis, sed pro illis specialis educatio requiritur, ut non modo singulari pietate, sed etiam spiritu ecclesiastico imbuti crescant. Haec educatio, quam clericalem dicemus, est a teneris annis procuranda, ut magis in animis vigescat. Imo speciali hac educatione quae pueris datur in seminariis, evolvitur facilius vocatio ad statum clericalem, quae forsitan non haberetur si communi crescerent educatione, etsi christiana. Etenim vocatio alia est extraordinaria, alia ordinaria; illa non constituit legem oeconomiae divinae sed exceptionem; igitur legislatio attendit ordinariam; iamvero haec evolvitur si opportuna media adhibeantur; ad quod maxime iuvat ut excolatur prima aetate, antequam animus distrahatur, si non malis, profanis tamen moribus.

Igitur cum Ecclesiae ius sit procurandi sibi necessaria et utilia, ius est I. habendi sibi suas scholas theo-

logicas et seminaria, ut aiunt, maiora, quod passim concedi solet, etsi non defuerint regalistae qui et programma theologicum praescribere ausi fuerint.

II. Ius Ecclesiae est habendi sibi scholas proprias et secundarias sub respectu educationis, seu habendi seminaria, ut aiunt, minora; idem ius est et sub respectu instructionis, non modo cum programma scholasticum civile non respondet exigentiis instructionis clericalis, sed etiamsi concordaret; etenim semper verum est Ecclesiam ius habere instruendi suos clericos, etsi ab aliis aequae instrui possint; instructio enim Ecclesiae et neminem laedit (hinc ratione conflictus alicuius nequit excludi), et ei inservit; quisque autem potest necessaria sibi, opera sua sibi procurare, si de cetero capax.

83. Posito quod Ecclesia habeat sua seminaria minora, quando non concordat programma scholasticum civile cum ecclesiastico, duplici modo procedere potest: vel addendo sibi necessaria, ceteris conservatis, ex gr. augendo tantum horas pro tradenda lingua latina et philosophia, vel etiam detrahendo aliquam materiam, ex gr. historiam naturalem, aut minorem extensionem ei tribuendo.

Primum hanc habet utilitatem ut clerici valeant examina status sustinere (ex. gr. licentiae lycealis), et sic idonei evadunt ad quaedam officia Ecclesiae utilia, a quibus secus excluderentur, non quaerimus an iuste vel iniuria, ex gr. a consequenda facultate publice docendi, ulteriora examina status postea sustinendo. Habet autem illud incommodum ut materia addiscenda augeatur.

Hoc incommodum vitatur in secunda ratione ordinandi lycea clericalia, sed habetur impossibilitas pro clericis obtinendi diplomata scholastica civilia; insuper si qui clerici interim agnoscant se ad statum clerica-

lem non esse vocatos, et proinde discedant, pares non sunt ad frequentandam eandem classem in lyceis civilibus. Hinc timor et illud efficit ut difficilius adolescentuli quorum vocatio semper est incerta, in seminariis collocentur; hinc quidam vivendo extra seminarium, clerici non fiunt, qui secus optimi fuissent Ecclesiae ministri. Verum Ecclesiae prudentiae est iudicare in concreto quid sibi expediat, pro diversa temporum et locorum conditione.

84. Secunda ex allatis rationibus effecit ut quidam regalistae contenderent ad damnum societatis vitandum seminaria cogi posse ad programma civile servandum.

Sed immerito; etenim Ecclesia ius habet constituendi quod sibi utilius; si autem aliquod damnum exinde sequitur, est tantum per accidens; deinde non est damnum irreparabile, cum extra seminarium possint huiusmodi adolescentes si sufficientis fuerint ingenii, tempore non admodum longo, supplere defectum instructionis habitae; deinde in conflictu inter utilitatem spiritualem et damnum aliquod temporale, illa praevallere debet. Ceterum cum utilissima sit concordia inter res ecclesiasticas et civiles, pertinet ad Ecclesiae prudentiam ut absque necessitate vel evidenti utilitate, discrepantia non habeatur; insuper Ecclesia est valde sollicita ne et indirecte absque necessitate, fideles detrimento exponantur.

85. Quaedam pariter gubernia voluerunt etiam constituere aetatem, citra quam non deberent pueri in seminariis recipi, utpote incapaces iudicandi de propria vocatione.

Verum id iniuria; est enim Ecclesiae iudicare quae aetate utiliter possit tentari vocatio puerorum ad statum ecclesiasticum.

86. Item quoddam gubernium cum vidisset Concilium

Tridentinum statuisset aetatem annorum duodecim pro pueris in seminariis recipiendis, hoc decretum urgere coepit contra episcopos, veluti si recipiendo iuniores offenderent Concilii Tridentini legem. Nisi impius esset, risu esset dignus hic zelus gubernii increduli, praesertim si contra ipsum Summum Pontificem leges tridentinae urgerentur.

Ceterum non advertunt leges Ecclesiae posse modificari iudicio ipsius Ecclesiae, contrariis legibus scriptis vel consuetudinibus, eamdemque esse Ecclesiae hodiernae auctoritatem ac Tridentini Concilii.

87. Quaedam gubernia saltem voluerunt laicis prohibere frequentare scholas clericales, exigendo ut omnes scholares essent tonsurati. Verum si animadvertamus vocationem evolvi ex idonea educatione, evidens est ut plurimum prima aetate eam incertam esse, ideoque tempus aliquod probationis requiri antequam statum clericalem amplectantur, quae probatio nullibi convenientius quam in institutis clericalis instructionis et educationis haberi potest. Igitur laici nequeunt excludi a frequentatione scholarum clericalium absque nocumento ipsius Ecclesiae; ad summum haec ratio non militaret pro iis qui positive quamcumque spem excluderent ecclesiasticae vocationis, quod in iuvenibus vix fieri potest. Sed an et laici huiusmodi, seu laici quatenus laici, valeant excludi a scholis Ecclesiae propriis infra videbimus.

88. Tandem quaedam gubernia exegerunt studia lycealia clericorum complecti debere omnes materias programmatis civilis, permittendo Ecclesiae addere sua studia, sed non detrahere, requisito insuper examine gubernii pro declaranda utili frequentia huiusmodi studiorum. Rationem quam adducunt est sequens: interest reipublicae clericos esse honorabiles et idoneos; atqui

id exigit culturam omnibus civilibus personis communem; secus a personis civilibus parvi haberentur; cultura autem civilis traditur programme civili et eius index est status. Ego clericis quoque absolvendum est civile studiorum programma.

Huic sophismati respondemus: interest reipublicae clericos esse honorabiles et idoneos veluti si directe attenderent bono civili procurando, nego; ob indirectas relationes concedo. Quoad minorem distinguo: in statu normali concedo, semper nego. Et transmissa altera propositione, nempe culturam civilem procurari programme civili (potest enim status aliquando errare et in hoc) negatur consequens quoad clericos, id est quoad eos qui tantum indirecte ministrant bono civili concessa gubernii competentia pro iis qui directe reipublicae ministrant.

Et sane: clerici ministerium certe valde iuvat societatem civilem, quia religionem promovet quae est fundamentum moralitatis et proinde socialitatis, verum directe et immediate religio refertur ad vitam aeternam, et non ad praesentem felicitatem. Hinc clericorum ministerium refertur ad obiectum competentiae civilis tantum indirecte, et e contra directe respicit obiectum competentiae ecclesiasticae. Igitur iudicium de requisitis pro utili clericorum ministerio, ideoque ut sint honorabiles et idonei, spectat ad Ecclesiam, non autem ad statum.

Quoniam autem Ecclesia utitur mediis humanis quantum fieri potest, hinc oportet in suis clericis requiratur condiciones honorabilitatis civilis in quantum fieri potest. Verum efficacia ministerii ecclesiastici praesertim pendet a gratia Dei et mediis supernaturalibus, et Dei adiutorium fit efficacius cum absque culpa Ecclesiae desunt media humana, supplet enim tunc Deus. Hinc

si nequit ministros sibi procurare qui gaudeant omnibus mediis humanis, non ideo debet carere ministris, qui adjuvant populum christianum in divinis. Ceterum si fuerint pietate et sana doctrina imbuti, a populo honorabuntur etsi careant scientiis humanis, dummodo curent singulari pietate supplere defectum mediorum naturalium.

Verum haec quaestio est interna Ecclesiae, et spectat ad iudicium legitimorum Pastorum, qui nempe gradus instructionis humanae requiratur in religionis ministris in statu normali societatis civilis et religiosae, et quando possint et sine ea ordinari ob statum anormalem, curando substantiam in defectu accidentium.

89. Status tantum potest conditionate quaedam exigere in ministris Ecclesiae, cum nempe eis tribuat privilegia non debita; tunc potest praescribere aliquas conditiones et proinde et scholasticas, ut iisdem gaudeant data eis optione. Verum oportet sint privilegia non debita; ex. gr. cum parochos constituit officiales status civilis; sed oportet liberam relinquat actionem ecclesiasticam, ut in citato casu, praescindendo a concordatis, si Ecclesia nominaret parochum qui non satisfaceret conditionibus a lege civili requisitis, utique non esset officialis status civilis, sed tamen deberet gubernium eum adhuc agnoscere ut verum parochum.

Item quoad hygienem et publicam moralitatem (puta si delicta committantur) subiiciuntur et seminaria legi civili, salva immunitate locali et personali, ut infra notatur.

§ 4.

De scholis Ecclesiae propriis pro laicis.

90. Vidimus ius esse Ecclesiae instituendi et habendi sibi scholas proprias, pro clericorum instructione et educatione. Videamus modo an Ecclesiae sit quoque ius

instituendi scholas pro laicis. Et ut quaestionis sensus determinetur, notandum est scholas instituere sumi posse significatione propria vel lata; proprio sensu est determinare materias tradendas, et disciplinam servandam, nec non personas docentium et regentium designare et remove, eosque dirigere et gubernare in sui officii adimplimento.

91. Hoc tamen non excludit interventum distinctae potestatis sive eiusdem sive diversi ordinis, pro negotiis alterius generis; diversi ordinis esset interventus civilis potestatis si scholae instituuntur ab Ecclesia; eiusdem si instituuntur a privatis civibus. Negotia autem diversi generis essent hygienes et publica moralitas; id non offendit scholasticam libertatem et proprietatem, sicut non imminuitur ex eadem causa autonomia familiae et auctoritas paterna.

Etenim semel pro semper adnotamus, curam huiusmodi negotiorum spectare ad civilem potestatem, eiusque leges et ab ecclesiasticis viris servandas esse, salvo privilegio fori, iuxta theoriam generalem quam lib. III de immunitate exposuimus, nempe et clericos subiici vi directivae legum civilium, causa boni publici constitutarum, in iis quae dignitati et officiis sui status non adversantur, prout sunt recensitae materiae.

92. E contra lato sensu scholae propriae habentur, cum propriis impensis instituuntur, sed servatis dispositionibus legum civilium tum quoad materias scholasticas, tum quoad scholasticam disciplinam et qualitates personarum docentium et regentium, ut sunt apud nos scholae privatae sed legibus uniformatae.

93. Iamvero ubi lex civilis concedit civibus huiusmodi scholas instituere, manifesta iniustitia esset, par ius Ecclesiae, seu eius praelatis et adsociationibus, non concedere; esset enim eam in deteriori conditione ac

privatos constituere, et proinde lex odiosa adversus Ecclesiam absque sufficienti motivo.

Item si clerici et ut personae privatae a munere docendi excluderentur.

An autem status debeat privatis tale ius concedere et quomodo videbimus infra; hic tantum ex hypothesi agimus, idest huiusmodi ius et Ecclesiae agnoscendum esse, si privatis concedatur; rationes autem quas pro privatis afferemus, multo magis militant pro Ecclesia ut infra videbimus.

94. Igitur quaerimus an Ecclesiae sit ius instituendi scholas proprias, primo sensu explicato, pro laicis.

Rursus haec quaestio potest multiplicem habere intellectum: 1° an hoc ius sit exclusive Ecclesiae proprium, sicut ius instituendi in christiana religione; 2° et quatenus negative, an Ecclesiae competat cumulative cum aliis; et quoniam considerari potest titulus communis vel specialis et societatis status normalis vel anormalis, hinc quaestio subdividi potest ulterius et quaeri 3° an in statu societatis normali ius constituendi scholas, Ecclesiae competat eodem titulo ac ceteris; vel 4° an habeat titulum specialem, adeo ut hoc sit ius eius proprium, quamvis non exclusivum et etiam minus proprium ac societatis civilis, et 5° an hoc ius competat ex specialiori titulo in statu societatis anormali, et proinde per accidens; quod rursus esse potest vel ex deordinatione societatis civilis, vel ex non ordinatione eiusdem, seu in hoc postremo 6° casu devolutive; deinde 7° hae quaestiones vel in genere de qualibet schola possunt institui, vel 8° speciatim, presertim de scholis popularibus, et 9° tandem quaeri potest de effectibus iuridicis huiusmodi scholarum.

QUAESTIO PRIMA.

AN ECCLESIAE SIT IUS EXCLUSIVUM INSTITUENDI SCHOLAS
PRO LAICIS.

95. Hanc quaestionem breviter absolvimus respondendo negative. Etenim Ecclesiae ius est exclusivum in iis quae per se primario et directe referuntur ad vitam aeternam; constituunt enim ordinem supernaturalem et ad supernaturalem finem sunt natura sua ordinata; huiusmodi est revelata doctrina, sacramenta, etc. Atqui scholae non sunt huiusmodi. Etsi enim, ut supra vidimus, i. scholis instructio non sit ab educatione disiungenda, et educationem oporteat esse religiosam et non tantum civilem ac moralem, tamen scholae scopus non est exclusive aut saltem praecipue religiosus, adeo ut Ecclesiae sit subiicienda saltem ex praecipuitate finis. Est enim finis scholae aut tantum instruere mentem in scientiis et humanis disciplinis, ut in scholis mediis et superioribus, vel educare curando integram personam, idest et cognitiones communes omnibus necessarias in ordine civili, ethico et religioso tradere, et simul voluntatem ad bonum civile morale et religiosum flectere. Igitur institutio religiosa vel nullo modo vel minus principali (non quidem per se, sed ut obiectum scholae) attingitur, idest ut pars aliquius totalitatis.

Hinc et patribusfamilias facultatem suos docendi et statui civili scholas instituendi nemo unquam denegavit.

Igitur transeamus ad aliam quaestionem, an nempe Ecclesiae sit saltem ius scholas instituendi pro laicis, etsi non exclusivum, ideoque cumulativum cum aliis, primo ex titulo communi, considerantes primo socie-

tatem in statu normali, deinde in anormali, et prae-
scindendo ab effectibus civilibus de quibus postea.

96. Iamvero ut propositam quaestionem resolvamus
quae considerat titulum communem instituendi scho-
las, est evolvenda alia quaestio generalis, cui nempe
sit ius scholas instituendi, seu attingenda est quaestio
quam dicunt « *libertatis instructionis* », quae differt
a libertate *professionum*, de qua aliquid infra agentes
de *effectibus civilibus* scholarum privatarum.

QUAESTIO SECUNDA

DE LIBERTATE INSTRUCTIONIS.

97. Recenseamus in primis opiniones hac de re et
statum quaestionis rite determinemus. Quaeritur an
cuilibet qui putat sibi vires sufficientes esse, ius sit
scholas instituendi, quin speciali indigeat auctorizatione
civilis potestatis, vel an ea necessaria sit. Et quoniam
quaestio adhuc multiplicem potest habere sensum, ani-
madvertimus 1^o quaestionem non posse institui de iure
repressivo (salva, ut supra, immunitate ecclesiastica si
ei locus sit) cum schola crimini, aut fraudi cuicum-
que locum dat, idest quaestionem institui non posse
de iure puniendi eorundem criminum auctores et in
poenam interdicens quoque ulterius magisterium, cum
ex abusu praecedenti, merito suspicionem legalem con-
tra se causaverint et suum magisterium periculosum
societati reddiderint. Etenim crimina compescere, eo-
rumque auctores inhabiles reddere ad quaedam quae
ceteris licent, proprium est auctoritatis civilis ex cri-
teriis generalibus de eiusdem natura et competentia.

98. Item 2^o et ius praeventivum speciale nequit ei
denegari, ex iis quae generatim de eodem iure publi-
cae potestati competenti, disputavimus, cum omnino
indicia specialia abusus et periculi habentur, ex. gr. si

de viro ageretur qui dementiae argumenta dedit ut indicia probabilia proximi delicti.

99. Sed quaeritur de praecedenti auctorizatione, quae rursus duplici modo concipi potest, vel ut mera recognitio idoneitatis, seu ut mera praeventio, vel ut vera auctorizatio, tanquam muneris publici collatio, loco publicae potestatis exercendi. In 1^o casu, potestas civilis tantummodo determinat, iuxta communiter contingentia, quae sint necessaria ut quis laudabiliter doceat, et eis verificatis declarat Caium docere posse; in 2^o non omnibus idoneis sed tantum aliquibus pro necessitate sociali ius docendi tribuit, sicut non omnes idoneos praefectos facit, sed tantum aliquos. Etiam in primo casu limites possunt esse ampliores vel non. Igitur quaeritur 3^o an ex periculo generali aliquem vel dolo decepturum, vel ex ignorantia non bene susceptis muneribus satisfactorum, possit per modum regulae exigi ut quiquis scholas velit instituere, praecedens subeat examen requisitorum sive moralium sive scholasticorum, quam praeventionem generalem dicimus politiae pro moribus, scholasticam pro doctrina; vel etiam an aliquibus tantum ex idoneis sit concedenda docendi facultas, vel potius tantum repressioni locus sit et praeventioni speciali, de qua diximus numero praecedenti. Iamvero pro temporum diversitate habitae sunt et inter cordatos viros, diversae de hac re opiniones. Antiquis enim temporibus, cum gubernia obtinebant quae legitima dicebantur, seu ut dicitur antiquo iuri innixa, quaeque in publica legislatione professionem faciebant principiorum christianorum, auctores orthodoxi plures contendebant hanc saltem generalem praeventionem esse necessariam, ne in re tanti momenti, malitia aut ignorantia societas deciperetur, loquendo de scholis quae a privatis instituuntur analogice ad scholas pu-

blicas, idest quoslibet volentes et solventes admittendo, et praescindendo a scholis vere paternis ac domesticis, quae omnino sunt sub patrisfamilias responsabilitate.

100. Praeter hanc primam rationem periculi praecavendi in re gravissima addebant nonnulli et aliam, idest munus docendi quod quis suscipit, respicere ad ipsam societatem; exhibet enim operam suam cuilibet volenti et ea curat quibus indiget ipsa societas. Iamvero societas ius habet non permittendi cuilibet indiscriminatim exercitium professionis quae plurimum influit in statum publicum socialem, sed exigendi cautiones quasdam.

101. Hanc rationem magis inculcantes sectatores rigidioris sententiae, aiebant societatem imbuere doctrina esse munus publicae potestatis; etenim societatem educat et informat his vel illis principiis. Iamvero societatem curare spectat ad publicam potestatem. Ergo concludebant,

4^o neque omnibus idoneis esse facultatem docendi concedendam, sed tantum iis quos voluerit publica potestas, quae iure suo utitur vel scholas tantum publicas instituendi, quas omnes frequentent qui indigent instructione, vel in levamen praesertim publici aerarii, sibi benevisis concedendo ex idoneis magisterium.

102. In hanc sententiam socialistae convenire solent, qui more spartano et pagano, individuum eiusque libertatem immolant deo statui, et filios non parentum, et multo minus Ecclesiae, sed status proprios esse docent; idest exaggerant publica iura et bona in detrimentum privatorum, et quoddam bonum publicum sibi fingunt quod non redundat in privatorum bonum neque ad illud ordinatur.

Hos omnes excessivos fautores vocabimus publicae auctoritatis, seu legis.

103. E contra sunt alii fautores libertatis, quorum I. quidam negant statui quodlibet ius circa scholas privatorum, excepto iure repressivo et praeventivo speciali, quae proprie non sunt iura scholastica, sed criminalia, cum respiciant crimen vel proximum eius periculum. Aiunt enim: sicut status neque in reliquis privatorum actibus sese ingerit, sed permittit unumquemque libere uti suis viribus donec alios non offendat, ita et in docendo; et sicut permittit ex propria imperitia aliquos decipi et in aliis negotiis quin eos praeventivae subiiciat auctorizationi, ita et in hac re; videant igitur patresfamilias quibus suos filios instituendos committant. Imo et libertatis in genere hic panegyricum cantant. Aiunt enim in hac hypothesis patresfamilias cum sciant sibi consulendum esse, diligentiores futuros in magistris deligendis atque invigilandis; hos pariter magis sollicitos in fiducia sociali sibi promerenda; ab initio quidem concessae libertatis, omnes omnia sibi usurpare et ineptos vel perversos nobilissimam docendi artem suscipere; sed paullatim hos detegi et derelinqui, ita ut tantum idonei maneant, ideoque sponte obtineri et uberius eam magistrorum selectam classem quam leges exosae et libertatis limitativae peius curassent, diplomatibus accademicis semel obtentis, inertiam fovendo.

104. II. Alii e contra libertatis fautores, concedunt generalem quamdam praeventionem posse, si in concreto expediens fuerit, a statu praescribi, et tantum extremam sententiam excludunt, nempe per modum regulae etiam idoneis posse facultatem docendi denegari.

Dicimus per modum regulae. Etenim III. quidam et ex fautoribus libertatis non denegant, posse societatem in eum statum perversitatis, aut periculi devenire,

ut salus publica exigat extraordinaria remedia, inter quae et interdictionem docendi quasdam materias privatis, etsi specialis praeventio contra eos haberi non possit, sed tantum quia gubernio positive non constat eos ordini sociali bene affectos esse, vel quia non satis scholares eorundem posset invigilare, ideoque in discipulis esse posset periculum quod deest in magistris.

Et quoniam in concreto applicationes harum exceptionum pendent ab aestimatione eorum qui praesunt, pro temporum diversitate, hinc aliquando fautores huius tertiae sententiae inter libertatis defensores, videri possunt concordantes cum fautoribus extremae sententiae ex defensoribus legis.

105. Iamvero cum superioribus temporibus obtinerent gubernia quae dicebantur legitima et conservantia (etsi facta non semper nominibus responderent), cumque novitatum amatores impedimentum in publicis legibus ac in magistratuum vigilantia invenirent, mirum non est si cordati viri favebant auctoritati seu vi legis, etsi quidam aliquando visi sint plus aequo eidem favere; et e contra si eam acerrime impugnabant alii; qui quidem non mentem suam proponebant seu finem ad quem pervenire cupiebant, sed sub specie iuris communis vindicandi, libertatis singulis debitae ac scientiarum profectus, mutationem regiminis publici promovebant. Mutatis autem temporibus, cum publica potestas in eorum manibus devenisset qui iuri, ut dicunt, moderno innituntur, et principia proponunt non christiana sive circa titulos principatus adipiscendi, sive circa modum societatem regendi, tunc 1^o visi sunt plures ex his denegasse sua antiqua principia inviolabilis libertatis docendi, patrumfamilias, et prosperitatis scientiarum, ut contraria auctoritativa principia adoptarent. Cum autem de contradictione accusarentur, plures ut

se defenderent, aiebant aliud esse ius in statu societatis normali, aliud in anormali, concedentes in tertiam sententiam fautorum libertatis et asserentes in statu normali ius esse cuilibet docendi, in anormali necessariam esse specialem praeventionem aut etiam proprie dictam auctorizationem. Iamvero societatem nunc esse in statu anormali, ac proinde donec nova principia non fuerint universim adoptata adeo ut societatem possideant, specialibus exceptionibus opus esse. Qua tamen responsione falsitatem ostendebant principii ab initio invocati absolutae libertatis, cum ex eodem principio status anormalis potuisset defendi et antiqua limitativa legislatio guberniorum legitimorum.

106. Sed cum hic status anormalis et provisorius nimis perduraret, hinc quidam coriphaeus celebre sibi applicavit effatum, idest aliud esse theoricam et aliud praxim, non advertendo id importare aut falsitatem theorices aut delictum in praxi. Falsa est enim theoricæ socialis quæ societati nequit applicari absque eius destructione; ostendit enim saltem inniti conceptui incompleto humanæ naturæ ideoque falso si ut ei respondens consideretur. Vel si theoricæ est recta et completa, praxis ei repugnans in materia iuridica est delictum.

107. Sed 2^o et quidam ex orthodoxis visi sunt mutasse doctrinam, cumque antiquitus legi faverent, postea inter libertatis fautores acerrimos militaverunt, adeo ut catholicis obiectum sit eos libertatem impugnare cum imperant, defendere cum serviunt. Verum immerito si de catholicis in genere sermo sit, non autem de uno vel altero aut paucis; neque enim et inter optimæ intentionis auctores aliquando desunt qui zelo abrepti, exaggeratam aliquam doctrinam propugnent; in quibus potius mens laudanda est et termi-

nus ad quem aspirant, quam arma quibus militant. Nobis autem curandum ne peccemus sive in fine sive in mediis.

108. Ut autem ostendamus catholicos sibi non contradicere, duo notanda sunt:

1.^o Etsi ius semper sibi constet, tamen pro diversa materia applicationes seu verificationes iuris variare possunt.

2.^o Aliud esse loqui de iure in se, iuxta obiectivam rei veritatem et aliud ex hypothesi, seu ad hominem arguendo; quae duo si attendantur patebit diversam agendi catholicorum rationem, non veram sed mere apparentem contradictionem praeseferre.

Et sane quoad I^{um}, ius sociale tandem refertur ad ipsius societatis salutem, iuxta veram praesentis felicitatis ideam quae ex recto hominis conceptu derivat, ideoque terminus ultimus semper idem est et constans. Verum conditio socialis alia est normalis, alia anormalis; etsi autem quaedam semper sint constantia ob identitatem humanae naturae, ideoque semper iure sint praestanda, quaedam tamen mutabilia sunt ex variabilitate conditionum in quibus societas versatur. Videntum est igitur an qui diversas leges utpote iuri conformes invocant, innitantur verae diversitati conditionis socialis vel non. Iamvero cum auctoritas socialis profitetur vera seu christiana principia circa naturam societatis ideoque eius actio imbuatur spiritu christiano, legis protectio et ingerentia est per se tutoria et salutaris; ideoque mirum non est si abunde invocetur; utilitas enim quae ex ea derivat est securitas socialis; damnum autem quod ex ea provenire potest est tantum retardatio activitatis privatae eiusque limitatio, quae legitima esse potest ad praecavendum periculum publicae perturbationis.

E contra cum auctoritas socialis in sua agendi ratione non informatur veris seu christianis principiis, eius interventus est aut noxius aut saltem inutiliter onerosus, cum limitet privatam activitatem absque respondententi compensatione. Igitur mirum non est si catholici, prout qui solliciti sunt veri ordinis et boni socialis, considerent interventum publicum utpote noxium et illegitimum, non quidem quia publicus est, sed quia spiritu imbuatur non christiano. Respiciunt igitur semper ad bonum publicum, eiusque sollicitudine ducuntur, sed ex diversa conditione societatis, diversa petunt atque defendunt.

109. Id tantum indicat, catholicos quaedam agnoscere principia absoluti valoris, cui sese accommodare tenentur homines in negotiis privatis et publicis, adeo ut non sit iustum quidquid hominibus placuerit et formis socialibus constituerint, sed quod constituitur conformiter his principiis.

Ex catholicis autem attendentibus in concreto verae utilitati, non semper omnes ut rationem reddant eorum quae nunc utilia vident, assurgunt ad recta principia, cum hoc difficilioris investigationis opus sit, sed aliqui exaggerata principia praesentibus indigentibus statim accommodant. Qui defectus reflexionis in fautoribus et auctoritatis et libertatis aequè habetur, ut ad inconveniens momentaneum vitandum, recurratur ad contrarium principium universale falsum. Sed id imperitiam in advocatis non falsitatem causae ostendit. Ceterum catholici suum locum dant et auctoritati et libertati, ut ex infra dicendis. E contra exaggerati libertatis fautores, eam invocant ut ius absolutum, ideoque numquam possent sibi cohaerenter eius limitationem proponere, vel per hoc iam ostenderent falsitatem sui principii absolutae libertatis.

110. II. Diximus aliquando catholicos arguere ad hominem, idest ex principiis adversariorum. Posito enim in iure publico alicuius nationis quaedam sint admissa principia libertati etiam plus aequo faventia, ita ut societas de facto iisdem innitatur, profecto licet eadem et in sui favorem invocare si ad rectum finem invocentur. Etenim non agitur de re per se mala et inhonesta, sed de institutione quae per se est deficiens; ideoque non de malo positive extante, sed de defectu boni alicuius agitur. Si igitur libertas haec, quamvis per se et in abstracto defectiva, in concreto utilior sit ac tutoria potestas publica, legitime invocatur, nec huius iuribus contradicatur, utpote quae ex pacto expresso, ulteriori iure caret. Sicut enim si homines, determinati territorii concorditer extra societatem viverent male utique agerent utpote contra naturae intentionem, tamen a nemine privato cogi possent ad publicam societatem ineundam, ita et posita societatis institutione sed cum expressis limitibus datis publicae auctoritati, quamvis nimis coarctatae, non posset haec contra pactum plus iuris sibi arrogare. Etsi enim instituta societate et publica constituta auctoritate, praesumatur eidem collata in concreto universa potestas quam natura confert ipsi societati, tamen si expresse contrarium fuerit constitutum, praesumptio cedit veritati. Etenim societas actuatur facto humano, ideoque ut ius in concreto exurgat publicae potestatis, respondentia facta requiruntur, quae si deficient, deficit ius ipsum.

111. Sed iam videamus quid iuxta obiectivam rei veritatem dicendum sit de iure privatorum constituendi scholas, et de respectivo iure gubernii super easdem.

Recolamus ex principiis lib. I. partis primae generalis, c. 3. a. 2. expositis, originem et scopum socie-

tatis civilis, ex quibus eius ius dimetiendum est. Vidimus eam a natura dirigi ad supplendam insufficientiam familiarum pro bono totius hominis temporali obtinendo, conformiter bono aeterno eiusdem, et ad relationes reciprocas familiarum iuridice ordinandas. Prima pars significat eam supplere insufficientiam sive singularum familiarum seu hominum sui iuris, sive plurium amicali tantum societate coniunctorum, vel iuridica sed imperfecta (idest sine iure independenti iudicandi pacta eaque urgendi); secunda pars indicat determinationem eius quod iustitia inter homines importat, respondens iudicium et executionem.

112. Ex his deducitur competentia societatis civilis. Ei exclusive competit iuridica moderatio relationum reciprocarum inter familias, aut inter homines quatenus homines sunt (seu quatenus praescindunt a subiectione familiari). Igitur iudices constituere, sententias proferre, milites armare et alia huiusmodi quae ad iuridicas relationes reciprocas determinandas, servandas, coactive restituendas spectant, exclusive pertinent ad publicam potestatem. Sed habet et alium scopum, qui est supplere privatorum insufficientiae in eis procurandis quae evolutioni perfectae humanae naturae necessaria sunt. Igitur scopus societatis non est ipsam praestare debere per se quidquid refertur ad mutuum adiutorium hominum, sed supplere ei quod singuli nequeunt aut nolunt, et ex secunda parte eius finis, ordinare voluntarias ipsorum actiones, ne loco sese adiuvandi, perturbent; invigilet igitur, corrigat, adiuvet, reprimat.

113. Iamvero scholarum institutio non pertinet ad primum caput, idest ad relationes iuridicas ordinandas sociorum, sed ad alterum, idest ad evolutionem perfectionis humanae. Ergo licet privatis ea omnia prae-

stare ad quae vires sufficiant, sive singulatim, sive spontanea adsociatione; tantummodo remanet publicae potestati ius, 1^o invigilandi ne adiuvare volentes evolutionem humanae perfectionis, perturbent relationes iuridicas; 2^o puniendi et reprimendi posita perturbatione aut proximo eius periculo; et 3^o ius et officium, si privati nolint aut non possint, instituendi pro facultate concreta societatis, ea omnia quae ad eius perfectionem gradualem opportuna sunt.

Ergo, scholas instituit status cum deficiunt vel ex toto vel ex parte scholae privatorum (et ex parte semper deficient, cum pro pauperibus vix possibile sit adsint universim charitate privatorum constitutae); deinde invigilabit ne in scholis privatorum perturbentur relationes iuridicae, et si id fiat, reprimet.

114. Ex quo iam patet falsitas sententiae extremae fautorum legis, nempe ius docendi esse munus publicum sicut illud iudicium quos status constituit quot et quos voluerit.

Est igitur ius privatorum quod a statu nequit violari, sed tantum moderari aut extraordinario, salute publica exigente, limitari vel suspendi.

Item apparet in hac re quantitas actionis status, sicut et in ceteris quae ad primum eius scopum referuntur; in societate imperfecta imperfectione facti, actio gubernii in iis quae ad evolutionem publicae prosperitatis pertinent, est maxima, cum privati parum aut nihil extra muros domesticos praestant; e contra cum civilitas valde evoluta est, multa praestant privati, et tunc gubernium retrahit actionem suam directam, et tantum invigilat, aut etiam ex publico aerario iuvat ipsos privatos, quod solet magis oeconomicum esse quam directa provisio eorum quae promovent publicam utilitatem.

115. Posito igitur privatis de cetero idoneis competere ius docendi, sive singulatim, sive adsociati sint, et gubernio competere ius repressivum et etiam praevenitivum speciale, quaeritur an statui sit concedendum et ius praeventionis generalis, ut defendunt fautores moderatae sententiae tum defensorum legis tum libertatis. Et respondendum est posse statum normas quasdam praevenitivas quibus idoneitas docentium verificetur constituere pro iis qui modo publico docent. Dicimus quidem posse, non autem dicimus semper debere. Illud posse probamus ex iure status normas quasdam generales praevenitivas constituendi in iis quae sunt maioris momenti, cum id valde expediat bono publico et aliunde non multum gravet privatos, si res intra limites a nobis constitutos retineatur, idest simpliciter idoneitatem verificari non autem extraordinariam et saepe inutilem peritiam. Hinc videmus et in aliis pluribus has normas praevenitivas constitutas esse et facto universali comprobatas, ut circa emptiones et venditiones et alia negotia privata (ex. gr. de iustis mensuris, ponderibus, etc.). In re autem nostra praeventio quaedam publica ac directio poterit bonum societatis procurare non modo avertendo damna quae ab imperitis afferri possunt, sed etiam efficacius in societate fovendo studia, et sic bonum commune magis promovendo. Igitur falsum est assertum fautorum effrenae libertatis, in negotiis privatorum nullam unquam cautelam praevenitivam generalem adoptari posse.

116. Igitur ex prima ratione adducta a fautoribus mediae huius sententiae, dicimus statum id posse, sed non semper debere: si enim attenta conditione sociali, haec pericula sint remotissima aut rarissima, non erunt subditi gravandi inutilibus praecautioibus.

Poterit autem expedire duplici ex capite:

1° Ut magis solliciti sint docentes in idoneitate sibi procuranda.

2° Ut magis sint tuti ipsi privati, qui non semper in deligendis magistris, praesertim in pagis, solliciti sunt ut debent, neque aliquando possunt; (quod et in pagorum municipiis verificatur ut potius oeconomiae quam idoneitatis sint solliciti). Hinc panegyricum libertatis quod eius fautores recitant non semper in concreto verum est.

117. Relate autem ad aliam rationem, nempe magistri privati officium referri ad bonum publicum, id non probat magistros privatos sese substituere actioni gubernii, ideoque indigere positiva eiusdem approbatione, ut volebat extrema sententia; etenim sese non substituunt, sed ex dictis, praeveniunt iure suo actionem gubernii; tamen influunt in bonum publicum, et a statu invigilari possunt ne perturbent relationes iuridicas, idest ne malitia aut ignorantia noceant; id est ob negativam relationem quam habent ad publicum bonum, non autem ob positivam, quatenus illud promoveant; tamen cum ignorantia noceant, et idoneitate promoveant, lines inter utrumque respectum non sunt in concreto valde remoti.

118. Relate autem ad sententiam eorum qui et specialem auctorizationem aliquando praescribi posse putant, ita ut et de cetero idonei possint reiici si societati eos docere non expediat, id quidem in abstracto videtur concedendum cum salus publica sit suprema lex in iis iuribus quae alienabilia sunt; sed an in concreto verificari possit non videmus; etenim ex iure praeventivo praescribi possunt omnes conditiones quae in concreto necessariae sunt, ne res publica detrimentum capiat; et cum verificantur omnes conditiones ido-

neitatis moralis et scholasticae, impossibile est reipublicae imminere aliquod periculum.

Ceterum casus esset omnino exceptionalis.

119. Igitur mediam sententiam secuti sumus, quae ex directis principiis de natura societatis descendit, et salvat libertatem, simulque publicam tranquillitatem, cum et gubernio sua sint tecta iura, ideoque veris conditionibus socialibus satisfacit. Etenim quidam considerantes limitationem quam leges apponunt libertati et aliquando legislatorum aut regentium imperitiam, plus aequo libertati privatorum favent, simpliciter eam asserentes et ab omni praeventiva norma solventes. Alii e contra considerantes effrenae libertatis pericula, quibus sero medicina paratur, nimis libertatem ligant; ideoque ex eodem publici boni amore habentur *conservatores* et *progressistae*. Sed utrumque systema falsum est si absolute sumatur.

Primi enim supponunt societatem iam adeptam esse perfectionem ultra quam nihil supersit, vel saltem periculum peioris status ex mutatione esse tale ut excludat rationabilitatem tentaminum.

Secundi e contra facile volunt omnia immutare, supponentes nihil boni existere.

Veritas autem media est, utrumque concilians, idest et bona praesentia plura esse eaque conservanda; et mala quaedam esse seu imperfectiones, quae sunt auferendae, ita tamen ut ad melius adspirando, periculo non exponamus bona certa quibus gaudemus. Igitur cum criterio procedendum est ad nova, vetera bona servando.

120. Quaeri etiam posset an auctoritas civilis valeat aliquem gradum instructionis litterariae lege praescribere omnibus pueris, ideoque parentes obligare ad eam procurandam suis filiis. Dicimus lege et proinde omni-

bus; minus enim difficilis est quaestio si de aliquo individuo specialibus in adiunctis versanti agatur. Etenim pater debet filiis educationem respondentem conditioni sociali familiae ut iidem congruenter valeant sibi consulere. Quid igitur si pater superioris conditionis filios analphabetos relinqueret? Profecto esset evidenter et inexcusabiliter negligens in munere suo praestando cum gravi filiorum damno; ideoque servatis servandis, puta ad instantiam *consilii familiae*, a iudice compelli posset ut officio suo satisfaceret.

121. Verum et conditio generalis societatis alicuius, talis evadere potest ut generatim per modum regulae, aliquis elementaris gradus instructionis sit omnibus filiis debitus, qui secus notabile damnum per totum suae vitae spatium persentirent. Ideoque peccarent contra suum officium, parentes qui cum possent, negligerent talem instructionem natis suis procurare. Imo et reipublicae interesse potest cives huiusmodi instructione pollere, tum ut praestent viribus, tum ut iura politica exercere valeant; ad id enim in praesenti rerum conditione, necessarium saltem est sciant legere.

122. Ex his certe fluit, auctoritatem civilem posse instructionem popularem fovere ad eamque filiis procurandam, diversis modis parentes allicere.

Si autem obligatoria redderetur, 1^o oporteret semper locum dare rationabilibus exceptionibus; qui enim paupertate impediuntur aut locorum distantia vel aliis iustis causis excusantur, neque indirecte cogendi sunt, aut durius tractandi. 2^o Cum impossibile sit maior pars patrum instruat in litteris filios suos per se, nec scholae privatae gratuita et idoneae semper praesto sint, necessario uti deberent scholis publicis. Oportet ergo tales scholae ita sint ordinatae, ut a catholicis frequentari valeant servatis omnibus quae Ecclesia exigit. Quae si

status non valeat praestare, debet omnino abstinere ab exigenda quavis litteraria instructione. Et id maxime refertur ad ius ecclesiasticum. 3^o Sanctiones quibus muniret status suas leges scholasticas, sicut in ceteris legibus, oportet non excedant rei gravitatem, neque comparate maiora inducant damna quam utilitates, et sicut in ceteris accommodari deberent moribus, indoli et evolutioni populorum. 4^o Potest negotium evadere magis implexum si quaestiones nationalitatis attingat. Ubi enim populus non est eiusdem labii, si praescriberetur popularis instructio, non essent offendenda iura nationalitatum. Res facilius est cum immigrantibus, si nempe ea conditione suscipiantur ut filios suos addiscere faciant linguam novae patriae.

123. Ex dictis apparet per se loquendo scholarum institutionem non esse exclusive attributionem status civilis, sed eam cuilibet facultatem habenti licere, etsi sub vigilantia status eiusdem ut reprimat abusus et eos proxime probabiles praeveniat, vel etiam normas quasdam generalis praeventionis constituat, ex quibus idoneitas docentium resultet.

Posito autem quod lex civilis iuste praescriberet et quemdam gradum instructionis elementaris, eius ius ad id quoque extenderetur, ut nempe verificaret an relativae leges observarentur.

Id vero non laedit libertatem docendi omnibus valentibus recognitam, sed ad summum respiceret rectam executionem muneris assumpti, et non tam docentes quam discentes attingit.

Ex his prona est responsio ad propositam quaestionem, idest titulo omnibus communi, posse Ecclesiam scholas instituere, si id suo fini respondere iudicaverit, de quo inferius agemus.

124. Quo posito illud subiungimus scholas ab Ecclesia

pro laicis institutas maiorem fiduciam non modo populi sed etiam civilis auctoritatis mereri; etenim sanctitas ipsa Ecclesiae pignus dat absentiae periculi quod noceant sive ignorantia sive praesertim ex malitia; et si quod sit inconveniens in inferioribus ministris, certe corrigetur a superioribus.

Cum autem ius competens auctoritati civili praeventionis generalis, innitatur in periculi alicuius morali possibilitate cum haec possibilitas moralis nulla sit vel minima in scholis ab Ecclesia institutis, hinc et minus rationabilis fit ipsa praeventio. Et proinde usque ad nostra tempora vidimus apud Gallos, litteras superioris religiosi, quas obedientiae vocant, pro monialibus et religiosis, aequiparatas fuisse diplomati idoneitatis civilis.

Et huiusmodi exceptio in ipsorum favorem non erat odiosa, etsi eadem regula non fuisset pro privatis civibus; etenim hi etsi optimi, proprium tantum testimonium habent. E contra personae destinatae a legitimis Ecclesiae praelatis, habent pro se praesumptionem idoneitatis, quae inutiles et proinde irrationabiles reddit praeventionis generalis normas. In mentem enim revocetur hic a nobis non agi de effectibus civilibus scholarum privatarum; sed tantum de praeventiva norma publicae honestatis, quae praeventio nequit adhiberi nisi extante antecedente aliqua morali possibilitate damni socialis; secus nimis opprimeretur humana activitas et libertas.

125. Item hic praescindimus a perfecta immunitate a lege civili, quae institutionibus ecclesiasticis competere possit ex lege positiva Ecclesiae, sed rem tantum iure naturae inspicimus.

Cum autem schola pro laicis per se dirigatur ad bonum praesens, hinc attenta natura et fine, respicit materiam quae est competentiae civilis, quoad vigilantiam, ideoque eius correctioni vel praeventioni locus

est, prout necesse fuerit. Diximus autem regulariter loquendo in scholis ab Ecclesia institutis praeventionem generalem non esse necessariam.

126. Verum ut Ecclesia uti possit iure communi, necesse est obiectum de quo agitur aliquo modo referatur ad eius finem. Non enim agimus de viris ecclesiasticis, qui agere possunt et ut ecclesiastici et ut cives sicut ceteri privati, ideoque nisi lex ecclesiastica specialis obstet (vel civilis concordata, ideoque etiam ecclesiastica), possunt uti iure communi sicut ceteri, et societates atque industrias cuiusvis generis instituere ac negotia quaelibet pertractare; sed agimus de ipsa Ecclesia vel eius subdivisionibus, seu de praelatis Ecclesiae ut tales sunt, aut de ordinibus vel congregationibus aut aliis canonicis adassociationibus religiosis. Iamvero ut Ecclesia quatenus talis, aliquid instituat vel pertractet, oportet aliquo modo referatur ad eius finem, secus ab ipso deflecteret neque ceteri neque societas civilis tenerentur eius institutionem agnoscere ut factam ab Ecclesia quatenus talis, etsi teneri possent ad eam agnoscendam ut derivantem a iure individuorum qui Ecclesiam componunt.

127. Iamvero in concreto nulla est institutio quae ad Ecclesiam aliquo modo non referatur; vel enim refertur ad bonum spirituale, vel ad temporale; si 1^{um}, patet ad Ecclesiam spectare; si 2^{um}, vel est bonum temporale aliorum et est charitas et proinde aeque refertur ad finem Ecclesiae, vel est bonum temporale Ecclesiae ipsius et est utilitas temporalis eiusdem, ad quam ius habet, cum ius habeat ad bona temporalia sibi procuranda. Etsi autem non omnia media ad hoc ei expediant, ex. gr. negotiatio, tamen ipsa de hoc videbit, sed si velit, ius eius agnoscendum est.

Iamvero scholae et promovent saltem secundo bo-

num spirituale, et primario bonum temporale, et proinde ad Ecclesiae finem referuntur, ideoque recte pro eis utitur iure communi. Quod melius patebit ex sequenti quaestione ad quam transeundum est, inquirendo nempe an scholarum institutio, titulo speciali, Ecclesiae liceat, quod idem est ac inquirere an relatio quam scholae habent ad Ecclesiae finem sit non modo aliqualis, adeo ut ei liceat eisdem attendere, sed valde proxima, adeo ut ei expediat, et ei plusquam ceteris ius sit, cum promoveant illa bona ad quae Ecclesia specialem habet destinationem. Igitur sit

QUAESTIO TERTIA.

DE TITULO SPECIALI ECCLESIAE COMPETENTE,
ETIAM IN STATU SOCIETATIS NORMALI, SCHOLAS PRO
LAICIS INSTITUENDI.

128. Diximus scholas et promovere secundario bonum spirituale, et primario bonum temporale discentium, et societatis christianae, ideoque obiectum esse Ecclesiae conveniens saltem sub respectu communi charitatis. Maxime autem Ecclesiae conveniens est et promovere quae ad charitatem proximi in ordine temporali referuntur. Sed influxus scholarum in bonum spirituale, mediocris non est; ideoque in eis Ecclesia non qualem-cunque habet utilitatem spiritualem, sed magnam; ideoque non solum scholae constituunt medium quo Ecclesia uti potest, sed quod specialem eius meretur sollicitudinem.

129. Quod ut melius appareat discurremus per praecipuas scholarum classes, considerantes ut supra 1. scholas populares seu elementares; 2. medias; 3. superiores.

Et I. quoad scholas populares, ipsarum scopus est prae-

cipue educativus, et ipsae cognitiones quibus mens imbuitur, ad scopum educativum diriguntur. Ex hoc supra deduximus non modo necessitatem instructionis religiosae, sed etiam quod omnia tradenda sint spiritu positive christiano, idest non modo vitando contraria sed suggerendo opportuna et eis animum informando, ex quo deduximus Ecclesiae competere ius vigilantiae in scholas omnes. Iamvero id satis proximam et positivam relationem habet ad bonum spirituale, quod abundantius et tutius curabitur in scholis ab ipsa Ecclesia directis, quam in scholis tantum ab ea invigilatis.

II. Quoad scholas medias seu secundarias, etsi in his potiore partem habeat mentis instructio, tamen et educatio suam sibi vindicat; alia est enim educatio necessaria viris popularibus et alia viris civilibus; oportet enim crescente instructione et exquisitior sit instructio et educatio moralis et religiosa; et sicut post completas scholas elementares, puer artificis vel agricolae adhuc educatur in sua familia pro opportunitate, ita et qui in ulterioribus scholis prosequitur instructionem, indiget concomitante proportionata educatione morali et religiosa.

Hinc est positivam ordinationem instructionis et educationis ad scopum religiosum adhuc utilissimam esse. Igitur rursus tutius et abundantius curabitur in scholis ab Ecclesia institutis et directis, quam in scholis simpliciter ab ea invigilatis.

III. Quoad scholas superiores, etsi in his specialis instructionis scholastico-religiosae rigorosa necessitas non adsit, adeoque vigilantia negativa sufficere posset, tamen 1^o nemo est qui non agnoscat quanta sit in superioribus studiis deploranda depravatio; ex eis enim non harmoniam fidei et rationis, sed repugnantiam passim deducunt, et in statu sociali actuali mera Ec-

clesiae vigilantia, etsi haberet auctoritatis civilis adiutorium, non semper efficacissima esset, cum plures docentes non essent satis imbuti christiano spiritu ut eo informarent suam doctrinam. Et 2^o etiam praescindendo ab hac contingenti conditione, tamen certum est eos qui theologicorum studiorum ieiuni sunt, non semper satis idoneos esse ad harmoniam scientiarum et fidei plene agnoscendam.

Iamvero in scholis ab Ecclesia directis, utrique inconvenienti occurreretur, adeo ut et personae haberentur imbutae spiritu christiano, tamquam aromate, ne scientiae corrumpantur, et satis in re theologica pro eius relationibus cum ceteris scientiis versatae.

Igitur Ecclesia titulo speciali sui finis, speciale ius habet condendi scholas etiam pro laicis easque sibi habendi, et positive dirigendi, etiam in statu societatis normali.

APPENDIX

DE CONVICTIBUS EDUCATIONIS

130. Ad educationem curandam maxime ducunt convictus, sive coniuncti scholis sive separati; cumque scholares superiores (universitatum) maxima indigeant custodia, hinc utiliter et pro iisdem instituuntur. Cum autem valde intersit Ecclesiae haec educatio vel custodia, hinc multo magis ac pro instructione, habet ius huiusmodi convictus vel collegia instituendi et dirigendi, cum haec referantur immediate ad moralem et religiosam educationem. Cumque Ecclesiae institutio sit immunis a quavis probabili suspicione, hinc nullum ius est auctoritati civili praeventionis generalis, sed tantum inspectionis hygienicae et praeventionis specialis aut

repressionis, salva immunitate ecclesiastica, si ei locus sit. In quo iure, cum de re evidentissima agatur, non insistimus.

QUAESTIO QUARTA.

DE IURE PER ACCIDENS COMPETENTE ECCLESIAE
INSTITUENDI SCHOLAS
IN STATU SOCIETATIS ANORMALI MORALITER.

131. Sed quid de iure Ecclesiae quoad scholas instituendas in statu societatis anormali? Haec anormalitas duplex esse potest: 1^o quatenus auctoritas civilis aut non vult in scholis publicis ea praestare quae Ecclesiae competunt tum quoad vigilantiam, tum quoad impartendam religiosam instructionem, hinc neque cogit praestari in scholis privatis, sed tantum a volentibus ponuntur; aut nequit haec praestare ex impedimento morali, ut in statu mixtae religionis, vel falsae praevalentis; 2^o quia auctoritas civilis impotens est ex defectu-physico, ut apud barbaros, vel in dissolutione sociali, puta in dissolutione romani imperii. In primo casu status socialis est anormalis ex hominum culpa; in secundo per se est sine culpa; in primu casu videamus iura quae Ecclesiae competere possent cumulative cum statu civili, ideoque per accidens ex huius defectu; in secundo consideremus ius Ecclesiae supplendi impotentiae physicae status civilis, ideoque quod potest ex iure devolutivo.

132. Ius quod Ecclesia habet instituendi scholas proprias pro instructione fidelium, innititur titulo magis riguroso in facta hypothesisi. Etenim tunc scholae status non satisfaciunt requisitis pro scholis catholicis vel negative quatenus numquam de re religiosa et de eius connexionem cum aliis materiis, praesertim moralibus,

verbum faciunt, vel etiam privative quia spiritu acatholico vel etiam antichristiano sunt imbutae. Iamvero in secundo casu regulariter nequeunt frequentari a catholicis, et nullo modo a pueris; ad summum aliquando frequentari valent cum magna cautela scholae superiores, etsi lugenda experiantia doceat cautelas generatim non servari. Gutta enim cavat lapidem, cumque scholares suspiciant scientiam suorum magistrorum in re profana, facile eis auctoritatem concedunt et in religiosa. Deinde scholares etsi optimi ingenii, non solent talem apparatus doctrinae habere quo valeant pro-
fectis doctoribus resistere. Et tandem societas aliorum discipulorum qui in sua maiori-
tate vel etiam totalitate aliter sentiunt, plurimum influit in eis depravandis, praesertim quia res non modo est cum intelligentia scholarium catholicorum, sed etiam imo maxime cum voluntate; plurimum enim potest respectus hominum, etsi praescindamus a morum corruptione quae incredulitati viam aperire solet.

133. Sunt pariter noxiae et scholae mere negativae, saltem si de popularibus et mediis sermo sit; assuescunt enim pueri et adolescentes ad parvipendendam religionem veluti eam sine qua optimus homo et civis haberi potest. Insuper illud addendum, difficile esse magistros incredulos aut acatholicos, suo malo spiritu non inbuere scholam, cum abstinere a quavis religiosa allusione, utpote contrarium rerum relationibus, difficillimum sit quia non naturale. Tamen facilius licere poterit ex gravi causa frequentare has scholas, si aliunde maiori diligentia suppleatur earundem defectibus. Verum semper apparet eas minus esse opportunas et iuribus catholicorum non respondere.

134. His positis cum catholici ius habeant et suscipiendi instructionem in quavis scientia, et id sine pe-

riculo suae religionis obtinendi, cumque id verificari nequeat ex hypothesis in scholis publicis, apparet ius eis esse illud obtinendi in scholis privatis. Cum autem ad Ecclesiam maxime spectet necessitati spirituali consulere, et efficere ut eius filii sic transeant per bona temporalia ut non amittant aeterna, sequitur non modo catholicos tamquam privatos, sed ipsam Ecclesiam, vel laicos catholicos quatenus tales, idest nomine Ecclesiae et sub eius directione, posse scholas instituere. Igitur in hac hypothesis, est Ecclesiae ius multo magis ac in statu normali societatis. In hoc enim ea iure polleret 1^o ex libertate communi; 2^o ut abundantius et tutius obtineatur catholica iuventutis institutio; e contra in statu anormali, ut simpliciter curetur catholica institutio, quae secus nullo modo haberetur.

135. Igitur huiusmodi ius catholicis sive privatis, sive praelatis aut religiosis, poterit tantum denegari ab eis qui cum Iuliano apostata sentiant. Notum enim est hunc perfidum christiani nominis inimicum, christianis interdixisse publice litteras docere, eo quia auctores interpretandi, essent pagani et indecens esset christianos de diis disserere; sic addebat irrisionem damno. Etenim factum esset vel christianos iuvenes frequentare paganorum scholas in quibus perverterentur, vel a scholis omnino abstinere; et tunc brevi tempore defecissent inter christianos viri pollentes profana litteratura; hinc et viri idonei publicis muneribus; et quoniam in societate praedominant non tantum opes, sed etiam, imo temporis tractu maxime, praevaleret doctrina, brevi factum esset ut christiani inepti fierent ad influxum in re publica exercendum. Iamvero utrumque est contra rectam rationem; et 1^o catholicos exponi seductioni. Ex disputatis enim in lib. primo partis 1^{ae} de relationibus status acatholici cum subditis catholicis,

apparet neminem posse etiam humano modo loquendo, seu in foro sociali, cum aliqua verisimilitudine negare catholicis ius profitendi religionem suam. Ergo qui eos ponunt in necessitate periculum perversionis subeundi, iniuria agunt, cum eos non ex persuasione, sed contra propriam conscientiam agere compellant.

2^o. Neque ius est acatholicis excludendi catholicos a publicis bonis et muneribus, ratione catholicitatis, cum ex eadem ratione, nequeant hanc professionem in eis considerare ut culpae imputabilem; etenim acatholici saltem considerare debent omnes confessiones christianas ut aequae probabiles. Ergo iniuria catholici publicis bonis excluderentur.

136. Illud autem addimus; si scholae publicae habeantur publico aerario alitae (possunt enim esse publicae auctoritate sed expensis scholarium vel redditibus haereditariis) tunc verificari potest casus in quo status civilis ex iustitia distributiva teneatur ex eodem publico aerario scholis catholicis subvenire.

Id est si catholici sint in aliquo statu agnoscendi tamquam pars status prout catholici sunt. Id esse potest I. pactis conventis; ex. gr. si regio catholica annexa sit statui acatholico, data fide publica de integritate iurium religiosorum et civilium catholicis servanda. Iamvero ad id scholae catholicae necessariae sunt. Si autem status provideret ex publico aerario scholis acatholicis, laederet aequalitatem iuratam non providendo scholis catholicorum; etenim eos cogeret et ad contribuendum scholis acatholicis, cum solvant tributa sicut ceteri, et ad sustinendas speciales impensas, si proprias scholas vellent, quod est catholicos in deteriori conditione ponere ac ceteros.

137. Sed II., etiam sine expressis pactis id iustum esse potest; si nempe catholici sint in aliquo statu tali

quantitate, ut publicam mereantur considerationem et veluti subdivisionem in statu constituent; tunc si status providet ex publico aerario scholis formaliter acatholicis, et scholis catholicorum providere tenetur; secus hos subditos et cives non eadem mensura tractaret ac reliquos, absque culpa, quod est contra iustitiam distributivam. Dicimus si status subveniret scholas formaliter acatholicas; si enim pro multitudine sectarum, scholas institueret quae a religione quavis saltem determinata praescinderent, idque publica necessitate faceret, posset ab eo onere excusari. Etenim etsi numquam liceat, malum facere, ut esset constituere scholam acatholico spiritu imbutam, et tantum per accidens excusari possit ex erronea conscientia inculpabili, tamen licet aliquando a bono alias obligatorio abstinere, cum nempe id sive physice sive moraliter impossibile est, seu praestari nequit absque gravioribus malis. Schola autem negative se habens quoad religionem, est per se tantum omissio boni, et non mali positio.

QUAESTIO QUINTA.

DE IURE ECCLESIAE DEVOLUTIVO INSTITUENDI SCHOLAS
AUCTORITATE CIVILI DEFICIENTE.

138. Cum status civilis est in dissolutione et incapax sibi providendi, ita ut non tantum scholas catholico spiritu imbutas non instituit sed nullas aut fere, tunc non modo Ecclesia potest scholas instituere titulis supradictis, sed etiam devolutive; consulit enim societati christianae eo deficiente ad quem primario spectaret, sicut praestat et in aliis multis. Etenim in plebe christiana, numquam deficit ius sibi consulendi, sed sibi consulit ea forma quam actu habet, quae in hypothesi saltem, efficax est tantum ecclesiastica.

QUAESTIO SEXTA.

DE EFFECTIBUS CIVILIBUS SCHOLARUM A PRIVATIS
ET AB ECCLESIA INSTITUTARUM.

139. Primo determinandum est quid sint effectus civiles scholarum. Fieri potest ut ad quaedam iura civilia exercenda, puta electoris, vel ad quaedam munia gerenda aut professiones excercendas, requiratur specialis instructio, quae in omnibus non verificatur. Quaeritur an statui ius sit antecederet eandem cognoscendi.

Iamvero si de iuribus quibusdam civilibus seu positivis exercendis sermo sit, item de publicis muneribus, ex. gr. iudicis, notarii, etc. nemini dubium esse potest auctoritati civili non modo ius sed et officium esse certiorandi se de competente idoneitate, ideoque et de competente scientia eorum qui ad haec assumenda aspirant. Cum enim ex hypothese, seu ex ipsa rerum natura, ea instructio requiratur pro talibus muneribus rite sustinendis, quae communis non est, patet eadem credenda eis non esse de quibus sufficienter non constet debita peritia.

140. Sed quid de professionibus quibusdam privatis, ex. gr. medici, chirurgi, pharmacopolae, advocati et similium?

Quidam exaggerati libertatis defensores, contendunt haec negotia, privatorum discretionem esse relinquenda et tantum damna quae dolo vel ignorantia fuerint illata, esse sententia iudicis compensanda. Rationes ipsorum analogae sunt eis quae supra pro omni-modi libertate instructionis concedenda allatae sunt. Id est 1^o haec negotia privatorum esse; magis expedire libertatem quam legem, quia cito idonei cognoscentur, dum e contra saepe minus idonei proteguntur diplo-

mate malis modis acquisito, in detrimentum aliorum qui diplomate carent sed praestant scientia.

Ad quae respondemus: ad I^{um}, et in negotiis privatorum cum gravioris momenti sunt et periculi plena, posse praeventive intervenire ad cautelam, publicam potestatem. Iamvero citatae professiones negotia respiciunt gravissima et periculosa, plusquam sit ipsum magisterium litterarum aut scientiarum.

141. Hoc quoad ius. Quoad eius exercitium, dicimus ad II^{um}, saepe privatos, praesertim in pagis, non satis posse sibi consulere, ideoque expedire interventum praeventivum publicae potestatis.

142. His positis quaeritur an status debeat competentem idoneitatem agnoscere tantum in iis qui suas scholas frequentaverint vel etiam in iis qui privatas aut ecclesiasticas, praescindendo nunc a casu postremae quintae quaestionis. Iamvero insistentes ipsi rei naturae rursus distinguimus: aliud est quaerere an status ipse sit qui iudicet auctoritative de sufficiente idoneitate candidatorum citatis officiis vel professionibus, et aliud est quaerere an pro eadem declaratione idoneitatis obtinenda, unice sint frequentandae scholae publicae. Quoad primum, cum agatur de idoneitate pro officio vel professione civili, ius se de eadem certiorandi profecto ad statum spectat. Sed bene adnotetur, statum tantum ius habere agnoscendi de existente idoneitate, non autem potest idoneos repellere. Etiam idoneos pro officio iudicis ut tales agnoscere debet, etsi inter idoneos adspirantes ad illud consequendum, iure eligat, criteriis oeconomiae politicae.

143. Ex quo apparet iniustam fore exigentiam frequentandi scholas publicas; etenim supponeret debitam idoneitatem in eis tantum acquiri, quod est absurdum. Sed sufficit factum frequentationis seu diplomatis scho-

larum privatarum vel ecclesiasticarum de studiis a lege civili praescriptis expletis, ut quis idoneus a lege habeatur, vel status ius habet verificandi per se hanc idoneitatem in scholis privatis vel ecclesiasticis acquisitam? Cum sermo est de munere publico exercendo, ex. gr. iudicis, quod nomine status exercetur, profecto status potest semper per se examinare, cum ipse conferat officium, et qui illud recipit publicam vestem induat. E contra cum sermo est de exercitio professionis privatae, et tantum agitur de periculo vitando.

Cum officium status sit certitudinem assequi de idoneitate, contentus esse debet medio sufficienti; igitur non tenetur simpliciter credere privatorum attestationibus, sed tunc tantum cum contraria praesumptio haberi nequit; secus inutiliter subditos gravaret; hinc attendenda esset celebritas scholarum et institutorum, et tunc status verificaret idoneitatem scholarium mediate, idest mediante fama iuste sibi comparata et conservata scholarum quas frequentassent. Cum autem scholae ecclesiasticae maiorem mereantur fiduciam quam ceterae, hinc patet eis plus rationabiliter concedi, praesertim si agatur de instructione satis parva, puta de elementari instructione requisita pro qualitate electoris, cum haec soleat in omnibus mediocribus scholis acquiri.

Ceterum cum non multum gravet examen si debite et non hostiliter instituatur, et aliunde ponderatio valoris scholarum privatarum multis difficultatibus locum dare posset, non est incongruum, statum constituta norma generali, per se verificare, vel per examinatores mixtos, vel aliqua cautela requisita in docentibus privatis et ecclesiasticis si velint privilegio paritatis civilis gaudere.

144. Multo autem magis concedendum est ad idonei-

tatem recognoscendam in catholicis, sufficere scholarum catholicarum frequentationem, cum scholae publicae non sunt catholico spiritu informatae, ut vidimus in quaestione tertia. Tunc enim contrarium agere esset pessima iniuria.

145. In postremo autem casu, idest quando Ecclesia devolutive scholas instituit, cum scholae Ecclesiae unicae sint, tunc eis plenam efficaciam civilem tenetur status concedere donec res in eadem conditione perseveraverint. Tunc enim repraesentant ipsam societatem civilem et religiosam simul, et in concreto constituunt meliorem cautelam possibilem.

Et haec de scholis sufficiant.

CAPUT II.

DE POTESTATE ECCLESIAE QUOAD MORES, IDEST PRO SANCTIFICATIONE FIDELIUM.

ART. I.

DIVISIO CAPITIS.

146. Ad salutem consequendam adultis praeter fidem necessaria sunt opera; et quaedam immediate a Deo praescribuntur, idest lege divina sive naturali sive positiva; quaedam e contra mediate, seu lege Ecclesiae, cui Deus hanc tradidit potestatem. Ecclesia enim et rectam fidem ac legem Dei edocet et insuper leges condit quibus facilius fides custodiri et lex Dei observari possit. Etenim nostrae sanctificationis causa formalis est gratia; efficiens principalis Deus; secundaria et cooperans, nos ipsi per bona opera; ministerialis Ecclesia instrumentalis media quibus Ecclesia donata est ad hunc finem. Iamvero in iure publico de his dua-

bus causis sermo est quatenus in eis ius Ecclesiae consideratur; de reliquis enim agit theologia tum dogmatica tum moralis, sicut de legibus ab Ecclesia latis pro foro externo agit ius canonicum, dum ius publicum divinum considerat ipsum ius Ecclesiae tales leges ferendi.

147. Hinc *disciplina ecclesiastica*, quae solet definiri: « Praxis factorum fidei consona ». Nobis igitur videnda est comprehensio huius disciplinae ut competentiam directam Ecclesiae agnoscamus.

Disciplina ecclesiastica dividi solet in *dogmaticam*, *liturgicam*, *externam*. *Dogmatica* est praxis factorum necessaria ne contradicatur fidei. *Liturgica* est praxis factorum pro cultu Dei; *externa* est praxis factorum ut singuli fideles et integra societas ecclesiastica, in externa conversatione, seu agendi ratione, finem societatis ecclesiasticae consequantur. Hinc liturgica praescribit ordinem cultus divini, praescindendo ab obligatione eiusque extensione afficiente fideles eundem praestandi; ex. gr. ordo missae est disciplinae liturgicae; praeceptum audiendi missam est disciplinae externae; afficit enim individuum ut ipse sanctificetur et ut bonum exemplum det ceteris; igitur respicit actum externum tum individualementum tum sociale, cum sub nomine conversationis externae utrumque veniat.

148. Verum haec divisio etsi recta quoad obiecta, haec enim tria complectitur ecclesiastica disciplina, non est recta logice, quia iuxta regulas divisionis, eius membra oportet mutuo sese excludant ideoque sint opposita; sed tria enumerata non sese excludunt, sed ex parte sese includunt. Etenim tum in re liturgica, tum in externa conversatione quaedam sunt dogmatica et quaedam non. Ita dogmatica est disciplina substantia-

lis in sacramentorum confectione et administratione, ideoque et in missae celebratione, quae est actus eminenter liturgicus. Ita in externa conversatione etiam reciproca, obedientia pastoribus legitimis est disciplinae dogmaticae, quia lege divina necessaria.

Igitur ut divisio sit logice perfecta, dicendum est disciplinam, attento obiecto, aliam esse liturgicam, aliam externam, prout directe praescribit ordinem servandum in cultu Dei seu legitimum ritum eum excolendi, vel prout directe praescribit quae ad sanctificationem individui et ordinem sociale[m] servandum spectant.

Attenta autem origine, seu fonte, est vel dogmatica, vel non, cui aliquando reservatur nomen merae disciplinae, contraponendo legis ecclesiasticae necessitatem, necessitati legis divinae seu dogmaticae. Igitur tripartita divisio dogmaticae, liturgicae et externae poterit tantum retineri pro practico usu, sed non ut logica divisio.

149. Igitur exponendo extensionem disciplinae loquendum est de liturgica et de externa politia ecclesiastica. Nomen autem *liturgiae* significat litteraliter *opus sacrum*, ideoque primario significat ordinem cultus divini, et antonomastice ordinem missae. Sed extenditur quoque ad ritum quo omnia sacramenta et sacramentalia conficiuntur et administrantur. Etenim cum haec proxime tendant ad nos Deo coniungendos per internam sanctificationem, merito sub nomine cultus divini comprehenduntur.

150. Exterior autem disciplina comprehendit tum ea quae Ecclesia praecipit a singulis directe praestanda pro sua sanctificatione, tum pro mutua christianorum conversatione, tum pro ministrorum Ecclesiae constitutione muneribusque, et officiis ac iuribus respondentibus in populo christiano, tum ea quae ad consiliorum

evangelicorum professionem aut opera supererogatoria facilius et magis ordinate praestanda, tum administrationem rerum temporalium quibus Ecclesia eiusque partes pro suo scopo indigent, tum denique pro incolumitate totius societatis Ecclesiae, quae indirecte refertur ad singulorum sanctificationem; ideoque hic a nobis omittitur, cum de directa Ecclesiae competentia agamus. Haec enim omnia in societate christiana necessaria sunt, idest 1° ut quis private sanctificetur; 2° cum aliis iuste, sancte et pacifice vivat; 3° Ecclesia indiget ministris qui ceteris provideant et quibus ceteri pareant; 4° promovet evangelicam perfectionem vel professionem consiliorum evangelicorum, vel saltem 5° opera supererogatoria charitatis in Deum, proximum et nosmetipsos; et 6° indiget tum ipsa tum eius partes bonorum temporalium acquisitione, administratione et usu.

Pro 1°, 2° et 3° scopo, hoc sub respectu, indiget praesertim sacramentis et sacramentalibus; quae sacramentalia et ad 4. 5. et 6. extenduntur; etenim non modo personae Deo consecrantur sed et res, ut Ecclesiae, vestes, etc. Sacramenta autem et sacramentalia etiam sacram liturgiam absolvunt.

Pro 1° autem et 2° scopo, reliqua media praeceptiva vocare possemus praecepta ethico-ecclesiastica. E contra praecepta pro servanda organizatione ab Ecclesia constituta, et pro eiusdem organizationis salutari actione, dici possunt ecclesiastico-socialia.

151. Quae ut melius appareant notandum est ad salutem aeternam necessariam esse sanctitatem. Sanctitas autem quid est supernaturale, sed subaudit fidem et naturalem honestatem. Iamvero Ecclesiae 1° concreditae sunt veritates credendae et iure divino sive naturali

sive supernaturali executioni mandandae; ideoque eas auctoritative proponit, ut vidimus cap. antecedenti.

2º Ei concedita quoque sunt media sanctificationis ex opere operato seu sacramenta, quae sunt media quaedam obiectiva, seu instrumentalia, externa et socialia necessaria, ideoque substantialia sanctificationis; dici igitur possunt media substantive et immediate supernaturalia; dum autem gratiam sanctificantem infundunt vel augent, etiam roborant gratia actuali ad praecepta omnia servanda, difficultatesque quascumque internas vel externas superandas.

3º Eidem Ecclesiae collata est potestas instituendi et administrandi media quaedam sanctificationis *analogia* sacramentis, quae dicuntur *sacramentalia*, quae dici poterunt media sanctificationis supernaturalia mediate et participative.

4º Praeter auctoritativam propositionem legis moralis naturalis et praeceptorum positivorum Dei, habet Ecclesia ius legem ferendi circa ea quae legis tum naturalis tum positivae observantiam determinant et adjuvant. Etenim quaedam praecepta legis naturae sunt indeterminata; ex. gr. necessarius est cultus Dei externus et publicus, sed quo tempore et ritu, ab ipsa lege naturae non determinatur, sed ab Ecclesia; praeceptum de mortificatione est naturale, sed indeterminatum; item ex praecepto divino positivo, necessaria est Eucharistiae perceptio, sed tempus ab Ecclesia determinatur. Quae pariter iubet ea quae adjuvant, vel removendo a periculosus, vel quae faciunt praecipiendo, ut ita tutius et ordinatius in societate christiana serventur officia tum theoretica fidei, tum practica erga Deum, nosmetipsos et proximum, et ipsa media sanctificationis sive a Deo sive ab Ecclesia constituta, ordinate et utilius adhibeantur; haec praestat disciplina

tum liturgica tum externa, pro diversa obiectorum natura. Haec quoque media ad sanctificationem referuntur, sed vel sunt per se naturalia (attendendo quod fit exterius) sed directa ad ordinem supernaturalem ex intentione Ecclesiae, ut ieiunia, orationes, etc., vel naturalem meliorem rationem considerant utendi ipsis supernaturalibus immediatis aut mediatis, ideoque ea communi classificatione dicemus media *sanctificationis communis naturalia elevata*.

5° Ecclesia curat quoque ordinare et faciliorem reddere professionem consiliorum evangelicorum pro iis qui ad christianam perfectionem specialius aspirant. Professio religiosa sive sollemnis sive non, est *sacramentale*, quatenus ritu aliquo Ecclesiae sanctificatur; ideoque hoc sub respectu ad liturgicam disciplinam refertur; in reliquis eiusdem Ecclesiae dispositionibus ad *externam*. Haec dicimus media *perfectionis naturalia elevata* (etenim per se adsociatio est medium naturale).

6° Ecclesia saltem pietatem, charitatem et sanctitatem promovet operibus supererogatoriis, institutionibus et adsociatibus multiplicibus; haec dicemus media naturalia elevata *sanctificationis specialis*.

Haec omnia sunt media sanctificationis directa supernaturalia vel naturalia.

7° Ecclesia organizat seipsam, ministros distribuendo et constituendo, ipsorumque iura et officia determinando et respondentia plebis aut ordinum inferiorum iura et officia; hoc est de se medium *naturale* organizationis hierarchiae supernaturalis; quoad sanctificationem est medium *indirectum*, sed *positivum* et *proximum*. Et poenae sunt media *indirecta* et *proxima* sed *negativa*, dum organizatio Ecclesiae est medium indirectum proximum, sed *primario positivum* et tantum secundario negativum, ne confusio fiat.

8° Ecclesia res temporales acquirit (vel imponit *latus, decimas*, etc.) easque administrat et dispensat pro se suisque partibus. Est medium naturale *remotum*.

9° Tandem integram societatem conservat, eiusque partes integrantes, quod *indirecte* ut *prærequisitum*, necessarium est ad salutem singulorum. Sed de hoc in potestate indirecta actum est libro antecedenti.

152. Si relatio horum mediorum ad sanctificationem velit classificari, reassumendo dicemus :

I. Sacramenta sunt media supernaturalia *immediata*, *directa*, *positiva*, *proxima*.

II. Sacramentalia sunt media supernaturalia *mediata*, *directa*, *positiva*, *proxima*.

III. Organizatio Ecclesiae et praecepta ecclesiastico-socialia sunt media de se naturalia, *indirecta*, *proxima*, *positiva*.

IV. Poenae sunt medium de se *naturale*, indirectum, *proximum*, *negativum*.

V. Bona temporalia sunt media naturalia, *remota*.

VI. Reliqua spectantia ad disciplinam exteriorem sunt media naturalia, *directa proxima*, *positiva* aut *negativa*, ab Ecclesia aliquo modo *elerata* (ut fit per sacramentalia) seu ordinata ad supernaturalem finem.

153. Iam vero cum de tertia parte quatenus organizationem Ecclesiae respicit et consequentia iura ac officia sive ministrorum sive plebis, sermo sit in tertio capite, et reliqua ad sacramentum ordinis revocari possint, hinc agemus totidem articulis de iure Ecclesiae : primo seu

ART. II. (huius capitis) Quoad sacramenta ;

ART. III. Quoad sacramentalia, praesertim circa cultum divinum publicum ;

ART. IV. Quoad reliqua capita praeceptorum ecclesiasticorum moralium ;

ART. V. Quoad consilia evangelica et praesertim pro ordinibus et congregationibus religiosis instituendis et regendis;

ART. VI. Quoad reliquas pias adsociationes et pia opera;

ART. VII. Quoad bona temporalia;

ART. VIII. Quoad iurisdictiones;

ART. IX. Agendum esset de eis quae pro incolumitate societatis christianae in temporalibus, ab Ecclesia praecipuntur. Sed cum de his actum sit praesertim libro antecedenti cap. 6^o ubi de potestate indirecta Ecclesiae in res et personas civiles, pauca in praesenti supersunt indicanda, quae competentiam Ecclesiae in temporalibus ratione specialis relationis ad spiritualia, quoad privatos respiciunt.

ARTICULUS II.

DE IURE ECCLESIAE QUOAD SACRAMENTA.

§ 1.

DE IURE ECCLESIAE QUOAD SACRAMENTA GENERATIM.

154. Cum sacramenta sint media substantive supernaturalia, Ecclesia tantum est competens circa ipsorum administrationem; hinc ipsa statuit condiciones rectae administrationis et susceptionis eorundem, et proinde et quando debeant denegari.

Iamvero hac in re obtinuit enormis abusus apud plures gentes, nempe legem civilem punire Ecclesiae ministros duplici ex capite; 1^o *ob indebitam sacramentorum denegationem*; 2^o *ob abusum ministerii* in eorundem administratione, ex. gr. quia exigèrent condiciones indebitas. Sed id duplici modo intelligi potest: 1^o de denegatione indebita et de abusu ministerii, iuxta

ipsas leges ecclesiasticas; 2^o iuxta leges civiles discrepantes a legibus Ecclesiae; quocumque modo intelligatur, enormitas huius abusus evidens est. Etenim in primo casu iudex competens transgressionis legis ecclesiasticae est ipsa Ecclesia: ille enim iudicat qui legem fert. Si autem opus sit brachio saeculari pro executione legis ecclesiasticae, tunc potestas civilis interveniet ministerialiter, non iudicando Marte proprio.

155. Sed dici posset, interveniendi ius esse et auctoritati civili, quia praeter damnum spirituale, haberi potest et damnum temporale, ex. gr. *ignominia* ex publica sacramentorum denegatione. Verum respondemus: auctoritas civilis iure proprio per se iudicat de damno temporali proveniente ex *causa temporali* concedo, ex causa spirituali nego; et contradistincta *causali*, negatur consequens.

Et sane, ut quis iudicet de iustitia vel iniustitia damni illati, necesse est iudicet de iustitia vel iniustitia causae; atqui causae spiritualis iudex competens est tantum Ecclesia. Ergo sola Ecclesia iudicat de iustitia vel iniustitia damni illati per sacramentorum denegationem. E contra causae temporalis iudex competens per se est auctoritas civilis; dicimus per se, seu ratione materiae, quia ratione personae ob privilegium fori, potest esse per accidens et Ecclesia; sed nunc ab immunitate clericorum personali praescindimus.

156. Si autem secundo modo res intelligatur, tunc patet interventum civilis auctoritatis esse hostilem ipsi Ecclesiae; punit enim ministrum qui leges Ecclesiae observat, quique exigit quod ipsa requirit et id tantum quod ipsa sufficiens iudicat. Et proinde tunc auctoritas civilis laedit independentiam Ecclesiae.

157. Sed dici posset praeter materias exclusive spirituales extare et mixtas, puta matrimonium; ideoque

legibus Ecclesiae consuli sanctitati sacramenti seu finis spiritualis; legibus autem civilibus consuli ordini temporali; et quoniam actus semel positus, operatur in utroque ordine, hinc ministrum Ecclesiae tunc tantum legitime agere, cum leges utriusque ordinis servat; hinc subiici iudicio utriusque potestatis.

Resp. 1^o animadvertendo hanc difficultatem considerare tantum casum in quo leges civiles aliquid superaddunt legibus Ecclesiae, non autem quando eis contradicunt, id prohibendo quod Ecclesia exigit, aut exigendo quod ipsa prohibet; hinc limitatus esset interventus auctoritatis civilis, contra ac fiat; etenim Ecclesiae adversarii considerant simpliciter leges quas-cumque civiles.

2^o Resp. Ecclesiam quidem permittere pro effectibus civilibus quibusdam, legem civilem superaddere speciales dispositiones, de quibus pertractavimus parte prima lib. 1^o cum de materiis mixtis egimus, sed Ecclesia pro suis ministris simpliciter agnoscit ut obligatorium in sacramentorum administratione legum suarum observantiam, ut fini spirituali consulatur, eumque liberum vult a quacumque sanctione civili; ex. gr. in matrimonio etsi consensus parentum pro minoribus, requiratur regulariter pro liceitate actus, tamen illud ut validum semper habet, ideoque non agnoscit ut obligatoriam observantiam legis civilis quae illum pro validitate praescribat; quatenus autem minister contradicat et legi Ecclesiae quae illud ipsum requirit quod lex civilis, ex. gr. consensum parentum pro liceitate matrimonii, aut si Ecclesia legem civilem suam faciat et observandam expresse velit, tunc minister aliter agendo, offendit ipsam legem Ecclesiae et incidimus in casum primum.

158. Iamvero si aliquid aliud praeter Ecclesiae prae-

scriptum necessarium erit pro ordine temporali, tunc vel est conciliabile cum eis quae requirit ordo spiritualis vel non; si hoc sumus in casu conflictus; hinc cedere debet ordo temporalis et proinde iniusta lex civilis quae aliter exigit; si alterum tunc poterit quidem a lege civili denegari efficacia actus pro quibusdam effectibus civilibus, sed non puniri ipse actus ministri, conformis legibus Ecclesiae; etenim eo quod Ecclesia legem civilem non adoptat, iam indicat ipsam iudicare non expedire pro fine spirituali eius obligatorietatem; ideoque a lege civili poterit quidem praescribi negando ut supra efficaciam quandam civilem, non autem simpliciter puniendo ipsum actum; quia tunc lex civilis iam puniret actum qui ponitur pro fine spirituali servatis legibus de hoc ab Ecclesia latis et habitis ab ea ut sufficientibus.

Quod si qui effectus civiles adhuc sequuntur, ii ut sequela necessaria actus spiritualis non cadunt sub potestate civili, ut diximus de materiis mixtis. Igitur ius est civili potestati consulendi ordini civili, sed sine impedimento pro ordine spirituali; igitur qui voluerit consulere suo bono spirituali, sufficit observet leges Ecclesiae; poterit tamen privari quibusdam separabilibus effectibus civilibus si legibus civilibus non satisfaciat, sed non exinde positive puniri, quia puniretur ille qui consulit bono spirituali, renuntiando bono cuidam temporali, seu quibusdam effectibus civilibus. Ut patet, non loquimur de omissione *actus separabilis* a susceptione sacramenti, seu ab actu spirituali; tunc enim, ut diximus agentes de materiis mixtis, non ipse minister Ecclesiae, sed qui utuntur eius opera poterunt pro effectibus temporalibus legi civili subiici.

159. Haec quae de sacramentis diximus, generatim dicenda sunt de ministerio ecclesiastico, cum eadem

vigeant principia; idest nequit minister Ecclesiae puniri a civili potestate, eo quod *indebite* negaverit suum ministerium, aut illud male seu *per abusum* adhibuerit; etenim iudicium spectat semper ad Ecclesiam, cum causa sit *spiritualis*.

160. Quid si *praetextu* vel *occasione* ministerii spiritualis, damnum inferat temporale, ex. gr. furetur? Si vere *eridens* sit ministerium spirituale fuisse merum praetextum seu occasionem, profecto materia per se est civilis; aderit tamen immunitas personalis; sed si quod dubium fuerit de connexione legitima inter ministerium spirituale et damnum temporale, tunc iudicium adhuc spectat ad auctoritatem ecclesiasticam; multo magis si quod lex civilis prohibet, esset ab Ecclesia ut laudabile declaratum. Ex. gr. quaedam leges prohibent ministro Ecclesiae quacunque ratione sese ingerere in testamentorum confectione ne in favorem Ecclesiae gravent infirmos. Iamvero haec lex per se est iniusta; etenim ratione periculi alicuius abusus ex parte ministri, excludunt et honestum eius interventum, cum liberalitas in Ecclesiam non sit removenda a dispositionibus ultimae voluntatis.

161. Per haec quae generatim diximus de sacramentis in genere, iam praeoccupatae sunt quaestiones quae de pluribus in specie fieri possent, cum nihil speciale dicendum occurrat circa confirmationem, eucharistiam, poenitentiam, extremam unctionem; etenim omnes quaestiones de hac re cum foro civili ad indubitam *denegationem*, aut ad *indebitas exigentias* reducuntur, praesertim pro absolutione sacramentali et eucharistica participatione; nimis enim ridiculum est auctoritatem civilem circa reliqua velle sese immiscere, puta aetatem, ieiunium, ritum etc. ut fecit Iustinianus, qui et modum celebrandi missam praescripsit, quod

nempe elata voce consecratio fieret; sed auditus non fuit. Igitur remanet dicendum in specie de sacramento *baptismi, ordinis et matrimonii*.

§ 2.

DE SACRAMENTO BAPTISMI.

162. Vidimus supra, cap. I, baptizari posse et debere omnes rationis usum habentes qui id desiderent, dummodo dispositi, cum cuique ius strictissimum sit consequendi suam salutem aeternam. Sed quid de carente usu rationis, potestne invitis aut insciis vel *praesumptive* repugnantibus parentibus baptizari? Doctrina Ecclesiae est, utroque invito non posse. Etenim cum hic careat rationis usu (puta quia infans) non potest facto suo tendere ad vitam aeternam, sed per alios; igitur videndum cui providentia commiserit eius curam: commisit autem parentibus; ergo ipsis repugnantibus nequit ei succurri nisi sit qui ius habeat corrigendi hanc ipsorum malitiam, et culpam (seu negligentiam) supplendi.

163. Iamvero id verificatur si pro usu paternae potestatis sint alicuius subditi. Id est I. sint subditi Ecclesiae; tunc enim tenentur obtemperare legibus Ecclesiae et in usu potestatis paternae; et proinde de rigore iuris, non modo filii catholicorum, sed et acatholicorum possent ab Ecclesia baptizari et catholice institui; id aliquando medio aeo iure praestitum est cum parentes essent haeretici, ut filii traderentur aliis propinquis catholice educandis. Id in societate catholica possibile erat, nec inhumanum videbatur; e contra esset nostris temporibus.

164. Quid si unus ex parentibus dissentiret et alter consentiret?

Posset et deberet baptizari, etsi dissentiens esset

pater; in hoc enim seu pro salute aeterna, aequae cura pueri tradita est utrique parenti, nec pater praevalet matri, sed ei adsistendum qui bene utitur sua potestate; multo magis praevalet mater, tutoribus dissentientibus; sed si mater renuat, et tutores consentiant, hi praevalent utpote patrem repraesentantes; favendum est enim ei qui potestate sua bene utitur. Hinc si defuncto patre, mater et tutores renuant, sed avus paternus vel avia paterna offerat nepotes ut baptizentur, suscipiendi sunt; mortuo enim patre veluti ad eos devolvitur *naturalis* tutela. Ex hac ratione, conformiter iuri romano plures affirmant et repugnantibus genitoribus, praefendum esse avum paternum.

165. II. Ex eodem iure romano statutum est et dominum posse invitis parentibus servis, eorum filios baptizare; cum enim iure gentium inducta esset dominica potestas quae moderabatur patriam potestatem, imo iuxta ideam iuris romani, eius locum tenebat, cumque ex hoc iure gentium, dominium in servos factum esset moraliter honestum in iis quae officiis naturae non adversarentur, cumque pater servus nolens filios baptizare irrationabiliter ageret, poterat corrigi a domino qui iure gentium habebat superioritatem quoad ipsa iura individualia et domestica servi sui, ideoque eius abusus corrigere et defectus supplere poterat (1).

Tamen rex christianus nequiret filios subditorum

1) Si autem quaeratur quomodo iure *gentium* potuerit *servitus* fieri iusta, notandum est vel servitutem sumi sensu iuris romani, idest pro facultate utendi et abutendi servo, et hoc sensu nunquam honesta esse potest; vel sumi pro perpetua locatione operum servi favore domini, et perfecta eius subiectione, salva dignitate humana et officiis naturalibus, et hoc sensu honesta esse potest. Et sic servi fieri possunt 1^o in poenam; si enim delinquentes in

infidelium, invitis parentibus baptizare, quia etsi sint eius subditi, non sunt subditi quoad rem religiosam supernaturalem, ut sunt fideles respectu Ecclesiae.

166. III. Infantes possunt baptizari insecis aut invitis parentibus, si sint ab iisdem proiecti, seu derelicti aut expositi; per hoc enim renuntiant patriae potestati, et filii fiunt primi occupantis, salva reverentia debita humanae naturae.

IV. In extremo vitae periculo, dummodo sit personale infantis et non commune tantum, ut in epidemia (ex instructione sacrae Congregationis de Propaganda Fide apud Gury sub littera K. in notis Cretoni ad vol. 2^{um}, quae instructio pertractat hanc omnem materiam de baptismo concedendo vel non). In extrema enim necessitate, omnibus aequum ius est succurrendi proximo.

poenam et vita iuste expoliari possunt, multo magis in servitutem redigi; hinc

2^o aliquando iure belli, saltem quando bellum ex una parte erat evidenter iniustum et singulis belligerantibus imputabile; ex, gr. si more praedonum ad nos in servitutem redigendos adventarent; profecto eos victos, servos nostros facere possemus;

3^o voluntaria venditione; aequivalet enim locationi perpetuae;

4^o nativitate; 1. iure privato, saltem aliquo tempore iustum est ut filii servorum adulti serviant domino patris sui ad compensanda alimenta recepta in pueritia, et etiam ad compensandum periculum quod morerentur ante alimenta compensata; 2. iure publico, si servitus iam de facto in societate existat et nequeat aboleri absque magna publica subversione. Curare tamen debet societas ut paullatim haec publica necessitas imminuatur donec plene cesset; et nunquam poterit servis negari adimplementum officiorum naturalium, quia sunt iura inalienabilia; ideoque sicut voluntarie nequeunt amitti, ita neque in poenam aut ob bonum publicum auferri. Sed negatio baptismi filiis, non est parentum officium, sed iniuria. Ergo corrigi potest si ipsorum paterna potestas ut talis, agnoscat superiorem, ut fit in servitute.

Item dicendum si sint adulti amentes vel dementes a natiuitate, absque spe obtinendi usum rationis; sed si sequerentur perturbationes, abstinendum esset per accidens.

167. Circa baptismum fuerunt abusus auctoritatis civilis apud nonnullas gentes, et aliqui adhuc sunt.

Ita praescribere tempus intra quod baptismus administrari debeat; vel locum, puta domum; vel aquam calidam pro hygiene; vel baptismus administratum notificandum esse auctoritati pro *statu civili*; vel quod gravius est, administrari non posse nisi post inscriptionem infantis in registris status civilis; et alia plura, quae nobis singulatim prosequi non vacat, cum ex principiis generalibus satis innotescat harum legum irrationabilitas et etiam iniustitia, si ferantur a potestate civili Marte proprio. Aliud est de nonnullis, si concordarentur cum Ecclesia; ex. gr. de notificandis infantibus natis et baptizatis statui civili. Nonnullis providet legislatio ecclesiastica, ut de aqua calida adhibenda cum expediens fuerit etc. De his vide praeclarum opus Adulphi Giobbio (1).

§ 3.

DE SACRAMENTO ORDINIS.

168. Ecclesia indiget ministris, cum distribuatur in clericos et laicos; hinc sequitur I. ipsi ius esse adle-

1 Lezioni di diplomazia ecclesiastica, Roma, Pustet, 1904, vol. III, pag. 9 et seqq.; apud eundem auctorem etiam quoad alia sacramenta, plura curiosa invenies; ex. gr. in Russia an. 1868 illud quoque fuisse denuo praescriptum, quod parochi non possent fideles extraneos suae parochiae ad confessionem admittere, absque licentia scripta politiae. Id ut susceptio sacramentorum impediretur iis qui occulte catholici erant, sed in registris civilibus inscripti fuerant violenter ut schismatici, cit. vol. III, pag. 379.

gendi eosdem quos et quot iudicaverit; ipsa enim competens est tum circa numerum ministrorum qui eidem utiles esse possint, tum circa qualitates quas praeserferre debent ut ei utiles sint; hinc et de aetate ipsa indicat qua possint non modo utiliter ministrare, sed etiam ponderate suscipere onera ordinum maiorum. Haec enim quaestio moralis est, quando nempe quis valeat prudenter sese coram Deo et Ecclesia obligare.

169. Cum autem Ecclesiae ministri indigeant non modo speciali instructione, sed praesertim idonea educatione, tum ut experimentum sumatur de ipsorum vocatione et respondentia eidem, tum ut habitus virtutum quae maxime status clericalis propriae sunt formentur, ius est Ecclesiae clericos seu candidatos clericatus opportune educandi, quod fit in seminariis. Et quoniam ministrorum adlectio, educatio et ordinatio directe refertur ad finem spirituales, hinc Ecclesia est in his omnibus independens.

Hinc esset abusus potestatis civilis vel numerum restringere ministrorum sacrorum, vel aetatem praefinire vel conditiones idoneitatis praescribere, aut modum educationis; de quibus duobus capitibus supra diximus, agentes de scholis pro clericis. Hinc sequitur et immunitas seminariorum a potestate civili, excepta parte hygienica et publica moralitate, quae per se sunt obiecta civilia, salva tamen immunitate quae aliunde ab Ecclesia potuerit constitui, cum ei sit ius privilegia sibi vindicandi, ut diximus in capite de immunitate ecclesiastica, lib. antecedenti.

170. Difficultates quae circa qualitates et educationem ministrorum proponi possunt, supra praeoccupavimus, idest societatis civilis interesse ministros esse idoneos; hoc enim interest indirecte ob connexionem boni spiritualis cum temporali, non autem directe, veluti si bono

temporali procurando directe attendant; hinc iudicium de his spectat ad Ecclesiam.

171. Pari ratione argui posset circa numerum; idest excessum ministrorum nocere societati civili.

Sed respondetur; vel excessum dici relate ad Ecclesiam, vel ad statum civilem; si primum, significat ministros plus esse quam Ecclesiae expediat; verum de hac re iudicium ad ipsam spectat Ecclesiam; si secundum, tunc status civilis gravaretur iusto ministrorum numero; esset igitur casus conflictus, et proinde damnum temporale esset sustinendum pro spirituali utilitate.

Verum haec dicimus ut morem geramus adversariis; etenim iustum ministrorum numerum gravare statum civilem (nisi in exceptionalibus aliquibus circumstantiis in quibus et Ecclesia temperat suas leges) fieri non potest; sed numerus ministrorum Ecclesiae semper excessivus videtur viris irreligiosis (1).

Circa clericos specialem merentur considerationem duo, immunitas a *militia* et *caelibatus*; 3^o obiter de clericis regularibus.

A. De immunitate clericorum a militia.

172. Ex dictis sequitur quoque aliam immunitatem ab Ecclesia iuste vindicari posse pro clericis, idest a *militia*. Haec enim competit 1^o clericis maioribus, cum in perpetuum addicti sint servitio divino, praesertim presbyteri, et sit inconciliabilis cum ipsorum ministerio militia armata; et semper perturbetur actio ecclesiastica etsi in exercitu aliis deputentur officiis, ex. gr. infirmis curandis aut etiam ministerio religioso exhi-

(1) Quinam fuerunt vel etiam sint in specie Guberniorum nonnullorum abusus sive circa numerum sive qualitates ordinandorum, vide apud laudatum Giobbio, *Diplomazia ecclesiastica* vol. III. pag. 20 e 581.

bendo; etsi enim huic indigentiae exercitus providendum sit, hoc tamen ab auctoritate ecclesiastica faciendum est, tum ut legitima missio habeatur a capellanis, tum ne perturbentur dioeceses ex revocatione presbyterorum a suis parochiis et aliis officiis.

Verum de hoc in citato capite de immunitate ecclesiastica ex professo sermo est; sed nunc dicimus 2^o et clericos qui in seminariis sunt ad educationem suscipiendam hoc privilegio gaudere debere.

Ius enim est Ecclesiae educandi sibi clericos; sed per militiam distrahuntur a vocatione ecclesiastica; ex quo duo incommoda sequuntur; 1^o plures, ut experientia ostendit, vocationem amittere, et sic tum ipsi periculo amittendae salutis exponuntur, tum Ecclesiae deficiunt ministri; 2^o semper retardantur ipsorum studia, quae minus utiliter reassumuntur posteriori aetate.

173. Quae in contrarium proferuntur, nec responsionem merentur, cum ab iis proponantur qui carent recto sensu religioso, ideoque rerum spiritualium iusti aestimatores esse nequeunt.

Aiunt enim I., sic apparere solidas vocationes et superficiales evanescere. Sed respondetur aliud esse providentiae vias extraordinarias et aliud ordinarias. Iamvero humanae legislationis oeconomia oportet rationem habeat tantum eorum quae communiter contingunt, ideoque cursus ordinarii providentiae; sed iuxta hunc, vocationes non bene custoditae nec excoltae evanescunt, ideoque non modo quaedam apparentes, sed et plures verae vocationes quas adversarii male insinuant ut superficiales.

174. Multo minus attendi debet quod, serio an per iocum nescimus, prolatum est, seu educationem militiae (della caserma) optimam esse. Etsi enim lamentanda non essent inconvenientia quae ut plurimum in tanta

societatis corruptione in ea verificantur, diversus est omnino spiritus militaris et ecclesiasticus, ideoque militaris educatio non conducit idoneis Ecclesiae ministris efformandis.

175. Obiiciunt clericorum exemptionem esse cum ceterorum detrimento.

Responsio patet ex applicatione theoriae generalis de privilegiis expositae lib. antecedenti, cap. de immunitate ecclesiastica, a 4., nempe:

Exemptio clericorum a militia est cum detrimento aliorum, distinguo, idest societatis nego; quorumdam privatorum: subdistinguo, in detrimentum iniustum nego, iustum concedo.

176. Quaeri posset an ius exemptionis ab Ecclesia vindicari possit tantum pro clericis vel etiam pro ceteris qui in seminariis animo clericandi, studiis attendunt.

Etenim de facto quaedam gubernia neminem eximunt; hinc iniuste agunt; quaedam clericos tantum maiores; et haec iniuste, licet minus, procedunt; alia concedunt numerum determinatum; iamvero et haec iniuste agunt, cum iudicium de numero ad Ecclesiam spectet; alia omnes theologiae studentes eximunt, non reliquos; et haec, praescindendo a concordatis, agunt iniuste, cum plures esse possint qui non adhuc studiis theologicis maturi sunt. Ergo omnes clerici sunt eximendi qui conditionibus ab Ecclesia praescriptis satisfaciunt.

Sed quid de reliquis seminaristis? Quaestio in praxi non multi est momenti; etenim hi si animum habent clericandi et bonam spem exhibent, possunt donari clericali tonsura adveniente tempore militiae; etenim ad hoc sufficit probabilis vocatio, cum non sit definitiva consecratio divino servitio. Verum de rigore iuris Ecclesia posset exigere exemptionem et sine tonsurae collatione, si non adhuc eliquatam putaret ipsorum voca-

tionem aut aliis de causis differre vellet collationem tonsurae. Etenim eo ipso quod studiis attendunt in seminariis et iudicio superiorum bonam dant spem clericandi, candidati sacerdotii dici possunt, ideoque de eis valent rationes expositae.

B. *De caelibatu ecclesiastico* (1).

177. Inter conditiones quas Ecclesia requirit pro ordinum collatione, est etiam caelibatus, qui quidem in Ecclesia latina requiritur et in ipsis tonsuratis, tantummodo permittendo vestes clericales eis qui post tonsuram aut minores ordines uni et virgini nupserint; in Ecclesia autem graeca post matrimonium non admittuntur ad ordines maiores.

Iamvero questio de caelibatu inspicere potest 1^o sub respectu theologico et oeconomico an nempe licite et utiliter ab Ecclesia praescribatur; 2^o iuridice, an Ecclesia valeat sine laesione iuris socialis illum iubere.

Primo sub respectu, quaestio a nobis resoluta supponitur, et eius rationes sunt evidentes, cum et statum sanctiorem, iuxta evangelica et apostolica principia (I. ad Cor.) constituat, et ministros magis liberos et a curis saecularibus expeditos faciat, ideoque divino et proximorum servitio magis paratos. Cum autem quisque ad ordines maiores accedat matura aetate, libere accedit, ideoque non ipse gravatur ab aliis sed semetipsum gravat. Aliunde Ecclesia cum praecedentem probationem exigit, prudenter procedit eos tantum ad sacros ordines admittendo de quibus moralis est certitudo eos perseveraturos si media sanctificationis quae ipsorum status suppeditat, adhibere voluerint.

1 Vide in ephemeride mediolanensi *Scuola Cattolica*, Fasciculo mensis maii 1904, pulchrum tractatum de caelibatu ecclesiastico in occidente, auctore Placido Lugano.

178. Secundo sub respectu patet societatis ius non violari, cum exigere nequeat ut omnes matrimonio operam dent. Hoc enim negotium si sociale est, est etiam maxime et primario individuale, ideoque nemo ad illud cogi potest. Deinde si societati expedit multiplicatio populi, hoc tamen non semper verum est; deinde plura alia sunt societati utilia, inter quae non modo religio, quae esset motivum sufficiens in re nostra abstinendi a prole, sed etiam societati necessaria sunt exempla honestae vitae, ad quam valde conducit honestus clericorum caelibatus; etenim in societatibus populi numero refertis, semper plures sunt qui ex necessitate abstinere coguntur a statu matrimoniali; quibus proinde non voluntaria sed necessaria servanda est continentia, ideoque difficilior.

C. De clericis regularibus.

179. Cum maxime conducat tum zelo singulorum servando, tum efficaciae ministerii ecclesiastici, unio clericorum in Ordines aut Congregationes, vis enim unita fortior, hinc profecto ius est Ecclesiae, et clericos regulares instituendi aut clericorum Congregationes, et statuendi omnia quae ad ipsos referuntur, eorumque personalitas iuridica est a statu agnoscenda, analoge ad ea quae infra generatim dicemus de publica professione consiliorum evangelicorum.

§ 4.

DE SACRAMENTO MATRIMONII.

180. Matrimonium est naturaliter in officium naturae, ideoque in Dei ministerium, tamquam medium ab ipso praeordinatum ad rectam humani generis propagationem atque conservationem, coniuges enim corpus filiorum efformant, et Deus animam immortalem, ad se

directe ordinatam, infundit, ideoque parentes naturae et Deo ministrant. Est pariter matrimonium in officium individui, quia bonum non est homini esse solum, quod regulariter et singulis individuis applicandum est. Est insuper in officium societatis, ideo quia ipso mediante familiae procreantur et societas perpetuatur; ideoque directe et naturaliter refertur ad Deum, ad individuum et ad societatem, quamvis ad Deum et ad individuum primario, ad societatem secundario; etenim matrimonium aequè habetur in statu extrasociali, et societatis formatio est eius sequela, quae ipsum iam constitutum subaudit.

Hinc lege divina naturali, voluntate libera contrahentium, et lege sociali idest civili, regitur, respective pro finibus Dei, individui et societatis.

181. Quoniam autem difficile erat naturalem honestatem in matrimonio servare, ideoque recte Deo inservire, ipse Deus voluit matrimonium specialiter sanctificare et munire, ut supernaturaliter homini daretur ea vis qua naturaliter caret, leges matrimoniales recte servandi.

Hinc illud constituit repraesentativum supernaturalis unionis Christi Domini cum Ecclesia, et ad dignitatem sacramenti novae legis elevavit.

182. Iamvero aliquando disputatum est inter theologos et iuristas, an ipse contractus matrimonialis esset sacramentum, vel tantum materia sacramenti; in prima sententia, realiter separari nequeunt sacramentum et contractus matrimonialis, sed simul habentur; hinc ministri seu personae conficientes sacramentum matrimonii sunt ipsi contrahentes, et forma sacramenti sunt signa sensibilia quibus ipsi mutuum consensum manifestant. In altera sententia sacramentum contractui supervenit, et minister est sacerdos vel alius clericus

ab Ecclesia iurisdictionem habens, et forma sunt verba ab eodem ministro prolata.

183. In contractibus autem distinguitur validitas et liceitas; hinc aliae conditiones pro validitate et aliae pro liceitate; id obtinet et in matrimonio.

Quaesitum autem est primo an conditiones pro celebratione, et praesertim pro validitate matrimonii non elevati ad dignitatem sacramenti, prouti et nunc est apud infideles, possent praescribi tantum lege divina, vel etiam civili; secundo quid iuris quoad matrimonium christianorum. Prima quaestio respicit non modo loca missionum, sed etiam civitates nostras in quibus, praeter hebraeos, aliqui sunt non baptizati, ideoque infideles.

QUAESTIO PRIMA

DE IURE AUCTORITATIS CIVILIS IN MATRIMONIUM INFIDELIUM.

184. Quoad primam quaestionem sententia communis est affirmativa et pro lege civili, ut tenent Sánchez, Suarez, Schmalzgrueber, s. Alphonsus, (1) etc. Non defuerunt tamen quidam, quid id negaverint, ut Feller, Muzzarelli, Barruel, Perrone in suo opere *De Matrimonio christiano*; etiam nostra aetate viri ceteroquin optimi et de religione benemeriti in hanc concesserunt sententiam.

Facilius enim putabant hac ratione excludi posse

(1) S. Alphonsus in sua Theologia morali, De Matrimonio cap. III n. 981, proposito dubio 2º an impedimenta dirimentia ab Ecclesia adsignata obligent infideles, respondit: « tantum obligare infideles « viventes in locis Summo Pontifici temporaliter subiectis, cum ibi « universaliter constringantur, legibus contractuum ».

Supponit ergo pacificum esse obligari lege civili.

quemcumque interventum auctoritatis civilis circa impedimenta eiusdem matrimonii, praesertim dirimentia, post eius elevationem. Si enim circa validitatem, seu, ut dicimus, circa vinculum matrimonii, nullum ius erat principi ante eius elevationem, multo minus postea. Hoc, zelo ceteroquin laudabili assertum est, hac nostra aetate in qua potestates civiles sunt ut plurimum ab Ecclesia alienae.

Verum non ratio utilitatis, ut plurimum fallax, attendenda est, sed veritatis; et Apostoli, etiamsi ipsorum aetate magis hostiles essent (quamvis minus culpabiles ob statum infidelitatis) auctoritates civiles, tamen ipsis obediendum esse, aperte inculcabant in iis quae ipsorum sunt, iuxta evangelicum praeceptum, danda esse Deo quae Dei sunt, et Caesari quae Caesaris.

185. Hinc apparenti utilitate non obstante, contraria sententia communis est quia vera, imo pro se habet auctoritatem S. C. de Propaganda fide, in instructione data die 8 octobris 1631, missionariis Indiae, in qua haec leguntur: « Indi polygami, qui cum omnibus
« mulieribus suis convertuntur ad fidem et baptizan-
« tur, tenentur dimittere omnes uxores praeter pri-
« mam, quae sola est vera uxor, si in illius matri-
« monio, nullum intervenit impedimentum iuris natu-
« ralis vel positivi conditi ob eorum principe ». Item adest alia instructio S. Officii 29. oct. 1739. qua declaratur legitimum et indissolubile matrimonium sinensium, initum cum solemnitatibus iuxta leges et consuetudines imperii (1).

186. Ratio autem intrinseca est, res humanas subiici

I V. Giobbio. Diplomazia ecclesiastica, vol. III. pag. 113.

Hinc supervacanea est quaestio an alia instructio S. C. de Propaganda concinnata anno 1821. habuerit definitivam approbationem Summi Pontificis vel non.

ordinationi legis divinae et insuper auctoritatis civilis, in iis quae eius intersunt, nisi alia sit a Deo apposita constituta auctoritas. Iamvero ex dictis matrimonium maxime interest societatis civilis, et ad eam directe, quamvis secundo, refertur. Ergo primario regitur lege divina, sed secundo et lege humana. Auctoritas enim civilis, et ipsa a Deo constituta est ut negotia humana ordinet ad bonum commune.

187. Fautores autem contrariae sententiae, in eo innituntur quod matrimonium ex dictis sit primario in ministerium naturae et Dei, ideoque a lege divina unice pendens. Sed haec ratio probat quidem legem divinam ante omnia esse servandam, atque illegitimam esse quamcumque humanam praescriptionem eidem contrariam, sed non probat legem humanam superaddi non posse legi divinae. Cum autem societatis intersit negotium matrimoniale, eius auctoritati concedenda est facultas illud ordinandi, quia cuiuslibet societatis auctoritas dimetienda est a fine eius, salvo aliis finibus et finium subordinatione.

188. Sed instant adversarii, aientes matrimonium naturaliter inspectum, quia est in ministerium Dei, aliquid religiosi esse, et attingere relationes immediatas Dei et individui, ideoque excludere interventum cuiuslibet personae quae Dei vices non sustineat. Id confirmant et ex eo quod apud omnes gentes matrimonium sanctificatum sit ritibus religiosis, quod profecto naturalem sensum circa religiositatem eiusdem ostendit.

Respondemus 1^o quoad minorem; etsi lato sensu matrimonium naturaliter inspectum dici posset aliquid religiosi quia in eo ministratur Deo, et quidquid ad immediatum Dei servitium refertur, religiosi actus nomen mereri potest, tamen nequit dici actus religiosus proprie loquendo. Actus enim religiosus stricte

sumptus est quo homo Deum directe agnoscit ut Deum (idest ut suum Creatorem, Conservatorem, Finem, etc.) eique utpote tali cultum tribuit (seu adorationem, amorem, gratitudinem, etc.). Est enim religio « complexus relationum moralium inter Deum et hominem, » seu relationum quae in mentis cognitione et voluntatis affectu consistunt.

Iamvero si consideremus matrimonium per se, initur a contrahentibus directe ut habeant adiutorium simile sibi et ut prolem sibi acquirant quae aliquomodo ipsorum personam perpetuet in hoc visibili mundo et sit baculum senectutis. Ad hoc immediate tendit matrimonium prout allicit ex sui natura contrahentes; ergo natura seu Deus contrahentibus hunc finem immediate et directe obicit, etsi Deus per hoc aliquid ultra intendat. Cum enim prolis educatio magnam secumferat difficultatem, hinc validis stimulis physicis et moralibus (seu affectus) Deus ad statum matrimoniale allicit, ut affectuum impulsione homines facile ducat ad eum terminum ad quem difficile tenderent considerationibus mere rationalibus. Quamvis autem homo iustus in contrahendo et id intendat, nempe ut prolem procreet ut sic multiplicet veri Dei cultores in hac et in futura vita, tamen immediatus finis est ut procuret sibi adiutorium simile sibi et ut in hac vita prole sua laetetur. Imo hic finis habendi prolem non est essentialis; secus coniuges tenerentur matrimonium consummare, quod est falsum iuxta omnes theologos. Ergo finis essentialis est adiutorium mutuum. Hinc falsum est matrimonium directe respicere relationes immediatas individui cum suo Creatore, cum potius respiciat relationes immediatas cum semetipso ut habeatur illud adiutorium simile sibi et prolis laetitia.

Quod autem matrimonium apud omnes gentes sancti-

ficatum sit ritibus religiosis, rigoroſe loquendo verum non eſt, cum in ipſa Eccleſia, etiam ubi Tridentinum publicatum eſt, nullus requiratur ritus religioſus pro eius validitate, ſed tantum regulariter pro liceitate. Deinde ipſe ritus religioſus eſt utique res religioſa, ſed non ſemper religioſa eſt res quae per eum celebratur. Solet enim accedere rebus quoque profanis, magni praesertim momenti, ut ſanctificentur vel divinum adiutorium in eis peragendis imploretur. Ita dux ad bellum profecturus, benedictionem armis ſuis procurat; imo quotidie cibum ipſum benedicimus. Non eſt ergo mirum ſi homines matrimonium, quod tanti momenti eſt, ritu religioſo in ſtatu quoque naturae ſanctificare curaverint, quamvis in ſe proprie religioſam naturam non praeseferret.

189. Quoad maiorem, id eſt quoad principium generale ſubintellectum in proposita difficultate, hoc erat, nempe auctoritati civili in naturali ſtatu nullum eſſe poſſe ius in re religioſa ſocialiter conſiderata.

Agentes generatim de iure civilis poteſtatis in re religioſa in ſtatu merae naturae, vidimus lib. I. part. I. cap. 3. art. 3. q. 2., hoc principium eſſe ſimpliciter falſum, cum et ius ſit ei negativum excludendi abusus, et etiam poſitivum, ſaltem devolutive, ſi nulla alia ſit conſtituta auctoritas religioſa iure gentium vel poſitivo cuiusque ſocietatis.

190. Verum nos non vindicamus poteſtati civili ius ordinandi matrimonium in ſtatu naturae, ex eo quod eſt actus religioſus ſocialis, ſed quia refertur directe etiam ad bonum ſociale.

191. Sed gravior difficultas adverſariorum eſt haec: « Matrimonium, utpote quod originem dat familiis, antecedit formationem ſocietatis, ideoque abſurdum eſt ſubiiciatur legi ipſius ſocietatis ».

Verum vel consideramus matrimonium eorum qui contrahunt non adhuc extante societate, vel eorum qui in ea iam constituta; si primum, certe physice impossibile est lege sociali ordinetur; sed non de his loquimur; si secundum, tunc potest et lege civili dirigi si sermo sit de potentia physica; neque absurdum est possit et iure. Etenim difficultas subaudit hoc aliud principium, nempe societatem utpote historice derivatam a praeexistente persona physica et morali seu familia, nihil posse in iis quae ei causam dederunt. Sed hoc est falsum, quia natura non modo intendit societatem civilem ad mutuas ordinandas relationes familiarum, sed ad integrum bonum temporale praesens totius hominis; seu eius ius perficit integrum hominem, ideoque sibi subordinat integrum hominem; hinc reagit et in eos qui ei causam dederunt, ideoque familiae, ea constituta, amittunt suam independentiam, et quamvis conservent aliqualem autonomiam, tamen oportet modificent suam iuridicam positionem et suas internas relationes, prout exegerit ratio boni communis, cuius iudex est ipsa socialis auctoritas. Ideoque primae familiae constituuntur iure absque societate civili; sed ea efformata, melius constituuntur iure civili.

Hoc valet non modo quoad matrimonium, sed et quoad reliqua, ex. gr. relationes patrisfamilias cum filiis, quae utique sunt naturales, sed non modo ponuntur sub vigilantia societatis ut suppleat et corrigat, verum etiam modificantur prout exegerit ratio boni communis. In societate enim oportet socios coexistere, ideoque non quidem amittere suum statum sed illum modificare.

QUAESTIO SECUNDA

DE IURE CIVILIS AUCTORITATIS
IN MATRIMONIUM CHRISTIANORUM.

192. Resoluta hac quaestione, superest secunda: quid iuris auctoritati civili circa matrimonium christianorum, quod ad dignitatem sacramenti elevatum est?

Et quidem si vera esset sententia quae contractum distinguit re et separat a sacramento, nisi positiva obstaret Dei dispositio, quae probanda esset, admitti adhuc deberet ius potestatis civilis circa validitatem matrimonii seu circa vinculum. Etenim ipsa rei natura immutata non fuisset, ideoque sacramentum superveniret contractui iam legitime existenti, et esset legitimus cum satisfaceret legi tum divinae tum civili.

193. Hinc regalistae omnes solebant mordicus hanc defendere sententiam. Verum haec sententia in praesenti nullo modo defendi potest. Etenim summus Pontifex Pius IX. fel. me. in litteris die 19 Septemb. 1852 ad Regem Sardiniae datis declaravit, inter christianos nullum subsistere matrimonium ut validum contractum, quod sacramentum non fuerit, ideoque inter christianos rationem sacramenti et contractus esse inseparabilem, seu, quod idem est, sacramentum et contractum in facto non distingui.

« Fidei enim dogma est (ait ibi Pontifex), matrimo-
« nium a Domino nostro Iesu Christo ad sacramenti di-
« gnitatem erectum esse; atque ex Ecclesiae doctrina
« sacramenti ratio non qualitatem aliquam accidentalem
« refert contractui superadditam, sed ad ipsius matri-
« monii essentiam pertinet ita ut unio coniugalis in-
« ter christianos non sit legitima nisi in matrimonio
« quod sit sacramentum, extra quod non habetur nisi
« concubinatus ».

194. Theologice autem haec sententia probatur ex ea Concilii Tridentini definitione, sess. 24. cap. I. *de ref. matrim.* qua edixit matrimonia clandestina post ipsius Concilii decretum specialissime promulgatum, non amplius fore legitima et rata. Igitur ante Concilium Tridentinum matrimonia clandestina, seu absque legitimi ministri Ecclesiae presentia celebrata, erant legitima et rata; item legitima et rata sunt et nunc ubi citatum decretum Concilii Tridentini non fuit promulgatum.

Iamvero matrimonium dicitur ratum, quod est christianorum proprium, rationem habens sacramenti (1). Ergo benedictio ministri Ecclesiae non est de essentia huius sacramenti; hinc minister huius sacramenti non est minister Ecclesiae, sed sunt ipsi contrahentes, et contractus a sacramento non distinguitur. Quod patet et ubi Concilium Tridentinum est promulgatum; etenim requiritur quidem ad validitatem praesentia parochi aut ordinarii, vel delegatorum ab eis, sed pro validitate sufficit mera ipsorum praesentia, quin benedictionem impertiantur aut aliquid aliud agant, imo etsi sint contradicentes. Ergo parochus ex mente Concilii non est minister sacramenti, sed testis qualificatus seu auctoritativus, cuius praesentia ex dispositione Concilii est necessaria ut contrahentes sint habiles ad contrahendum.

195. Posita igitur identitate sacramenti cum contractu, sequitur potestati civili omne ius ademptum esse circa vinculum matrimoniale, ideoque omnes causas illud respicientes, ad forum ecclesiasticum natura sua spectare. Id autem theologi Ecclesiae definitionibus ostendunt; hinc secundae quaestioni propositae, negative respondendum est.

[1] Cap. 7. *de Divortiis.*

Quidquid attingit vinculum, attingit ipsum sacramentum; hinc quidquid refertur ad eius validitatem aut ad liceitatem actus per se inspectam, refertur ad sacramentum; hinc matrimonium attingit quatenus est elevatum, seu supernaturale effectum. Iamvero quidquid supernaturale est, est competentiae ecclesiasticae, et absurdum est esse competentiae civilis, seu potestatis ordinis naturalis. Ergo et matrimonium.

196. Et quoniam et sponsalia relate ad suam validitatem, referuntur directe ad vinculum contrahendum vel non, hinc ipsorum quoque iudicium est competentiae ecclesiasticae (1).

Diximus: quidquid refertur non modo ad validitatem, sed etiam ad liceitatem vinculi per se inspectam; etenim aliae sunt dispositiones quae requiruntur pro ordinata et honesta susceptione alicuius sacramenti, et in genere pro cuiuscunque negotii expeditione, attenta tantum rei natura, et aliae quae per accidens supervenire possunt ex extrinsecis adiunctis; iudicium de illis vel ordinatio positiva in re religiosa ad Ecclesiam spectat; quoad secundas locum habere potest et iustum praeceptum alterius auctoritatis, puta patrisfamilias, aut principis, de cuius tamen iustitia iudicare semper spectat ad Ecclesiam, tanquam ad supremum moralitatis tribunal. Ex. gr. statuere quaenam requirantur pro recta missae auditione, ratione ipsius actus, ad Ecclesiam spectat, sed quando Ecclesiae praeceptum non urget, poterit paterfamilias iusta de causa id interdicare filio, puta quia indiget eius ministerio. Tunc actus fit illicitus, non ratione sui, sed per accidens, ob extrinsecam circumstantiam, et praeceptum patris non est

I Vide proposit. 58. damnatam a Pio VI. in Bulla *Auctorem fidei*.

religiosum, ideoque non attingit auditionem missae quatenus actus est religiosus, sed est ob necessitatem familiarem, ideoque eius transgressio offendit quidem pietatem, seu obedientiam erga parentes, sed non religionem. Hinc male quis deduceret ex hoc accidentali et extrinseco iure, ius esse patrifamilias ordinandi rem religiosam, cum eam non attingat quatenus religio est, sed ratione circumstantiarum.

Id et in re matrimoniali evenire potest. Hinc proprie dicta impedimenta matrimonii etiam impediencia, ab Ecclesia declarantur vel constituuntur, quamvis ratione alterius virtutis possit aliquid induci et ab alia auctoritate. Sed semper spectat ad Ecclesiae iudicium decernere an haec iure vel iniuria interveniat. Hinc Ecclesia inter sua vetita, et deficientiam rationabilem consensus parentum pro minoribus recensuit.

197. Igitur cum matrimonium referatur ad Deum, cui ministrat, ad officium individuale et ad officium sociale, Deus illud ordinavit positiva lege, excludendo auctoritatem civilem, et omnem potestatem Ecclesiae sui loco concedendo. Iamvero id Deus praestitit non modo iure supremo quo pollet in ipsam societatem, sed et quia cum matrimonium primario referatur ad ipsum cui ministrat, Deus est praecipuus interesse habens in matrimonio, etiam naturaliter loquendo, ideoque exclusit societatem civilem ab eo ordinando, cum ad eam directe quidem, sed minus principaliter referatur. Ordinatio autem Dei, sapientissimi, semper optima est et relate ad individuum atque societatem.

198. Hinc iniuste et insipienter quererentur principes de suo inminuto iure, tum quia Deus est supremus Dominus societatis ipsius, tum quia ille est cui matrimonium principaliter inservit, tum tandem quia Deus

consulendo sanctitati matrimonii optime providit et bono sociali.

199. Sed argui posset, leges civiles nequire excludere leges Dei et Ecclesiae, sed cumulative cum eis concurrere posse pro ipsa validitate et liceitate obiectiva matrimonii, ita ut nequeant illud prohibere aut omittere quod illae praecipiunt, vel praecipere quod prohibent, sed posse supperaddere, ut supra diximus et de ordinis sacramento, adeo ut pro valida et obiectiva licita celebratione matrimonii necesse sit servare universas has leges; hinc et ministerium Ecclesiae non posset ministerium suum praestare nisi servatis quae iuste antecederent lex civilis praeciperet.

200. Sed applicando matrimonio theoriam de materiis mixtis lib. I. part. 1^{ae} expositam, solvitur difficultas; idest in re supernaturali vel supernaturalizata, quoad rei substantiam et effectus inseparabiles, competens est tantum Ecclesia, cum repugnet auctoritatem ordinis naturalis, prout est civilis, attingere res supernaturales.

201. Sed remanet videndum an auctoritas civilis excludatur quoad omnes effectus matrimonii etiam temporales. Et distinguendum est inter effectus inseparabiles ab ipsa substantia, et effectus separabiles qui licet sint naturales seu sponte sua fluentes iuxta normalem cursum rerum humanarum, tamen non sunt rigoroze essentialia.

Quoad primos, logice sequitur eos agnoscendos esse et in ordine temporali; qui enim agnoscere tenetur causam ut legitimam, tenetur agnoscere ut legitimos et effectus ab ea inseparabiles; hinc qui tenetur agnoscere aliquod matrimonium ut validum et substantialiter licitum, tenetur agnoscere ut legitimos et eius effectus vere necessarios, secus esset contradictio. Hinc coniuges qui valide coram Ecclesia contraxerint, a

lege civili vere ut coniuges habendi sunt et eis agnoscenda iura coniugum substantialia; item proles habenda est ut legitima, et agnoscendae sunt obligationes parentum substantiales erga eamdem, et eius iura substantialia.

202. Quaeri potest an lex civilis valeat constituere matrimonium quod vocant civile, eique iura veri matrimonii tribuere, saltem ad praecavenda mala minora. Et respondetur negative.

Cum enim non sint facienda mala ut eveniant bona, cumque inter christianos quaelibet unio maritalis extra sacramentum matrimonii sit intrinsece mala, nequit praecipi neque ei valent agnosci iura matrimonialia, cum lex civilis nequeat supplere defectum veri matrimonii, a quo tantum valent derivare.

Ex eadem ratione, quod nequeant fieri mala ut eveniant bona, sequitur neque divortium perfectum posse a lege civili concedi, praetextu vitandi mala maiora.

Item patet matrimonium civile haberi non posse iuridice ut verum matrimonium, ob civilem aequalitatem debitam aliquando dissidentibus. Ut enim lib. I. part. I^{ae} cap. 5. a. 3. § 1. q. 5. expositum est, nequeunt agnosci effectus iuridici actus in se invalidi, quoties auctoritas civilis nequit causam invaliditatis supplere, quod in re nostra verificatur.

203. Praeter hos effectus inseparabiles, sunt et alii qui rigore separari possunt. Ex. gr. quantitas dotis debita; iura successionis coniugum erga parentes, sive quoad nobilitatem sive quoad bona; item successionis coniugum reciproce, vel filiorum ipsorum quoad bona aut nobilitatem, praesertim si concurrant duo successiva matrimonia, unum contractum iuxta leges ecclesiasticas tantum, et aliud etiam iuxta leges civiles. Hos omnes appellabimus effectus mere civiles;

etenim rigore sunt ab essentia matrimonii separabiles; etsi enim coniuges debeant sibi adiutorium, tamen quantitas bonorum materialium ab uxore tradenda viro, seu dos, non est iure naturae determinata neque rigore necessaria; item a patribus danda sunt filiis alimenta et educatio, regulariter proportionata statui ipsorum, sed haereditas in nobilitate pendet a iure civili; item haereditas quoad bona, a iure civili potest saltem modificari iuxta exigentias societatis.

Iamvero cum hi effectus sint de se temporales, spectant per se ad auctoritatem civilem; cumque sint separabiles a substantia, hinc non adscribuntur ut accessorium principali, auctoritati Ecclesiae, sed de eis disponit lex civilis. Hinc potestas civilis iure leges fert de conditionibus sive antecedentibus, sive concomitantibus sive subsequentibus matrimonium, ut his effectibus gaudeant contrahentes, dummodo in his legibus servetur subordinatio Ecclesiae, quatenus nihil praecipiat quod ipsa prohibet, aut prohibeatur, vel spernatur quod ipsa imperat.

204. Sed ulterius quaeri potest an matrimonium valide contractum sed contra leges civiles, non modo effectibus civilibus possit destitui, sed etiam ulterius puniri in contrahentibus aut in ministro Ecclesiae.

Et distinguendum est: fieri potest matrimonium in facie Ecclesiae fuerit tantummodo validum et non licitum, vel etiam fuerit licitum. (In primo casu loquimur de licetate, quam supra diximus obiectivam, non attendendo subiectivam quam ipsa lex civilis attingere potest).

Si primum, puniri utique potest ab auctoritate ecclesiastica: hinc civilis auctoritas posset intervenire praecedente iudicio Ecclesiae; etenim actus est illicitus ob violatas leges Ecclesiae, de quarum violatione iudicium ferre spectat ad Ecclesiam.

Hoc posito, civilis auctoritas potest intervenire 1^o nomine Ecclesiae, eius sententiam executioni mandando; 2^o nomine suo quoad laicos, quoniam has leges Ecclesiae servari plurimum interest et pro bono temporali; sed tunc servandum est quod diximus lib. I. generice de protectione religioni debita a statu, idest non plus punire quam patiatur ipsa Ecclesia; hinc punitio nequit consistere in privatione iurium substantialium matrimonii. Hoc enim esset ipsam validitatem actus inanem reddere, et sic etiam eluderetur lex ecclesiastica.

Si autem secundum, idest si actus esset coram Ecclesia et validus et licitus, ab auctoritate civili non posset puniri, sed tantum privari effectibus mere civilibus. Nequit enim puniri quod honestum est.

205. Sed obiici posset ad plenam actus honestatem requiri et observantiam legum civilium, quae de cetero iuste superadditae sint ecclesiasticis; hinc quoniam bonum ex integra causa et malum ex quocumque defectu, posset huiusmodi actus puniri ob inobedientiam legi civili.

Verum animadvertendum est 1^o Ecclesiam aliquando ob exceptionales circumstantias habere ut omnino iusta et honesta matrimonia (et item dicatur de reliquis), quae non satisfaciunt legibus civilibus, ex. gr. matrimonia conscientiae (quorum postea existentia detegi potest); hinc nullo modo possunt a lege civili puniri, quia contradiceretur Ecclesiae, iudicando illicitum quod ipsa iudicat undequaque honestum. Hinc tantum possunt destitui effectibus mere civilibus.

206. 2^o Sunt alia matrimonia quae Ecclesia declarat honesta per se inspecta, cum nullo impedimento ab Ecclesia recognito afficiantur; sed tamen non satisfaciunt legibus civilibus quas Ecclesia iudicat posse ser-

vari, etsi eas nomine suo non praecipiat; haec matrimonia sunt obiective iusta, sed subiective illicita, per accidens, non quatenus actus religiosi, sed ob extrinsecam circumstantiam. Quaeritur an ratione huius circumstantiae possint a lege civili puniri vel non.

207. Vel sermo est de ministro Ecclesiae, vel de ipsis contrahentibus. Minister Ecclesiae nequit puniri, quia esset ei legem praescribere in sui ecclesiastici ministerii exercitio. Iamvero hoc est contra Ecclesiae libertatem et independentiam.

Insuper exigere a ministro observantiam legum civilium, esset exigere concursum utriusque legis pro substantia actus, quae cadit unice sub lege ecclesiastica; sed hoc est iniustum. Ergo minister puniri nequit ob non servatas leges civiles.

208. Ex hac ratione apparet ipsam celebrationem matrimonii in forma Ecclesiae, omissis praescriptionibus civilibus, neque puniri posse in ipsis contrahentibus, sed tantum puniri posse omissionem praescriptionum civilium, quae poterant absque iniuria erga Ecclesiam observari independentem ab ipsa substantia.

Haec quoad secundam quaestionem.

209. Sed obiici posset: quid si status non sit catholicus, ideoque putet se adhuc esse in iusta possessione iuris naturae circa impedimenta matrimonio apponenda ideoque exigeret observari et a catholicis eam formam quam pro validitate praescribit?

Resp. aliam esse quaestionem iuris, aliam prudentiae. Quoad ius, huius status persuasio est falsa, ideoque destituta iure vero; ad summum habet quoddam ius putativum, seu opinionem inculpabilem de suo iure. Sed cum ex dictis lib. I. n. 573, argumenta quae veritatem christianae religionis ostendunt, saltem probabilia ei apparere debeant, ideoque admittere debeat ex

civibus plures esse posse qui eisdem moveantur, cumque aliunde christiana religio satis consulat bono sociali in suis praescriptionibus, imo locum relinquat legi civili pro effectibus mere civilibus ordinandis, oportet permittat contrahere in forma Ecclesiae, contentus suis praescriptionibus pro effectibus mere civilibus; secus laederet libertatem conscientiae suorum subditorum.

Quoad Ecclesiam autem, pertinet ad eius prudentiam decernere quas leges civiles debeat adoptare, et sic facere religiosas, et quas permittere pro effectibus civilibus, sicut ad ipsam spectat iudicare quas respuere debeat quia dogmati contrarias. Quod si status insisteret in suis iniustis legibus, tunc a fidelibus attendendae non sunt, et sumus in casu in quo per accidens necesse est detrimentum temporale sustinere ob libertatem spiritualem.

ARTICULUS III.

DE IURE ECCLESIAE QUOAD SACRAMENTALIA, PRAESERTIM CIRCA CULTUM DIVINUM.

§ 1.

DE IURE ECCLESIAE QUOAD SACRAMENTALIA GENERATIM.

210. *Sacramentalia* substantive sumpta sunt « signa
« ad cultum Dei externum et fidelium salutem ab Ec-
« clesia instituta, ob auctoritatem a Christo D. acce-
« ptam, ad gratiam fidelibus eis pie utentibus facilius
« impetrandam intuitu precum ipsius Ecclesiae, et ad
« alios supernaturales effectus in ordinaria eiusdem
« Ecclesiae potestate contentos, impertiendos, praeter
« proprios Sacramentorum et sacrificii eucharistici ef-

« fectus » (1). Ita habentur diversi solemnes actus cultus externi sive concomitantes eucharisticum sacrificium et sacramentorum administrationem, sive stantes per se; publicae preces, supplicationes diversae, consecrationes, benedictiones, dedicationes, rituales exorcismi quibus Ecclesia potestatem suam in daemones exercet, etc. Legimus in Evangelio ipsum Dominum signa quaedam adhibuisse in exercitio suae potestatis; sic insufflavit in Apostolos quando eis contulit Spiritum Sanctum ad remittenda peccata; item in ultima coena, in signum munditiae ad Eucharistiam suscipiendam necessariae, pedes Apostolorum lavit, subiungens: « Exemplum dedi vobis ut quemadmodum ego feci et vos faciatis ». Haec signa quatenus impetrant gratiam, non operantur ex opere operato ut sacramenta, sed ex opere operantis; tamen ex adnexis Ecclesiae precibus eiusque institutione, multum iuvant pie utentes, ideoque plus iuvant quam opera pietatis, privata singulorum actione praestita.

211. Ecclesiam hac pollere potestate theologi ostendunt, nec non perpetua eius praxis; imo confirmat omnium religionum factum, quae ritus quosdam plus vel minus solemnes aliaque sensibilia signa ab auctoritate religiosa instituta habuerunt et habent quibus proselyti adiuventur in cultu divinitati praestando et se ipsos eidem acceptos reddendo. Et sane, ipsa rei natura ostendit hanc potestatem ad auctoritatem religiosam referri, ideoque verae Ecclesiae deesse non posse. Cum enim proprium sit auctoritatis religiosae, omnem cultum divinitatis determinare et ordinare, nec non fideles adiuvere ut Deo accepti fiant, cumque Ec-

1 V. Guillelmum Arendt S. I. « *Analecta ecclesiastica*, » anno 6^o 1898^o fasc. 5^o Romae, Via Cavour 295.

clesia positive habuerit ad hoc plenissimam auctoritatem, et preces Ecclesiae utpote sponsae sine macula et sine ruga, semper acceptae sint Deo, ideoque singularem praeseferant efficaciam, patet ei competere potestatem sacramentalia instituendi.

212. Sed insuper haec potestas est eius exclusive. Etenim directe refertur ad finem spiritualem; imo per se refertur unice ad finem spiritualem, imo supernaturalem, cum sacramentalia tendant ad gratiam impetrandam atque sanctificationem procurandam, augendam et conservandam ex sui natura. Quae autem directe ad vitam aeternam ordinantur, exclusive pertinent ad Ecclesiae potestatem.

213. Quod si per accidens conflictus aliquis exurgat cum fine temporali, tunc regulae generales sunt applicandae; idest 1^o si conflictus vitari poterit, alia ratione aequae providendo fini spirituali, faciendum est; verum iudicio et auctoritate potestatis ecclesiasticae, cum potestati civili sit tantum facultas reclamandi; 2^o si conflictus vitari non potest, praevalet ordo spiritualis.

214. *Divisio* sacramentalium magis vulgata, ea est quae ab effectibus desumitur, et innuitur per notum versiculum: «Orans, tinctus, edens, confessus, dans, benedicens».

Orans (1) indicat orationem dominicam et ceteras preces publicas idest factas nomine Ecclesiae. *Tinctus*, aspersionem aquae lustralis et sacras in diversis consecrationibus unctiones. *Edens*, manducationem esculentorum a sacerdote benedictorum. *Confessus*, confessionem generalem in missa, communionem et officio divino (Confiteor). *Dans* eleemosynam ex praescriptione Ecclesiae. *Benedicens*, benedictionem Summi Pontificis, Episcopi, Abbatis, Sacerdotis.

[1] V. Pesch; Prael. «Dogmat.», vol. VI, n. 333.

Sed nobis alia divisio, nostro scopo magis accomodata est proponenda: idest sacramentalia vel diriguntur ad privatam cuiusque salutem et sanctificationem, vel ad publicum sanctificationis ministerium; rursus quaedam ad vivos iuvandos, quaedam ad mortuorum cultum referuntur; quae quidem alia ad primum praecedentis divisionis membrum referuntur, utpote suffragia specialia, quaedam ad secundum, utpote ad publicam communionem et charitatem erga defunctos exercendam ordinata.

215. Rursus quaedam privatam respiciunt salutem et sanctificationem, singulorum distributive, et quaedam plurium collective seu per adsociationes; quae quidem aliquando et referuntur ad publicum ministerium sanctificationis aut charitatis; id enim praestant ordines et aliae adsociationes religiosas iuxta divisiones infra tradendas.

Iamvero de his agemus articulo praesertim V. et etiam VI. In qua tamen materia, quod interest, non tam est potestas Ecclesiae praescribendi ritum religiosum (sacramentale) quo personae Deo consecrentur aut in piam coeant confraternitatem, sed est ipsa potestas instituendi ordines, religiosas congregationes, pias adsociationes. Omittimus autem pertractare de sacramentalibus quae ad privatam referuntur salutem et sanctificationem vivorum, ut benedictiones innumerae, vel ad speciale aliquorum suffragium mortuorum etsi fiant publice, ut anniversaria et alia huiusmodi; de his enim nihil pro re nostra dicendum occurrit; sufficit enim vindicasse Ecclesiae generalem potestatem haec instituendi et ordinandi. Hinc ad eam exclusive pertinet invigilare ne superstitiones in his inolescant; quatenus autem ad publicum cultum referuntur, ut

dicta anniversaria et alia solemnia suffragia, comprehenduntur in secundo primae divisionis capite.

216. Tamen non defuerunt aliquando et in hac re usurpationes quaedam civilis potestatis, ut sibi vindicaret interventum, praetextu superstitionis; verum refutatio huius abusus pendet omnino a principiis generalibus hactenus enunciatis, id est quidquid directe refertur ad finem spiritualem competit Ecclesiae.

Igitur specialiter de iis sacramentalibus agendum in praesens est quae referuntur ad publicam sanctificationem vivorum quae in publico cultu divino consistit, et de iis quae ad publicam communionem cum defunctis; et quoniam pro utroque scopo societas religiosa indiget locis specialibus, hinc 1° agendum de loco cultus divini; 2° de tempore; 3° de modo, seu de ipso cultu divino, idest de actibus et ritibus in quibus consistit; deinde speciatim de communione cum mortuis; hinc 4° de loco sepulturae, seu de coemeteriis; 5° de modo curandi corpora defunctorum; 6° de sepultura ecclesiastica concedenda vel non.

§ 2.

DE CULTU DIVINO.

Et 1° de templis; 2° de processionibus; 3° de exponendis sacris imaginibus.

A. *De templis.*

217. Ut cultus publicus rite exerceatur, necessaria sunt loca determinata, seu templa, in quibus plebs christiana conveniat, et verbum Dei audiat, sacrificio adsistat et aliis ecclesiasticis functionibus participet. Hinc quoniam Ecclesiae ius est acquirendi sibi necessaria, ius est sibi haec loca procurandi ac respondentia aedificia elevandi, ipsorumque numerum et formam exclusive determi-

nandi, cum de obiecto agatur quod directe fini spirituali inservit. Hinc abusus est si civilis potestas velit numerum templorum limitare sub praetextu excessivae quantitatis; iudicium enim de hac re ad ecclesiasticam spectat auctoritatem, quia cui spectat iudicium de fine, spectat et iudicium de mediis proportionatis.

Item abusus est exigere praecedentem gubernii permissionem. Etenim ius Ecclesiae est liberum et exclusivum in hac materia, utpote per se spiritualis.

218. Et quoniam templis plures conceduntur et concedendae sunt, ut infra videbimus, immunitates, hinc quidam regalistae ius guberniorum limitandi numerum templorum aut concedendi praeventivam facultatem eadem erigendi, deducebant ex eo quod gravent societatem, ex. gr. quia non solvunt publica vectigalia (tassa fabbricati etc.). Verum quoniam Ecclesia ius habet erigendi has immunitates, pro tot exigit templis, quod necessaria iudicaverit. Si autem essent concessionem ex mero favore status procedentes, ad summum sequeretur eas a statu limitari posse templis sibi benevisis, non autem simpliciter impediri posse erectionem templorum quae Ecclesia vellet, etsi carentia privilegiis. Gravamen autem quod exinde societati derivat, est iustum et abunde compensatum ex beneficiis quae religio in societatem infert, ut dicitur generaliter de privilegiis Ecclesiae.

219. Sicut Ecclesiae ius est liberum templa erigendi, ita et collabentia restituendi, imo quodam sub respectu maius, cum plus offendatur ex impedimento conservandi quae habet, quam ex prohibitionem nova erigendi; hoc ius proinde tantum per summam iniuriam ei denegari potest.

220. Item notandum est quoad formam, apud omnes gentes, templa specialem sibi vindicasse structuram qua

et accommodata essent usui sacro et multae plebis unioni, et exterius repraesentarent suam destinationem. Igitur ius est Ecclesiae suis templis dandi eam formam quam expedire putaverit, servatis tantum iustis aedilitatis legibus: dicimus iustis, si enim ex odio in Ecclesiam leges laesivae de hac re conderentur, profecto ab Ecclesia possent iure sperni et cassari.

Neque obiici potest specialem formam aliquando prohiberi sectis acatholicis aut non christianis; item nova templa aedificare vel etiam collabentia reparare. Haec enim fiunt erga sectas tantum toleratas, nos autem agimus de vera Ecclesia quae habet ius existendi, quod a societate unice agnoscitur vel saltem agnoscendum est ut par ceteris, iuxta dicta de relationibus Ecclesiae cum statu falsae aut mixtae religionis, lib. I. partis primae.

221. Nostra aetate apud plures gentes ipsa proprietas templorum Ecclesiae negata est, et vindicata statui. Verum status posset sibi tribuere ius aliquod tantummodo in templa a se erecta. Dicimus ius aliquod, idest ius patronatus; hoc enim tantum Ecclesia concedit iis qui aedificia a se erecta in templum converti petant; sine consecratione enim vel benedictione non habetur inter christianos formaliter templum aut oratorium publicum, sed aedificium mere profanum, etsi materiale templi structuram praeseferat. Aedificator igitur qui petit aedificium suum consecrari aut benedici, hoc ipso renuntiat suae proprietati, eamque in Ecclesiam transfert, vel saltem eam gravat perpetua servitute in favorem Ecclesiae, cuius iurisdictioni eam subdit. Talis conditio est intrinseca ipsi rei naturae; etenim templum consecratum subtrahitur commercio humano et Deo exclusive dicatur, ideoque in ordine profano fit nullius, sed pendet unice ab auctoritate re-

ligiosa quae Deum repraesentat. Si autem fiat tantummodo publicum oratorium per benedictionem, destinatur adhuc exclusive cultui publico, ideoque saltem gravatur perpetua servitute in favorem societatis religiosae. Neque obici posset templa spectare ad publicam religionem; atqui publica religio ad statum pertinet; ergo et templa. Responderi enim debet, templa spectare ad religionem, quae etiam hoc sensu dicitur publica, quatenus a civili societate amplectenda est et defendenda, non autem quatenus a civili potestate moderanda sit.

222. Apud nonnullas gentes, recentiori aetate obtinuit bona Ecclesiae fuisse a statu usurpata, inclusive ad templa ipsa; sed horum pars restituta est Ecclesiae pro exercitio cultus. Disputatum est vel etiam disputatur, an status restituerit Ecclesiae proprietatem horum templorum, vel tantum usum.

Locutio legis potest esse clara, ex. gr. si dicat; templa sunt proprietates nationales; Ecclesiae tamen usus eorundem (omnium vel aliquorum) conceditur. In hac hypothesi, de iniusta lege conqueri possumus, sed non disputare de eius sensu. Si e contra locutio legis non sit clara, rationabilis praesumptio esset quod proprietas fuisset Ecclesiae restituta. Debemus enim praesumere legem civilem iuri divino, ecclesiastico et communi noluisse contradicere, praesertim si adfuisent concordata cum Ecclesia.

Multo magis si lex civilis agnosceret Ecclesiae ius possidendi quaedam alia bona; debet enim praesumi voluisse ante omnia recognoscere ius possidendi ea quae sunt magis necessaria et sacra. Apud nonnullas gentes factum est ut compositis rebus publicis initio superioris saeculi, fuerint Ecclesiae restituta quaedam bona, et quod iurisprudentia et usus etiam civilis auctorita-

tis, hanc restitutionem interpretarentur de ipsa proprietate. Sed multis elapsis annis, puta dimidio saeculo, coeperunt fisci procuratores, diversis subtilitatibus, legis sensum restringere ad nudum usum. Iamvero patet id omnino irrationabile esse, etiam praescindendo a praescriptione quae favore Ecclesiae supervenire potuerit. Etenim legis sensus pendet ab intentione legislatoris; quae profecto melius innotescere debuit eo tempore quo lex lata est, quam multos post annos.

Multo autem magis favore Ecclesiae pronuntiandum est, si ipsa auctoritas civilis, aevi illius in quo bona restituta sunt, facto suo legem suam favore Ecclesiae interpretata est.

223. Apud plures gentes, lex civilis obligat municipia ad expensas necessarias pro templis conservandis. Hinc nonnulli deducere voluerunt, legem civilem templorum proprietatem tribuisse ipsis municipiis. Dominus enim est, qui consulit rerum suarum conservationi. Sed male ita arguitur. Potest enim lex obligare municipia ad recensitas expensas non titulo domini, sed servitii publici.

Religio enim inservit civitati vel saltem magnae eius parti.

Et notandum est potuisse civitati imponi tale onus, etiam ex titulis specialibus. Puta si bona Ecclesiae quibus sibi consulebat, fuerint a societate civili usurpata. Item si abolitae decimae; quae si restituerentur, posset adhuc Ecclesia providere; multo magis si ei recognosceretur, prout iustum esset, libera acquirendi et possidendi facultas.

224. Quammaxime decet templa esse immunia ab auctoritate laica, et Ecclesia ius habet hanc immunitatem sibi vindicandi iuxta regulas generales de immunitate quas exponimus.

Templa I. eximuntur a profanis usibus; etenim non concordant usus profani et sacri; iuxta indolem humanae naturae necesse est ut in actibus externis maxima reverentia circumdantur obiecta sacra, seu personae, loca et res quae divino cultui destinantur; est enim lex fundamentalis adassociationis idearum. obiecta nobis in mentem revocare ea ad quae eadem servire animadvertimus; hinc quae profanis usibus profanos sensus excitant, esto honestos, sed positive non sacros; proinde necesse est templa sacris tantum inserviant, si utiliter ad sacra nos excitare debent: et proinde immunia sint ab usibus profanis, si qui lege imponantur ceteris aedificiis; et multo magis iniusta esset lex quae specialiter templa gravaret. Hinc Ecclesia sua templa consecrat vel benedicit pluribus ac solemnibus sacramentalibus.

225. Iudicare autem quinam usus sint profani, et proinde vitandi in templis, et quinam sint sacri, larga saltem significatione et proinde in templis admittendi, spectat ad Ecclesiam. Iamvero ex ipsa natura Ecclesiae, in templis non modo cultus divinus celebratur et sacramenta ac sacramentalia administrantur, sed etiam populus christianus in suis officiis erga Deum, proximum et semetipsum instruitur, atque ad virtutes omnes excitatur. Id nostris diebus quaestioni satis incredibili locum dedit. Cum enim ob naturam guberniorum vigentium et temporum indolem, populus catholicus plura praestare possit et debeat in ordine civili et sociali pro utilitate ipsius Ecclesiae et publica charitate, factum est ut Ecclesia permittente non modo sed etiam fovente, plebs christiana ad templum vocaretur ut praeter consuetas et directe sacras instructiones et adhortationes, specialibus quoque institutionibus imbueretur ad praedicta officia.

Auctoritas ecclesiastica, pro rerum opportunitate, tale munus etiam piis ac doctis laicis permisit vel commisit, semper sub vigilantia et directione pastorum. Hinc factum est ut res ecclesiastica non modice adiuuaretur. Exarsit proinde adversariorum zelus, qui conquesti sunt templa sic profanari atque religiosum sensum in populo imminui, vel saltem abusum loci sacri admitti, conciones in eo et conventus celebrando ad res politicas et oeconomicas.

226. Sed quoad profanationem hae assertiones ridiculae forent si non essent impiae et iniuriosae erga ecclesiasticam auctoritatem, et fervidos catholicos quam et quos putant minori zelo informari comparate ad viros ut plurimum de re religiosa non curantes vel etiam incredulos.

227. Quod autem attinet ad praetensum abusum, respondemus in rebus quoque politicis et oeconomicis seu socialibus populum christianum moralibus adstringi officiis, ideoque in eis instruendum esse non modo theorice, sed practica efficaci ratione; idque moderari ad Ecclesiae auctoritatem spectare. Insuper attentata temporum indole, plura negotia de se politica et socialia, quam maxime connectuntur cum causa religionis ideoque mediate ad rem religiosam referuntur; hinc de eisdem in templis pertractare sub Ecclesiae directione et vigilantia a destinatione sacra eorumdem templorum alienum non est, imo consonum. De talibus argumentis in templis etiam agere, hanc habet utilitatem ut populum ad haec non assuetum, negligentem aut torpentem excutiat, eique suadeat connexionem talium quaestionum aut institutionum cum re religiosa ideoque characterem mediate religiosum horum negotiorum et consequentem necessitatem in plebe christiana ad eadem concurrendi. Spectabit autem ad Ecclesiae pastores,

indolem concionum et conventuum diiudicare, eisque debitum modum praescribere ne a sua natura deflectant, et si quid periculi in eis occurrat sollicitè providere (1).

228. Verae autem necessitatis causa templa et ad profanos usus poterunt occupari, quod regulariter fit transitorie, puta tempore belli, pestilentiae, inundationis, ut habet cap. 2. *De custodia Eucharistiae*; necessitas enim non habet legem; et tunc ratione charitatis, usus adhuc pius dici potest. Sed id semper cum beneplacito Ecclesiae, quae consensum suum ex officio dat quoties viderit veram esse necessitatem, cum ad eam de eadem iudicare spectet, utpote superiorem societatem.

229. Ex dictis apparet etiam enormis iniustitia legum quae exigunt in eodem templo exerceri cultus diversos, ita ut diversis horis diversae religionis exercitium habeatur, puta catholicae, schismaticae, etc. Etenim etsi Ecclesia ex supradicta lege necessitatis possit et id permittere, tamen iniquum est ad id eam cogere. Potest quidem permittere, cum non agatur de re intrinsece mala; sunt enim res valoris relativi, cum totum negotium, ut patet ex allato argumento, pendeat ab influxu quem exercent in affectibus humanis excitandis iuxta communiter contingentia. Iamvero etsi optimum modum eosdem excitandi eligere debeamus cum datur facultas, tamen et modos minus idoneos amplecti possumus, cum nihil melius valemus. Hinc ubi Ecclesia careret alio templo, posset et promiscue uti.

Sed iniustitia est 1. quando catholicis impeditur proprii

(1 Vide egregium opusculum *Di chi sono le Chiese?* Salvatoris Brandi S. I. Typis Civilitatis Catholicae Romae, 1898.

Et tamen Gubernium italicum, seu minister status pro negotiis cultus etc. edidit circularem die 25 Sept. 1903, quae prohibet in Ecclesiis congressus catholicos. Item lex gallica separationis status ab Ecclesiis, diei 9 dec. 1905 art. 26.

templi aedificatio; 2. quando catholici expoliantur proprio templo et dissidentibus permittitur usus partialis eiusdem. Etenim praescindendo a laesione dominii in secundo casu, semper adest laesio iuris religiosi, cum locus in quo exercetur cultus acatholicus, sit nobis positive profanus, imo sensu vulgari execratus; ergo ex lege illa adsociationis idearum minime idoneus ad cultum Deotribuendum, imo potius afflictionis existit. Si autem tempore procedente, res minus offendit, est quia ab assuetis non fit passio; sed res semper in se minus recta et catholicis iniuriosa remanet.

230. Deinde cum communio externa de se exprimat communionem animorum, communio exterior in loco religioso, de se exprimit communionem religionis; ideoque si absque necessitate fiat, producit indifferentismum; et indifferentismus est et desiderium illum propagandi quod tales leges suggerit.

Hinc etsi sit unica communio civilis inter omnes cives, tamen nequeunt cogi ad unicam communionem religiosam, quia ad religionem falsam nemo cogi potest, et falsa est quae indifferentismo innitur.

231. II. Templum immunita sunt a civili auctoritate. Hoc non indicat numquam eam posse ibi intervenire per se, ex. gr. ad reos capiendos, praescindendo a positiva lege ecclesiastica, sed quod per se haec loca subsunt iurisdictioni ecclesiasticae.

Et sane cum sint destinata exclusive cultui, et cultus cura exclusive sit competentiae ecclesiasticae, hinc et loca haec exclusive pendent ab Ecclesia. Etsi enim religio sit officium sociale, tamen, saltem facta institutione Ecclesiae, quidquid ad eam refertur, ab Ecclesia exclusive dependet, sive personae sint, sive res, sive loca, saltem prout ad religionem referuntur. Cum autem templa nullum alium usum habeant praeter sacrum,

exclusive et semper per se ab Ecclesia pendent. Tantum per accidens evenire potest ut auctoritas civilis indigeat exercitio alicuius actus suae iurisdictionis in eisdem. Tunc autem ipsa rei natura suggerit ut iudicium, si tempus concesserit, huius iustae causae interventus extraordinarii, ad Ecclesiam spectet, utpote quae est societas superior. Quae ratio saltem ostendit fundamentum naturale cui innituntur leges positivae ecclesiasticae de immunitate templorum conditae.

232. III. Templorum immunitas speciatim importat exemptionem a vectigalibus publicis; etenim vectigalia publica utique solvuntur ut cives concurrant expensis necessariis publico bono promovendo; verum quidem est et templorum securitatem defendi a civili potestate ideoque hoc sub respectu et templa solvere deberent vectigalia; sed ex alia parte onus Deum colendi est societatis integrae; hinc templum est aedificium in quo societas satisfacit officio suo; sed aedificia publica, natura sua sunt immunia a vectigalibus; etenim cum ipsi societati inserviant, iustum est ea a societate defendi, ideoque expensae ad hoc necessariae, derivandae sunt ab aliis bonis civium quae non integrae societati inserviunt sed singulis privatis.

Si autem societas sit mixtae religionis, ad summum sequitur eandem immunitatem concedendam esse templis omnium religionum quas status agnoscit, non quidem intuitu falsae religionis, sed civium eis utentium, non autem catholicae seu verae religioni esse denegandam; semper enim societas agnoscere debet officium Deo cultum praestandi, ideoque aedificia sacra habere debet ut destinata publico huic muneri satisfaciendo.

233. Cum inspectio hygienica sit per se competentiae civilis, praescriptiones relativae, de cetero iustae, erunt

et in Ecclesiis observandae. Hinc tempore epidemiarum poterunt plura praescribi tum circa tempus, tum circa alia opportuna; et idem dic de processionibus de quibus infra, quae praescriptiones pro ecclesia habent tantum vim directivam, et non coactivam, si de cetero iustae sint.

Dicimus si de cetero iustae; etenim dispar est conditio societatis subditae et societatis independentis, imo et maioris, in iis in quibus per accidens competit alteri societati perfectae aliquod ius; societas enim imperfecta simpliciter tenetur leges societatis suae perfectae observare (nisi inhonestae sint aut nimis onerosae simul et iniustae), quin iudicium praeventivum possit emittere. E contra societas independens praecedenter inspicit leges alterius, et si iniustas inveniatur, de eis conqueritur easque spernit; ex. gr. si aliqua natio possideat in territorio alterius, ratione huius possessionis pendet ab eadem; ideoque eius leges servare tenetur in negotiis relativis; sed si sibi specialiter iniuste onerosae fuerint, tunc utitur sua independentia ad res suas defendendas. Hinc videmus nationes exigere ad invicem damnorum reparationem quae suis subditis in alieno territorio illata fuerint eosque adsistere. In qua re etsi quoad singula negotia multum possint conventiones et consuetudines iuris gentium, tamen principium generale stat, idest: societates perfectas et iure pares, et in iis in quibus per accidens pendent ab alia, uti sua independentia in ponderandis legibus sibi ab ea datis; etenim subiectum obligationis est independens etsi ratione materiae sit dependens: hinc prout subiectum est, procedit servata dignitate suae independentiae, quod importat ipsum iudicare de valore obligationis quae ei imponitur. Hinc multo magis hoc iure utitur societas independens et iure superior prout est Ecclesia.

B. De processionibus.

234. Egimus de locis specialiter destinatis cultui publico exercendo.

Verum quaeri potest an extra septa Ecclesiae in locis ipsis publicis, puta in plateis et viis, ius sit actus quosdam cultus divini exercendi. Etenim inter ritus cultus catholici sunt et processiones, quarum quaedam dici possunt necessitatis et aliae utilitatis. Necessitatis voco quae Viaticum comitantur, et mortuorum cadavera, de quibus postremis numero 318; utilitatis, reliquas, puta peregrinationum, imaginum, reliquiarum, litaniarum etc.

235. Quaestio autem generalis haec est: an ius sit Ecclesiae exercendi actus cultus publici in ipsis publicis locis, specialiter non destinatis cultui divino, neque aliis specialibus usibus profanis. 1^o Loquimur de locis publicis, quia profecto nequit ingredi loca privatorum dominis ipsis dissentientibus; in his enim tantum ingreditur ut ipsis volentibus sacramenta vel sacramentalia administret; quod si irrationabiliter haec reiicerent, profecto in eos animadverti posset; sed invitis sacramenta saltem non administrarentur. 2^o Loquimur de locis publicis non habentibus aliam specialem destinationem, ex. gr. commercio tantum destinatis, in quibus non omnibus indiscriminatum patet accessus. 3^o Loquimur de iure per se inspecto, idest in statu societatis normali, non autem de eo quod per accidens fieri potest, quando vel catholici pauci sunt in societate et ipsorum religio non recognita, vel ob sectarum numerum periculum aliquod est seditionis.

236. Iamvero si de iure in se inspecto sermo sit, profecto potest Ecclesia ritus suos exercere et in publicis locis. Etenim Deo debitus est cultus publicus, et debetur

ab ipsa societate humana. Quamvis autem regulariter cultus publicus exerceatur in locis specialiter designatis, tamen maior est publicitas et recognitio a societate Deo tributa, cum per plateas ipsas et vias publicas datur; in Ecclesiis conveniunt tantum volentes, e contra in processionibus cultus divinus manifestatur omnibus, tepidis quoque et negligentibus.

Deinde Deus agnoscitur et adoratur coram terra et coelo, et optime exprimitur eius dominium universale, quia cultus eo melior quo evidentius exprimit in modo quo praestatur, hominis obsequium et Dei dominationem; hinc videmus et in cultu civili, profano aut etiam sacrilego *heroum*, hunc quoque ritum Ecclesiae imitatum sicut et alios multos, cum in rerum natura fundamentum habeant suae efficaciae. Modus autem Deum adorandi per processionem, videtur insuper repraesentare cursum humanae vitae, et homines in hac terra peregrinantes et Deum laudantes, aut ab eo misericordiam impetrantes.

Igitur cum expediat haec ratio cultus publici, et aliunde Deo a societate sit debitus cultus publicus, certe ius est Ecclesiae et hunc ritum tenendi.

237. Ex his apparet iniustitia legum quae hunc modum Deum adorandi prohibent; etenim in his apparet voluntas subtrahendi a conspectu societatis ritus religiosos, eosque relegandi in locis clausis, ut veluti privati videantur; hinc societas non ita efficaciter movetur ad cultum Deo debitum, neque impelluntur indifferentes.

238. Omni autem reprehensione maiores sunt leges, quae processiones etiam circum Ecclesiam in territorio ipsius Ecclesiae (sacrato) subtracto a commercio profano prohibent.

Hi enim vere ostendunt se velle ab oculis societatis subtrahere cultum divinum. Etenim cum locus sit Ec-

clesiae et sacer, apparet idem esse ac Ecclesiam. Indifferens enim est an templum sit locus undequaque clausus, vel apertus, cum essentia templi in eo sit, locum specialiter destinari cultui divino exercendo et praesertim sacrificio offerendo.

Igitur maximae utilitatis sunt processiones, ideoque Ecclesiae ius est eas peragendi.

239. Verum processiones quas diximus necessitatis et magis attendendae sunt. Etenim si ceterae sunt aliquid supererogatorii, primae sunt necessitatis. Cum enim necessarium sit Eucharistiam ad domos fidelium afferre, positive praecipere occultam delationem, est prohibere cultum et honorem ei debitum; hinc maximam iniuriam irrogat religioni.

240. Videamus quid obiciant: I. obiciunt dominium publicum viarum, quod est societatis civilis; hinc saltem eius permissio requiritur; II. impedimentum commercii civilis; III. periculum irreverentiae, a contradicentibus; IV. rixae; V. hygienis; VI. inconveniens, cum et ceterae sectae idem ius haberent: hinc commercii civilis impedimentum et rixae periculum crescerent.

241. Respondemus ad I^{um}, societatem ecclesiasticam non esse societatem ratione subiecti extraneam societati civili, sed eius membra esse quoque cives; ideoque ius habere ad usum publicum viarum et platearum pro omni scopo honesto, cuiusmodi est cultus divinus; ino 1^o in hypothesis societatis christianae quam hic consideramus, subiectum est identicum, et est unica societas materialis humana, quae duplicem formalem societatem constituit; sed onus tribuendi Deo cultum publicum provenit ex eo quod humana societas est, etsi modus satisfaciendi huic officio pendeat a qualitate religionis quam profitetur; hinc est ipsa societas

civilis, non quatenus primario est civilis, sed quatenus humana, quae tenetur Deo tribuere cultum publicum eo modo quem auctoritas religiosa designabit. Viae autem et plateae non dicuntur loca profana quatenus exclusive sint destinata usibus profanis, sed quia licet in eisdem, usibus attendere profanis, et si volumus, hi constituunt normalem et frequentiore destinationem eorumdem.

242. Si II^o supponamus tantum aliquos ex civibus esse christianos, adhuc stat ipsos per hunc ritum satisfacere officio sociali reddendi Deo cultum publicum, quod officium cum naturale sit, agnoscendum est et a reliquis civibus, qui tenentur permittere catholicis ut modo suo Deum publice colant.

243. III^o Si consideremus autem quaestionem non ratione subiecti sed ratione societatis, tunc etsi dominium viarum publicarum dici vellet societatis civilis, quatenus civilis est, et non quatenus humana, idest ad exclusionem societatis religiosae, adhuc tamen verum est ex dictis lib. I. part. I^{ae} de relationibus utriusque societatis, societatem civilem teneri ad deserviendum ecclesiasticae, ideoque illius territorium gravatur servitute passiva in favorem cultus divini.

244. Ad II^{am} difficultatem respondemus, negotia civilia non turbari ex momentanea occupatione areae publicae causa religiosa, cum commode aliter eis consulatur; non enim Ecclesia tota die aream publicam occupat, sed tempore proportionato ei quod societas debet officiis religious. Quod si in magnis urbibus ob cleri et devotorum multitudinem et maximam ritus solemnitatem, ut in festo Corporis Domini, aliquando suspendi debeat publicus transitus, est incommodum relative leve, cui et ob alias minoris momenti causas seu civiles solemnitates, incolae subduntur. Quod si

alicubi irrationabiliter nimis protraherentur functiones religiosae extra Ecclesias, esset abusus inferioris alicuius auctoritatis ecclesiasticae; et tunc ei occurritur, sicut ceteris abusibus in hac materia, per recursum ad superiorem auctoritatem ecclesiasticam.

245. Ad III^{um}. Per se loquendo nihil aliud sequitur nisi auctoritatem civilem invigilare debere ne iustus Ecclesiae ritus perturbetur aut irreverenter excipiat; neque enim per modum regulae abstinendum est a publico cultu divino et aliis bonis praestandis ob timorem irreverentiae ex parte hominum impiorum, sed potius hi compescendi sunt; secus ex sua malitia obtinerent scopum suum, idest impediendi cultum divinum, et in ipsis Ecclesiis possent eadem tentare. Quod si res in eum statum devenerint ut auctoritas civilis non sit amplius potens viris irreligiosis continendis id non defectum iuris in Ecclesia, sed potentiae in civili auctoritate ostendit, ideoque ad summum ostendet, quid aliquando prudenter omittatur, non autem quid iure exigatur.

246. Ad IV^{um} eodem modo respondendum est ac in praecedenti difficultate.

Quoad V^{um}, id evenire potest tantum tempore aliquo exceptionalis, puta pestilentiae, et tunc certo, omitrendae sunt eae populorum frequentiae quae morbo propagando conducere possunt; etsi enim debeamus a divina pietate iuvamen impetrare, non tamen Deus tentandus est, et omnes praecautiones naturales sunt servandae. Iudicium autem de periculo quoad morbos, profecto est competentiae civilis. Sed et in hac re adnotandum est quod supra num. 223, idest Ecclesiam, utpote societatem independentem et superiorem, excipere normas a societate civili latas, easdem ad examen revocando, et in casu evidentis exaggerationis easdem

iure reicere, hinc multo magis si ex aperta hostilitate procedant.

247. Sed hic quaeri potest an etiam coactive procedi valeat contra Ecclesiae ministros, si legibus iuste latis hac de causa, non obtemperent. Et respondendum negative, sed tantum superioribus auctoritatibus ecclesiasticis possunt denunciari ut ab eis puniantur, vel ut ab eis facultas eos coercendi impetretur. Et ratio est quia etsi haec materia sit per se competentiae civilis, tamen quoniam Ecclesia posset leges civiles ut iniustas habere, et de eis iudicare ut societas superior, hinc iuridice non liquet, Ecclesiae ministros reos fuisse, nisi praecedente superiori iudicio ipsius Ecclesiae. Secundo, et post hoc iudicium, adhuc verum est substantiam actus fuisse religiosam, ideoque non posse prohiberi ab auctoritate laica, neque ob adiuncta temporalia, sed haec denuncianda sunt auctoritati ecclesiasticae, ut ipsa provideat et prohibeat nomine proprio.

248. Sed dicunt: auctoritas civilis considerat actum prout temporalis est, et in casu citato, considerat hominum conventum; hinc eadem difficultas fieri potest et pro conventu in Ecclesia; praescindit vero an sit ex causa religiosa vel civili.

Resp. Actus humani, ut alias diximus, dividuntur in spirituales et temporales, non quidem quasi illi fiant solo spiritu, et hi solo corpore, sed ex scopo et obiecto; iamvero ex hypothesi obiectum et scopus conventus est religiosus; ergo substantia actus est religiosa, neque prohiberi potest ab auctoritate civili ob alia pericula, quia eius interdictio ferretur in ipsum actum religiosum.

Hinc neque causa periculi politici posset interdici, sed tantum sibi auctoritas civilis cavere posset, parando vires quibus resisteret seditioni.

249. Ex his apparet quid dicendum si in casibus contemplatis in duabus antecedentibus difficultatibus, seu inconvenientiae et rixae, auctoritas civilis iudicaret se impotentem ad delicta praevenienda et compescenda; etenim non posset actus religiosos interdicere, sed tantum monere auctoritatem ecclesiasticam, ut ipsa consulat, et faciat quod prudentia sua melius putat.

250. Neque dicatur officium vitandi seditiones et caedes esse auctoritatis civilis, ideoque in hac re procedere iudicio proprio; hoc enim verum est cum ex causa temporali oriuntur, non autem si ex spirituali. Tunc enim nequit causam spirituales auctoritative remove, sed tantum monendo et rogando, has caedes praevenit, non autem coactive impediendo actus iurisdictionis ecclesiasticae, sicut nec postea eosdem puniendo.

351. Remanet VI. caput difficultatum ex inconvenientibus quae proveniunt concedendo, ut iustum esset. idem ius ceteris sectis.

Verum respondemus ceteris religionibus utpote falsis, non idem ius esse, per se loquendo; ad summum esse ius quoddam subiectivum et putativum ubi legalis tolerantia aut cultum paritas inducta est; sed tunc semper discrepantia est, nempe in has sectas posse auctoritatem civilem liberius procedere, tum praeveniando, tum limitando, tum puniendo abusus, quoniam titulo mere humano innituntur, neque innitantur titulo verisimili, divinae originis; hinc sunt saltem in ea conditione in qua essent actus religiosi in statu merae naturae, seu subiecti speciali vigilantiae civili, eiusque repressioni.

C. De imaginibus sacris publice exponendis.

252. Per processiones et peregrinationes exercetur cultus divinus in locis publicis transitorie; sed quaeri potest an occasionaliter saltem et causaliter exerceri

possit stabiliter, quod fit exponendo publico conspectui imagines sacras, sive in aediculis seu tabernaculis ad id aedificatis, sive in parietibus domorum.

253. Hic mos passim obtinet in regionibus christianis, et opera privatorum, qui ex devotione sua id praestant. Etsi superioribus saeculis impugnatores habuerit, non tamen causa publicitatis cultus, sed ratione imaginum quas idololatriam sapere contendebant. Hinc eas reprobantes in ipsis Ecclesiis, reprehendebant quoque in publicis viis. Sed qui cultum relativum imaginum admiserunt, earundem expositionem in publicis viis laudabant. Tantum saeculo XVIII id quoque vetare coeperunt alicubi, sub ratione iuris. Aiebant siquidem ipsarum conspectum offendere dissidentes; ius autem esse singulis civibus ne offendantur in sua fide religiosa: hinc actus religiosos contrarios aliorum fidei, non esse praestandos extra septa templorum ad quae conveniunt tantum volentes; vel saltem officium esse guberniorum ad impediendas rixas haec signa specialis cultus ceteris invisī prohibendi; sic etiam consulitur reverentiae debitae rebus sacris, quum subtrahantur profanationibus quibus saepe exponuntur, ut experientia ostendit.

254. Verum respondemus haec falso asseri, et obiecta falsis inniti principiis indifferentismi saltem politici, nempe systematis asserentis publicam auctoritatem in sociali regimine aequae se habere debere erga omnes religiones. Et sane: societas habet naturale officium profitendi religionem, non quamcumque sed veram; cum autem vera sit tantum catholica, hinc societas per se, ei exclusive conformari debet; quod si aliquando per accidens potest ab ea praescindere, numquam tamen potest positive ei contradicere, sed tantum quaedam omittere, et quidem iudicio ipsius Ecclesiae.

Igitur ius habet Ecclesia cultum suum publicum exercendi omnibus modis idoneis, quorum iudicium ad eam spectat circa necessitatem vel opportunitatem. Iamvero per se loquendo, expositio imaginum valde conducit sensui religioso alendo, etenim sunt constans monumentum fidei eorum qui eas erexerunt, et veluti patens professio religionis, et transeuntes movent ad pietatis sensus edendos.

255. Si verum esset principium indifferentismi politici, potius sequeretur, omnibus cuiusque religionis permitendum esse suas exponere imagines, quam omnibus id interdicendum. Etenim principium invocatum, iuxta adversariorum doctrinam, nimis late patet.

Nemo enim offendendus est, ex hypothesi, in sua religione, quatenus ipse non cogatur ad eam contradicendam nec directe afficiatur iniuriis causa religionis, non autem quasi quisque in sua conversatione teneatur abstinere a quolibet actu, ceteris causa religionis in viso. Id enim dum dissidentibus favet, nocet credenti et contradicit eius religioni, quae iuvatur manifestationibus analogis, quae etiam relative necessariae sunt. Hoc principium si urgeretur, omnem cultum externum saltem publicum auferret, cum ipsis templis non esset danda forma specialis, quia athei eius conspectu possumt offendi; hinc ab universa societate omnia signa religiosa essent auferenda. Iamvero et dissidentes contentos esse oportet sibi eadem permitti quae ceteris, et pro societate melius est habeatur aliquis publicus cultus ex parte aliquorum verus, ex parte aliorum falsus, quam carere quolibet cultu; etenim illud saltem servat genericum religionis sensum pro omnibus civibus, et rectum sensum pro pluribus; hoc autem in omnibus extinguit quemlibet religionis sensum.

256. Ex his patet responsio ad 1^m obiectionem. Quoad

2^{um}, nempe saltem ad rixas vitandas, posse gubernia haec prohibere, respondemus ut in numero antecedenti, negative si de catholica religione sermo sit. Etenim gubernii officium erit punire qui indebite alios causa religionis laedunt, non autem ad quodcumque periculum praeveniendum, publicam religionis manifestationem prohibere; hoc enim est remedium valde peius adhibere, malo quod praecavendum est; deinde est iniuria; etenim gubernii est proprio Marte praevenire rixas et alia damna temporalia, quae ex causa temporali fluunt; cum autem derivant ex causa religiosa, ea praecavere tantum subordinate ad auctoritatem religiosam.

257. Hinc patet responsio et ad 3^{um}, idest guberniorum officium est praecavere quae offendunt reverentiam erga religionem, non iudicio proprio sed Ecclesiae, quae decernit quoties prudentia exigat quaedam bona omittere.

258. Ceterum norma generalis est, a debito ordine non recedendum, nisi cum casus exceptionalis est evidenter demonstratus, ne impiis concedamus quod desiderant, nempe imminutionem cultus divini; et semper prae oculis habendum est, diminutionem huius cultus et societatis discessionem etiam partialem et per omissiones a lege Dei, esse magnum pro ipsa infortunium, cui exponi debet tantum ex vera necessitate, et animo repugnante, ac conante eam auferri, hinc procurante ut verus sensus religiosus cum desiderio plenae suae evolutionis, vivus teneatur in plebe christiana, ut quamprimum cesset status exceptionalis et vigeat status normalis ac exemplaris.

N. 2.

De tempore.

Quaestio de tempore potest 1^o respicere designationem dierum; 2^o horarum.

A. De diebus cultui publico destinatis.

259. Cum sermo est de diebus cultui publico destinatis, intelligi debet 1^o de diebus festis de praecepto; 2^o de diebus solemnioris cultus etsi non de praecepto. Etenim cultus publicus in Ecclesia quotidie praestatur, et iure, quum Deus semper sit Dominus humanae societatis, ideoque convenienter semper ut talis honoretur, et hoc excellentissimum opus bonum promoveatur. Hinc quaestio tunc incidit tantum in horas; sit 1^o de diebus festis de praecepto.

260. Notum est ex morali theologia, imo ex catechismo, dies festos apud catholicos duo importare: 1^o abstinentioniam ab operibus servilibus, quae constituit negativam sanctificationem diei festi; 2^o positivam sanctificationem saltem per adsistentiam sacrificio missae. Saeculo XVIII cum dies festi primo imminuti sunt a Benedicto XIV, aderant et dies semifesti, in quibus adsistentia sacrificio erat praecepta sed non abstinentionia ab operibus servilibus, quod adhuc alicubi quibusdam diebus ex devotione servatur.

261. Iamvero Ecclesiae ius esse praescribendi sanctificationem diei festi, profecto a nemine qui atheus non sit, in dubium revocari potest. Si enim Deus colendus, et quidem publice, profecto modus idoneus id praestandi ab auctoritate religiosa determinandus est. Et quidem positiva sanctificatio non solet adversarios habere. Etenim Deus est colendus determinatis ritibus, ut communio socialis appareat et ut ordinate fiat; facultas autem haec ordinandi est ex natura sua apud auctoritatem ecclesiasticam. Cum autem actus praecipuus cultus divini sit sacrificium, adsistentia eidem recte praescribitur, et quidem praestanda ab omnibus eadem die, ut magis appareat esse ipsam societatem quae Deum colit.

262. Sed negativa sanctificatio, seu abstinencia ab operibus servilibus, facilius impugnatores invenit. Verum quam sapienter inducta sit, apparet si consideremus animum sic vacuum a curis saecularibus facilius coelestia recogitare; et non modo, divino adsistere posse sacrificio sed etiam ceteris sacris functionibus, praesertim verbi Dei praedicationi, ut sic quisque satisfaciat officio procurandi sibi instructionem religiosam ac moralem et semel audita retinendi atque recogitandi. Deinde ipsa ab operibus gravioribus et forensibus vacatio, ostendit melius ipsam societatem Dei cultui attendere, cui pars temporis exclusive dedicatur. Accedit hanc requiescentiam necessariam quoque esse pro ipsa virium corporearum reparatione (1). Hinc Deus

(1) « Ogni giornata di lavoro determinando nel nostro organismo un deficit che si eleva dal dieci al venti per cento della nostra provvigione intera di ossigeno, procura in capo ad una settimana un impoverimento del sangue ed un esaurimento del sistema nervoso. Per ricolmare questo deficit e per evitare la perdita della salute, è dimostrato che è necessario un periodo di regolare riposo, settimanale, completo. È stato provato anche scientificamente, che nessuna cosa può sostituire questo giorno di riposo; nemmeno il sonno, nemmeno l'alimentazione migliore e più nutritiva; perchè l'ossigeno che è necessario non può essere reintegrato nei nostri muscoli, se non mediante il riposo ». V. *Rivista internazionale di scienze sociali e discipline ausiliari*, sett. 1904. *Il riposo festivo*, del Prof. Antonio Boggianno. Hic ad rem citat quae in camera italica oratorum populi exposuit Sanarelli leg. XXI, discussioni pag. 11. 252. Citat item oratorem populi Bossi, leg. XXI 2. sess. pag. 11.318, qui demonstrat etiam in studiis, seu in laboribus intellectualibus, locum habere analogas depauperationes organicas, quae tantum quiete reparari valent. Item ostendit pluribus allegatis, operarios defatigatos, omnibus perpensis, non amplius utilem laborem sustinere.

apparet nobis ut pater, qui nostra quiescientia honoratur. Sic et affectus familiae renovantur honesta delectatione atque conversatione, a qua plures ceteris diebus impediuntur, sicut fraternitas hominum in eodem templo apparet, in quo et pauperes demirantur artium opera.

Iis tamen qui servituti obnoxiae addicti erant, Ecclesia permittebat ut aliquid in sui non autem dominorum utilitatem laborarent.

263. Hostilitas in dies festos saepe causam occultam habet saevam cupiditatem eorum qui cum ipsi indulgeant otio vel operibus non servilibus, vellent populum quotidie defatigari in sui utilitatem; sunt igitur speculantes super aliorum labores et non curant ceteros semper defatigari, citius infirmari ac vitam finire.

264. Obiiciunt igitur operum suspensionem, populos depauperare, cum magnum lucrum impediat, seu septimam saltem partem lucri possibilis.

Respondemus. I. Si damnum temporale utiliter sustineatur pro spirituali, iam supervacaneae ac irrationabiles sunt querelae; igitur haec difficultas tantum magni fieri potest ab iis qui vitam futuram non admittunt neque utilitatem cultus divini.

II. Vidimus pro ipsa reparatione virium corporearum utilem esse quiescientiam dierum festorum; hinc tandem directe iuvat ipsam temporalem prosperitatem, praeter indirectam utilitatem quae ex reliquis bonis ordinis intellectualis et moralis, ex iisdem diebus festis derivat.

265. Nostra autem aetate, pluribus in locis dies festus a sociali auctoritate non sanctificatur, sed tantum a privatis qui velint et possint. Etenim officia publica, puta administrativa, et operae publicae quotidie vigent. Hoc autem iniquum est; etenim I. societas ut

societas sic non agnoscit diem festum neque Deum honorat; et proinde haec praxis innititur falsae theoriae religionem esse negotium privatum et non publicum, et societatem esse negative atheam.

II. Sic societas impedit plures privatos a festis sanctificandis, puta officiales status vel operarios. Quod si quae sint publica officia aut operae suspensionem non admittentes, puta officia publicae securitatis, vel publicae illuminationis, haec quidem Ecclesia permittit, dummodo necessitas sit vera et non ficta, et dummodo quantum fieri potest, tempus relinquatur singulis satisfaciendi suis religiosis officiis.

266. Non autem consideramus casum societatis mixtae religionis; etenim tunc limitationes faciendae sunt pro diversa historica origine et pro diversitate aliarum circumstantiarum. Tantum in genere adnotamus, in societate saltem christiana, ad minimum dominicos dies agnoscendos esse a lege; nobis autem mens non est considerandi societates paganas, aut iudaicas, ve incredulas.

267. Si auctoritati religiosae spectat dies festos statuere qui et a societate civili sunt agnoscendi, profecto ad eandem religiosam auctoritatem pertinet numerum eorundem dierum determinare. Hinc omnino illogica se praebent gubernia quae catholicam religionem agnoscendo, aliquos dies festos admittunt, alios autem ut superfluos reiiciunt. Si autem, ut in omni humana re fit, paullatim augeantur dies festi ita ut nimis excrevisse videantur, et non amplius respondere conditioni sociali, res Ecclesiae exponatur quae semper festis, ut dicitur, reducendis, sese facilem praebuit.

268. Quoad reliquas festivitates non de praecepto sed solemniores, eas iuste ab Ecclesia indici apparet, cum et iustissimae causae sint easdem celebrandi, et

tantum volentes iis participant; sunt autem semper multi in societate qui absque detrimento iisdem participare possunt.

269. Contra solemniores dies festos in genere, obii-ciunt eos potius profanationes inducere, seu ebrietates et alia huiusmodi, quam divinum cultum promovere, ideoque iuste aboleri, vel auctoritate civili impediri.

Difficultati propositae respondemus, ab adversariis exaggerari incommoda quae in festis obtinere solent; etenim considerant tantum publica quaedam inconvenientia et non innumera bona quae etiam habentur. Ceterum Ecclesia quae magis sollicita est boni spiritualis, et iudex competens tum de iure, tum de rei utilitate, aliter semper iudicavit, et numquam putavit solemnitates religiosas esse abolendas quia aliqui eis abutuntur. Habent enim solemnitates magnam utilitatem in ideis religiosis in societate alendis, cum moveant et indifferentes, et altam ideam rerum religiosarum in populis imprimant; hinc utilissimae sunt. Si vero quaedam aliquando sunt inconvenientia, curandum est ut Ecclesiae praescriptiones observentur ut sic auferantur, vel saltem immi-nuantur, prout res humanae permittunt; numquam enim perfectae esse possunt, neque omnia valent mala vitari.

Est autem falsissimum posse solemnitates religiosas a civili auctoritate interdici causa quorumcumque abusu-um, cum circa actum religiosum nulla sit ei facultas. Hinc potius comprimat abusus qui separabiles sunt ab ipso actu religioso, ex. gr. ebrietates et rixas, et mini-strando Ecclesiae concurrat ad ceteros auferendos qui in ipsis ritibus religiosis consisterent.

B. De hora.

270. Horam celebrandi cultum divinum constituere, profecto ad auctoritatem religiosam spectat, cum eius sit iudicare de opportunitate eorum omnium quae ad cultum divinum referuntur. Sed et in hac re usurpationes aliquando lamentandae fuerunt.

Quaedam enim gubernia, regalistarum imbuta praedictis, aliquibus horis, puta matutinis vel nocturnis, sacras functiones peragi aut verbum Dei praedicari prohibuerunt.

Aiebant enim tenebras occasionem praebere inhonestis actionibus. Hi obliti erant primos christianos integras etiam noctes vigilasse ad celebranda mysteria vel illustrium martyrum memoriam recolendam.

271. Respondemus autem I. quoad ius.

Occasione cuiuscumque abusus nequit actus religiosus interdici a civili auctoritate, quia ei non competit in materia religiosa legem ferre. Nec valet id esse ratione adiuncti extrinseci; etenim numquam tangere potest ipsum actum religiosum, nec substantia rei debet posthaberi adiunctis.

II. Quoad utilitatem huius legis, dicimus et Ecclesiam cognoscere et remove quae publicae honestati officiant; hinc zelus hic contra Ecclesiam est omnino pharisaicus.

Ceterum adsunt modi indicatos abusus praecavendi, de quibus disserere ad nostra non pertinet.

*NUM. 3.**De modo cultus divini.*

272. Ecclesiae competere exclusive ius determinandi quidquid refertur ad modum praestandi divinum cultum, indubium est, cum sit obiectum directum et prin.

cipale religionis, ideoque si qui admissa distinctione et independentia auctoritatis ecclesiasticae, huiusmodi ius imminuerunt, indirecte tantum id ausi sunt, ob incommoda quaedam quae exinde in rem civilem derivare contendebant; quibus obiectionibus facile respondetur applicando principia quae circa casum conflictus lib. I. part. I. cap. 3. a. 3. constituimus. Igitur potius nobis superest enumerare capita praecipua modorum cultus divini, et seriem texere multiplicium usurpationum et violentiarum auctoritatis civilis, quae pro diversis temporibus in hac re obtinuerunt.

A. *Obiectum.*

273. Cum Ecclesiae sit determinare quidquid per se refertur ad finem religiosum, apparet eius esse 1° determinare obiectum cultus divini. Datur autem in Ecclesia cultus absolutus et primarius latrae soli Deo, ideoque sanctissimo Eucharistiae Sacramento; Virgini autem cultus iperduliae, et sanctis atque angelis cultus duliae; qui quidem cultus est secundarius si cum primo comparetur, et hoc sub respectu non est absolutus, cum sanctis detur intuitu Dei; sed est absolutus quatenus sanctis datur ob excellentiam supernaturalem, quae vere in ipsis est, quamvis a Deo participata.

Reliquiis autem et imaginibus sacris datur cultus omnino relativus.

274. Igitur Ecclesiae est sanctos ipsos canonizare; veras reliquias agnoscere et falsas aut dubias prohibere, nec non imagines indecentes aut quomodocumque ab usu ecclesiastico alienas, vetare.

Hinc miranda audacia Parlamenti parisiensis, quod cum anno 1728 Benedictus XIII, ad universalem Ecclesiam extendisset festum sancti Gregorii VII., prohibuit eum haberi ut sanctum et officium recitari, quia

in breviario legebatur: « Henrici imperatoris impiis co-
« natibus constantissime restitit, eumque regno et fide-
« lium communione privavit ». Rex autem Galliae de-
cretum Parlamenti cassavit (1). Tamen timore Parla-
menti, celebrabatur de communi Confessorum (2). In
dominiis autem suis eandem prohibitionem tulit im-
perator Iosephus II. et non habuit a quo corrigeretur.

275. Item si qui lamentandi abusus sive circa falsas reliquias quae proferuntur, sive circa imaginum cultum, iudicio Ecclesiae unice sunt compescendi. Et in materia abusuum notandum est, ut supra diximus de diebus festis, ab hominibus irreligiosis facile exaggerari. Status civilis officium est Ecclesiae ministrare, sententiarum eius executionem curando.

B. *Crimina.*

276. Pariter Ecclesiae est quaecumque crimina circa rem religiosam iudicare, et ei ius est eadem compescendi; tamen si delictum sit evidens, ut aperta blasphemia, necesse non est iudex laicus invocet praecedens iudicium ecclesiasticum, cum id necessarium sit tantum in re obscura aut dubia, et non in facto evidenti, in quo sufficit iudex laicus procedat salva subordinatione iudicio ecclesiastico, et concesso iure ad illud appellandi si dubium de iure exoriat. Etenim circa factum, cum laedat etiam legem naturae et publicam moralitatem, si nihil aliud obstat (puta immunitas personalis), competens est et iudex civilis.

(1) Vide Audisio, Storia dei Papi. Benedetto XIII. anno 1721-30.

(2) De Maistre, Du Pape, cap. 7. § 3.

C. Ritus.

277. II. Circa ipsum modum, seu ritus cultus divini, competens est exclusive Ecclesia. Hinc deploranda ultrabyzantina Iosephi II. agendi ratio, qui et numerum candelarum quae accendi deberent pro festorum solemnitate, constituit.

D. Lingua sacra.

278. Singularem mentionem meretur lingua qua sacra celebrantur. Eam determinare pro qualibet gente profecto ad Ecclesiam spectat. Ipsa enim scit quid sacrorum venerationi et fidelium utilitati magis expediat. Iamvero Apostoli et presbyteri praesertim ab eis instituti, dicendi sunt ea lingua celebrasse quae in usu et in honore erat apud singulas gentes, ideoque graeca aut latina in occidente romano. Nulla enim erat ratio ob quam Apostoli insueta populis lingua uti deberent, et multo minus ob quam presbyteri novam addiscere adsumerent. Quod enim a nonnullis dicitur Apostolos constituisse ut celebraretur augustum Sacrificium tribus tantum linguis in titulo crucis sanctificatis, idest hebraica, graeca et latina, solidae rationi non innititur. Sed procedente tempore linguae tunc viventes faciem suam immutaverunt, et linguis quas vulgares dicimus locum dederunt. Liturgia autem antiquam servavit linguam, ideoque nunc apud latinos (et, servata proportionem, idem dicatur de Graecis, Armenis, Syris, etc.), populus non amplius intelligit liturgicam linguam.

Id quidem inconveniens est, quia ceteris paribus maior utilitas caperetur ex usu linguae ab omnibus intellectae.

Verum usus linguae antiquae, omnibus perpensis, apud nos maiores habet utilitates. Primo enim lingua

mortua immutabilis est; ideoque formulae sacris dogmatibus significandis idoneae, immotae atque honorabiles permanent. E contra linguae viventes non raro modificant verborum significatus et aliquando minus honestos adsumunt, ut videre est perlegendo antiquos vulgares scriptores. Ita nullus italicus amplius vocaret cum poeta corpus Domini, *carogna*.

2.^o Magis patet unitas Ecclesiae, tum spatio, tum tempore. Cum enim ritus latinus apud catholicos ferme universalis sit, fideles ubicumque se conferant, eadem sacra audiunt quibus ab infantia assueti sunt, et sicut a patribus didicerunt. E contra si singulis gentibus sua esset lingua liturgica, Ecclesia nationalis potius quam catholica videretur.

Quamvis autem praeter latinam, nonnullae aliae sint liturgicae linguae, tamen non multae sunt, nec multum patent; insuper et ipsae antiquissimae, ideoque venerabiles et familiares populis suis. In locis autem missionum, naturale est linguam adhiberi missionariorum propriam; cumque missionarii latini esse soleant, neochristiani adscribuntur ritui et liturgicae linguae eius Ecclesiae a qua ad fidem vocati sunt, et sic et ipsi inseruntur in antiqua Ecclesia, et eius quoque exteriori faciei participant.

279. Institutio autem religiosa datur linguis vulgari-bus, aliquando neque nobilibus seu scriptis, sed dialectis cuiusque provinciae, ut valde utiliter in pluribus Ecclesiis servatur quoad catechismi explicationem.

Aliunde necessitas intelligendi singula nequit multum urgeri, quia secus neque linguae nobiles et totius nationis propriae valerent adhiberi, sed dialectis provincialibus utendum esset; quae saepe plus distant a lingua nationali vivente, quam ipsa a lingua matre mortua et sacra, ut cuique propria experientia facile suadere

valet. Si autem sacra dialectis celebranda essent, nec satis venerationi sacrorum consultum esset, cum dialecti ut plurimum ineptae sint ad nobiliora congrue exprimenda, et facilius errores insinuari possent, atque Ecclesia non varietate sed babelica confusione circumdata appareret.

Preces insuper plures publicae sed non liturgicae, ut in novendialibus praeparationibus festis praecipuis, lingua vulgari recitantur seu in cultu quem vocant suppletorium (1). Iamvero apud nonnullas gentes, Slavos praesertim, plures actus cultus publici, latiori sensu suppletorii, permittente vel tolerante Ecclesia, pro maiori populi intelligentia, lingua vernacula persolvuntur.

Hac tamen concessione aliquando abutitur spiritus nationalitatis, et ubi populus dividitur in plures nationalitates, non modicas parit difficultates et inconvenientia. Cum igitur preces liturgicae quae lingua sacra persolvuntur non sint nisi solemnes et consuetae, fideles de cetero in re religiosa bene instituti, tum ob catechisticas explicationes, tum ob vulgares versiones, tum ob analogiam linguae sacrae cum linguis vulga-

(1) Hoc nomen potest sumi latissimo sensu, vel magis limitato. Latissime sumptum comprehendit quidquid ad cultum divinum refertur extra sacrosanctum Missae sacrificium, idest extra liturgiam proprie sumptam. Sed magis limitata significatione complectitur tantum ea quae sunt extra sacramentorum et sacramentalium confectionem et administrationem.

Et recolendum est inter sacramentalia recenseri officium quoque divinum.

Hinc libri liturgici lato sensu apud latinos sunt missale, pontificale, caeremoniale episcoporum, rituale, breviarium et excerpta ex eis.

Sed ex his excerptis, nonnulla sunt in usum populi ut officium beatae Virginis vel defunctorum, quae in confraternitatibus recitari solent; et tunc et lingua vulgari adhibentur.

ribus ab ea derivatis, sufficienter valent eas intelligere; significatus autem genericus ex ipsis ritibus manifestatur et fideles pio animi affectu concomitantur ea quae audiunt aut canunt.

280. Ecclesia tamen aliquando populis recentius conversis, quorum lingua nullam aut nimis remotam analogiam cum aliqua ex sacris linguis praeseferebat, quaedam concessit in propria lingua persolvenda. Ita Slavis illud certo a Summis Pontificibus Ioanne VIII (1) et Stephano VI (2) concessum est ut non modo populus *caneret* et *psalleret* lingua sua, sed etiam quod *Apostolus* idest Epistola, et Evangelium postquam latine fuissent in Missa decantata, etiam Slavice perlegerentur. Quem usum linguae propriae nonnullis in regionibus Slavi ad universam liturgiam traduxerunt, quod quoque a S. Sede ratificatum fuit, idest ab Innocentio IV, Urbano VIII, Benedicto XIV, Pio VI et Leone XIII. Sed semel concesso vel ratificato usu linguae vulgaris succedentibus mutationibus in ea introductis Ecclesia morem non gessit; et ita apud Slavos quoque invaluit lingua sacra, quae nunc palaeoslavica dicitur, analoga quidem sed distincta a viventibus ab ea derivatis, quae proinde venerationi et immutabilitati dogmatis respondere valet, atque subdivisionibus nationalibus non defert, sed unitatem antiquae originis potius repraesentat, et sic aliquam inducit universalitatem, catholicitati verae Ecclesiae magis conformem.

Quod autem cum Slavis olim factum est, cum aliis

[1] Epistola ad Swantupuleum sub num. 247, collata cum epistola ad Methodium sub num. 195.

[2] Epistola ad Swantupuleum v. Balan: *La Chiesa cattolica e gli Slavi*, Roma 1886, pag. 26 et seqq., et praesertim v. Epistolam 31 Stephani VI ex registris conservatis in Musaeo Britannico et editis inter alios a Philippo Iaffé Lipsiae, 1885.

quoque populis a ceteris nimis differentibus, ex. gr. cum Sinensibus, in futurum valde rationabiliter fieri posse, nemo negabit, quando tempora matura erunt; praesertim si tales Ecclesiae ad eam perducerentur conditionem qua vita propria vivere possent, propriis pastoribus et institutionibus.

281. Item evenit aliquas gentes ad unitatem Ecclesiae conversas fuisse quando in liturgia adoptaverant linguam vulgarem. Ita Romeni Transilvaniae saeculo XVIII ineunte. Prudentia igitur suadebat ut talis innovatio, ab Ecclesia ratificaretur, ne occasio redeundi ad schisma subministraretur, praesertim si gentes finitimae perseverantes in schismate, innovationem non suscepissent sed adhuc uterentur antiqua lingua liturgica.

E. Campanae.

282. Frequentior usurpatio in hac re est circa *sonitum* quia campanas molestas asserunt, et earum usum restringunt, aliquando statuta municipalia, aliquando leges publicae, invocata publica incolumitate, cum ex. gr. tempestates habentur et ex sonitu fulmina timentur.

Circa hoc notandum est, aliud esse ius et aliud rectum exercitium eiusdem, quod Ecclesia servare debet, quodque ipsa praescribere debet, contrafacientes ipsa puniendo, vel civilis auctoritas de eius consensu.

Ecclesiae profecto ius est campanas pulsandi, tum quia fideles invitant ad ecclesiam, et ruri praesertim, constituunt modum meliorem vel etiam unicum, plebem congregandi. Deinde Ecclesiae hoc ius est quia ipse sonitus campanarum est actus cultus publici et publica fidei manifestatio, et monet societatem, eamque excitat ad laetitiam spiritualem vel ad dolorem aut alios pios animi sensus.

283. Circa modum autem, profecto curandum est ne

importune pulsentur, sive quoad horam, puta nimis nocturnam, sive quoad temporis productionem. Illud enim ipsi communitati molestum esse potest, dummodo tamen de communitate sermo sit, et non de paucis, qui tempora invertentes, faciunt diem noctem et noctem diem. Hoc autem, praesertim vicinis, molestum esse potest.

Verum iudicium de hoc ad Ecclesiam spectat, et eius est leges de hac re ferre et contra facientes punire.

284. Difficultates quae contra proponuntur, innituntur falso supposito. Aiunt enim campanas turbare aerem publicum et quietem publicam, et eos etiam quibus ex diversa vel nulla religione invisae sunt.

Resp. Ecclesiae ius esse et societati civili onus esse cultus publici, ideoque et aer publicus subiicitur iuri religioso, seu exercitio actuum qui pro ipso publico cultu sunt convenientes, ut profecto est sonitus campanae qui est vox ipsa societatis christianae. Si autem societas non sit catholica, tunc adhuc ius est Ecclesiae cultus publici; quia societas acatholica, saltem debet catholicam religionem considerare ut licitam, et quidem non tantum ut privatam religionem, sed ut publicam. Est enim error contra ius naturae, religionem inter privatos actus restringere.

285. Ceterum nos loquimur de iure per se, non autem de maiori vel minori eius exercitio quod sperari possit pro diversa hominum dispositione; erit autem prudentiae Ecclesiae ita limitare exercitium sui iuris sive circa tempus, sive modum, ut adversariis non subministret speciem aliquam rationabilis causae ad eam impediendam.

286. Obiic. II. Per campanarum sonum, frequentem praesertim, laedi privatum ius vicinorum, quibus molestus est; hinc auctoritate civili posse limitari sicut et exercitium artium strepentium solet coarctari municipalibus praescriptionibus.

Resp. Vel agitur de ecclesiis erectis ante aedificationem domorum vicinarum, vel postea. Si primum, et attento iure privato, nihil obstat; sibi enim impudent qui prope ecclesias aedificaverunt. Si de secundis agatur, primo animadvertimus ipsam altitudinem turrium campanarum molestiam portabilem facere, ad quod et consuetudo conducit, quia ab assuetis non fit passio. Oportet autem Ecclesia utique curet ita turres campanarias construere ut non sint molestae vicinis, aut saltem usum campanarum pro opportunitate moderari. Sed si de iure sermo sit, profecto cum Ecclesiae ius sit et templa erigendi, et campanas pulsandi, si quod est privatis incommodum, tolerandum est pro conflictu cum bono publico, sicut et alia tolerantur pro ipso bono civili, et aliquando pro mero publico solatio, puta cum in plateis publicis ad multam noctem spectacula vicinis incommoda protrahuntur. Hinc non currit paritas cum artibus perstreptibus, quae in exemplum adductae sunt, cum harum exercitium respiciat ius privatum, et non ius et officium publicum, et quidem ordinis superioris, idest religiosi; hinc illarum exercitium subiicitur legi civili, huius exercitium ecclesiasticae exclusive.

F. *Preces publicae.*

287. III. Ius est exclusivum Ecclesiae indicendi publicas preces. Hinc vexatoriae sunt praescriptiones auctoritatis civilis si quando cantum hymni ambrosiani praecipiat, aut collectas in missa, vel alias quascunque preces, cum ad iudicium auctoritatis religiosae spectet decernere quinam eventus sint considerandi ut conformes legi Dei aut contrarii, ideoque ut tales qui mereantur has vel illas Ecclesiae preces.

§ 3.

DE COMMUNIONE CUM DEFUNCTIS.

288. Ob animorum immortalitatem, sequitur vivos adhuc in communione esse affectuum cum pie defunctis; etenim spes eos gloriosos inveniendi in altera vita, laetificat vivos. Hic sensus naturalis, determinationem et perfectionem accipit a fide christiana, quae docet quoque mortuorum resurrectionem; hinc reverentia erga corpora ipsorum non modo procedit ex memoria praeteriti temporis, et ex adsociatione idearum ob sensum humanitatis, sed etiam ex fide in futuros eventus; consideramus enim mortalia residua hominum pie defunctorum, ut nobis relictæ veluti sacrum depositum et expectantia gloriosam resurrectionem. Insuper fides catholica docet hanc affectuum communionem non esse inanem sed fructuosam; dum enim nos honoramus defunctos vel etiam precibus et aliis piis operibus eos iuvamus, si adhuc indigeant expiatione, iuvamur quam maxime sanctorum intercessionem, et ut habet communis fidelium sensus, etiam precibus eorum qui in purgatorio detinentur.

289. Hinc est reverentiam erga defunctorum corpora qui pie obierunt, in Ecclesia haberi non modo ut actum humanitatis et iuris gentium, sed etiam religionis; multo autem magis sunt actus religionis, suffragia quae pro eis offerimus, quia eos iuvamus in ordine mere spirituali ut citius Deum videant. Hic sit I. de locis in quibus ipsorum corpora requiescunt, seu de coemeteriis vel ecclesiis; II. de modo curandi eadem corpora, (*crematio* vel *humatio*); III. de iure sepulturae; IV. de religio-sitate ritus processionis pro mortuis.

NUM. 1.

De locis in quibus corpora requiescunt.

290. Loca huiusmodi a veteribus paganis dicebantur religiosa, sensu tamen diverso a nostro; idest quia dicata diis inferis. Dicebant autem sacra, quae dicata diis superis; sancta quae diis semonibus seu semi-diis. Verum nos quaerimus an sint religiosa, quatenus nempe sint destinata alicui facto et ritui religioso, idest in honorem divinitatis adimplendo, ideoque an sint immediata subiecta iurisdictioni ecclesiasticae et a civili immunia vel non.

291. Haec loca vel sunt in ipsis Ecclesiis vel extra. Immunia esse cum sunt in ipsis Ecclesiis, disputari non potest; si enim corpora defunctorum in Ecclesiis sepeliuntur, profecto est ex religiosa consideratione, ideoque per hoc non profanatur Ecclesia et proinde remanet immunis a civili potestate.

Potius quaeri potest an sit ius sepeliendi in ipsa Ecclesia vel a lege civili possit prohiberi; hinc sit 1^o de sepulchris extra Ecclesiam, seu de coemeteriis; 2^o de iure sepeliendi in Ecclesia.

A. De coemeteriis.

292. Quaeritur an coemeteria sint loca religiosa sensu superius explicato. Et respondetur affirmative. Etenim ex ante dictis cadavera et ipsorum depositio sunt pro christianis obiectum cuiusdam cultus religiosi, et coemeteria unice destinantur huic officio obsequii in Deum et spiritualis charitatis in proximum, et proinde in eis prohibentur actus profani. Hinc etiam consecrantur vel benedicuntur pluribus sacramentalibus, et ipsorum conspectio fideles inducit ad actus religionis ac charitatis

spiritualis multiplicandos. Ex his sequitur eadem immunitate ac Ecclesias gaudere oportere.

293. Obiiciunt: sepulturam esse iuris gentium, et praecipue sepeliri cadavera ex officio humanitatis; atqui quod est huiusmodi est ordinis naturalis et civilis. Ergo ritus religiosus est quid accessorii, sed ipsum sepulchrum est quid civilis.

Resp. Utique cadavera sepeliri ex officio humanitatis et ex iure gentium; sed illud addendum est, apud christianos hoc officium elevatum esse ad officium religiosum; ino addi posset apud omnes gentes ut quid religiosi fuisse consideratum. Et notandum, ritum religiosum non accedere sepulturae, sed sepulturam considerari ut rem religiosam. Hinc ipsa substantia actus est elevata ad ordinem religiosum, ideoque subtracta iurisdictioni civili quoties sic religiose fiat. Auctoritati civili remaneret ius sepeliendi et curandi sepulchrum tunc tantum quando Ecclesia aliquos nollet sepelire ritu religioso; tunc status civilis curaret sepulturam officio tantum humanitatis.

294. Obiic. II. Hygienis et publicae securitatis quammaxime interesse curam sepulchrorum, seu quoad tempus ne citius sepeliantur qui forsitan adhuc vivunt; vel serius cum corpora corrumpuntur, in contagiosis praesertim morbis; ita ut inspiciantur corpora ne delicta occultentur, puta in occisis ex dolo; item quoad modum, ut ex. gr. humentur absque contagionis periculo, et cetera circa sepulchra curentur quae hygienem vel publicam securitatem respiciunt, quae omnia sunt competentiae civilis.

Resp. concedendo haec omnia esse competentiae civilis, ideoque ius esse civili auctoritati haec omnia curandi; et tamen negamus ipsam sepulturam seu actum sepeliendi, et ipsa sepulchra esse aliquid profani.

Etenim haec omnia sunt quaedam accidentalialia quae antecedunt, concomitantur vel subsequuntur sepulturam aut sepulcrum, et his omnibus suppositis, concomitantibus vel subsequentibus, Ecclesia praestat sepulturam ut actum religiosum et sepulchrum habet ut locum religiosum.

295. Id tantum probat Ecclesiam teneri ad leges, de cetero iustas, a civili auctoritate de hac re latas, observandas, salva sua independentia, ut diximus lib. I. num. 409. Hinc expendit leges civiles de hac re latas et eas observari mandat a suis, si tamen iniustas aut hostiles sibi non inveniat, cum in his servet suam independentiam.

296. Ex eo quod coemeteria sint loca religiosa, sequitur in iis sepelienda esse tantum cadavera fidelium, Ecclesiae iudicio. Hinc errant qui volunt omnes cuiusque religionis vel etiam nullius, in eodem loco esse sepeliendos; etenim sic communio exterior non responderet communioni religiosae quam significat, et sic auferretur sepulchro eius qualificatio loci religiosi, et sepulturae auferretur qualificatio actus religiosi.

297. Neque valet opponere, omnes esse sepeliendos. Etenim aliud est omnes sepelire, aliud omnes sepelire in eodem loco religioso. Neque exclusis irrogatur iniuria; si enim viventes non communicaverunt nobiscum, neque mortui id faciant; imo saepius iniuria eis irrogaretur quia praesumptae ipsorum voluntati contrairemus, cum dicendum sit eos vivos noluisse nobiscum communicare neque pro tempore futuro.

B. De sepulchris in ipsis ecclesiis.

298. Nunc de alia quaestione, an ius sit Ecclesiae sepeliendi in ipsis templis. Antea recolimus de hac re historiam. Antiquitus Ecclesia servavit de hac re leges

civiles, de cetero iustas, ut nempe intra moenia in romano imperio non sepeliret, cum id lege vetitum. Conversis autem ad fidem ipsis imperatoribus adhuc lex civilis servata est. Sed religionis causa martyrum et sanctorum corpora in Ecclesiis condita sunt, sub altari. Hinc et reliqui fideles coeperunt cupere sepulchrum prope Ecclesiam, tum ut requiescerent coram sanctis, tum ut facilius iuvarentur suffragiis fidelium accedentium. Hinc primo episcopis et regibus, deinde presbyteris, clericis, monachis, patronis et ecclesiarum benefactoribus, deinde omnibus concessum est sepulchrum, primo prope Ecclesiam in eius porticibus vel atriis, deinde etiam intra Ecclesiam, non tamen sub altari, quod tantum sanctorum exuviis reservatum est. Tamen Ecclesia in pluribus conciliis provincialibus praecepibat vel hortabatur ut generatim conderentur coemeteria extra Ecclesiam, et alicubi eidem coniuncta erecta sunt, ut sic et satisfaceret distinctioni Ecclesiae et coemeterii et simul devotioni fidelium. In rituali autem adhuc inculcatur erectio coemeteriorum extra Ecclesias.

Sed saeculo XVIII, leges civiles coeperunt sepulchra in Ecclesiis prohibere et coemeteria longe ab habitationibus praescribere causa hygienis. Iamvero quaeritur an hae leges sint ab Ecclesia observandae.

299. Ecclesia eis observandis se difficilem non prae-buit, tum quia conformes suae legislationi, tum quia ut plurimum utiles reipublicae, tum etiam quia inutilis et impossibilis fuisset resistentia, nec de re per se illicita ageretur sed ad summum de violato iure Ecclesiae, cui ipsa salvo principio, de facto cedere potest.

300. Ceterum attenta iuris quaestione, dicimus 1^o has leges esse iniustas si ita rigore procederent ut neque corpora sanctorum permetterent in Ecclesiis ve-

nerari; haec enim sunt obiectum cultus specialissimi, qui in Ecclesiis tribuitur; sed haec non solent in Ecclesias inferri nisi multis post mortem annis, cum ita exsiccata sunt ut nullus hygienicus praetextus possit in medium adduci.

Item 2^o essent iniustae si ab Ecclesiis excluderent et viros erga quos Ecclesia specialem habet reverentiam, ut sunt episcopi et praesertim ipse summus Pontifex.

3^o Etsi generatim pro hygiene magis expediat coemeteria extra Ecclesias haberi et in locis satis remotis vel alias opportunis, tamen non est impossibile cadavera saltem aliqua ita humare in ipsis Ecclesiis ut nullum exinde capiat detrimentum hygienae publicae; hinc ubi talis vigeret consuetudo, lex civilis quae inaudita Ecclesia eam interdiceret, certe irreverentia peccaret, et de rigore iuris posset ab Ecclesia sperni, cum civili auctoritati sufficiens esse debeat ita corpora sepeliri ut nullum detrimentum capiat res publica; hinc potius est negativum eius ius, quam positivum, idest ius habet invigilandi ut quicumque locus eligatur, cautelae debitae requirantur, potiusquam unicum locum determinare, quando possibile est et alibi satisfacere exigentiis hygienis et publicae securitatis.

NUM. 2.

De modo curandi corpora defunctorum, seu de humatione et crematione.

301. Cum illatio in sepulchrum causa religionis fiat, hinc et ritus (seu modus id rite, idest recte et honeste conficiendi) religiosus sit oportet, servatis praescriptionibus hygienicis et publicae securitatis ab auctoritate civili latis, prout dictum est.

302. Quod autem attinet ad modum materialiter in-

spectum, duae rationes diversae usitatae sunt, nempe *humationis*, ut nunc apud christianos, et *cremationis*, ut nunc apud Indos et olim aliquando et apud Graecos et Romanos.

Iamvero potest quaeri quinam modus sit praefendus. Ut igitur ex ordine procedamus, primo indicemus rem historice, deinde sub respectu religioso et iuridico. Ex sacris litteris habemus apud patriarchas et Aegyptios humationem in usu fuisse; quae et perseveravit in populo electo; sed aliqui reges cremati sunt; verum de ceteris id nunquam obtinuisse videtur; imo ex Talmude apparet post babylonicam captivitatem, cremationem habitam esse ut abominabilem, tanquam ritum paganum.

Apud veteres quoque romanos, mos communis fuit humatio, etsi serius pro optimatibus obtinuerit crematio. Apud christianos autem semper in usu fuit humatio, sive ob exemplum patriarcharum et populi Dei, sive quia magis dormitionem spiritualem repraesentat, qua corpora quiescunt donec ab angelica tuba excitentur. Hinc mos humandi habetur ut apostolico praecepto praescriptum.

303. Verum sicut christianismus sponte informavit omnes sociales institutiones et universam fidelium vitam, sic nostra aetate, increduli conantur hoc spiritu societatem exuere, et sua incredulitate informare. Et in re nostra quidam aperte procedunt, invocantes significationem materialistico-pantheisticam cuius capax est crematio, nempe dissolutionem in vapores repraesentare finem individui humani, qui redit in absolutum, et accelerare transformationem corporis seu hominis in puriorem statum quo ad superiorem gradum evolutionis ascendit. Alii e contra speciem spiritualismi conservant, aientes melius significari poetica ra-

tione, spiritus ascensionem ad coelum. His addunt et inconueniens quod in humatione habetur, corporis nempe nostri quod in tabem convertitur et a muribus et vermibus manducatur. Cineres autem et domi custodiri possunt et sic satisfit affectibus superstitum qui semper conversari valent cum suis caris. Alii autem rationes scientificas in medium adducunt, nempe hygienem, cremationem praeferendam indigitare; etenim celeris dispersio in aerem exalationum corporis humani non nocet, dum e contra in humatione aer circumstans inficitur, nec non aquae potabiles. Accedit et ratio oeconomica ne tot terrae occupentur coemeteriis, dum cineres facile custodiuntur.

304. Sed hae rationes sunt infirmæ; etenim quoad significationem, Ecclesia praeferit recordare futuram resurrectionem, quam animae in coelum ascensum.

305. Quoad conservationem cinerum in domibus privatis, qui cognoscit homines in concreto, facile intelligit quot negligentis et profanationibus exponerentur cineres in domibus, praesertim cum nepotes succedunt, vel domicilium mutatur.

Item non exprimeretur communio omnium fidelium per sepulchrum commune.

306. Ratio pariter oeconomica parvi est momenti, cum experientia ostendat ubi crematio concessa est volentibus, maiora dispendia sustineri ut rite conficiatur. Territorium autem a coemeteriis occupatum exiguum est, si comparetur cum reliquo territorio. Nec enim debemus, ut nonnulli immerito faciunt, considerare summam territorii quod in universo orbe occupatur a coemeteriis, ut utilitatem oeconomicam cognoscamus quae ex eorundem abolitione derivaret. Etenim videnda est utilitas quae in singulos redundaret, quae non esset sensibilis, ideoque sperni posset, ut faciunt

mathematici de minimis quantitativis. Deinde hae considerationes oeconomicae sunt nimis materiales, ut nos movere debeant; supponunt enim nihil aliud esse ab homine attendendum quam quod aëri et potui inseruit. Hinc pari argumento nemo movetur ad plateas quae ornatus causa in urbibus et pagis sunt, convertendas in campos frumenti, etsi suo numero superent coemeteria.

307. Proinde inter obiectas rationes consideranda est tantum hygienica. Si enim humatio non posset rite componi cum publica hygiene, profecto cum non agatur de re praecepto divino necessaria, si detrimentum esset notabile, teneretur Ecclesia hunc modum curandi cadavera omittere et ritus suos religiosos alteri accomodare.

Verum omnino negandum est hygienem obstare humationi. Experientia enim et peritorum saepe etiam incredulorum iudicium (ut senatoris Mantegazza Pauli) ostendunt humari posse corpora facile ita ut non noceant, cum sufficiat terra altiori eadem tegere, et sic lenta habetur dissolutio, quae cum paulatim disperdat in aërem per terrae filtrationem vapores (gaz), eundem aërem non inficit, praesertim si debita distantia cum locis habitatis servetur et ventorum directio consulatur.

Idem Mantegazza in suo *almanacco igienico popolare anno XL 1905* cui titulus — *Le fruste e le marlinicche della vita* — pag. 78 loquens de crematione in diversis regionibus ait: « Abbiamo insorto e anche oggi insorgiamo contro le calunnie lanciate dai fanatici crematori contro i cimiteri, che quando sono governati da una savia igiene, non possono arrecare alcun danno alla salute dei vivi ».

Et jam ab an. 1883 mense ianuario, in ephemeride florentina — *La Rassegna* — scripserat:

« In fatto di cremazione io sono dunque un codino,
 « perchè credo fermamente che i cimiteri sono stati
 « e sono calunniati, perchè credo che il cinquanta
 « per cento dei crematori fanatici inneggia al rogo,
 « per essere creduti liberali o almeno progressisti,
 « e perchè è cosa facile l'aver l'aria d'andare avanti
 « rifacendo la strada dei tempi passati e trapas-
 « sati remoti ».

308. Neque inficiuntur aquae nisi omnino inconsulte
 coemeteria ponantur circa cursus aquarum potabilium,
 et in hac re stratus terrae et inclinationes attendere
 oportet (1).

I Praestat haec confirmare auctoritate deputati Angeli Celli, in
 romana studiorum universitate hygienis professore. In suo *Manuale*
dell'igienista, edito an. 1904, vol. II, pag. 338, haec habet: « Sono
 « in vero pregiudizi antichi quelli che fanno ritenere i cimiteri
 « come un pericolo per la salute pubblica. Anzitutto, se confron-
 « tiamo la quantità di materia organica che si sotterra in un ci-
 « mitero con quella che si versa alla superficie del suolo delle città.
 « troviamo che la prima è in confronto assai minore ».

(Il Celli la calcola all'1 ‰).

« Si può obiettare che varia è la superficie che accoglie l'una
 « e l'altra quantità di sostanza organica; ma intervengono le ana-
 « lisi dell'aria e dell'acqua e del terreno dei cimiteri, in confronto
 « a quelle rispettive delle città, per corroborare l'assunto.

« Le analisi dell'aria dei cimiteri dimostrano che alla superficie
 « l'acido carbonico si trova in piccola quantità mentre il resto dei
 « componenti è normale come dimostra la seguente tabella:

« A Campo Verano (Roma) per 1000 parti di aria:

	alla superficie		
	a m. 1,50 di profondità		
acido carbonico	0,31	— 0,35	— 36,2
acido nitrico	0	—	— tracce
anidride nitrosa	0	—	— 0
tammoniaca	0	—	— tracce
anidride solforica	0,2	—	— 0
sost. org. per m ³ d'aria	0,2	—	— 12,5

309. Sic habetur lenta corporis humani dissolutio, mediantibus viribus naturae, et non violenta et artificialis ut in casu cremationis.

310. Circa decentiam, si quid evenit minus conveniens visui, tamen occulte et sensim sine sensu fit, dum confrixio cremationis in aperto et in momento succedit.

311. Adiungenda est et alia ratio, licet non religiosa, tamen iuridica multi momenti; nempe humatio adhuc possibilem relinquit corporum inspectionem multum post temporis, si suspicio dolosae mortis succedat, dum

« Il suolo dei cimiteri nei punti in cui erano scavate le fosse è
« stato trovato, a Torino, meno ricco di germi che non quello di
« molte vie della città tanto in superficie che alla profondità di
« m. 1,50.

« Quanto ai microrganismi s'è trovato contemporaneamente in
« Roma un numero di 774 nell'aria alla Torre del Campidoglio,
« di 425 al monte Pincio, di 476 al Campo Verano.

« L'analisi chimica delle acque del sottosuolo eseguita in tre punti
« diversi della città di Roma ha fatto riconoscere più corrotta
« l'acqua del sottosuolo presso il palazzo del Valentino e al Borgo
« S. Spirito, anzichè quella del Verano.

« Il pericolo maggiore temuto dai cimiteri è la diffusione dei
« germi patogeni.

« Tuttavia anche questo si può evitare con le precauzioni da
« prendere nella inumazione, come la disinfezione, con lo stabilire
« speciali reparti in tempo di epidemia e col permettere le esuma-
« zioni dopo un tempo molto lungo dieci anni¹.

« Il pericolo per le infezioni comuni si può dire che non esi-
« sta, come provano le inchieste sul personale addetto ai cimiteri.

« Dal punto di vista igienico la cremazione si riteneva prima
« molto opportuna, ma ora, essendo dimostrato che il pericolo dei
« cimiteri non esiste, l'igiene vi è indifferente, e rimane solo una
« questione economica. Il forno crematorio sarebbe una spesa pei
« comuni, mentre un buon terreno per cimitero, toltà la spesa

crematio ad summum, veneni residua ostendit, si rite fiat; hinc pro reliquis generibus mortis violentae delegendis, praecedens inspectio esset necessaria, quae, ut notum est, ruri praesertim, cum nulla esset eo momento suspicandi ratio, valde negligenter fieri soleret. Hinc est togatos viros cremationi faventes non esse.

312. Sed ad rem nostram quaestio iuris haec est: teneretur ne Ecclesia stare legi civili cremationis obligatoriae, si ferretur?

Resp. negative. Etsi enim debeat Ecclesia suscipere iustas de re hygienica leges civiles, tamen eas suscipit salva sua independentia, seu inspiciendo an iustis causis innitantur; quae si deficient, non tenetur easdem observare. Iamvero hae causae in re nostra deficiunt.

Etenim rationes legis civilis non proponuntur ex revelatione quadam, cuius custodia sit auctoritati civili oncredita, sed patent ex lumine naturali, quo et Ecclesia utitur: hinc leges civiles iudicat ut videat an sint observandae vel non. Ius enim civitatis in hac re non est praescribere positive rationem curandi cada-

« d'impianto, dà piuttosto un utile annuale per l'affitto e la vendita delle aree.

« L'utilità dei crematoi rimane ancora discutibile dopo le battaglie e le epidemie, facendosi più presto a scavare fosse ».

Riporta quindi alcune pagine del Prof. Gabba contro la cremazione e aggiunge:

« Continuino dunque i crematori a fare il loro apostolato della bistecca umana, ma non ci mischino la scienza nè l'igiene, nè la chimica che non ci hanno proprio nulla che fare.

« Noi continueremo a crederci liberali, *progressisti*, benchè non crematori, e lasceremo che i cimiteri, ben costrutti e ben sorvegliati, continuino ad offrirci quei campi di dolore dove mille e mille vanno a pregare e a ricordare e dove il poeta l'artista ci innamorano colle loro ardenti ispirazioni ».

vera ab omnibus servandam, sed tantum cavendi ut fiat convenienter publicae saluti. Etsi enim privatis, uniformitatis gratia et maioris securitatis causa, posset lex civilis et modum unicum praescribere, non tamen Ecclesiae, quae est societas superior et quae in suis ritibus nequit ligari lege non necessaria societatis inferioris. Lex necessaria eius independentiam non laedit, quia est praesupposita ex ipsa rei natura vel saltem ex statu hodierno scientiarum; hinc in eius observantia non persentit auctoritatem societatis inferioris, sed ipsius naturae, quod profecto eius independentiae et superioritati non officit.

NUM. 3.

De iure admittendi vel excludendi a religiosa sepultura.

313. Ex iis quae supra diximus de natura coemeteriorum, apparet quoque ius admittendi aut excludendi ab ecclesiastica sepultura, proprium esse auctoritatis ecclesiasticae. Non enim agimus de sepultura simpliciter inspecta, sed de sepultura religiosa, et quidem catholica. Iamvero sepultura simpliciter inspecta pertinet ad officia humanitatis, ideoque nemini deneganda; sed sepultura religionis determinatae, idest in loco ritibus propriis alicuius religionis benedicto et modo analogis ritibus resultante, iis tantum convenienter dari potest qui eandem religionem sincere professi fuerint. Etenim ex parte defuncti, est praesumptiva voluntas eius corpus perseverare debere in ea exteriori communione, quam vivens excoluit; item ex parte societatis, sepultura est recognitio defuncti tamquam membri determinatae religionis et quidem membri laudabilis, ita ut de eo speretur, saltem probabiliter et prudenter, eam assecutum esse requiem, quam religio honestis

viris promittit. Igitur requiritur primo eandem religionem professum esse; 2^o non modo verbis, sed et opere; secus eidem religioni illusisset. Iamvero de his iudicare spectat ad auctoritatem religiosam.

314. Ex his apparet solutio difficultatum quae opponuntur: aiunt enim I. sepulturam esse iuris gentium et omnibus debitam. Resp. sepulturam quamcumque concedo, religiosam nego.

315. II. Aiunt de quolibet defuncto sperari posse salutem consecutum esse, cum potuerit in extremo vitae Deo reconciliari, etsi pessime vixerit.

Resp. sperari posse, idest id possibile esse, conc., prudenter et probabiliter negatur; nullum enim adest fundamentum probabilitatis huius iudicii. Iamvero in externa conversatione procedimus ex iis quae exterius apparent. Institutiones enim sociales ex eo vim suam et scopum desumunt, ut homines mediis visibilibus impellant aut deterreant, iuxta quod arguitur extrinsecus.

316. Hinc neque III. obiici potest illud antiquum effatum: parce sepulto. Hoc enim de individuo in suis privatis relationibus valere potest, non autem cum de ordine publico agitur. Iamvero concessio vel denegatio ecclesiasticae sepulturae, refertur ad ordinem publicum, idest ad ecclesiasticam disciplinam conservandam. Et enim exclusio ab ecclesiastica sepultura si non nocet defunctis, iuvat tamen viventes, cum eos salutariter deterreat ab imitandis pessimis exemplis. Imo timor huius poenae corrigit quosdam qui de cetero in vitio perseverassent; et iam s. Augustinus notaverat suo tempore plures Ecclesiae reconciliatos fuisse metu exclusionis ab ecclesiastica sepultura, qui aliis motivis non fuerant compulsi.

317. IV. Obiic. exclusionem ab ecclesiastica sepultura infamiam irrogare, ideoque esse competentiae civilis.

Resp. Infamiam irrogare ex causa mere civili negamus, ex causa ecclesiastica concedimus, et contradistincta maiore subintellecta, negatur consequens.

NUM. 4.

De processione mortuaria.

318. Defunctorum cadavera apud omnes gentes solemnitate quadam ad sepulchrum deferri mos est. Quaeritur an apud catholicos haec processio sit mere civilis vel religiosa. In quibusdam statibus in quibus per iniuriam processiones religiosas, saltem regulariter, prohibitaе sunt, permittitur tamen processio mortuaria, quia ut actus civilis habetur. Et quoniam solent volentibus permitti et signa religiosa, hinc catholici quoad factum acquiescunt, ut saltem hac libertate fruantur.

Verum si rem inspiciamus, huiusmodi processio apud catholicos, religiosus actus est, cum tota cura quae de cadaveribus suscipitur, ex fine religioso praestetur. Hinc et ritibus religiosus fit. Et proinde delatio signorum religiosorum et religiosorum rituum praestatio, est ius.

Hinc et modus praescribendus est ab auctoritate religiosa, salva competentia civili pro hygiene et publica securitate.

Et haec de praesenti numero, paragrapho et articulo sufficiant.

ARTICULUS IV.

IUS ECCLESIAE QUOAD RELIQUA
CAPITA PRAECEPTORUM MORALIUM,
IURIS POSITIVI HUMANI.

319. Appellamus praecepta moralia quae feruntur pro sanctificatione individui; etenim praecepta vel referuntur directe ad Deum, vel ad individuum perfi-

ciendum, vel ad relationes inter homines ordinandas; quae ad Deum, iam considerata sunt, praesertim agendo de cultu divino, in praecedenti articulo; quae respiciunt mutuas hominum relationes, partim considerantur in sacramento matrimonii, ubi de specialibus relationibus privatis, partim spectant ad organismum Ecclesiae, de quo capite sequenti; hinc remanet dicendum de iis quae sanctificant singulos, ut sunt praecepta de ieiuniis et abstinentiis, vel etiam privatas quasdam relationes inter homines attingunt, ut vetita communicatio cum iudaeis, quae inspicere potest et pro salute publica, et tunc de ea agitur in potestate indirecta, vel pro singulorum incolumitate, et de ea agitur praesenti articulo.

320. Quatenus naturalis honestas ordinatur ad publicam tranquillitatem, cadit et sub competentia civilis potestatis sed quatenus ordinatur praecise ad salutem aeternam, seu ad sanctificationem, spectat ad Ecclesiam. Iamvero ius esse Ecclesiae et ea omnia praecipendi quae ad sanctificationem conducunt, quatenus praecise ad id referuntur, evidens est quia attingunt directe ipsum finem Ecclesiae, quae sibi proponit non modo bonum publicum sed et privatum spirituale singulorum, et ad illud promovendum plenissimam a Deo accepit potestatem.

Et in hoc indoles Ecclesiae distinguitur ab indole societatis civilis, quia haec directe non attingit ordinem individuum, sed relationes externas familiarum et illum tantum adiuvat, supplet et corrigit; e contra Ecclesia aequae directe sibi proponit bonum individuale et publicum: hinc aequiparatur tum publicae societati, tum familiae.

321. Sed notandum est ea praecepta ecclesiastica, quae directe referuntur ad bonum individuale, diversa sanctione muniri, ac ea quae directe referuntur ad

bonum commune; illa enim in foro tantum interno puniri solent, et sanctioni divinae relinqui, nisi fiant publica et scandalum generent; tunc enim offendunt ipsum ordinem socialem et tendunt ad alios quoque ab officio avertendos, ideoque non modo ordinem individualem sed et socialem laedunt.

ARTICULUS V.

DE IURE ECCLESIAE PRO ORDINANDA PUBLICA PROFESSIONE CONSILIORUM EVANGELICORUM,

ET PRAESERTIM PRO ORDINIBUS ET CONGREGATIONIBUS RELIGIOSIS INSTITUENDIS.

322. Ex sacra theologia constat praeter praecepta esse et consilia in evangelio, quae perfectionem christianam constituunt. Iamvero apex evangelicae perfectionis per se consistit in tribus votis substantialibus paupertatis voluntariae, castitatis, et obedientiae perpetuae; maius enim est holocaustum eius qui ad haec sese perpetuo obligat, quam eius qui eadem observat, retinens tamen potestatem ad saecularia vota transeundi.

Vota religiosa sicut esse possunt privata, ita et publica, idest emissa in facie Ecclesiae, et ab eadem admissa et recognita.

Id fit sive cum, sive absque solemnitate; differentia est, solemnna regulariter importare non modo illicitatem actus contrarii, sed etiam invaliditatem, ex. gr. matrimonii, testamenti, aut saltem irritabilitatem, ut in promissione.

323. Quaestio iuris nostri est I. an Ecclesiae ius sit et quidem exclusivum haec vota publice agnoscendi,

ideoque eadem ordinandi, et effectus sociales non modo ecclesiasticos sed et civiles eorundem constituendi.

II. Quoniam haec vota maxime iuvant in adsociationibus religiosis, an Ecclesiae ius sit, et quidem exclusivum, approbandi et moderandi sive ordines (seu adsociationes religiosas cum solemnitate votorum), sive congregationes religiosas (idest adsociationes religiosas cum votis sed absque solemnitate), et an societas civilis teneatur effectus civiles tribuere legibus ab Ecclesia de hac re latis, et civium actibus respectivis.

§ 1.

THESIS.

Ecclesiae ius est exclusivum publice recognoscendi vota evangelicae perfectionis, eaque pro effectibus socialibus moderandi; et societati civili catholicae officium est, leges respectivas Ecclesiae et respondentes actus in ordine civili agnoscendi.

324. Loquimur, ut patet ex verbis enunciationis, de recognitione et moderamine horum votorum in foro externo, seu coram societate, primo ecclesiastica et deinde civili; non autem de mera moderatione in foro interno, seu ethica et non iuridica; etenim cum Ecclesia curet sanctitatem fidelium, profecto et ius ei est praescribendi normas servandas ab iis qui perfectioni cupiunt attendere, ideoque sicut leges fert pro omnibus praeceptivas, quia ad necessariam sanctitatem référentur, de quibus praesertim in superiori articulo egimus, ita et leges condit hypotheticas pro iis qui ad ipsam perfectionem volunt adsurgere, ut prudenter et efficaciter in hac re procedant. Igitur de votis non modo iudicat iuxta ipsorum valorem dogmaticum, seu leges morales, sed etiam disponit lege positiva, seu iure canonico.

325. Iamvero sicut bonum est consiliis evangelicis attendere in foro interno, ita optimum eadem servare et exterius, ita ut appareant coram societate christiana; id enim expedit 1° ipsi profitenti, cum sit sub vigilantia societatis ideoque cautius procedat, et difficilius a susceptis propositis discedat; 2° iuvat societati, quia eam aedificat. Hinc cum Ecclesia sit societas visibilis et ad sanctitatem atque perfectionem ducat, id visibiliter et socialiter praestat. Hinc expedit fidelibus sua vota emittere coram societate ecclesiastica, cui ex sui natura competit eadem suscipere, ideoque moderari ut debite emittantur, et emissa debite servantur. Et quoniam requirente publica utilitate, actus non modo illiciti sed etiam invalidi a competente auctoritate reddi possunt, hinc et actus oppositi votis non modo illiciti sed etiam invalidi ab Ecclesia reddi valent; personas enim illas ad contrahendum matrimonium voto castitatis inhabiles reddit; item inhabiles ad actus dominii, voto paupertatis et ad sese obligandos, voto obedientiae; ipsorum enim promissiones saltem sunt a superiore irritabiles.

Id est quod regulariter praestat cum votis *solemnitatem* addit; quae proinde solemnitas habet in iure canonico significatum omnino proprium; non enim tantum indicat vota emitti publice et additis ritibus augustioribus; id enim servari potest et in votis quae tantum oppositi illiciteitatem important et non invaliditatem (1).

(1) Haec sententia est omnino admittenda in adsignanda differentia voti simplicis et sollemnis; etsi enim aliqui theologi dixerint, vota sollemnia ea esse quae a Deo acceptata sunt, et eius nomine ab Ecclesia, id tamen sustineri non potest. Sic enim suam theoriā explicabant. Aiebant: Ecclesia aliquando approbat regulas alicuius religiosi instituti definitive, tamquam idoneas procurandae evangelicae perfectioni, et sic illud quoque edicit, eum qui sincere

326. Iamvero effectus omnes votorum quae Ecclesia probavit, agnoscendos esse non modo in societate ecclesiastica, sed etiam a lege civili, apparet ex eo quod lex civilis per se teneatur agnoscere quidquid lege ecclesiastica constituitur ut observandum non modo in foro interno sed et in externo.

Etenim sicut cultus ut sit in societate plene publicus, oportet agnoscatur et lege civili, sic et professio perfectionis ut plene sit socialis, et per eam Deus a societate honoretur, non modo ab Ecclesia est agnoscenda, sed et lege civili.

Quod si non fiat, utique ex parte voventium et ex parte Ecclesiae non imminuetur honor divinus ex professione religiosa redundans, sed imminuetur a societate civili, quae indifferentem se praebebit divinae ordinationi, laudanti professionem religiosam publicam ab Ecclesia moderatam.

Igitur lex civilis sese subtraheret ecclesiasticae et divinae et non plene agnosceret divinam ordinationem,

annum vel annos probationis sustinuerit, moralem habere certitudinem. suum votum esse vere tale, seu promissionem de bono sibi possibili et sibi meliore; ideoque acceptatum esse a Deo, et eius loco ab Ecclesia. Aliquando e contra approbat, sed non definitive; ideoque profitens prudenter procedit, sed non habet eam certitudinem quae in primo casu verificatur.

Verum id etsi ingeniose excogitatum, non tamen veritati innititur, quia plures regulae Congregationum sunt definitive adprobatae ut ducentes ad perfectionem evangelicam et ut tutantes eos qui sincere probationes praescriptas sustinuerint, et tamen Ecclesia eis non concessit votorum solemnitatem, cum in hoc respiciat non modo ad perfectionem regulae in se, sed ad oeconomiam sociale tum internam Ecclesiae, tum externam seu conditionis civilis. Hinc est Bonifacium VIII, cap. un. de Voto et voti redemptione in 6. edicere: « Nos attendentes, quod voti solemnitas ex sola constitutione Ecclesiae est inventa... ».

quia eam non agnosceret ut plene socialem. Hinc non agnosceret ex divina intentione unam esse materialiter hominum societatem, quamvis formaliter duplicem, sed ordinatam, ita ut iidem homines et societatis civilis sint membra, et Ecclesiae, et ipsa societas civilis ingrediatur socialiter Ecclesiam, eique subordinetur, ibi incipiendo suam legislationem ubi desinit ecclesiastica, quam proinde integre agnoscit, nisi ipsa Ecclesia eam limitet ad forum internum.

327. Hoc quidem per se; quid autem si societas civilis attenta sua conditione, admittat religionum pluralitatem aut a quacumque praescindat?

Responsio diversa esse potest iuxta diversos modos admittendi pluralitatem religionum, et salva debet esse semper naturalis honestas, ob quam quis nequit damnum ceteris inferre et sibi oportet sit constans in iis quae in favorem aliorum promisit. Huic principio innixa et quaedam tribunalia civilia suprema agnoverunt ex paritate rationis, nullitatem matrimonii ab eo contracti qui in sacris fuerit, nisi saltem statum clericalem in externa conversatione prius dimiserit; etenim cum sese exhibeat ut minister religionis quae suis ministris prohibet sub poena nullitatis statum matrimonialem, sibi contradiceret si vellet in ministerio perseverare, hanc legem non agnoscendo.

328. Leges civiles non recognoscendo canonicas dispositiones circa effectus iuridicos votorum solemnium, peccare possunt non modo defectu sed etiam excessu, si ampliores quam Ecclesia et voventibus noxios tribuant. Ita quaedam gubernia antiqua personas religiosas habebant ut omnino civiliter mortuas; hinc incapaces successionis sive testamentariae sive ab intestato, ne eis applicaretur effatum: quidquid acquirit monachus, acquiritur monasterio. Haec contra ius fieri

patet, cum sit determinare effectus iuridicos votorum, loco Ecclesiae ad quam exclusive spectat; insuper iniuriosum est, cum personas religiosas expoliet suis iuribus quae Ecclesia habet ut non repugnantia cum religiosa professione.

329. Omittimus difficultates quae praesertim contra votum castitatis et in genere contra sacrum caelibatum proponuntur, utpote theologicas potius quam iuridicas, et de caelibatu supra egimus.

Contra votum obedientiae obiciunt indignum esse humanae personae, sese committere alterius arbitrio, nec non id enerves homines facere.

Resp. limitationem voti quo promittitur obedientia in iis quae non sunt peccatum, omnem inhonestatem a voto obedientiae remove; est autem actus nobilissimus, cum Deo sacrificet maximum eius donum, seu libertatem qua dominium nostri habemus et nostrae voluntatis potestatem.

Est insuper actus fortissimae virtutis; hinc non enervat sed auget energiam; cumque possibilem reddat perfectam voluntatum conspiracyem, impellente maximo motivo, idest religionis, hinc et ad actus heroicos habilitat et superiori dat modum plures vires convertendi ad eundem scopum. Voluntas autem superioris non est arbitraria, cum contineatur non modo lege Dei et Ecclesiae, sed insuper regula et traditione instituti, nec non censura ordinis ipsius; etenim Definitorium generale vel Capitulum aut quocumque alio nomine designentur tum Consilia suprema ordinum, tum Comitia generalia eorundem, solent habere ius et officium invigilandi et corrigendi, aut saltem denunciandi sanctae Sedi superiores etiam generales, si abutantur sua potestate, ad quam sanctam Sedem semper de cetero patet recursus. Cum autem in maiori numero ordinum et

congregationum, officia etiam generalatus sint ad tempus, valde limitat arbitrium superioris certitudo remotionis si abutatur.

330. Contra votum paupertatis obiiciunt, praesertim invehendo contra mendicantes, cum dicant indecorum, imo iniustum eos vivere aliorum eleemosynis qui suis possint vivere quaestibus.

Resp. has eleemosynas esse retributiones spiritualium ministeriorum quae gratis ab iisdem ordinibus praestantur christianae societati; hinc indecorae non sunt neque iniustae.

331. Ceterum aliae sunt normae vitae communis, aliae pro vita extraordinaria; iamvero modus vitae necessaria acquirendi a mendicantibus adhibitus, est extraordinarius, seu dirigitur ad exercitium specialium virtutum, quae non omnium sed paucorum, specialiter a Deo vocatorum propriae esse possunt, ut diximus de ipso caelibatu.

Etenim humilitatis et christianae fraternitatis exercitium et sensum augent; hinc ordines mendicantes sunt maxime benevisi viris popularibus et pauperibus, qui gaudent de voluntaria paupertate et eleemosynae expetitione, quae sic nobilitat et miseros et maxime fovet sensus concordiae et fraternitatis inter viros populares et religiosos, qui sic frequentant illos et ipso- rum indigentiarum solliciti evadunt.

Hinc neque indecora est neque iniusta ratio vivendi mendicantium; etsi ipsi spiritualia officia praedicationis, sacramentorum administrationis, etc. non suppedirent, adhuc valde rationabilis esset ob virtutum exercitium, et Ecclesiae utilitatem afferret spiritualem, etsi esset cum aliquo temporali detrimento.

§ 2.

THESIS.

Ius est Ecclesiae exclusivum approbandi ordines atque congregationes religiosas, eosque easque moderandi, atque dissolvendi, omnesque causas de hac re iudicandi; et officium est status civilis, easdem adsociationes et respectivos actus recognoscendi in foro civili.

332. Thesis asserit in prima sui parte ad Ecclesiae ius spectare et quidem exclusive 1° ordines sive congregationes religiosas instituere, et regulam earumdem approbare;

2° easdem adsociationes religiosas moderari, seu gubernare; hinc et pro opportunitate regulas earumdem modificare, vel

3° easdem dissolvere et

4° causas omnes de hac re videre, puta validitatis professionis religiosae.

In secunda vero parte, thesis asserit per se officium esse christianae societatis, agnoscendi in foro civili has adsociationes, idest 1° eas habendi ut personas morales iuridicas, Ecclesiae homogenee subordinatas;

2° agnoscendi membra earumdem ut eisdem addicta, et ligata effectibus civilibus de quibus egimus in paragrafo antecedenti, nec non

3° eadem habendi ut alia ab aliis dependentia, prout regula statuerit et Ecclesia declaraverit.

Veritas thesis huius facile demonstratur ex generalibus principiis.

A. *Institutio.*

333. Ius est Ecclesiae exclusivum constituendi quidquid ducit ad sanctificationem societatis christianae, et officium est status civilis has Ecclesiae leges et actus respondententes agnoscendi in foro civili, ut in praecedenti paragrapho demonstravimus. Iamvero Ecclesia iudicat religiosorum ordinum et congregationum institutionem valde conducere ad sanctificationem plebis christianae. Et veritas huius iudicii facile comprobatur. Iuvat enim 1° ipsis profitentibus et voventibus; 2° integrae societati tum indirecte tum directe.

334. Et I. ipsis profitentibus; etenim sub communi regula et disciplina, facilius et tutius servantur votum paupertatis, cum superior de omnibus disponat, tum obedientiae, cum superior continuo instet, tum castitatis, cum et viventes in saeculo, sint tamen a saeculo segregati.

335. II. Iuvat integrae societati et 1° *indirecte*, quia patet bonum exemplum, quod maxime movet, plus quam pulchra verba; 2° *directe*, quia maior pars religiosorum attendit etiam vel ministerio ecclesiastico, vel operibus piis in favorem societatis; etenim religiones et congregationes aliae sunt vitae tantum contemplativae, aliae etiam activae; sed primae paucae sunt; quae autem sunt activae vel attendunt ministeriis ecclesiasticis, et sunt clerici regulares; vel operibus charitatis tum intellectualis et moralis, educando iuvenes praesertim; tum corporalis, ut in nosocomiis; tum mixtae, ut in orphanotrophiis et aliis hospitiiis in quibus cura corporum procedit cum instructionis et educationis subministratione, vel etiam armis defendendo societatem religiosam et civilem, ut olim in ordinibus militaribus. Ipsi autem ordines contemplativi, olim

praesertim magnam utilitatem attulerunt christianae reipublicae, sive quia in eis fervor spiritus et doctrina ecclesiastica servaretur, unde factum est ut optimi pastores exinde Ecclesiae providerentur temporibus maxime periculosis, nec non doctores contra haereticos, sive quia olim scripta antiquae sapientiae nobis servaverunt. Quae utilitates ab ordinibus religiosis allatae pro diversa sua indole in institutionibus iuris canonici abunde et distincte recensentur (1).

336. Iamvero evidens est has utilitates magis tuto et abunde afferri ab adsociationibus quam a disgregatis viris. Vis enim unita fortior. Et sane adsociatio est persona perpetua; hinc operas ad finem perducit quae hominis vitam excedunt; hinc et experientia traditionalis perseverat; nec non distribuuntur officia ut singuli pro sua capacitate ei attendant in quo excellentiores sunt; qui autem ingenio minus praestant, ceteris in temporalibus administrant et sic illi magis expediti evadunt. Impensis pariter parcitur et opes, si regula eas admittat, semel congregatae conservantur.

Ergo valde iuvat tum pro singulorum voventium professione, tum pro spirituali utilitate societatis christianae, voventes ordinem constituere aut congregationem. Notandum est et opera charitatis corporalis esse recensenda sub charitate spirituali, quia non lucri causa, sed supernaturali charitate ponuntur, ideoque finis spiritualis in illis attenditur.

B. *Aetas.*

337. Cum igitur adsociationes religiosas utiliter instituantur pro fine religioso, iure ab Ecclesia insti-

(1) Vide De Camillis, vol. I. in fine.

tuuntur; cumque unice sibi proponant religiosum finem, unice ab Ecclesia pendent.

Ergo Ecclesiae est I. eas unice instituere et regulam approbare; et proinde determinare *aetatem* vestitionis atque professionis; et proinde iniustae leges civiles quae aetatem diversam ab ecclesiastica requirebant. Hae leges non modo iniustae quia Ecclesiae adversabantur, sed etiam iniuriosae erant, quia supposebant Ecclesiam non satis prudenter procedere, et professionem praesertim in iuniori aetate permittere. Tamen notandum est conditionem socialem mutari posse et efficere ut maturior aetas requiratur; tunc spectat ad prudentiam Ecclesiae, annos ad professionem requisitos augere.

338. Et ratio esse videtur spiritus informans societatem. Cum enim societas imbuebatur spiritu christiano, prudenter permitti poterat professio et iunioribus, quia prudenter sperari poterat eos esse perseveraturos; et experientia id confirmabat; si enim aliqui pauci a votis susceptis deficiebant, multo tamen plures laudabiliter perseverabant; proinde Deo maior honor et Ecclesiae utilitas derivabat. Hinc et puerorum oblatio permittebatur, qui optime instituerentur et in religione excolerentur; qui si perseverassent, primitias Deo acceptissimas constituebant, de quibus in iure canonico.

Sed paullatim praevalente contrario spiritu factum est ut iuniorum professiones minus expedirent; hinc Ecclesia quoque maiorem exegit aetatem. Sed Ecclesia non solet a suscepta disciplina recedere nisi evidens sit utilitas mutationis, quod sapientissime fit non modo ex regula generali s. Augustini, quod mutatio disciplinae quae utilitate iuvat, novitate perturbat, sed etiam quia in hac re, cum agatur de aliqua concessione facienda spiritui irreligioso saeculi, Ecclesia defendit

donec potest cum aliqua spe, adspectum religiosum societatis.

C. *Tempus probationis.*

339. Est Ecclesiae probationis tempus, seu, ut dicitur, Novitiatus determinare; ideoque iniustae et iniuriosae leges civiles quae aliter disponunt. Quae probantur rationibus analogis eis de quibus sub praecedenti littera.

Quod si aliquando principes sive antiqui, ut Iustinianus, sive recentes, aliquid in his et sequentibus capitibus enumerandis decreverunt et ab Ecclesia toleratum est, vel fuit acquiescentia ad mala maiora praecavenda, vel etiam quia satis rationabiles erant leges, eas adoptavit, aut nihil aliud erant quam sanctio civilis legis ecclesiasticae sive scriptae sive consuetudinariae praeexistentis.

D. *Vestes.*

340. Ecclesiae competit quoque ius vestes speciales adsignandi religiosis, quae a societate civili sunt non modo permittendae sed etiam defendendae, nempe impediendo ne alii eas adhibeant.

Hinc iniuria agunt ea gubernia quae vestes religiosas prohibent, saltem extra claustra monasterii.

Et sane, vestes speciales maxime inserviunt ad publicam professionem susceptae vitae religiosae; item monent religiosos ipsos de sua regula servanda; etsi enim, ut ait Concilium Tridentinum adoptans vulgare proverbium, habitus exterior non faciat monachum, tamen saepe monachum custodit. Hinc expediunt societati cum eam moneant de religiosis ideis, easque facto inculcent. Igitur permittendae sunt; imo defendendae, impediendo ne alii eas gerant per abusum.

Cum enim sint signa distinctiva specialis classis per-

sonarum a legitima auctoritate determinata, decipit societatem extraneus qui eas induat, et quidem eam decipit sub respectu religioso cum sint vestes professionis religiosae; hinc et decori status religiosi iniuriam infert, si illis indutus ea faciat quae sanctitati et gravitati religiosae professionis non respondent.

341. Quod de vestibus religiosorum diximus, dicendum quoque est de vestibus clericalibus. Sive enim positiva institutione, rationibus analogis ac pro viris religiosis, sive hominum moribus, factum est ut apud plerasque gentes, sint sacerdotibus et aliis ministris religionis speciales vestes etiam communes, idest extra sacrum ministerium. Etenim ipsa sanctitas status efficit ut gravioribus vestibus utantur, et magis adhaereant antiquae consuetudini, abhorrendo a quotidianis mutationibus; et proinde forma vestium clericalium vel lege scripta, vel saltem consuetudine determinatur. Hinc iniuria agit qui eas prohibet vel non defendit.

E. Numerus.

342. Item ad Ecclesiam spectat numerum religiosorum determinare. Si enim inserviant publicae christianae societatis utilitati, Ecclesiae est determinare quot expediunt; si autem suae tantum sanctificationi attendant, quod etiam fit si ordo vitae activae socios habeat maiori numero ac requiratur a suo activo scopo, Ecclesiae pariter est eos omnes admittere qui probabilia dent vocationis signa. Ius enim omnibus est christianis tendendi ad suam perfectionem, cum hic finis sit ceteris praestantior. Hinc s. Gregorius Magnus reprehendit legem imperatoris Mauritii prohibentis milites in monachos mutari.

343. Sed circa hoc obiiciunt: Ecclesia non admittit ad religiosam professionem eos qui necessitate officii

familiaris detineantur, ex. gr. quorum opera ad genitores pauperes alendos in saeculo necessaria est; prius enim satisfaciendum est officiis, deinde consiliis attendendum. Iamvero sicut quidam necessarii sunt ad rem familiarem, ita quidam necessarii sunt pro republica.

Igitur hos sibi vindicare ad ipsam spectat societatem civilem, sicut ad patremfamilias consensum concedere vel negare eis qui sub eius sunt potestate.

Resp. I. observando non currere paritatem inter auctoritatem patrisfamilias in filios, et principis in subditos; nam filii subiiciuntur patri usque ad competentem aetatem quia non sunt sufficientes ad sibi consulendum, saltem ea maturitate consilii quae requiritur in gravioribus negotiis; e contra subditi coram principe sunt sui iuris, exceptis iis quae referuntur ad bonum publicum, in quo ei subduntur, sicut iure naturae tenentur consulere necessitatibus parentum et cum evaserint ab ipsorum potestate.

344. II. animadvertimus Ecclesiam iudicare quoque de rationabilitate vel irrationabilitate dissensus patris, adeoque si irrationabiliter dissentiat, filios adhuc admittit ad professionem religiosam.

A pari, Ecclesia utpote societas superior, iudicat an necessitas pro quibusdam remanendi in saeculo, a principe asserta, sit vera vel non; hinc si vere necesse erit quosdam in saeculo remanere, pro publico bono, eos non admittet, vel admissos dimittet. Sed haec quaestio cum consideret casum exceptionalem, valde differt ab ea sententia quam impugnamus, quae per modum regulae statuit potestatem civilem iure pollere determinandi quot et non amplius religiosi sint admittendi. Id enim quidam regalistae asserebant pro utilitate ipsius Ecclesiae ideoque huius utilitatis iudicium ab ecclesiastica in civilem transferebant potestatem. Alii assere-

bant quia in genere abundantiam religiosorum civili societati nocere putabant; hinc proportionem religiosorum constituere cum reliquis civibus principi vindicabant, sicut fit de militibus.

345. Iamvero id falsum est. Multitudo enim religiosorum, si vere religiosi sint, statui per se non nocet sed iuvat. Si autem vere religiosi non sint, officium status est, Ecclesiae libertatem relinquere reformationes faciendi et eam adiuvare in observantia sacrorum canonum promovenda, non autem protegere discolos religiosos adversus legitimos superiores, ut saepe regalistis mos fuit. Per se autem multitudo religiosorum iuvat societatem, tum quia numerum exhibet civium perfectorum, tum ob vitae activae ministeria quae generatim praestant, ut diximus.

Quod si per exceptionem alicubi deficerent cives pro ceteris necessariis professionibus, ex. gr. pro militia, tunc casus esset conflictus, et regulae generales applicandae essent, idest primo consulendum esset necessitati Ecclesiae si verificaretur, deinde status, et ultimum de his iudicium pronuntiare ad Ecclesiam spectaret.

346. De religiosis sicut de clericis obiiciunt nocere statui si numerosi sint, ob suas immunitates ab oneribus publicis.

Respondemus sicut de clericis diximus, id si verum, esset quid secundarii, tolerandum ob maius bonum spirituale, vel res iudicio Ecclesiae terminanda, si vere haberetur incommodum non tolerabile.

F. Erectio domorum religiosarum.

347. Sicut ad Ecclesiam exclusive spectat limites ponere numero religiosorum, ita et concedere facultatem erigendi novas domos, et proinde est usurpatio auctoritatis civilis ubi ad id eiusdem venia requiritur. Et

sane erectio domorum religiosarum exclusive spectat ad vitam religiosam; hinc exclusive competit Ecclesiae. Si qui effectus exinde derivant in civilem societatem, sunt semper indirecti, ideoque sunt sequelae necessariae ordinis spiritualis, quae ab auctoritate civili sunt agnoscendae, non autem causa ab ea moderanda est.

G. *Regulae modificatio.*

348. II. Si ad Ecclesiam exclusive spectat ordines aut congregationes instituere, et regulam seu legislationem specialem earundem approbare, ad eam exclusive spectat etiam eandem regulam modificare, si opportunum visum fuerit, cum mutatio aequivaleat regulae approbationi.

H. *Regimen.*

349. Item ad Ecclesiam unice spectat urgere executionem eiusdem regulae, ideoque invigilare in eius observantiam, sicut ad eam specialiter, superiores maiores eorundem confirmare.

Etenim ex iure canonico habent superiores ordinum, auctoritatem quasi episcopalem in suos, et proinde pollent iurisdictione spirituali, quae non modo est participata sed delegata a summo Pontifice. Etenim huiusmodi praelati non sunt divinae sed ecclesiasticae institutionis. Hinc et removentur a summo Pontifice vel aliis eius delegatis; etenim iurisdictio ipsorum durat quantum summi Pontificis delegatio, eaque revocata cessat. Superiores autem congregationum etsi ex iure communi non sint praediti auctoritate quasi episcopali, tamen habent plures facultates a sancta Sede, ideoque indigent eius approbatione. Si vero sint congregationes dioecesanae, ex paritate rationis a suis episcopis dependent.

350. Et ratio generica ob quam ab ecclesiastica pendet potestate, est quia sunt adsociationes intra Ecclesiam constitutae, pro fine ipsius Ecclesiae consequendo, et quidem sunt adsociationes publicae; hinc non modo sunt sub vigilantia Ecclesiae ut omnes societates minores homogeneae relate ad suam maiorem, cuius vigilantiae vi, potest societas maior prohibere quae opponuntur fini eiusdem, sed quia constituuntur ut societates publicae seu ut partes organismi Ecclesiae, eius implorant agnitionem et privilegia, nec non perfectionis causa voto obedientiae religiosae adstringuntur, sequitur esse subiecta regimini Ecclesiae et eius moderamini, quae eas regit conformiter indoli speciali regulae propriae uniuscuiusque. Regula enim specialis est conservanda, cum quisque profiteatur non simpliciter vota, sed iuxta indolem determinati instituti; hinc ipsorum varietas; et quis vocatur pro uno et non pro alio, et proinde modificationes quae introducantur debent semper respondere indoli speciali cuiusque instituti.

I. *Dissolutio.*

351. III. Sequitur ab Ecclesia unice posse dissolvi. Etenim quaelibet societas dissolvi potest eius tantum facto qui eam instituit vel superioris eius. Hinc Ecclesia id potest, quia est iudex competens I. an adversentur sive per se sive per accidens bono integrae societatis ecclesiasticae; II. an adhuc utiles sint pro perfectione cuiusque profitentis. Et quoniam haec iudicare exclusive pertinet ad Ecclesiam, ad eam quoque congregationum aut ordinum dissolutio, unice spectat.

352. Quid si fiant noxiae ordini civili? Id esse potest tantum quia discedunt a sua institutione; tunc recurrendum est ad Ecclesiam ut provideat, sed aucto.

ritate civili nequeunt dissolvi quia ab ea causam non habent, ideoque iure subsistunt donec ipsarum causa eas conservat.

353. Si autem dissolvantur ab Ecclesia, unice ad eam spectat disponere de bonis temporalibus quae possidebant. Haec enim bona non sunt individuorum sed ordinis aut congregationis, ideoque dissoluta societate, quaeritur quis succedat. Iamvero cum generice inspecta, sint pro scopo religioso, deficiente scopo specifico seu ordinis vel congregationis, remanet tamen scopus genericus, ideoque devolvuntur societati quae generice curat scopum religiosum, nisi obstet specialis fundatorum seu donantium voluntas. Secus cum ipsorum voluntas fuerit in genere religiosa, iure praesumitur voluisse aliam destinationem religiosam, deficiente specifica ab eis contemplata, quantum fieri potest eidem analogam.

Item deficiente persona imperfecta, eius bona accedunt personae perfectae a qua illa pendebat et causam habebat.

Tamen haec bona, quamvis non essent individuorum componentium ordinem, eisdem quoque providebant; hinc ex eis est ipsis succurrendum, nisi in poenam aliter iustum sit.

354. Obiiciunt: Bona religiosorum habent ut plurimum et scopum charitatis; hinc dissoluta religione, devolvuntur saltem ex parte, illi societati quae temporali bono providet. Atqui huiusmodi societas est civilis. Ergo *liquidatio* necessaria est.

Resp. Bona religiosorum destinantur ut plurimum et ad scopum charitatis temporalis ex fine spirituali, concedo, ex fine mere naturali nego. Atqui spectat ad Ecclesiam providere in temporalibus ex charitate, spiritualis et supernaturalis motivi causa, dum ad statum

civilem spectat tantum providere bono temporali ex motivo mere naturali et ordinis praesentis. Ergo contraria conclusio admittenda est.

L. Interpretatio regulae et iudicium.

355. IV. Ecclesiae pariter competit exclusive interpretari regulam et secundum eam iudicare emergentes quaestiones. Etenim potestas iudiciaria est necessaria sequela respondentis potestatis legislativae. Hinc maxime spectat ad Ecclesiam exclusive iudicare de validitate professionis, aut dispensare in votis et concedere saecularizationem, cum ipsa una interpretetur ius divinum et dispenset in iis quae innituntur facto humano.

M. Recognitio civilis.

356. Prob. secunda pars thesis, qua asserebatur I. statum civilem teneri ad agnoscendam personalitatem iuridicam adassociationum ab Ecclesia approbatarum, et quidem ut subordinatam homogenee ipsi Ecclesiae; et quoniam solent subdividi in minores adassociationes, puta in provincias, et domos, sua distincta praeferentes iura iuxta Ecclesiae legem, hinc has quoque minores personalitates esse agnoscendas.

II. Singula membra agnoscenda esse pro effectibus civilibus ut ligata votis et regula; et proinde

III. auctoritatem superiorem religiosorum in suos subditos agnoscendam esse in foro civili.

Haec quae enumeravimus sequuntur ex principio statuto in paragrapho praecedenti, idest actus Ecclesiae fori externi, agnoscendos esse validos et in foro civili. Iamvero Ecclesia constituit ipsam adassociationem religiosam ut personam moralem distinctam a singulis

personis physicis eam componentibus. Ergo est ut talis agnoscenda; et proinde ipsa congregatio vel ordo agnoscendus est ut subiectum iurium, ad normam legislationis ecclesiasticae, ex. gr. ut capax possidendi, acquirendi, contrahendi prout Ecclesia edixerit. Inferius enim quaestionem expendemus an in adsociatione facto privatorum constituta, ipsa adsociatio habeat personalitatem non modo collectivam, sed et distinctam a personalitate omnium simul individuorum. Sed certum est et ad rem nostram sullicit, societatem perfectam posse participare suam personalitatem et creare personalitates imperfectas a se dependentes et distinctas a personalitate collectiva sociorum. Etenim id est proportionatum suo fini; ergo id legitime potest. Iamvero id praestat Ecclesia in casu. Sed actus Ecclesiae sunt agnoscendi a societate civili. Ergo agnoscenda est personalitas iuridica adsociationum religiosarum, tamquam societatum homogenearum Ecclesiae et eidem subordinatarum.

Pariter II. membra agnoscenda sunt ut ligata votis et regula, cum professi fuerint publice, seu coram societate ecclesiastica, et eius leges et actus sint agnoscendi in foro civili. Hinc

III. agnoscenda quoque est hierarchia ordinum, quia singuli voventes publice et libere organizationem ordinis amplexati sunt.

Contrarium statuere esset relinquere has leges Ecclesiae ut non agnitas in foro civili, et quidem non ex causa aliqua accidentali, puta quia non innotescunt sufficienter, sed per se; item converterentur in obligationes mere ethicis, officia suscepta a professis coram Ecclesia publice, quod inordinatum est.

357. De hac re abusus magnus adfuit quatenus noluerunt ordines religiosos pendere a superiori generali

Romae commorante, sed a vicario generali pro suo statu, constituto, quod unitatem ordinis vel congregationis tollit.

ARTICULUS VI.

IUS ECCLESIAE QUOAD RELIQUAS ADSOCIATIONES RELIGIOSAS ET PIAS OPERAS.

Quaeritur *A.* De adsociationibus. *B.* De operibus piis. *C.* De naturali adsociationis libertate. *D.* De iure naturali testandi. *E.* De iure erigendi personam fictitiam.

A. De adsociationibus.

358. Praeter ordines et congregationes, seu adsociationes religiosas vinculo votorum adunatas, adesse possunt et aliae adsociationes ex scopo religioso, quamvis votis carentes. Hae quoque sunt personae morales imperfectae, religiosae seu homogeneae Ecclesiae. Iamvero vel petunt agnitionem ab Ecclesia, et tunc publicas dicemus; vel mera privatorum pia voluntate consistunt, et tunc privatas dicemus. Semper subduntur vigilantiae Ecclesiae, adeo ut eas corrigere, et si opus sit, dissolvere possit; item et praeventivas quasdam poterit normas constituere; etenim et in actis privatorum sed aliquo modo socialiter sese manifestantibus, Ecclesia omnia potest quae necessaria sunt pro recta eorumdem institutione ad finem religiosum.

359. Cum autem ab Ecclesia petunt recognosci, esse potest vel ut mēras personas collectivās, vel ut personas abstractas a singulis, seu ut vera collegia et vera corpora moralia. Si primum, sequitur poni sub speciali vigilantia

Ecclesiae pactum sociale, ideoque eam intervenire posse et debere ad singulorum ius sociale defendendum, cum eius custos et vindex sit constituta in ipsa societatis formatione. Quae adsociatio et est creatio privatorum quatenus ab iis libere constituta, sibi reservata eiusdem potestate seu regimine, et est creatio Ecclesiae per adoptionem, quatenus firmat pactum sociorum illudque positive approbat.

360. E contra quando Ecclesia eas erigit in personalitates distinctas a collectione personarum physicarum, seu in vera corpora moralia, eas creat, eisque impartitur suam personalitatem, etsi eas creet ad preces privatorum qui eas excogitarunt et desideraverunt. Hinc in primo casu dissoluta legitime societate, bona dividuntur inter socios, nisi aliud iure positivo et libera voluntate sociorum obstat; etenim omne ius est in collectione personarum physicarum quae eam societatem component. E contra in secundo casu, bona et iura socialia sunt distincta a collectione singulorum; hinc sunt personae fictitiae, quia in concreto non existunt nisi singula individua et eorundem collectiones.

361. Iamvero ius esse Ecclesiae et has personas proprie morales instituendi, nullum dubium est, cum sint organismi et media utilia pro consecutione finis socialis. Aliunde ius harum societatum adhuc subiectum habet concretum, quod tandem est societas perfecta, quae lege sua constituit societatem imperfectam ut subiectum iuris, sed eam limitando, ita ut revocet ius a sociis concretis, cum ipsi opponuntur indoli aut durationi eiusdem societatis imperfectae.

Indifferens autem est an membra harum societatum minorum sint votis adstricta vel non. Ergo Ecclesia eodem iure ac instituit ordines religiosos, potest et alias

religiosas adsociationes constituere, puta contraternitates, scholas, sodalitia, etc.

362. Regalistae dicunt saltem confraternitates creari a statu ab eoque pendere, quia sunt societates laicorum.

Resp. esse societates laicorum, sed christianorum reduplicative, idest ad scopum supernaturalem, non autem ut mere civium, idest ad scopum temporalem; hinc pendent exclusive ab Ecclesia, cum ab ea aequae pendeant clerici et laici in re religiosa.

363. Quaeritur autem an haec personalitas abstracta ab individuis possit in Ecclesia constitui voluntate privatorum, quamvis subordinata ipsi Ecclesiae, adeo ut Ecclesia tantum agnoscat quod iam existit, si nihil obstat.

Et quidquid sit in ordine naturali, de quo infra, certum est id non posse fieri in Ecclesia; quia personalitates in Ecclesia, cum sint ei homogeneae, sunt supernaturales. Iamvero ad id quod est supernaturale, homo non habet proportionem per se, sed eam accipit a Deo, facto positivo, sive immediate sive mediate. Duas autem constituit Deus personas supernaturales, personam moralem supernaturalem perfectam seu Ecclesiam, et personas physicas imperfectas; in baptismo enim constituit seu elevat personas physicas tantum, quae personae physicae limitantur ad eam potestatem quae refertur ad bonum spirituale singulorum sub Ecclesiae regimine. Boni autem publici religiosi omnis cura data est ipsi Ecclesiae. Hinc persona moralis in Ecclesia, distincta ab individuis, tantum ex facto Ecclesiae derivare potest. E contra persona collectiva, quia verae adsunt personae physicae elevatae ad ordinem supernaturalem, quae mutua coniunctione efficiunt collectionem pro utilitate singulorum.

Haec de adsociationibus religiosis; nunc

B. *De piis operibus.*

364. Causae piae, seu pia opera sunt institutiones reddituum pro aliqua utilitate publica, puta adsistentia infirmorum, peregrinorum, orphanorum, etc. Iamvero vel hi redditus conceduntur alicui adsociationi quae id muneris sive principaliter sive accessorie adsumit, ideoque ex contractu et in posterum obligatur, vel nemini conceduntur. In primo casu quaestio reducitur ad antecedentem, idest ad institutionem alicuius adsociationis pro scopo religioso, redditu addito temporali; iamvero in postremo articulo huius capitis ostendemus ius Ecclesiae et societatum minorum quae in ea sunt, acquirendi res temporales. Adnotavimus enim scopum religiosum comprehendere et opera charitatis corporalis, dummodo ex fine religioso intendantur, ut fit in societate christiana.

365. Si autem adsociatio intendat meram utilitatem temporalem, praescindendo a fine religioso, ut in societatibus quae dicuntur *philantropicae*, tunc societas haec religiosa non est. Quamvis enim amor humanitatis, ut sonat vox philanthropiae, non habeat malum scopum et significare possit idem ac charitas proximi, tamen usu venit ut charitas exprimat amorem proximi supernaturali, quatenus nempe imago Dei est, et proinde significet affectum religiosum; e contra vox philanthropiae significet tantum naturalem amorem hominis quatenus homo est, saltem praescindendo ab ordine supernaturali; quidam illum etiam negant.

366. Si vero opus pium constituatur independenter a quavis speciali societate, sed ut ens autonomum, tunc tendit ad aliquam partem boni publici, et per se est aliquid fictitii; sed natura sua concreditum est illi societati perfectae quae curat bonum specialiter a fun-

datore intentum, quaeque acceptatione sua obligatur ad redditus respectivos erogandos in eorum favorem quos fundator contemplant; quae societas perfecta erit vel Ecclesia vel status; de operibus enim piis idem dicendum est ac de adsociationibus, idest posse institui ex fine mere naturali, vel ex supernaturali. Inter christianos catholicos praesumitur eas institutas esse ex fine supernaturali; quisque enim praesumitur agere conformiter suis principiis, praesertim cum actum sibi onerosum et aliis utilem praestat. Iamvero christianus qui suum donat, scit opera facta ex scopo supernaturali, sibi maxime esse meritoria. Hinc in antiqua societate, cum imbuebatur spiritu christiano, semper iudicabatur iuxta hanc rationabilissimam praesumptionem. Nunc autem non modo contrarium admittitur, sed et quaedam leges informantur spiritu adverso, ut nec praesumant haec instituta ex spiritu religioso, nec ea permittant.

367. Sed iniuria; etenim ius est bona sua, de cetero libera, ad usum honestum destinandi. Scopus religiosus est maxime honestus; et ipsa opera charitatis temporalis inter ea quae ad scopum religiosum referuntur, ex dictis, recensenda sunt. Ius autem est Ecclesiae, ex infra dicendis, acquirendi et bona temporalia pro scopo suo. Ergo et pro operibus piis. Et quoniam Ecclesiae competit ius invigilandi in ea omnia quae ad scopum religiosum inter christianos referuntur, hinc ei competit ius non modo praestandi per se vel ex voluntate fundatorum operas pias, sed invigilandi quoque in eas operas pias quae ex voluntate testatorum aut fundatorum habent speciales administratores, nisi expresse constet contraria voluntas. Etenim diximus inter christianos haec praesumi instituta ex scopo religioso, quae

praesumptio viget donec contrarium aperte demonstratur.

368. Quod si fundatores expresse faterentur se ponere ex scopo religioso suas institutiones et tamen velle ecclesiasticam potestatem excludere non modo ab administratione sed etiam a qualibet vigilantia in administratores, iam contradictorie agerent, neque ipsorum voluntas in hoc esset attendenda. Etenim quaelibet institutio innitatur oportet personae cuidam physicae; hinc vel individuo vel societati. Individua autem vel regunt nomine proprio, vel alieno; ut in casu, nempe fundatorum operis pii; iamvero cum tunc non agant in propriam utilitatem, sed societatis, neque agant nomine proprio, ius est societati saltem inspiciendi an satisficiant officio suo; quod si a fundatore esset prohibitum, vel eius voluntas non esset praeceptiva quoad haeredes aut non esset attendenda ut occasionem praebens inhonestati administratorum.

Si autem alicui societati commendatur opera pia, societas aut est perfecta aut imperfecta; haec autem semper est sub aliquali vigilantia societatis perfectae homogenae; iamvero qui ex scopo religioso aliquid instituit, illud praestat in utilitatem societatis religiosae, ideoque tum societas imperfecta tum individuus qui alieno nomine id agit, est sub aliquali vigilantia societatis religiosae. Dicimus aliquali; etenim regulariter societas poterit rationes exigere ab administratoribus designatis a fundatore; si autem id fuerit prohibitum, quia aliquando natura ipsa operis id suadet, puta ad succurrendum pauperibus occultis, saltem poterit intervenire in casu evidentis abusus, aut rationes quasdam genericas petere.

C. De libertate naturali adsociationis.

369. Hactenus consideravimus ius adsociationum prout competit in Ecclesia, ex divina eius natura. Sed quid coram societate civili, quae non agnoscat divinam Ecclesiae naturam, sed innitatur principiis, ut aiunt, iuris moderni, quibus status civilis declarat se incompetentem in materia religiosa, ideoque votorum valorem non admittit, neque obligationes societatis perpetuae, excepto ad summum matrimonio?

Respondemus statum huiusmodi ut sibi constans sit, necesse esse agnoscat libertatem adsociationis pro scopo honesto. Hoc enim ius est naturale. Quisque enim ius habet sese perficiendi et evolvendi suam activitatem, ad quod maxime conducit adsociatio. Etenim omnino falsa est et gratuita doctrina quae invaluerat saeculo XVIII, quaeque renovabat errorem paganismi nempe singulos contrahendo societatem civilem, se suaque omnia ei obligare, ita ut indigerent eius venia pro quacumque alia contrahenda obligatione. Nam id non importat natura societatis civilis, ut vidimus lib. I. part. I. cap., 3., agentes de eius fine. Importat enim tantum, cum sit suprema in ordine temporali, non esse contrahendas alias obligationes eidem repugnantes. Hinc oportet scopus sit honestus, et in eius prosecutione, honesta adhibeantur media. Proinde in hypothesis de qua loquimur, idest praescindendo a divinitate Ecclesiae, utique competeret societati civili ius interveniendi in casu abusus, et cuiusdam generalis vigilantiae, sed deberet adsociationem agnoscere saltem ut personam collectivam, et exigere a sociis ut pacta servant donec honeste servari possunt.

Etsi autem perpetuae societatis obligatio non admit-

tatur extra matrimonium, admittitur tamen partem recedentem debere indemnes servare socios pro diversa natura societatis. Pari ratione et pia^e operae catholicae admittendae essent; admissa enim existentia adsociationis catholicae, tamquam legitimae societatis, ideoque tamquam moralis et iuridicae personae, saltem collectivae, vel etiam ut naturam corporis moralis referentis, iuxta dicenda infra n. 377, agnoscendum est in ea et ius haereditates ac legata acquirendi. Iamvero et pia^e operae catholicorum tandem recidunt in bonum eorundem; hinc si ut supponimus, sint ad scopum honestum, recognoscendae sunt, quamvis sub vigilantia societatis civilis, cuius auctoritas in hypothesis adversariorum esset unica; hinc valeret et modificare pia legata, prout societatis bonum exigeret, sicut nos dicimus de Ecclesia, dummodo de vera et non palliata exigentia agatur.

Haec quidem recte statuuntur et praescindendo ab ea celebri quaestione, an ius testandi sit ex lege naturae vel non. Etenim si in societate admittitur, ex aequalitate concessa civibus et ipsorum honestis adsociationibus, aequè omnibus agnoscendum est, et tantum iniuste ceteris concederetur et catholicis negaretur. Deinde omnes concedunt facultatem testandi etsi supponeretur a mero iure naturae derivari non posse, tamen inter ea esse quae ius naturae maxime laudat, et quae a natura societatis ordinatae, constituenda exiguntur ut fundamentalia; secus enim maximus deficeret stimulus ad homines solertes ac diligentes reddendos, quando carerent necessariis haeredibus, et impotentes essent his constituendis, si nec de parte substantiae propriae libere disponere possent. Igitur si a lege naturae non datur, danda est a lege civili, et quidem

omnibus ex iustitia sociali. Verum et ius naturae plurimum in hac re posse dicimus; hinc sequentem innuimus quaestionem:

D. De naturali facultate testandi.

370. Hoc quidem ius lege naturae defendimus. Etenim etsi aliquando disputatum sit an facultas testandi simpliciter inspecta sit ex iure civili vel ex iure naturae, nullo modo sustineri potest prima opinio. Dicimus simpliciter inspiciendo facultatem testandi. Non enim loquimur de plenissima eius libertate, qualis praesertim habebatur lege romana, dividendi proprietatem ab usufructu, fideicommissa instituendi, perpetuum usum determinandi et alia huiusmodi quae tantum lege positiva adaequate explicari possunt. Ius autem testandi, sicut ampliari lege positiva, ita iustis de causis et coarctari potest, tum cogendo ad naturales servandas obligationes, ex. gr. erga liberos, in quo proprie non coarctatur, sed urgetur lex naturae atque determinatur; tum illud iuxta bonum publicum limitando et mortificando. In societate enim oportet iura individualia accommodare ipsi coexistentiae plurium, ideoque ea modificare. Sed loquendo in genere, facultas testandi, idest nostrum successorem designandi ne bona nostra fiant nullius, est a iure naturae.

371. Id plures demonstrant, quia quisque potest res suas donare; quod tum absolute fieri potest, tum sub conditione; conditio autem in casu est: nisi quis revocet donationem ante mortem. Contra hunc modum defendendi ius naturale testandi, observaverunt alii, in hac hypothesis voluntatem testatoris evadere absolutam dum amittit vitam; sed cum vita amittitur dominium; mors enim omnia solvit. Hinc talem voluntatem num-

quam fieri absolutam; donec enim vivit seu dum voluntas est, semper conditionata est.

Sed adnotari potest, etsi donec quis vivit, eius voluntas sit retractabilis, non tamen semper retractatur; hinc si quis moriatur absque retractatione, hoc ipso ostendit se acquiescere in voluntatis suae manifestatione, et eius voluntas ex conditionata fit absoluta.

372. Sed ad omnem obscuritatem auferendam, animadvertendum est, eos qui negant ex lege naturae ius testandi, inniti falso supposito, hominem nempe dominium acquirere posse tantum pro suis indigentis personalibus, vel ad summum familiaribus; tunc enim quoniam post mortem *naturaliter* nullius rei temporalis indigemus (1), morte finiretur ipsum dominium, quod lege naturae acquisitum fuisset praecise tantum pro tempore vitae nostrae. Hinc tantum successio intestata saltem ex parte locum habere posset, eorum quibus de eodem iure naturae consulere tenemur, vel qui socii fuerunt laborum nostrorum, ut filii, quibus aliquod condominium et viventibus facile competit.

373. Sed hic conceptus iuris dominii falsus est. Etenim homo ius habet acquirendi non modo ut sibi consulat sed ut et aliis benefaciat, sive individuis sive societati ipsi; hinc non modo pro se laborat sed et pro aliis. Ex quo fit eum donare posse, quod neque inter vivos liceret si tantum ut sibi consuleret posset rerum dominio potiri; tunc enim vendere aut commutare posset, sed non donare. Posito autem iure aliis benefaciendi et donandi, non intelligitur quare coarctandum esset ad tempus vitae, et non extendendum ad mortis instans, cum maxime tunc benevolentiam natura duce osten-

[1] Dicimus naturaliter, quia supernaturaliter ad suffragia habenda quis et post mortem, utilitatem habere potest a rebus suis.

damus. Imo cum natura ita res mundanas condiderit ut nequeant in utilitatem generis humani evolvi nisi succedentibus sibi generationum laboribus, necesse est habeatur inter homines ea moralis personae perseverantia quae physice deest, et in successione haereditaria invenitur. Ea enim sublata, deficeret potentissimus stimulus ad activitatem humanam acuendam.

374. Igitur ius testandi ab ipsa natura hominis sociali procedit, qui rebus et laboribus suis sibi et ceteris iure consulit. Hinc non deducimus hoc ius ex conceptu absoluto dominii, idest disponendi pro lubito rerum suarum, iisdem utendi et abutendi; hoc enim ius si absque ulla limitatione lege civili potest indulgeri, non tamen exurgit a iure naturae; etenim attendendus est *titulus* quo valemus rebus potiri et ceteros excludere; tantum enim porrigitur ius, quantum titulus eius, qui est ratio illud generans et conservans. Iamvero lex naturae, ius dominii concedit pro necessitate et utilitate nostra; cum enim res quae sub dominio cadunt, sint limitatae et nequeant omnibus simul inservire, hinc ius eas occupandi seu praeoccupandi et ceteros excludendi, ut nobis eas vindicemus; possumus autem iuri nostro nuncium mittere vel simpliciter, ut rursus res occupata nullius fiat, vel, attenta nostra socialitate, sub conditione, idest ut ab alia determinata persona occupetur; quod est in alium, dominium transferre, sive gratuito sive non. Cum autem ex labore, rei valorem augeamus, hoc augmentum utpote effectus nostrae activitatis, ad nos plene pertinet, ideoque hoc sub respectu multo magis possumus de re nostra disponere, et etiam abuti, aut ius nostrum in alium transferre, sive inter vivos, sive mortis causa.

375. Dato autem iure testandi, in favorem cuiuslibet personae fieri potest, quae sit capax acquirendi; atqui

huiusmodi est tum persona physica, tum moralis, sive perfecta sive imperfecta. Ergo et Ecclesia, quae hoc ius sibi et suis minoribus internis adsociationibus semper ut proprium et nativum asseruit. Ex quo, sententia derivans ius testandi a lege naturae, magnum accipit robur, cum Ecclesia ius suum haereditandi habeat non ut suae naturae superadditum positiva Dei voluntate, sed ut exurgens ex ipsa natura personae moralis perfectae, quod esse non posset nisi in aliis ius esset naturale testandi; tunc enim auferente societate civili ius testandi, frustraretur ius Ecclesiae haereditandi, nisi et illud ius in favorem Ecclesiae omnibus concessum lege positiva divina diceremus, quod omnino gratuito et inverisimiliter assereretur.

376. Item sequitur et legata pia perpetua condi posse; bona enim sic relicta non sunt sine domino concreto; domini enim utiles sunt illi in quorum favorem constituta sunt, ex. gr. pauperes aut infirmi; dominium autem directum est societatis perfectae, curantis bonum eorum in cuius favorem, mortis causa, relicta sunt, vel etiam inter vivos erecta; imo eius est saltem mediate et ipsa domini utilitas harum institutionum, et etiam administratio, nisi administratores, de cetero habiles, fuerint a fundatoribus designati; auctoritas autem publica est civilis; sed admissa divinitate Ecclesiae, cum ex scopo religioso fiunt, ad eam ex dictis spectant.

Haec legata cum sunt erecta ut entia autonoma, seu fictitia, profecto sunt in bonum publicum, ideoque cum non fuerint determinatae societati imperfectae attributa, ipsius societatis perfectae sunt; secus nullius essent. Sed tenebiturne societas perfecta eadem suscipere?

Profecto tenetur, cum cuique ius sit benefaciendi ipsi societati vel alicui eius parti, dummodo cohaerenter

bono publico. Quod supremum ius societatis perfectae coordinandi omnia ad bonum publicum, magis vim suam exhaerit quoad ea quae non respiciunt ius privatorum, sed instituta sunt ob bonum ipsius societatis, ut, in hypothese, sunt legata pia sive intuitu religionis sive philanthropiae facta; hinc supremae potestati sociali, sive ecclesiasticae sive civili, pro diversa natura institutionum, competit non tantum ius legata pia modificandi, sed etiam supprimendi, si id publica utilitas requirat.

E. Ius naturale instituendi corpus morale.

377. Quaeritur an individuus, naturae lege sit ius condendi societatem quae tantum sit persona collectiva, vel etiam corpus morale.

Vidimus supra, n. 366, ius naturale esse hominibus adsociandi se ad scopum honestum; adsociatio autem iuridica importat saltem personam collectivam, quae repraesentat iura a singulis in communi posita.

Quod autem attinet ad corpus morale proprie sumptum, dicimus ipsum sumi posse vel simpliciter ut tale, vel mixtum fictione iuris. Primo sensu importat societatem cuius ius est distinctum a iure singulorum, sed tamen in bonum commune eorundem, vel saltem eorum qui in societate perseverabunt; ita fit in societate perfecta, sive civili sive ecclesiastica; in quibus tamen si deficerent omnes socii, et ipsorum ius evanesceret. Sunt enim independentes, ideoque ipsorum ius non innitur alteri personae a societate ipsa distinctae. Hinc ipsorum ius est quidem distinctum a iure singulorum, sed non subsistit independentem a sociis ipsis simul sumptis.

E contra habetur corpus morale seu moralis persona

mixta fictione iuris, quando ius sociale est non modo distinctum a iure singulorum, sed insuper subsistit independenter a sociis etiam simul sumptis, et proinde eis deficientibus subsistit titulus personae moralis eique adhaerent eiusdem iura et bona, quae non fiunt nullius. Ita evenit ex. gr. si deficiant omnino membra alicuius capituli vel communitalis.

Hanc personam dicimus moralem, sed partim veram, partim fictione iuris constantem. Ius enim proprie, abstractum ab omnibus personis naturalibus non subsistit. Ex quo sequitur talem personam non posse derivare a iure privatorum, quia excederet eos a quibus causam haberet, et contra ipsorum quoque voluntatem postea subsisteret.

Insuper cum sit persona quaedam de se perpetua, oportet habeat perpetuam existentiam; eam autem vel habet per se seu ex iure naturae, vel ex iure divino positivo, vel participatam; per se non habet; ab individuis nequit participari; ergo habet vel a societate civili vel ab ecclesiastica, prout uni vel alteri fuerit homogenea. Et sic subiectum ultimum iuris eius, proprie sunt adhuc personae verae, idest quae componunt maiorem societatem a qua firmitatem suam a propriis individuis independentem recipit.

E contra, ut notavimus lib. I. part. I. cap. 5. a. 3. q. I. a iure privatorum exurgere potest merum corpus morale, seu societas cuius ius non praescindat ab omnibus simul individuis, sed a pluribus in favorem aliorum qui in primo perseverant proposito.

378. II. Deinde et quoad personam moralem fictione mixtam, quoniam privatis ius est concurrendi ad bonum publicum non auctoritative, sed sponte, sub vigilantia et moderamine publicae auctoritatis, hinc in ordine mere civili et naturali, officium est reipublicae

adsistendi privatis qui utilem personam fictitiam volunt instituere; seu personalitas iuridica et fictitia est concedenda, si de cetero expediens.

Verum quoniam repraesentat non ius et bonum privatorum instituentium, sed societatis perfectae in cuius adiutorium constituitur, hinc a publica auctoritate modificabitur futuris temporibus prout expediet bono sociali, vel etiam supprimi poterit.

379. Hoc ius fortius est in re ecclesiastica quam civili, cum in ea ius omne et cura boni publici sit auctoritatis et ab alto descendens; e contra societas civilis cum sit instituta ad supplendam insufficientiam individuorum, his campum liberum relinquere debet donec vires sufficiant. In Ecclesia autem privati agunt semper in ordine ad bonum publicum, non suo nomine sed Ecclesiae, ideoque iugem et intimiorem ab ea recipiunt influxum.

380. III. Tamen ius est, ut supra, pia legata condendi; quae si fuerint tali personae ex parte fictitiae concessa, nequeunt modificari donec utilia adhuc sint, cum haec habeant concretum subiectum iuris in eis membris societatis in cuius utilitatem condita sunt, ex. gr. in infirmis. Verum quoniam hae classes sunt indeterminatae quoad individua, hinc adhuc administrative pendent a publica potestate, quae proinde et edit decretum declarativum de his haereditatibus suscipiendis, aut erigendis in entia moralia, seu personas fictitias.

381. Si autem administrator designetur a fundatore, vel est aliqua persona iuridica praeexistens, vel designata ex iis qui evidenter spectant ad classem in cuius favorem legata condita sunt, vel quae de his indigentibus curam habet; sed recognoscere hanc evidentiam, aut ea deficiente, administratores seligere, publicae est auctoritatis homogeneae.

ARTICULUS VII.

IUS ECCLESIAE ACQUIRENDI ET LIBERE
ADMINISTRANDI BONA TEMPORALIA.

§ I.

IUS ACQUIRENDI.

382. Cum Ecclesia eiusque internae subdivisiones, aut adsociationes, sint societates hominum quatenus tales, sequitur eas indigere bonis temporalibus. Ergo sequitur Ecclesiam iure pollere eadem legitimis mediis acquirendi. Cumque sit societas a civili independens, sequitur ad valide et licite acquirendum sufficere media iuris naturae, non autem teneri legibus civilibus, nisi eas ratas habeat; hinc est ius canonicum habere ut valida legata et testamenta ad causas pias etsi praetermissae sint solemnitates civiles, dummodo servata fuerint substantialia de iure naturae (Cap. Relatum II. de testamentis). E contra in actibus inter vivos solet Ecclesia ratas habere leges civiles de translatione domini; ratio praecipua differentiae ea esse potest quod mortuus nequit amplius actum suum corrigere; e contra vivus.

383. Contra ius Ecclesiae liberum et independens acquirendi obiici non potest cum Bolgeni et aliis bona materialia subiici per se societati civili, imo antecederet ac Ecclesiae, ideoque imminui ius societatis civilis si ad Ecclesiam, societatem independentem, transirent, absque eiusdem beneplacito. Etenim quoad primum, pertinent per se societati humanae, quae alia est civilis, alia religiosa, cum utraque eis indigeat.

384. Ad 2^{um} cum utraque, si in genere respiciatur, sit mundo coaeva, bona temporalia pariter in genere inspecta, pertinent ad utramque. Sed etsi inspecta in specie, pertinerent antecederet ad societatem civilem

cuius ius imminueretur ex transitu eorundem ad Ecclesiam, nihil inconueniens in hoc haberetur. Etenim societas inferior aliquid dammi sustinere tenetur in utilitatem superioris, sicut corpus pro anima. Imo cum et Ecclesiae inserviando adhuc inserviant societati humanae, et ei pro nobiliori fine inserviant, tandem non nocent societati humanae sed eam iuvant; sicut iuvat hominem quod animae inservit, etsi aliquid subtrahat corpori. Aliquando tamen Ecclesia voluit attendere huic distinctioni de bonis antiquitus possessis ut essent immunia a publicis tributis, et de bonis noviter acquisitis, quod non essent immunia, ne imminueretur ius principum. Verum id fuit ex prudentia, aut quadam aequitate Ecclesiae, ne principes offenderentur, aut ne auctis eius bonis, societas civilis gravaretur; sed non respicit ius.

385. Et notandum est ius esse Ecclesiae eiusque subdivisionibus, possidendi non modo bona temporalia quae immediate inserviunt exercitio cultus seu in genere vitae spiritualis, sed etiam quae mediate, seu bona immobilia ex quibus redditus necessarii comparentur. Etenim societas bene ordinata ius habet possidendi media idonea et tuta ad sui finis consecutionem. Sed in linea reddituum, non modo idonea sed magis tuta et naturalia sunt bona immobilia. Ergo de his possidendis Ecclesiae ius est.

386. Obiiciunt 1. utilius esse valores fiduciarios possidere, seu redditus debiti publici, cum auferant distractionem administrationis.

Resp. 1^o Ecclesiam ius habere ad media idonea; eius autem est eligere inter ea quae putat utiliora;

2^o valores chartaceos esse periculo expositos, et facilius possessores dependentes constituere a guberniis;

3^o habere valorem variabilem, ob variabilitatem va-

loris pecuniae. Ex. gr. ager qui bene excultus nunc sufficit alendis decem hominibus, sufficit aequè excultus et post 100 annos. E contra eadem quantitas pecuniae, puta 1000 libellae quae nunc sufficiunt alendo homini, non amplius sufficiet si eius valor ob novas detectas fodinas metalli et alias causas minuetur, ut a pluribus saeculis fit.

4^o Si sermo esset de *conversione* bonorum immobilium in chartaceos illud addendum foret, quod factum est apud nos et ubique fit quando talis *conversio* habetur, redditus nempe adsignari loco bonorum immobilium iam detractis expensis administrationis (reddito netto) ideoque idem est ac si hae toleratae fuerint.

387. Obiiciunt 2. bona Ecclesiae, seu in genere, ut aiunt, manuū mortuarum, esse nociva commercio ob suam immobilitatem.

Resp. I. perseverantiam eiusdem domini non nocere agrorum culturae, imo et iuvare; et notandum est tandem horum bonorum usufructum semper esse in societate humana; imo cum in Ecclesia sacerdotium non sit haereditarium, vere mutantur familiae usufruentium, etsi semper inscribantur eidem Ecclesiae.

Imo sic facile eis fruuntur et pauperes qui ad gradus ecclesiasticos admittuntur.

Resp. II. Ecclesiam non interdicere simpliciter alienationem, sed tantum 1^o auctoritate privata beneficiati, vel administratoris, quod in qualibet societate fit relate ad bona publica; beneficiatus enim, non dominium sed merum usumfructum habet bonorum beneficii sui. Praelatus autem aut rector Ecclesiae, de bonis eiusdem distinctis a mensa vel beneficio suo, neque usumfructum habet, sed meram administrationem; 2^o nisi urgeat necessitas aut utilitas. Experientia autem ostendit has causas interdum verificari.

Resp. III. tandem detrimentum temporale si quod esset, sustinendum esset pro bono spirituali, neque posset societas inferior limitare ius societatis superioris. Quae responsio et pro sequentibus difficultatibus aut limitibus, praesens habeatur; etenim difficultas *oeconomica* nunquam elidit rationem *iuridicam*.

388. Obiic. 3. Bona manuum mortuarum non bene excoli, quod nocet industriae.

Resp. negando; imo praesertim corpora moralia, ut ordines religiosi, optime de agrorum cultura meriti sunt, cum regiones desertas in floridos agros industria ac patientia sua converterint. Hinc copiosae divitiae ordinum religiosorum, magna ex parte erant fructus laborum eorundem et non gratuita donationis morientium; ex quo magis apparet iniustitia legum quae eosdem suis bonis expoliaverunt.

Ratio autem ob quam melius agri excoluntur a corporibus moralibus, praesertim ab ordinibus religiosis potiusquam a privatis, est multiplex: 1^o quia vis unita fortior; 2^o religiosi non solent indigere quotidianis fructibus, cum ex ipsa numerositate possessionum necessariarum pro magna familia, eveniat ut plurimum inter multos agros iam excultos et nonnullos haberi posse incultos, quibus attendi potest; e contra vir privatus solet non multa praedia habere, ideoque oportet statim retrahat ex eis meliorem fructum hic et nunc possibilem. Sed magnae operae fructus reddere non solent, nisi post aliquod tempus. 3^o Vir privatus morti subiicitur; hinc innumerae mutationes in statu familiarum; e contra corpora moralia sunt perpetua; hinc et opera longiora assumere possunt cum certudine continuationis, quia neque conditio monasterii mutabitur usque dum opus compleatur.

389. Obiic. 4. Saltem posse principem litem ponere

acquisitionibus Ecclesiae; etenim secus sequeretur paulatim omnia fieri Ecclesiae, cum sit societas perpetua, et raro alienet; hinc tandem ipsa, omnia bona absorberet, et iam principi deficeret territorium in quo sua iura explicaret aut a quo tributa societas civilis hauriret ad sua onera ferenda; hinc iure suae conservationis et existentiae, sicut valet princeps privatis limitem ponere, ita et Ecclesiae; est enim defensor iuridicus societatis civilis ut removeat quae eam laedunt.

Resp. negando tale ius competere statui civili. Sed ad omnem invidiam ab Ecclesia removendam, anidvertinus aliud esse ius, aliud ordinatum exercitium iuris. Utique Ecclesia habet ius acquirendi et possidendi pro fine suo, ita tamen ut absque proportionata causa non gravet societatem civilem; cumque ex Dei ordinatione, utraque in mundo perseverare debeat, Ecclesia non debet ita sua iura explicare ut impossibilem reddat civilis societatis existentiam ordinatam.

Hinc loquendo de legislatione generali Ecclesiae, numquam veris iuribus civilis societatis adversabitur. Sed videndum est quos limites debeat Ecclesia servare quoad acquirenda bona temporalia, et cuius sit eos definire.

390. Iamvero cum Ecclesia sit societas superior, definire limites legitimae evolutionis suorum iurium et terminos servandos ne societas civilis laedatur, ad eiusdem iudicium pertinet, salvo iure remonstrationis pro societate inferiori. Non igitur est status civilis praefinire limites acquisitionibus Ecclesiae, sed Ecclesiae ipsius eos sibi imponere, non acceptando nova legata, saltem immobilium, si vere id noceret statui civili, qui in hac hypothesis ius haberet reclamandi ad Ecclesiam, et Ecclesia certissime susciperet has reclamaciones;

sollicita est enim Ecclesia ut vitet et umbram eorum quae invidiam probabiliter generare possunt.

391. Sed restat videndum an vere indefinitae acquisitiones Ecclesiae nocere possint sive principi sive humanae societati.

Quoad principem, vel inspicimus ius eius politicum, seu iurisdictionem exercendi, vel ius tributa exigendi. Primum non imminuitur; nec enim praedia Ecclesiae sunt immunia a iurisdictione, sed tantum ipsa templa et loca assimilata; hinc lex civilis afficit incolas praediorum Ecclesiae, et in eis explicatur potestas tum iudiciaria tum coactiva principis.

392. Quoad tributa, haec obiectio id tantum evincit, ea in hypothesi Ecclesiam permittere debere ut imponerentur et praediis suis, et sic tutum esset et integrum ius principis. Iamvero ratio eximendi praedia Ecclesiae a tributis, duplex affertur: I. quia Ecclesia adiuvat societatem civilem, ideoque aequum est quaedam privilegia sibi vindicare possit aut eidem sponte tribuantur, in compensationem; inter quae privilegia et exemptio a tributis potest computari, etiam ex eo quod obligatio est societati christianae suppeditandi Ecclesiae quae fuerint ei necessaria. Si igitur aliqui sponte offerant Ecclesiae bona temporalia, hi ceteros seu integram societatem ex toto vel ex parte exonerant a praestandis subsidiis Ecclesiae.

Status proinde non exigendo tributa ab Ecclesiae bonis haec non imminuit, et sic exonerat pro hac parte societatem, quae supplere deberet si quid ex necessariis Ecclesiae deficeret. Imo esset valde indecens statum exigere portionem bonorum quae Ecclesiae offeruntur, ut exoneretur ipse status; duplici enim vellet gaudere utilitate.

Sed si Ecclesia abundaret divitiis iam non indigeret

immunitate a tributis, ideoque huic exemptioni nuncium mittere posset, et aliter compensari, et etiam satis se compensatam habere posset ex defensione armata status qua tuetur eius bona aliaque eius iura, absque alia compensatione, cum Ecclesiae natura sit ut debeat ordinem moralem promovere et sic tranquillitati publicae consulere, ideoque hominibus et societati civili benefacere de suo, contenta sibi necessaria et utilia tribui. Nen enim est societas commercialis quae dicat: « do ut des ad aequalitatem ».

393. II.^a ratio ob quam Ecclesiae adscribitur immunitas, est quia ipsa cum omnibus bonis et rebus suis est independens a potestate civili ideoque non ex privilegio ceteroquin iusto, sed ex mero iure sint eius bona immunia a tributis.

Verum distinguendum est inter bona quae immediate inserviunt cultui divino exercendo, ut sunt Ecclesiae et bona quae mediate, idest quia redditus necessarios subministrant. Si de primis sermo sit, certe sunt immunia, quatenus id exigit ratio cultus divini, ideoque praecedit ius Ecclesiae, subsequitur ius civile si quid supersit in quo exerceri possit; hinc videmus et nostris temporibus talia loca haberi ut immunia a tributis, etiam ab iis guberniis quae in reliquis non agnoscunt ecclesiasticam immunitatem.

Verum quoad bona cetera, profecto non est nimis urgenda ipsorum immunitas a lege civili; secus ibi princeps neque ius politicum posset exercere, quod nemo asseret. Ergo Ecclesiae dominium non excludit iura principis, nisi quatenus inconciliabilia cum iuribus Ecclesiae.

Hinc videndus finis ob quem Ecclesia ea bona possidet. Finis ob quem possidet aedificia sacra est exercitium cultus divini; hinc ibi non convenit exerceri

quae sunt profana; finis quo possidet bona de quibus agimus, est ut congrui redditus habeantur: iamvero 1^o si satis sint pingues ex multitudine horum bonorum, iam necessaria non est exemptio a tributis, ut supra dictum est: 2^o finis Ecclesiae in hoc non differt a fine privatorum; sed status civilis defendit haec bona et huius rei causa imponit privatis tributa; ergo Ecclesia permittere potest etiam suis bonis imponi; imo etsi ius habeat sibi vindicandi privilegium exemptionis si expediens putet, tamen non sunt ipso facto exempta, quia possidentur more privatorum, ut princeps aliquis possidet in regno alieno, vel ipsa respublica quae possidet plura more privatorum.

394. Haec ratio est ob quam plures docent, praescindendo a lege positiva ecclesiastica, Ecclesiam teneri servare leges civiles de cetero iustas, circa modos acquirendi rerum dominia. Tamen animadverti debet aliud esse ius acquirendi, quod in Ecclesia est omnino independens, aliud modus possidendi et fruendi rebus acquisitis; illud est in Ecclesia independens; hoc pendet a fine ob quem possidet; idest nequit praeiudicari eius fini; sed bona quae mediate tantum inserviunt fini Ecclesiae, more privatorum ei inserviunt, idest subministrando redditus detractis omnibus iustis expensis, inter quas et tributa debita statui pro competenti defensione, recensenda sunt. Haec de iure principis.

395. Sequitur consideratio ipsius societatis civilis, seu societatis humanae quatenus civilis est. Si ex hypothese omnia fierent Ecclesiae, nemo laicus possideret, et societas laica nihil possideret.

Animadverto I. haberetur melior ratio communismi et socialismi absque inconvenientibus. Cum enim in Ecclesia sacerdotium non sit haereditarium, ex omnibus familiis vocarentur ad fruendum de bonis Ecclesiae.

Deinde cum superflua sint eroganda in pios usus, sequitur divitiis Ecclesiae quammaxime iuvare omnes humiliores, et indirecte ceteros, quia minus eis solvendum est pro pauperibus.

Non extarent autem inconvenientia communismi, quia nullius ius laederetur, sed omnia per voluntarias donationes fierent proxime Ecclesiae, et remote populi.

II. Ad vitandum inconveniens quod omnia bona immobilia subtrahantur laicis, dicendum est ut supra, ad iudicium Ecclesiae spectare ponere sibi limites, non autem ad statum civilem, qui tantum exponere posset factum Ecclesiae, quae certe eius rationem haberet et iustis reclamationibus satisfaceret.

396. III. Nimiae divitiae neque ipsi Ecclesiae solent esse utiles, quia aggravant, non iuvant, et facile relaxarent ecclesiasticam disciplinam in clero, et in eo introducerent carentes debita vocatione; hinc Ecclesia 1^o facile concederet haereditatem aut quotam haereditatis propinquis etiam remotis, sed pauperibus, quibus testator cum ad nihilum ex iustitia teneretur, nihil reliquit. Si enim id non difficile praestat Ecclesia et in praesentibus circumstantiis paupertatis, multo magis in hypothetico statu divitiarum; dixi de propinquis remotis; si enim de valde proximis sermo sit, ex. gr. de filiis, tunc Ecclesia usurpat illud s. Augustini: « qui « haeredem sibi vult, suis spretis, alium episcopum « quaerat non Augustinum ».

2^o Facile bona Ecclesiae concederentur in emphiteusim perpetuam laicis, sub modico canone, ut medio aevo factum est. Id praestabat Ecclesia duplici ex intuitu, sui et populi; sui ut saepe sese exoneraret a bonis plurimis sibi inutilibus, quibus attendere non poterat; deinde populi; humiliores enim ne opprimerentur a potentioribus, bona sua offerebant Ecclesiae

ut ea reciperent titulo emphiteusis vel coloniae, praestito modico canone, ex. gr. libellis aliquibus cerae, et sic ponebant se suaque sub protectione Ecclesiae.

3° Tandem posset Ecclesia et simpliciter respuere novas haereditates.

Ex his apparet hypothesim de omnibus bonis absorbendis ab Ecclesia, non esse facilis verificationis.

397. Sed praeterea ratio habenda est casuum fortuitorum, eorum non modo qui in rem propriam incidunt, sed etiam aliorum, quique indirecte nobis nocent, ut eorum qui sunt debitores nostri. Etsi enim et privatis concedatur illimitata acquirendi potestas, tamen numquam factum est ut una familia absorberet omnia.

Primo enim ipsa multiplicatio bonorum importat magis complicatam administrationem, ex qua crescunt expensae et minus utiliter res geritur et fructificat; limitatio enim naturalis, hominis efficit ut solus ad multa non valeat sed ceteris adiuvari debeat; quae lex providentialis est ne unus absorbeat omnia.

Deinde facile habentur infideles administratores qui dissipant, vel etiam haeredes negligentes et inepti, praeter infortunia physica terrae et maris, nec non aperta latrocinia.

Etenim in re oeconomica et de probabilitate delicti ratio habenda est. Iamvero haec inconvenientia et pro Ecclesia habere possunt locum, et vere habuerunt, latrocinia praesertim.

QUAESTIO SPECIALIS I.

AN IUS DOMINII SIT NATURALITER ILLIMITATUM.

398. Haec sufficiunt pro difficultatis solutione. Sed quoniam de limitatione privatis imponenda verbum factum est, incidenter hanc innuimus quaestionem.

Quaesitum est a iuris naturalis cultoribus, an homo ius habeat indefinitae acquisitionis, dummodo mediis honestis. Et profecto in statu extrasociali nemini dubium esse potest. Etenim quisque ius habet ea occupandi quae aliquo modo sibi utilia esse possunt. Sed quis semper ulteriorem potest referre utilitatem; sin minus potest semper aliis magis benefacere. Deinde quis semper iuste fit dominus fructuum laborum suorum, et sic divitiae generant novas divitias, si quis eis sagaciter utatur.

399. Sed quid in societate civili? Profecto si id noceret, posset princeps limitem ponere; neque enim agitur de iure quaesito tollendo sed de novo iure non acquirendo; sed hoc est per accidens, seu ratione damni publici si quod eveniret; ceterum per se nequit, cum ius naturale tueri debeat.

400. Sed generice loquendo, expeditne ut lex apponat limites in hac re?

Negative, cum impediat activitatem industriae et commercii, et dissipationem in rebus inutilibus et infructuosis foveat atque divitiarum occultationem; hinc ubi divites timere debent vexationes ratione divitiarum, omnia languent cum magno rei publicae detrimento, ut in imperio Turcharum. Et proinde lex limitans, quae superficialiter videtur favere bono publico, reapse nocet. Igitur status civilis sinet cives ditescere quantum potuerint, dummodo honeste, et taxas solvendo.

QUAESTIO SPECIALIS II.

DE TAXA MANUS MORTUAE.

401. Obiiciunt per possessionem ecclesiasticam defraudari aerarium, etsi Ecclesia solveret tributa sicut ceteri; etenim ex perpetuitate Ecclesiae et difficili alie-

natione, sequitur non solvi tributa extraordinaria, ob successionem sive mortis causa sive inter vivos. Ergo saltem sequitur Ecclesiam subiiciendam esse taxae speciali, quae solet appellari manus mortuae, ipsi communi cum reliquis corporibus seu entibus moralibus.

Resp. Vel taxae supradictae imponuntur in societate ob relativa onera publicae potestatis, registrandi novos titulos dominii, vel ut media succurrendi aerario ob communia onera.

Si I^{um}, taxa supradicta esset iniuste applicata Ecclesiae et corporibus reliquis moralibus; si enim locum non habet successio in dominio, neque locum habet status civilis labor respondens novae transcriptioni.

402. Verum hae taxae in statu actuali societatis imponuntur ex secundo fine; sunt enim enormes et non responderent expensis quas status toleraret tantummodo pro nova transcriptione in publico censu. Et tunc quaestio haec specialis reducitur ad generalem quaestionem de immunitate a tributis. Si igitur Ecclesia non indiget hac exemptione, et aliunde noceat statui, poterit ab Ecclesia permitti ut conveniens taxa manus mortuae solvatur. Ita factum est et in emphiteusi; notum est enim emphiteutam praeter annum canonem, solvere ex iure romano praestationem extraordinariam domino directo, quando antecedendi emphiteutae succedit, quae praestatio dicitur *laudemium*, et est in obsequium domini directi ut recognoscat et *laudet* novum emphiteutam. Iamvero cum dominium utile est corporis moralis, ut Ecclesiae, nova successio numquam locum haberet, hinc dominus directus fraudaretur laudemii; igitur ne sit in deteriori conditione, inductum est ut facta computatione probabilis novae successionis si emphiteuta esset persona physica, solveretur periodicè praestatio loco laudemii; et statutum est id sin-

gulis quindecim annis praestandum, ex quo nomen *quindennii* loco laudemii.

In constitutione autem taxae manus mortuae, magis portabile visum est, dividere onus in singulos annos.

403. Specialem autem mentionem hac in re meretur legislatio italica, quae bonis ecclesiasticis praeter alias, et imponit taxam manus mortuae, et a singulis beneficiatis exigit taxam successionis usufructoriae; et sic duplicem taxam solvunt, et clerici evadunt privilegiati eo sensu quod plus ceteris gravantur, ratione inversa praeteritorum saeculorum. Et insuper illud quoque accedit quod si ex uno beneficio ad aliud promoveantur, rursus debeant solvere integram taxam novae successionis haereditariae, saltem si secundum beneficium non sit sub eodem tecto primi. Videretur enim sufficere si solverent taxam respondentem differentiae inter maiores redditus secundi beneficii et minores primi. Qui enim suscipit secundum beneficium iuxta canones regulariter amittit primum. E contra in haereditate civili quis cumulare potest indefinitos usufructus, ideoque iustum est, pro singulis solvat.

Hae rationes si obiiciantur officialibus ad haec destinatis, respondent: dura lex, sed lex. Minghetti autem legem excusat dicendo eam latam esse momento critico pro aerario publico, ideoque sicut plures alias leges afficientes bona ecclesiastica, habuisse scopum aerariam et non iuridicum.

Iamvero lex dura pro omnibus, per se defendi potest, sed pro una classe tantum civium nequaquam.

§ 2.

IUS ADMINISTRANDI.

404. Ex iure Ecclesiae libere possidendi bona sua, etiam immobilia, sequitur ius libere eadem quoque administrandi. Est enim Ecclesia sui iuris et perfecte independens in sibi consulendo. Atqui possessio, usus et usufructus bonorum temporalium seu eorundem administratio et erogatio, est medium quo sibi consulit. Ergo est in eo independens.

Hinc iniustae leges civiles quae ecclesiasticas administrationes subiiciunt tutelae status civilis.

405. Inter magnos abusos in hac re et ille recensendus est, qui primo venit sub nomine *regalismi*, stricte sumpti, nempe reges percipere redditus beneficiorum ecclesiasticorum vacantium. Item sede vacante, conferre beneficia non curata (1). Primus enim error considerabat beneficia ecclesiastica ut feuda, quorum redditus cum vacarent, utique cedebant domino directo; sed reges non sunt domini directi bonorum Ecclesiae; et quamvis ipsi contulerint eidem aliqua bona, Ecclesia tamen acquisivit eorundem bonorum non modo dominium utile, sed et directum.

Neque id iuris, per se regibus esset in ipsis feudis collatis Ecclesiae; ideo enim quod collata sunt Ecclesiae, nunquam vacant, cum Ecclesia adsit semper, sicut communitas, etsi careat rectore. Excipe nisi hac expressa conditione collata fuissent, hinc diximus per se.

406. Alter abusus conferendi beneficia non curata, sede vacante, supponit ad reges devolvi iurisdictionem, sede episcopali vacante, quod enorme est.

1 Vide De Martinis: *Il Regalismo antico e moderno*.

407. Obiiciunt: Corpora moralia aequiparari minoribus; hinc subiici tutelae status.

Resp. dist. ant. Corpora moralia perfecta negamus, imperfecta subdistinguiamus, sibi proponentia bonum privatum sociorum negamus; bonum aliquod publicum concedimus.

Ergo subduntur tutelae status, distinguimus, si sint perfecta negamus; si imperfecta subdistinguiamus, ecclesiastica negamus, civilia transeat, vel subd. si sibi proponant bonum privatum sociorum nego, si bonum publicum concedo.

Ratio distinctionum traditarum patet si animadvertamus societates quae et personae morales seu moralia corpora sunt, alias esse perfectas, alias imperfectas; illas subiici alterius tutelae contradictorium est; essent enim et non essent perfectae, seu independentes personae. Iamvero si de ipsa Ecclesia agatur, cum sit societas perfecta, sequitur absurdum esse eam poni sub tutela status civilis; multo magis cum sit ei superior ratione finis.

408. Si autem sermo sit de adassociationibus quae sunt intra Ecclesiam, tunc verum est eas esse personas morales imperfectas; et cum nobis sermo sit de iis quae non ratione privati boni sociorum instituuntur, sed publici, vel ut subdivisiones Ecclesiae ipsius, certe subduntur tutelae seu vigilantiae et regimini societatis perfectae, sed non heterogeneae, verum homogeneae; hinc non status civilis, sed Ecclesiae ipsius, idest publicae potestatis eiusdem et tandem supremae. Est enim regula generalis societates imperfectas pendere utique, sed a sua homogenea.

Haec dependentia dici potest tutela, tunc tantum quando societas imperfecta sibi proponit bonum aliquo modo publicum. Etenim si sibi proponat bonum priva-

tum sociorum, adhuc pendet a societate perfecta, sed non per modum tutelae, adeo ut ei sint rationes reddendae aut pro singulis actibus venia eius sit petenda, in qua stricta dependentia stat similitudo cum tutela; hoc enim est vexatorium et contra naturalem libertatem sociorum; etenim sicut socii distributive sumpti non habent hanc dependentiam a societate perfecta, ita neque coniuncti, cum ad eandem causam sunt adsociati.

Tantummodo ab ea pendent, quatenus sunt sub eius vigilantia ne offendant bonum publicum, et ab ea limitantur intuitu boni publici ut illud non offendant prosecutione boni privati; et tandem ipsa est iudex si quaestio inter socios exurgat; et tunc tantum a sociis rationem exigit eorum quae gesserunt.

409. Iam in parte generali praeoccupavimus etiam difficultatem quae contra liberum ius Ecclesiae possidendi et administrandi deduci posset ex eo quod societas civilis non agnoscat societatem quae praetergreditur limites sui territorii, ideoque nequit agnoscere dominium Ecclesiae, sed tantum parochiae, dioecesis, provinciae, et si locus sit, exarchatus et patriarchatus, quae adsociationes cum sint imperfectae, subduntur tutelae gubernii.

Reposuimus enim statum civilem teneri ad agnoscendam Ecclesiam universalem, et ad agnoscendas eius subdivisiones prout sunt; idest ut partes maioris societatis, praetergradientis eius territorium; hinc eas non ut sibi subiectas sed Ecclesiae universali agnoscere debere.

410. Ex iure liberae *administrationis* et liberi *dominii*, sequitur Ecclesiam et res suas posse *libere alienare*, absque ulla approbatione status civilis, qui id tantum attendere debet in transcriptione novi domini, an alienatio facta ab auctoritatibus ecclesiasticis

inferioribus, habeat veniam superioris auctoritatis ecclesiasticae competentis; haec enim iudicabit de causis sufficientibus alienationi permittendae, idest an in casu verificentur conditiones quas canones exigunt pro ea venia concedenda. Si dubia sit venia concessa a superiori ecclesiastica auctoritate, patet accessus ad eam ut debite interrogetur.

Interim poterit, imo debet suspendi effectus civilis, alienationis factae ab inferiori praelato. Ceterum cum auctoritas civilis, amico spiritu procedit, facile in his sicut et in pluribus aliis communicantur consilia inter Ecclesiam et statum et huic Ecclesia plurimum defert.

§ 3.

IUS ECCLESIAE IMPONENDI TRIBUTA.

411. Cum Ecclesia indigeat rebus temporalibus, cumque societas ius habeat exigendi a suis media sibi necessaria, cum eadem aliunde non habet, cumque Ecclesia etsi a Deo habeat media supernaturalia eaque de suo conferat fidelibus, tamen a coelo non habeat bona materialia, sed eadem in terra sibi procurare debeat, sequitur eadem a fidelibus esse ei subministranda.

Iamvero vel id faciunt sponte, vel non: cum autem primum evenit, possunt aliqui providere Ecclesiae non modo pro tempore praesenti, sed stabiliter, ut fit fundando beneficia, vel bona fabricae Ecclesiae relinquendo; tunc hi benefactores succurrunt Ecclesiae loco omnium, et oblationibus suis ceteros exonerant. Non enim, Ecclesia sufficienter provisa, posset iure exigere correspondentium temporale pro spirituali quod largitur; si enim ut *pretium*, esset simonia; si titulo honestae sustentationis ministrorum et expensarum cultus, non amplius veritati inniteretur, cum aliunde haberetur abundanter.

412. Excipe parvas oblationes ex alio fine, pro actibus determinatis, puta matrimonii, baptismi, de quibus infra.

Si autem Ecclesia non habeat sibi necessaria, tunc praesentes dare debent; verum si sponte, moraliter sumpti, id faciant, et sufficiat, non sunt cogendi, cum melior sit spontanea oblatio, sive ratione meriti in offerentibus, sive minoris gravaminis. Id etsi aliqui essent negligentes; si enim sufficiunt ceterorum oblationes id indicat hos, ceteros supplere per suam abundantiam. Iudex autem huius sufficientiae est Ecclesia. Si sufficientes non sunt spontaneae oblationes, tunc Ecclesia eas ex supra allegato principio, iure lege imponit.

413. Iamvero duplicis esse possunt naturae; quaedam ad subveniendum in genere fabricae Ecclesiae et ministrorum sustentationi, sicut adsunt in societate taxae quas dicimus directas; aliae pro singulis actibus ministerii ecclesiastici in speciale servitium alicuius. Sicut enim quaedam ministrantur omnibus simul, seu ipsi communitati religiosae, ut praedicatio verbi Dei, missae celebratio aliarumque communium functionum, sic quaedam specialissime ministrantur pro aliquibus, ut baptisma, adsistentia matrimonio et sepultura.

Iamvero redditus primi generis, quos *generales* dicemus, Ecclesia sibi procurat imposita contributione proportionata facultatibus, ut facit ipsa societas civilis, idest *decimis* et *primitiis*; neque veteribus nostris ignota fuit natura taxae quam dicunt hodierni *divitiae mobilis*; etenim decimae aliae *reales* ex praediis, aliae *personales* ex professione et industria.

Igitur in his consideratur principium: quemque socialibus expensis contribuere debere pro viribus; quamvis utilitas ministerii socialis persentiatur aequè ab omnibus sive divitibus sive pauperibus.

· 414. In quo est aliqua differentia inter titulum contributionum prout fiunt in societate civili et in Ecclesia. In illa enim quisque concurrit oneribus socialibus sustinendis pro viribus, etiam ex eo quod societas defendit cuique sua bona; hinc pro quantitate commodi, iustum est sit et quantitas contributionis expensis toleratis ad eadem bona defendenda; hinc quaedam bona in societate civili aequè defenduntur omnibus, puta vita, et quaedam tantum habentibus, puta praedia.

E contra in Ecclesia ipsum ministerium commune suppeditat omnibus eadem bona; nec enim Ecclesia defendit divitibus bona materialia ex quibus solvuntur decimae, nisi defensione aliqua morali, idest promovendo moralitatem publicam, quae defensio nullam per se importat expensam, dum defensio societatis civilis per milites et alios officiales importat expensas.

415. Ratio autem ob quam in societate sufficit pro tributorum exactione, principium: *quemque pro viribus*, praeterquam quod frustra a pauperibus expectarentur tributa, quae proinde a divitibus praestanda sunt, est, quia in societate completa et perfecta, addicitur societati ipsa persona, ideoque cum omnibus suis iuribus et bonis. E contra in societate incompleta et imperfecta, puta in commerciali, non addicitur ipsa persona simpliciter, sed aliquo tantum sub respectu; hinc proportio onerum vel est proportionem bonorum collatorum, vel per capita.

416. Iamvero indifferens est pro Ecclesiae sustentatione an necessaria ei subministrentur immediate a fidelibus, puta per decimas, vel immediate a societate civili seu a publico aerario, et sic mediate a fidelibus, ita ut princeps taxas imponendo et illud prae oculis habeat ut sibi procuret unde succurrat Ecclesiae.

417. Hic modus habet suas utilitates et sua incommoda.

Utilitas in eo est quod collectores ecclesiasticos decimarum liberat a pluribus incommodis et iurgiis; imo in societate iuridice catholica, sed de facto aliena a devotione in Ecclesiam, esset etiam aliquando impossibile decimas saltem integre percipere, vel nimis odiosum et molestum.

418. Incommodum autem est in eo quod Ecclesia fit de facto dependens a gubernio, quod eam statim in angustias deducere potest, negatis subsidiis.

Erit igitur prudentiae Ecclesiae pensatis temporum et locorum circumstantiis unum vel aliud medium praeferre. Si enim postremum systema sibi expedire putaverit, ius habet illud exigendi. Sicut enim Ecclesia ministerio suo consulit singulis, ita consulit bono societatis integrae; hinc sibi necessaria tum directe ab individuís, tum a societate iure exigit; et societas civilis tenetur praestare Ecclesiae ea quibus indiguerit; igitur et temporalia, si societas ut talis sit catholica; praesertim cum invitos Ecclesia non posset efficaciter cogere, nisi rursus recurrendo ad brachium saeculare; hinc Ecclesiae potest magis expedire directe ei succurri a statu civili; ius autem habet exigendi sibi utilia et magis efficacia fini suo consequendo.

419. Ex hac theoria solvitur et difficultas quae contra modum decimas reales exigendi proponi posset. Etenim ex iure canonico ad eas cogeantur et infideles, puta iudaei, in statu christiano commorantes, in eoque possidentes bona quae antecederent christiano fuerant et decimis religioso praecepto gravata, etsi non cogerentur ad solvendas decimas industriales cap. XVI de decimis, et XVIII de usuris. Et ratio est quia erant loco tributí a societate impositi bonis tem-

poralibus ipsius societatis; igitur sicut ex aerario solvi potuissent et sic mediate percipi a praediis, ita et ab his immediate. Res enim immobiles seu territorium consideratur primo ut subiectum eminenti dominio societatis, quae in casu erat christiana, ita ut eius sit, et deinde singulorum privatorum; hinc decimae reales erant onus reale, quicumque esset possessor; e contra decimae personales, praestabantur tantum a fidelibus cum adhaereant personae, ideoque qualitatem eius attendant quod sit societatis religiosae membrum vel non.

Addendum insuper infideles emendo praedia in societate christiana, eadem minori emisse, ratione decimarum quibus gravabantur.

Fuit quoque inductum pro incolumitate societatis christianae, ne iudaei brevi absorberent omnia praedia christianorum quia si non solvissent decimas, potuissent eadem emere meliori pretio et sic allicere dominos christianos ad eadem sibi vendenda.

420. Si autem religioni consuleretur directe ex aerario publico, tunc vel imponitur speciale tributum, vel ex communibus deducitur: si I. non posset imponi infidelibus quoties reale non esset; absurdum est enim cogere aliquam personam ut directe participet expensis cultus, quem reicere lex eidem permittit; hinc quod de infidelibus, et de haereticis dicendum est, cum lex eos agnoscit; si autem tantum toleraret, non idem dicendum esset: cum enim ipsi subditi sint Ecclesiae, rigore iuris possent subiici eius oneribus et pro multo agnoscere deberent, sibi poenas non infligi sed tolerari.

Si autem Ecclesiae succurreretur ex communibus redditibus status, tunc indiscriminatim imponeretur tributum omnibus, quia tunc afficit societatem per modum unius, quae ab omnibus exigit eam quantitatem quae suis oneribus sustinendis sufficiens est. Iam-

vero inter onera socialia sunt et religionis expensae; si igitur societas unicam agnoscat veram religionem, unice ad eam alendam concurrit. Sectae autem toleratae nequeunt aequale ius exigere, cum ex hypothesi sint mere toleratae. Aliud autem dicendum esset si iuridica paritas cultuum esset inducta; tunc melior provisio videretur statum nemini succurrere, vel habita ratione numeri, sectae cuique restituere portionem reddituum, ut alias explicatum est, lib. I. n. 608.

421. Praeter ministerium commune Ecclesia praestat et ministerium speciale, ex. gr. in baptismo, confirmatione, matrimonio, sepultura et sacramentalibus pluribus.

Igitur sicut in societate civili praeter taxas generales et directas quibus quisque concurrit pro facultatibus suis, adsunt et taxae speciales pro actibus determinatis, quae indirectae nuncupari solent, ita et in societate ecclesiastica, speciales contributiones possunt imponi, sicut consuetudine in pluribus casibus inductum est, in taxis seu incertis utriusque stolae, albae et nigrae. Iustum enim est specialius concurrere ad ministros alendos qui specialius utuntur ipsorum opera.

Tantum miserabiles personae gratis ad omnia admittendae sunt, cum excusentur ex sua paupertate et aliunde ius integrum habeant sicut ceteri ad media sanctificationis.

422. Item species quaevis turpis lucri est vitanda. Hinc Ecclesia non admisit has oblationes pro pluribus sacramentis et sacramentalibus, ut pro poenitentia et Eucharistia, sed tantum pro baptismo et matrimonio, et praesertim ex sacramentalibus pro sepultura. Ratio est quia illa sacramenta nimis intime referuntur ad sanctificationem, et etiam frequentius suscipiuntur. E contra matrimonium etsi sacramentum, tamen mul-

tum refertur et ad vitam temporalem; baptisma autem fit semel tantum et laetitiae magnae argumentum est. Emolumenta autem sepulturae etiam sunt in recognitionem genericam curae animarum.

423. De his specialibus oblationibus quaeri posset an iuste ab Ecclesia praecipi possent etsi ministri satis aliunde essent provisi ex bonis beneficii. Et modicae oblationes pro nonnullis solemnioribus actibus videntur semper exigi posse ab eis qui sunt solvendo.

Ratio est quia beneficia sunt instituta potius pro communi ministerio, cum illud per modum unius respiciant, et deinde expedit fovere populi devotionem in Ecclesiam, quod fit et per modicas has oblationes.

§ 4.

TRIBUTA SEU OBLATIONES IN FAVOREM S. SEDIS.

424. Cum sancta Sedes ministret in utilitatem totius Ecclesiae, iustum est universos fideles ex omnibus regionibus concurrere ad expensas eius sustinendas, quae attenta sublimitate Pontificis et numerositate negotiorum, modicae non sunt; illa enim efficit ut aulam et familiam habeat satis magnam et decoram ut convenienter suo gradui possit oculis populorum exponi. Homo enim qui inter sensibilia versatur et ex eis materiam sumit suae cognitionis atque eis quammaxime commovetur, indiget ut cultu quodam externo et Augusto sublimes dignitates ei appareant. Numerositas autem negotiorum, numerositatem officialium secum trahit. Accedit Pontificem providere et negotiis quibusdam specialibus, puta fidei propagationi, aut bellis defensivis contra infideles aliosque Ecclesiae hostes sustinendis, nec non specialissimis necessitatibus particularium Ecclesiarum, ut pater communis ad quem omnes recurrunt.

425. Iamvero expensis sanctae Sedis sustinendis fideles provident ex parte spontaneis oblationibus, ut nunc est denarius sancti Petri. Sed his non sufficientibus, ius habet s. Sedes oblationes exigendi tum ordinarias tum extraordinarias pro modo necessitatum suarum. Extraordinariae fuerunt decimarum partes aliquando a sancta Sede sibi reservatae. Ordinariae sunt annatae (idest fructus primi anni) et dimidia annatae reddituum beneficiorum quas pro ipsorum qualitate sibi reservat quando conferuntur; item spolia clericorum, seu residua ex superfluis beneficiorum quae viventes non expenderunt in debitos pios usus, aut ex vetita negotiatione acquisierunt; item taxae multae in expeditione bullarum, brevium, rescriptorum s. Sedis, ob concessas vel dispensationes vel facultates. Quae quidem oblationes speciales, saltem modicae, semper a s. Sede exigí possent, etsi sufficienter esset aliunde provisa, cum respondeant speciali ministerio in favorem aliquorum, sicut diximus de oblationibus pro baptismo, matrimonio et sepultura favore parochi; praesertim si attendamus redditus sanctae Sedis numquam esse posse superfluos quia saltem melius potest attendere innumeris necessitatibus missionum aut Ecclesiarum pauperum, quarum plures semper in mundo sunt.

426. Regalistae adversati sunt his iuribus s. Sedis sub praetextu pecuniam a regno distrahi non posse, ne ad paupertatem paullatim reduceretur et tandem omnis numerata pecunia ab eo exularet et Romam conflueret. Sic Philippus IV. pulcher dictus, Franciae rex, prohibuit solvi oblationes sanctae Sedi tempore Bonifacii VIII.

Verum hae assertiones sunt 1º iniustae; 2º ineptae. Iniustae: etenim ius est summo Pontifici haec habendi,

et cum Romam mittuntur, non est ad regionem sub respectu religioso extraneam, sed ad urbem principem cuius omnes christiani cives sunt, ex cap. 20 de foro competente.

Ineptae autem quia falso supponunt paullatim omnem pecuniam posse deficere a regno et Romae cumulari, quod experientia falsum ostendit; et paritate rationis idem eveniret in urbe principe cuiuslibet regni respectu urbium provincialium, pagorum praesertim. Sed ipsae vicissitudines commercii humani efficiunt, pecuniam, etsi ad urbem principem abundantius confluat, postea refluere ad singulas provincias, etiam ex eo quod ex omnibus provinciis officiales assumuntur, et occurritur in re nostra necessitatibus Ecclesiarum etiam particularium.

Deinde in re nostra, pecunia quae Romae confluit est res valde limitata et pene insensibilis, comparata cum motu, ut aiunt, commerciali.

ARTICULUS VIII.

DE IURE ECCLESIAE ACQUIRENDI IURISDICTIONES, ET PRAESERTIM DE IURE SUMMI PONTIFICIS HABENDI REGNUM TEMPORALE.

427. Sicut Ecclesia ius habet acquirendi dominium etiam stabile, ita et iurisdictiones; quo nomine in iure canonico venit potestas civilis-politica. Sed inter ius quoad dominia et ius quoad iurisdictiones differentia est; etenim dum illius acquisitio necessaria est normaliter pro omnibus Ecclesiis, iurdictio e contra non est necessaria nisi aliquando per accidens ob speciales temporum circumstantias, praeterquamquod summo Pontifici, cui libera et independens iurdictio,

seu principatus, est regulariter necessarius. Igitur in praesenti articulo primo agendum esset de iure Ecclesiae acquirendi iurisdictiones, sive supremas sive subordinatas, deinde de necessitate et legitimitate independentis principatus pro summo Pontifice.

Verum primam quaestionem satis pertractavimus cum de iuribus adventitiis Ecclesiae egimus, lib. I. n. 401. et 633.; vidimus enim etsi subiectum auctoritatis civilis non sit idoneum ut fiat subiectum auctoritatis ecclesiasticae, quae veluti accessorie eidem adhaereat, subiectum e contra ecclesiasticae auctoritatis esse idoneum ut fiat et subiectum auctoritatis civilis; hinc tota quaestio reducitur ad factum, nempe an haec vel illa Ecclesia legitime acquisiverit iurisdictionem aliquam sive subordinatam sive independentem.

428. Iamvero medio aevo plures episcopi et abbates occasione feudorum diversi gradus, facti quoque fuerant sive barones sive comites, aut marchiones, vel duces, sive principes etiam immediati S. R. Imperii; quorum feudorum sive principatuum causa, exurrexit quaestio de investituris, cum Henricus IV. rex vellet comites in episcopos convertere, seu sibi vindicare episcoporum et abbatum electionem et institutionem, quia feuda ab imperio obtinuerant.

Sed agamus de principatu summi Pontificis, cuius 1^o indicabimus historicam originem; 2^o legitimitatem; 3^o ostendemus eiusdem necessitatem.

§ 1.

ORIGO HISTORICA PRINCIPATUS SUMMI PONTIFICIS.

429. Primo notandum est Ecclesiam romanam fuisse a primis saeculis post pacem datam, divitiis abundantem, adeo ut patrimonia plurima non modo circa urbem sed in tota Italia, imo et in aliis imperii provin-

ciis possideret. Iamvero abundantes hae divitiae non modo plurimum potentiae conferebant summo Pontifici, ut semper faciunt, cum scriptum sit *protegere sapientiam sed protegere et pecuniam*, verum iure romano conferebant plurimum auctoritatis in colonos qui patrimonialia haec excolebant.

430. Praeterea in dissolutione romani imperii, cum innumeris malis premerentur populi, et quovis auxilio carerent, episcopi erant qui populi curam suscipiebant, et suis divitiis atque auctoritate eidem succurrebant; id praesertim praestabant romani Pontifices. Barbari autem qui nullius iuris observantia tenebantur, non semel religione devinciebantur, ut et Attila, flagellum Dei, a s. Leone Magno mitigatus est. Populi autem sponte deferebant Pontifici, et cum in discrimine versarentur, ad eum confugiebant.

Erat igitur ex una parte imperii idoneitas, ex altera necessitas; idoneitas ex parte Pontificis, qui plurimum poterat et divitiis et morali auctoritate tum in barbaros seu hostes compescendos, tum in fideles ut eos ad patriae defensionem et ordinis observantiam revocaret; insuper erat in Pontifice plena voluntas potestatem suam in bonum populi exercendi; deficiente autem organizatione civili, ecclesiastica organizatio eius vices supplet, cum ius habeat salvandi societatem christianam et societas sese defendat ea forma quam actu habet.

Populus autem nullos habebat defensores, vel longinquos et inefficaces; erant enim post Iustiniani seu Belisarii et Narsetis super Gothos victorias, Caesares Byzantini; graecorum autem dominium in Italia pessimum fuit, cum romanis expoliandis plurimum valerent, nihil autem in eis defendendis a vicinis Longobardis, ita ut et aliquando de auxilio rogati, responderent imperatores populis Italiae ut sibi quo meliori possent modo, consulerent.

Omnia igitur oculi in Pontificem convertebantur, non modo romanorum sed et vicinarum urbium, a dominio longobardorum **adhuc** immunium, qui Pontifex curis omnigenis opprimebatur, ita ut s. Gregorius Magnus, initio saeculi VII. iam quereretur se non tam Pastoris quam principis partes gerere, ep. 25. lib. I.: « ita ut saepe incertum sit utrum Pastoris officium, aut terreni proceris agam ».

431. Orta autem saeculo VIII. haeresi iconoclastarum cui plures graeci imperatores adhaerebant, ipsorum copiae ab Italia eiectae sunt, et actum de restaurando occidentali imperio. Verum prudenter restitit sanctus Gregorius II. ut graecis ad fidei unitatem revocandis consulere posset; et aliunde hoc imperium nimis fuisset parvum ut antiqui nominis splendorem sustineret et quod magis est, ut longobardis resistere posset, a graecis separatum, imo et ab ei impetum.

Tantum proinde permisit negari graecis tributa, seu suspendi obedientiam, donec Ecclesiae reconciliarentur.

432. In hac igitur rerum romanarum dissolutione factum est ut sensim sine sensu summi Pontifices primas partes tenerent in supremo civitatis regimine, et eis populi deferrent, ita ut magistratibus inferioribus quos eligebant, onus parendi Pontifici imponerent.

Item factum est ut in plures civitates vicinas eadem auctoritate potirentur; hinc saepe legimus summos Pontifices repetivisse a regibus longobardis terras et civitates quas ipsi invaserant et quae ad ius romanae Ecclesiae pertinere noscebantur.

433. Pipinus autem et Carolus Magnus francorum reges cum longobardos, semel iterumque debellassent, et restituerunt romanae Ecclesiae terras quas iam possederat, seu, ut aiebant, iustitias s. Petri, et alias insuper addiderunt, exarchatum scilicet et Pentapolim,

quas iusto bello à longobardis receperant, frustra graecis reclamantibus qui eas sibi restitui volebant; hi enim ignavia et desertione sua, quodvis ius in eas provincias amiserant, cum ad eas defendendas ut principis officium est, omnino inhabiles tum virium tum voluntatis defectu sese ostendissent.

Igitur initia principatus civilis romanorum Pontificum antecedunt donationes regum francorum, cum iam in urbe, in romano ducatu et pluribus circum circa civitatibus primas partes et supremas in regimine civili sustinerent.

434. Neque ius summi Pontificis imminutum est ex eo quod Pipinus et deinde Carolus Magnus declarati sunt patritii romani, et Carolus etiam romanus imperator.

Nam quoad primum titulum, variae fuit significationis; antiquitus enim denotabat genere optimates, qui veluti essent patres patriae; sub imperatoribus Constantinopolitanis hoc titulo donati sunt qui specialiter ab imperatore ut eius patres haberentur et aliquando primam post imperialem in aliqua provincia auctoritatem designavit; sic patritius recensetur Dalmatiae, veluti huius pater et protector.

Hac significatione protectoris collatum est Pipino primum, deinde Carolo Magno, ut patronis populi et Pontificis romani, non quasi auctoritatem exercerent in Pontificem, sed quia honorabantur hoc munere speciali defensorum Papae et romanae urbis.

435. Neque titulus imperatoris importabat iura maiestatica in romanam urbem; etenim imperator occidentis medio aevo valde discrepabat ab imperatore antiquo, vel ab imperatore orientali; hi enim erant monarchae in territorio cuius titulum imperialem gerebant; contra imperator romanus prout a sancto

Leone III. restauratus est anno 800 in persona Caroli Magni, significabat defensorem armatum christianae societatis in occidente, et primum inter occidentales principes christianos; hinc nullius territorii principatum obtinebat nisi iam habuisset, ut diximus lib. III., agentes de depositione imperatorum.

436. Verum quidem est temporis processu coronam germanicam seu argenteam, et italicam seu ferream, fuisse coniunctas cum dignitate imperiali, cum in regno ille eligeretur qui oportebat dignus esset recipiendi a Pontifice coronam auream seu imperialem; verum urbs Roma et cetera dominia Pontificis non erant subiecta coronae germanicae aut italicae.

Item verum est in coronatione imperatoris populum romanum iurasse eidem fidelitatem; sed salva fidelitate iam iurata domino Papae (1); igitur Papa erat princeps supremus; imperator erat defensor Papae et populi, et ut tali ei debebatur honor atque obedientia sed dummodo ipse prior debitam obedientiam servaret erga Papam, et se exhiberet ut eius defensorem adversus internos externosque hostes, non autem ut dominum et principem.

437. Huiusmodi fuit origo dominii s. Sedis, idest ex populorum spontanea deditioe et principum donationibus; cumque ex primo capite factum sit ut populi prout necessitas suggerebat sese darent Pontifici, non unico indivisibili actu creatus est principatus Pontificis, sed sensim sine sensu, ita ut difficile imo impossibile sit determinare quando ex mera praevalentia facti et aliquali iure momentanee collato, transierit in perfectum principatum. Hoc commune est omnibus

[1] Vide iuramentum praestitum anno 895 imperatori Arnulpho, apud Rohrbacher lib. 59.

institutionibus quae sponte sua prout necessitates exegerint, efformantur. Sic insensibiliter auctoritas patris familias seu patriarchae in tribu vertitur in auctoritatem monarchicam principis prout tribus excrescat in populum; ita in nonnullis guberniis liberis, paullatim auctoritas praesidis pertransivit in auctoritatem principis, ut apud plures civitates medio aevo, quidam cives facti sunt domini (signori), auctis paullatim titulis regiminis popularis; imo et ipsum romanum imperium ortum habuit ex cumulatione et perpetuatione dignitatum reipublicae, quae in sua origine longe distabant ab auctoritate regali, cuius nomen per longum tempus imperatores reiecerunt, utpote romanis invisum.

438. Sub finem autem saeculi XI. donatio comitissae Mathildis, plurimum auxit dominium s. Sedis, cuius donationis effectus impugnaverunt imperatores plures, etsi saepe eam ut validam in actu coronationis agnovissent, ut fecit et Fridericus II.; sed tantum Rodolphus definitive de iure et de facto nuncium misit huic haereditati. Sed interim maxima pars urbium sese in libertatem vindicaverant, et sese liberas civitates seu municipia constituerant, cum inter Pontifices et imperatores disputantes, occasionem habuissent populi facile sese subtrahendi ab utriusque reali dependentia, et etiam privilegia et exemptiones impetrandi, servata quadam subordinatione generali.

439. Ceterum dominium summorum Pontificum in ratione quae exercebatur, secutum est temporum indolem, ideoque feudaliter feudorum tempore; per libera municipia, tempore civitatum liberarum; modo absoluto posterioribus temporibus, etsi semper nonnullae fuerint differentiae in populorum et libertatis utilitatem quas singillatim persequi ad rem nostram non attinet.

440. Haec varietas rationis qua concretatum est, occasionem tribuit aliquibus errandi; cum enim viderent civitates plures anteactis saeculis sub Pontifice libertates communales quamplurimas habuisse, ut et pecuniam cuderent, et exercitus conscriberent, et ius sibi dicerent, et oratores apud Pontificem haberent, putaverunt tunc temporis Pontificem, non fuisse praeditum iuribus maiestaticis (sovranià) in huiusmodi urbes, sed nominalem quamdam vel eminentem tantum habuisse dominationem (alta sovranià). Sed immerito; innituntur enim falso supposito iura maiestatica tantum exerceri posse ratione *centralistica*, quae posteriori aetate apud omnes fere gentes obtinuit; sed haec est modalitas maiestatis non essentia, et contraria regiminis ratio communis fuit principatui summi Pontificis et pluribus aliis ex regibus, quos vere monarchas fuisse nemo dubitat. Id tantum ostendit, salva vera Pontificis suprema potestate et independentia, eius principatum locum relinquere posse maiori vel minori participationi regimini publico prout tempora suggesserint, adeo ut libertates municipales et iura, non sint limitatio iuris Pontificis sed participatio; illa enim imminuit vel aufert maiestatem; haec e contra non.

Haec de origine.

§ 2.

DE LEGITIMITATE PRINCIPATUS SUMMI PONTIFICIS.

441. Principatum summi Pontificis fuisse in sua origine immaculatum ab omnibus vitiis quae ut plurimum concomitantur origines aliorum principatuum, omnes, etiam eiusdem actuales adversarii alicuius scientiae et probitatis consentiunt. Etenim quoad urbem Romam et vicinas civitates innititur spontaneae populorum de-

ditioni, provocatae ex populorum indigentia et Pontificis potentia ac benevolentia; quoad alias civitates innititur spontaneis principum donationibus, populis quoque acclamantibus.

442. Quomodo ergo nunc eiusdem adversarii, fatentes legitimam eius originem, eiusdem eversionem legitime fieri potuisse contendunt? Id duplici ex capite: 1^o ex mutata populorum voluntate; 2^o ex conflictu cum iure nationis italicae; hoc secundum caput inferius examinabimus. Quoad primum dicunt: sicut principatus Pontificis ex voluntate populorum legitime coepit, ita contraria populorum voluntate nunc cessare debet.

Non curamus minorem huius ratiocinii, idest populos Pontifici subiectos eiusdem principatum reiecisse; etsi enim id falsum ostendi possit evidentissimis argumentis si de vero populo agamus et non de paucis impiis et perturbatoribus, tamen pro re nostra interest tantummodo respondere principio invocato, idest legitimos principatus everti posse populorum voluntate. Sed hoc principium est falsum; etsi enim populus disponere legitime possit de principatu cum vacat, et eam eligere gubernii formam quae ei magis placeat, non ita tamen est de evertendo principatu semel legitime constituto. Populus enim liber, idest carens principe, potest vel sibi retinere supremam potestatem etsi deleget exercitium, vel eam transferre conditionate, vel absolute; iamvero quando eligitur forma gubernii monarchica et quidem alligata dignitati perpetuae, ut in casu s. Sedi, profecto populus confert supremam et independentem auctoritatem irrevocabiliter, ideoque non amplius potest rationabiliter dissentire.

443. Unicum effugium huic argumento esset si as-

sereretur populum numquam absolute auctoritatem transferre seu subiectum supremæ potestatis a se distinctum designare, sed semper subintelligi conditionem donec populo placuerit. Sed hæc hypothesis falsa est; cum enim principatus non constituatur pro bono singulorum privato (in his enim nemo praesumitur alienare suam independentiam sed simpliciter delegare executionem sui iuris, ideoque ministros a se dependentes revocabilesque constituere) sed agatur de bono publico et de opere a natura intento, videndum est an ius naturæ exigat populum sibi reservare principalem potestatem eamque tantum ministerialiter exercendam aliis delegare, vel an permittat quoque eam alienari, seu constitui subiectum a populo ipso distinctum, in quo semel collata, resideat a populo independens. Ad hanc resolvendam quaestionem videndum est an finis socialis obtineri possit et in hac hypothesi; si enim potest, ergo ius naturæ permittit; iamvero non modo finis socialis obtineri potest in alia forma a democratica, sed ut plurimum melius obtinetur; si enim populus sibi retineret hanc potestatem, facile turbæ haberentur, praesertim cum nullus constitutus est ordo exercendi supremam hanc populi potestatem; igitur ius naturæ non modo permittit sed et consulit; hinc constituto principe, nisi expresse declaratum sit eum tantum ministerialiter possidere auctoritatem supremam, omnino praesumitur eum absolute eadem potiri.

Igitur et si populi nunc dissentirent, non infirmarent legitimitatem iuris pontificii.

§ 3.

DE NECESSITATE CIVILIS PRINCIPATUS
PRO SUMMO PONTIFICE.

444. Loquimur de necessitate quadam relativa, non autem absoluta; Ecclesia enim et s. Sedes habent pro se divina promissa, portas inferi non praevalituras; hinc etsi deficerent omnia humana praesidia et ingruerent omnia saeva, adhuc Ecclesia staret et s. Sedes, sicut primis tribus saeculis. Sed etsi Deus initio voverit Ecclesiam propagari et conservari absque ullo humano praesidio ut eius divinitas ostenderetur, et quamvis interdum adhuc Ecclesia exponatur gravissimis periculis, a quibus unice Dei virtute eripitur, tamen voluit Deus Ecclesiam normaliter procedere et subsidiis humanis, et officium ipsius Ecclesiae est eadem subsidia sibi ordinate procurare, et officium christianorum omnium est, in hoc Ecclesiam adiuvere, ideoque impium est eamdem eisdem expoliare. Haec enim lex est divinae sapientiae et providentiae ut praestemus quod possumus, supplente Deo in iis ad quae non valemus.

445. Sunt igitur Ecclesiae relative necessaria ea quae de se sunt opportuna pro consecutione tuta, expedita et ampla finis Ecclesiae. Iamvero ut s. Sedes sit plene et evidenter libera, in praesenti societatis conditione necessarius est principatus civilis; qui proinde est ei relative necessarius. Dicimus ut s. Sedes sit plene et evidenter libera: 1^o plene; idest ut omnes sine impedimento valeant ad eam accedere, cum eaque communicare; et ipsa valeat omnibus suam voluntatem manifestare, absque ullo periculo pro se suisque officialibus, et quin teneatur respicere ad modum quo eius voluntas suscipietur ab iis qui extranei sunt negotio, adeo ut non

debeat tacere ad maiora mala quae per accidens exinde sequerentur; 2^o evidenter; non enim pro publicis magistratibus sufficit iustos esse, sed oportet insuper iustos eos apparere, ut ait s. Paulus de se colligente cleemosynas. Iamvero quamvis summus Pontifex sit positive infallibilis in re dogmatica, et negative in re disciplinari, quatenus per legem generalem nequit offendere dogma, et quamvis specialissimam habeat Dei adsistentiam in omnibus negotiis (Deus enim dat gratiam proportionatam statui), tamen haec non usque eo porrigitur ut in singulis negotiis vere sit infallibilis, adeo ut ignorantia, errore facti, personarum acceptione, aut alio minus recto motivo duci non possit; item quod magis sapientes dispositiones emanare non posset. Et quamvis Pontifici honesta praecipienti in iis quae ad eum spectant, esset aequae obediendum etsi ipse non recte ageret, tamen hoc in facto non succedit; subditi enim raro et difficile obediunt cum probabilem habent suspicionem, superiorem per suum praeceptum sibi iniuriam irrogasse. Igitur oportet summus Pontifex pro utili gestione summi pontificatus, non modo sit plene liber, ut in singulis negotiis statuatur quod obiective iustum est et magis expediens, sed insuper evidenter liber appareat ut eius regimen sit pro salute animarum plene efficax.

446. Tota tamen quaestio reducitur ad minorem, an nempe ut Pontifex sit plene et evidenter liber, requiratur principatus civilis. Iamvero id certissimum est. Non insistimus in theologica demonstratione quam inferius innuimus, sed in naturali. Etenim ille est de facto plene et evidenter liber qui immunis est ab aliorum dominio et sibi sufficiens; sed huiusmodi est tantum qui effective est princeps et quidem status alicuius momenti, habita ratione principatuum circumstantium; dicimus effective; si enim tantummodo

concederetur immunitas personalis et regius honor, res esset apparens potius quam vera; vere enim esset in illius potestate qui territorio dominatur; hinc ad summum gauderet libertate quadam precaria et momentanea, non stabili et tuta, ideoque esset in momento liber, sed non in statu seu conditione permanenter libera. Insuper non esset evidens eius libertas ab influxu principis territorialis qui influere vellet vel sui gratia vel foederatorum suorum, contra reliquos, nisi Pontifex esset in aperta inimicitia cum rege territoriali; tunc enim timeri non posset Pontificem eius intuitu moveri; verum id ostendit hunc statum non esse naturalem sed violentum; insuper est cum magno damno populi subiecti illi regi qui ex sua conditione hostilis esse cogitur erga summum Pontificem (1).

447. Diximus insuper hunc principatum summi Pontificis, alicuius magnitudinis esse debere; si enim nimis esset exiguum comparate ad viciniorem, vel viciniore, idem fere esset ac si staret sub potestate regis vel regum viciniorum; singulis enim momentis posset aliquid ab eo vel ab eis timere.

448. Sed quid si defectui principatus, vel eius exiguitati, suppleat interventus legatorum gentium omnium, qui caveant de libertate Pontificis?

Resp. praesertim in secunda hypothesi quod aliquis Status licet exiguus sit Pontifici concessus, id constituere posse minus malum, conditionemque forsitan ad tempus ab eo tolerabilem, sed non constituere conditionem normalem Pontifici debitam. Etenim haec protectio moralis plurimum incommodi habet, cum singulis multum esset a Pontifice deferendum pro maiori zelo quo eum

1) Vide opusculum meum: *Della natura di società giuridica e pubblica competente alla Chiesa*, cap. 3.

defenderent, et insuper quamdam precarietatem semper includit; saltem enim aliqui possunt vel aperte vel occulte deficere et regem territorialem contra Pontificem instigare, praesertim emergente inter ipsos dissidio et unoquoque curante ad suas partes pertrahere Pontificem. Igitur ut Pontifex possit utiliter exercere munus suum supremum pro universali Ecclesiae bono necesse est sit princeps. Status alicuius momenti; tunc est de facto plene et evidenter liber vi ipsius conditionis in qua est, et non tantum ex precaria et adventitia rerum dispositione.

449. Sed dicunt: si Papa est princeps, saepe ob politicas complicationes tenebitur bellum indicare potentiis catholicis, vel saltem uni favere et alteri adversari, quod est inconveniens; etsi enim officium esset principis adversarii Pontificis in temporalibus, molestias non inferre rei religiosae in suo regno, tamen hoc difficile est; videtur igitur magis conveniens, Pontificem esse in superiori positione, omnino spirituali, et veluti extramundana, ut iure internationali lex feratur de omnimoda eius independentia, quae sub tutela iuris gentium ponitur, adeo ut nationes omnes sint vindices libertatis eiusdem si forsitan princeps territorialis eidem attentabit; quod non est probabile; nec enim valet omnium indignationi sese exponere.

Resp. praesumendum esse Pontificem iusta et prudenti uti externa politica, ita ut et in hoc, exemplar christiani regiminis omnibus exhibeat; ceterum quidam non immerito animadverterunt statum Pontificis etsi oporteat sit sufficientis magnitudinis ut ei independentiam largiatur, non tamen esse debere excessivae magnitudinis, ne ob suam politicam praeponderantiam, ceteros potentatus ad invidiam excitet.

Verum quidquid de hoc sit, respondemus directe,

Pontificis independentiam esse bonum necessarium et substantiale, et ad eam necessarium esse principatum; si exinde aliquod sequitur inconveniens, est non modo per accidens sed et parvi momenti comparatum cum servitute Pontificis aut precaria eiusdem libertate; igitur conflictus est inter bonum stabile et inconveniens transiens; vitatur malum permanens, cum aliquo momentaneo incommodo, et nemo inter haec anxius esse potest.

450. Obiiciunt: sicut Pontifici pro regimine Ecclesiae universalis necessaria est independentia et libertas, ita et episcopis pro regimine suarum Ecclesiarum; si igitur illa importat principatus necessitatem pro Pontifice maximo, haec quoque importabit pro singulis episcopis, quod videtur nimis, ideoque falsum.

Resp. concedendo antecedens et negando consequens ex defectu paritatis. Etenim si debita libertate privetur episcopus, dummodo liber sit summus Pontifex, adest remedium, cum hic corrigere valeat quod ille minus recte constituit aut praetermisit; sed si summus Pontifex non sit liber, a nemine corrigitur aut suppletur.

Insuper episcopi non habent negotia internationalia pertractanda, et regulariter cum regibus non agunt de iis quae totius regni intersunt seu constituunt legislationem generalem nationis, haec enim a s. Sede per suos nuncios solent pertractari. Ergo oportet Pontifex sit aequae independens ab iis principibus quorum relationes curat, et a singulis quorum leges corrigit.

451. Haec ratio necessitatis civilis principatus summi Pontificis, pro eiusdem tuta et evidenti libertate, in causa fuit quod concilia quae ab eius origine celebrata sunt (et sunt novem oecumenica), eum non reprehenderit, imo plura expresse defenderint, ut Lateranense IV, Constantiense et Tridentinum (sess. 22. cap. xi).

Ex constitutione autem s. Pii V. *Admonet*, quarto kal. Aprilis 1567, novus Papa iurat de non infeudandis civitatibus, oppidis et locis s. romanae Ecclesiae, et post suam coronationem, datis litteris id debet confirmare. Etenim Papa non est dominus, sed administrator bonorum et iurisdictionum Ecclesiae, quae in titulum ad ipsam s. Sedem spectant. Consulentes autem infeudationes, vel per se vel per alios, summo Pontifici excitata constitutione excommunicantur et rei laesae maiestatis declarantur, et incurrunt eo ipso confiscationem omnium bonorum, dignitatum atque beneficiorum. Cardinales autem S. R. E. in assumptione pilei et sede vacante iurant se servaturos praedictam constitutionem nec Pontifici contravenienti consensuros, neque dispensationem ab hoc iuramento petituros aut oblatam acceptaturos.

Item disponitur feuda vacantia, non esse rursus aliis concedenda. Haec praesertim intuitu *nepotismi* constituta sunt; et confirmata a Sixto V. constitutione *Quanta*, et a Gregorio XIV. constitut. *Quae ab hac sancta Sede*, nec non a Clemente VIII. et Urbano VIII. constitut. *Ad romani Pontificis curam*, 26 Iunii 1592 (1).

In Syllabo autem habetur proposit. 75 et 76; accedunt allocutiones plures et litterae summorum Pontificum, praesertim Pii Pp. IX., ut litterae 26 Martii 1860: « Singulari divinae providentiae consilio factum esse, ut « romanus Pontifex quem Christus Ecclesiae suae caput « centrumque constituit, civilem assequeretur principatum »; item in allocutione *Maxima quidem*, 9 Iunii 1862, dicitur « illum necessarium esse ut idem nulli « umquam principi aut civili potestati subiectus supre-

(1) Vide Ferraris, Bibl. Canonica, c. V c. verbo *Feudum*, art. 2. n. 6. N seqq.

« mam dominici gregis universi pascendi, regendique
« potestatem auctoritatemque ab ipso Christo Domino
« divinitus acceptam, per universam Ecclesiam plenis-
« sima libertate exercere ac maiori eiusdem Ecclesiae
« et fidelium tum utilitati ac indigentis occurrere
« possit ». Episcopi autem numerosi tunc Romae prae-
sentes, occasione canonizationis, assenserunt, et absentes
quoque. Hinc in bulla *Apostolicae Sedis* sub num. XIII.
conservata est excommunicatio latae sententiae iam
lata circa alienationem et infeudationem locorum s.
Sedis, in citatis supra constitutionibus et aliis, idest
etiam Innocentii IX. *Quae ab hac Sede*, et Alexandri
VII. *Inter ceteras*.

452. In his authenticis declarationibus consistit argu-
mentum theologicum liceitatis, necessitatis et legiti-
mitatis principatus civilis summi Pontificis. Circa quae
notandum est. I. *liceitatem* esse doctrinam specula-
tivam quae ad dogmatis dignitatem elevari posset,
cum contineatur in revelatione, si accederet solemnis
definitio; pertinet tamen ad doctrinam catholicam, cum
non modo implicita sit in facto Ecclesiae et in aliis
doctrinis, sed et tradita sit a Concilio Constantiensi
contra Wicleffitas ac in proposit. 15. damnata in Syl-
labo: « De temporalis regni cum spirituali compati-
« litate disputant inter se christianae ac catholicae
« Ecclesiae filii ».

453. II. *Utilitatem et necessitatem*, quoniam refe-
runtur ad praesentes circumstantias, non posse elevari
ad dignitatem dogmatis; etenim elementum contingens
et historicum circumstantiarum non continetur in re-
velatione; tamen constituunt doctrinam catholicam
infallibiliter ab Ecclesia propositam, cum Ecclesia sit
infallibilis non modo in dogmate proponendo, sed et in
omnibus quae cum conservatione et evolutione ipsius

dogmatis et Ecclesiae connectuntur; ex. gr. Concilium Tridentinum esse oecumenicum.

454. III. Quoad *legitimitatem* in specie dominii huius vel illius urbis, iudicium Ecclesiae esse *auctoritativum* ideoque obligationem imponere sese eidem accommo- dandi; imo et quoad legitimitatem complexivam et specificam urbis Romae, hoc iudicium est in re tam gravi, ut error a divina providentia permitti non possit.

455. Sed quid important *praesentes circumstantiae*? Praesertim alludunt ad divisionem gentium christia- narum in plura regna, ex qua fit ut Papa oportet sit a quolibet independens ut liber sit. Ceterum etsi uni- cum esset regnum christianum quod orbem saltem civilem universum complecteretur, adhuc saepe saepius summus Pontifex plura pateretur a rege vel impera- tore christiano cum eiusdem illicitis deberet sese op- ponere decretis, ut ostendit historia ipsa romani im- perii post datam Ecclesiae pacem; si enim sub piis imperatoribus servata est erga Pontificem debita re- verentia, tamen sub impiis aut minus piis plures quoque Pontifices in exilium acti vel in carcerem detrusi. Si tamen unicum esset magnum imperium ut tunc tem- poris, certe et pro Pontifice requireretur validius regnum ut de facto esse posset liber.

456. Est haec incompatibilitas Pontificis subditi, quae occasionem dedit fingendae Constantini donationi quae in decreto Gratiani affertur, chartae nempe qua Con- stantinus imperator sedem Constantinopolim transla- turus, urbem Romam Pontifici concedit, cum ob ma- iestatem Pontificis obfuscaretur maiestas imperatoris et illius dignitati adversaretur praesentia Principis. Hoc, inquam, instrumentum etsi sit historice falsum, exprimit tamen socialem necessitatem et dat formam historicam, evolutioni spontaneae factorum, ex qua tem-

pore procedente constitutus est summi Pontificis principatus.

457. Ex his quae diximus iam praeoccupatae sunt plures quae afferri solent difficultates.

Dicunt igitur: Ecclesia saltem per septem saecula, fuit absque dominio temporali; ergo non est necessarium.

Resp. ergo non est absolute necessarium concedimus, relative praesenti sociali conditioni negamus. Et sane, omittimus prima tria saecula, cum tunc Ecclesia fuerit in statu persecutionis; in reliquis autem quatuor, 1^o plures Pontifices, ut diximus, maxima mala perpessi sunt ab imperatoribus quoque christianis, cum ipsorum non parerent iniquis mandatis; 2^o his saeculis, constitutis regnis pluribus christianis, et sic creata necessitate Pontificis aequae ab omnibus independentis ut omnibus posset reddere iudicium iustitiae, etiam paullatim efformatus est principatus summi Pontificis, iuxta regulam providentiae qua fortiter et suaviter omnia facit; hinc parallele processit efformatio status socialis exigentis Pontificis principatum, et eiusdem creatio.

458. Obiciunt deinde, utique principatum civilem fuisse necessarium summo Pontifici, quando societas civilis immiscebat se rebus religiosis; tunc enim rex territorii in quo fuisset Pontifex, eidem legem dictasset in iis quae populis proponere debuisset; sed nunc non ita est; viget enim principium libertatis cultuum; hinc in quolibet statu permittitur quaelibet doctrina religiosa; igitur non est necesse Pontificem esse principem ut gaudeat ea religiosa libertate quae omnibus conceditur; cumque hic spiritus libertatis conscientiae intine pervaserit modernam societatem, stabilis evasit, ideoque sociales circumstantiae mutatae sunt; et proinde doctrina quae asserit nunc dominium temporale non

esse Pontifici necessarium, imo utilem esse eiusdem carentiam cum eum exoneret a curis terrenis ut liberius vacet coelestibus, non contradicit doctrinae catholicae, syllabo, allocutionibus et episcoporum declarationibus.

Resp. I. positive et theologicæ. Summus Pontifex gloriosæ memoriæ Leo XIII, publicis tum litteris (1) tum sermonibus adhuc asseruit necessitatem principatus civilis, et episcopi pariter. Iamvero iudex competens eorum quæ Ecclesiæ sunt opportuna vel necessaria est ipse Pontifex. Ergo circumstantiæ sociales mutatae non sunt relate ad rem nostram.

459. II. Quoad factum; falsissimum est nunc libertatem plenam concedi catholicae doctrinae et religioni; ne cetera commemoremus, sufficiat indicare facta recentia Helvetiæ et Germaniæ (Kulturkampf).

460. III. Etiam si doctrina moderna de cultuum libertate ubique applicaretur, tamen esset semper cum limitatione; dummodo non præiudicet publicæ tranquillitati et ordini exteriori, cuius princeps iudex est: hæc clausula necessario semper adiungitur; cum enim doctrina de cultuum et conscientiae libertate, sit obiective falsa, et proinde subversiva ordinis socialis, qui eam invocant ut negent religioni catholicae eam protectionem quæ per se loquendo eidem unice deberetur, ex necessitate suæ conservationis coguntur postea citius vel serius dictam clausulam limitantem apponere, et iudicium reservare statui civili, in quo iudicio edendo status cum ex naturalistico principio procedat, etiam pluries errat, reputando temporalia quæ sunt religiosa.

1) Vide epistolam, 13 Iunii 1887 ad card. Rampolla, Status Secretarium, nec non encyclicam ad Italos die 5. Augusti anni 1898.

Et sic denegant Ecclesiae naturam perfectae societatis, imo religionem inter res invisibiles relegant, et proinde Pontificem contraria praedicantem, iuxta sua principia coguntur habere ut seductorem qui negat iura nativa status et populos ad inobedientiam provocat. Et nostra quidem aetate organa, ut dicunt, publicae opinionis et guberniorum heterodoxorum saepe saepius tradiderunt legem italicam, 13 Maii, 1871, de inviolabilitate summi Pontificis (guarentigie) offendere ius internationale, quia dat impunitatem iniuriis ab ipso irrogatis, guberniis omnibus, et dat Pontifici modum haec gubernia offendendi.

461. Haec enim est sors status anormalis ut contrariis querimoniis locum det. Notandum est autem temporibus praesentibus una cum maiori affirmatione libertatis individualis, etiam evolutam esse in immensum legis dominationem quae normam imponit innumeris privatorum actibus; et simul in immensum excrevit potestas effectiva guberniorum quae ope modernae organizationis socialis, statim qualibet persona potiri possunt, eiusque actus impedire, dum e contra tempore anteacto, ex. gr. feudali, non omnes vires sociales erant in manibus principis, unde ei et facile resisti poterat. Hinc maior necessitas immunitatis summi Pontificis ab hac omnipotentia status moderni.

462. IV. Resp. summum Pontificem praeter doctrinae praedicationem, actionem suam in innumeris negotiis maxime practicis exercere, tum episcopis creandis, tum religiosis ordinibus aut congregationibus approbandis, tum causis iudicandis, legibus vel actis guberniorum et populorum reprehendendis vel laudandis (ut an. 1881 foederatione agraria Hiberniae et relativis actibus gubernii britannici, etc.), bellis item; ex quo fit ut eius influxus in vitam nationum sit magnus

et eius benevolentia desideretur ab omnibus contentibus. Igitur etsi vere daretur libertas cultus quatenus merus cultus est, tamen Pontifex non esset satis independens ratione supradictorum. Igitur vel neganda natura Ecclesiae et indoles pontificiae potestatis, vel agnoscendum est statum normalem ipsius Pontificatus esse principatum.

463. Sed modernus auctor (Carolus Curci ex-iesuita in opere, *Dissidio tra la Chiesa e lo Stato*), ait: quid si alius modus inveniretur Ecclesiae utilior ac temporalis principatus?

Resp. hanc hypothesim in praesenti societatis conditione admitti non posse; 1. theologicæ, cum summus Pontifex declarando sibi necessarium verum principatum, excludat alios quoscunque modos; 2. rationaliter; nam ea effectiva independentia quæ datur a principatu, a nullo alio medio dari potest; speciatim non datur a vicariatu collato a Pontifice alteri principi; oportet enim Pontificem ipsum esse effective dominum in regione sua; non enim indiget tantum honoribus et tributis, quæ et a vicario possent eidem praestari. sed praesertim indiget independentia et libertate; igitur oportet vires militares et magistratus territorii, a Pontifice in omnibus dependeant (1).

464. Postremo obiciunt ius italicae nationis. Etenim unitas regiminis politici est magnum nationis bonum, praesertim moderna aetate cum ceterae nationes compositae sint in unitatem politicam vel saltem constituent regna potentia. Etenim natio italica divisa in plura regna semper exponeretur incursionibus extero-

(1) Relate ad dominium temporale sanctae Sedis, vide praeclarum opus, cui titulus: *Il dominio temporale dei Papi*, per mons. Giuseppe Patroni. Siena 1883.

rum, ut et superioribus aetatibus factum est, ideoque esset praeda potentioris; insuper careret debito influxu in societate europea, cum nunc ex frequentioribus relationibus, partes Europae in multis efforment, unicum familiam, cuius negotia communi potentiorum consilio finiuntur.

Iamvero durum est Italica causa principatus civilis summi Pontificis consequi non posse unitatem politicam, ideoque securitatem et debitam positionem.

Resp. hic applicanda esse principia generalia, idest quaelibet natio ius habet procurandi sibi politicam unitatem, salvo aliorum iure conc., absolute negatur; nec enim unitas politica est bonum supremum, ideoque sicut ceteri legitimi principes non possunt exturbari eius causa, ita multo minus Pontifex.

Si autem unitas politica consideraretur ut bonum necessarium causa securitatis, tunc attendenda sunt principia de conflictu; iamvero in conflictu inter bonum temporale alicuius nationis et spirituale totius christianitatis, illud cedere debet.

Ceterum bono nationali provideri posset alio modo, ex. gr. foederatione, et ipsa Pontificis auctoritate, cuius praesentia universam illustrat nationem et protegit.

ARTICULUS IX.

IUS ECCLESIAE QUOAD QUAEDAM DE SE TEMPORALIA RATIONE SPECIALIS RELATIONIS AD SPIRITUALIA.

465. Vidimus extare materias mixtas, seu quae ex sui natura referuntur ad finem utriusque societatis; et tunc unaquaeque societas eas ordinat relate ad finem suum, salva subordinatione societati maiori, et com-

petentia exclusiva Ecclesiae in supernaturalibus eorumque necessariis effectibus.

Sed merentur specialem considerationem quaedam causae, quae per se essent temporales, sed peculiarem relationem dicunt ordini spirituali.

Huiusmodi sunt I. delicta cum scandalo; etsi enim omnia delicta offendant sanctitatem, ideoque finem Ecclesiae, maxime tamen peccata cum scandalo, quia non modo alienant a fine suo peccatorem, sed et reliquos; ideoque peccatum cum scandalo, turbat ordinem sociale ecclesiasticum. Hinc ratione scandali, inductae poenitentiae canonicae; et aliae coercitiones adhiberi possent a iudice ecclesiastico, salva potestate auctoritatis civilis eadem puniendi directe et per se.

466. II. Delicta contra bonos mores, specialiter subsunt tribunali ecclesiastico, quia haec crimina non tam offendunt bonum temporale, ut facit ex. gr. furtum, quod est malum ratione iniustae offensionis boni temporalis, sed morum honestatem quatenus honestas est; hinc habent specialem oppositionem fini ecclesiastico; et proinde non modo ratione scandali cum fuerint notoria, sed etiam ratione suae inhonestatis cum aliquo modo societati innotescunt, puniri possunt ab Ecclesia, salva maiori punitione status civilis, directa et intuitu iuris temporalis laesi, si locum habeat, ut in adulterio et similibus. Etenim delicta contra bonos mores sunt veluti hostes occulti qui pervertunt societatem spirituales, cum maxime alienent ab eius fine.

467. III. Praeter peccatum publicum quod notorietate sua scandalum generat in plebe christiana, potest Ecclesia corripere fidelem de quolibet alio peccato de quo constet in foro externo. Id expresse statuitur cap. *Novit ille*, XIII. de iudiciis, in quo inter alia haec leguntur: « Cum enim non humanae constitutioni sed

« divinae potius innitamur, quia potestas nostra non
« est ex homine, sed ex Deo, nullus qui sit sanae men-
« tis ignorat, quin ad officium nostrum spectet de quo-
« cumque peccato mortali, corripere quemlibet chri-
« stianum; et si correctionem contempserit, per di-
« strictionem ecclesiasticam coercere ». Et sane: finis
Ecclesiae est salus cuiuslibet fidelis, ideoque non modo
compescere debet delicta quae rem publicam pertur-
bant, ut scandala, vel laedunt ius tertii, sed etiam ipsius
peccantis correctionem procurare.

Hinc fit in foro canonico, quasdam obligationes urgeri,
aut puniri quaedam peccata circa ipsas res temporales
quae non attenduntur a lege civili; ex. gr. in contra-
ctibus lex civilis non considerat, regulariter, laesionem
gravem sed non enormem (idest infra dimidium iusti
pretii), et tamen iudex ecclesiasticus etiam intimatis
censuris, urget restitutionem, quia laesio et infra di-
midium potest esse peccatum mortale. Hinc et videt
hanc causam civiliter, et renitentem persequitur cen-
suris.

468. Hinc IV. generalius sequitur posse etiam, Ec-
clesiam videre de controversia inter duos fideles, si
nempe unus queratur se laesum ab alio, idest fratrem
in eum peccasse, iuxta quod legimus apud s. Matt. XVIII:
« Si peccaverit *in te* frater tuus, vade, corripe eum
« inter te et ipsum solum. Si te audierit, lucratus eris
« fratrem tuum. Si te non audierit, adhibe tecum unum
« vel duos, ut in ore duorum vel trium testium stet
« omne verbum; quod si non audierit, dic Ecclesiae;
« si autem Ecclesiam non audierit, sit tibi sicut ethni-
« cus et publicanus ».

Iamvero ut Ecclesia videat an vere frater in fratrem
peccaverit, quoniam id et in re temporali accidere po-
tuit, necesse est videat de ipsa causa temporali, ex. gr.

de iniusta damnificatione. Quoniam autem peccatum perdurat donec restituatur ablatum, vel aliter satisfactum sit parti laesae, hinc Ecclesia sicut iudicat de transgressione iam facta, ita et de compensatione facienda, quae si omittatur culpabiliter, perdurat peccatum.

Ecclesia igitur ad quam spectat curare correctionem peccantis, iure praescribit et satisfactionem laeso exhibendam.

Si autem quis Ecclesiam non audierit, ex evangelio habendus est ut ethnicus et publicanus, idest poena gravissima excommunicationis ab Ecclesia mulctari potest.

469. Igitur indirecte ratione peccati, Ecclesia iudicat et de controversia temporali, quae est materia et causa peccandi. Et tamen per hoc Ecclesia sibi non adscribit iurisdictionem civilem, quia de re temporali praecise non iudicat ut temporalis est. Hinc si controversia resoluta fuerit legitima sententia civili, Ecclesia pronuntiat partem victricem posse tuto ea uti sententia sibi favorabili, idest in huiusmodi usu peccatum non esse. Sicut enim oportet confessarius in foro interno, cum de mero licito vel illicito agitur, per se permittat poenitenti usum sententiae ei favorabilis, dummodo probabilis, ita et in foro externo nequit iudex ecclesiasticus legitimam sententiam iudicis saecularis spernere, ut aliam ipse pronuntiet, sed dictamen reflexum permittere debet parti victrici, ut quaestio quae ante sententiam erat forsitan dubia, habeatur post sententiam ut iuridice certa.

Sed quid si iudex saecularis, manifeste protulerit sententiam iniquam aut iniustam?

Tunc in foro conscientiae pars victrix tuta non est. Sicut enim in dubio praesumendum est pro legitimo

superiore, eiusque praeceptum vel sententia servanda, ita error eius manifestus, nullo modo nobis suffragatur. Si autem hic error iudicis saecularis, manifeste constet et in foro externo ecclesiastico, profecto iudex ecclesiasticus necesse est pronuntiet, victorem utentem hac iniusta sententia adhuc esse in statu peccati, ideoque adhuc corrigendum esse, et ni pareat, distictione ecclesiastica eum compellere potest.

470. V. Ex hac indirecta potestate in res temporales ratione peccati, sequitur etiam iudicem ecclesiasticum de rigore iuris videre posse causas temporales inter laicos, quando eis negatur iustitiae administratio, vel negligitur, ut statuitur cap. 6. et 10 *de foro competente*.

Etenim controversias temporales iudicare directe spectat ad saecularem magistratum; sed indirecte ratione auferendi peccatum eiusque occasionem, iudicari possunt et a iudice ecclesiastico; haec enim auferre, spectat ad finem Ecclesiae. Iamvero in re evidenti, statim procedere potest et iudex ecclesiasticus; in re autem obscura vel dubia, regulariter procedere debet iudex laicus; per eius enim sententiam, pars victrix efformat sibi dictamen reflexum et se a peccato in fratrem, immunem habet. Hinc eodem cap. 10. *de foro competente*, expresse statuitur causas temporales inter laicos, a iudice laico videndas, et declarantur subreptitia rescripta quae in contrarium quis a s. Sede impetra-verit; sed permittitur iudici ecclesiastico has causas videre, in casu neglectae iustitiae, vel si pars aliqua gravata fuerit.

Neglecta enim iustitia a iudice laico, deficit medium directum iuridicum ad auferendas occasiones peccati, vel ipsum peccatum, prout controversia adfuerit vel evidens iniuria. Igitur supplet Ecclesia ex munere suo auferendi iuridice peccata et ipsorum occasiones.

471. Idem est in casu sententiae manifeste iniquae, cum haec in foro conscientiae et ecclesiastico nullo modo suffragetur, exceptis sententiis quae etsi errori facti innitantur, tamen procedunt ex praesumptione culpaе et ad vitandum periculum commune, de quibus non agimus, cum considerent casum omnino specialem, et adhuc iustae dici possint in foro externo etiam ecclesiastico.

472. VI. Etiam causae miserabilium personarum possunt iudicari in foro ecclesiastico, nonnullis in casibus. Etenim protectio viduarum, pupillorum et aliarum miserabilium personarum, inculcatur saepius in sacra Scriptura ut opus misericordiae; hinc specialiter ad Ecclesiam pertinet eas defendere si indigeant. Et proinde in ipsarum negotiis non intervenit praecise quatenus temporalia sunt, sed ratione causae piae.

Casus autem in iure contemplati, ex quorum enunciatione patet ipsorum maxima aequitas, sunt: 1. cum ipsae miserales personae accedunt ad tribunal ecclesiasticum quando negligens fuit iudex laicus in reddenda iustitia, cap. *Ex tenore* XI. *de foro competente*.

2. Quando vidua, vel pupillus (etsi divites), vel miserabilis persona, fuerunt violenter oppressae et rebus suis expoliatae; possunt apud iudicem ecclesiasticum agere interdicto *unde ei*, ad possessionem recuperandam, ex cap. XV. *de foro competente*, non tamen in causa proprietatis, ut notat Reiffenstuel *de appellat.* n. 86. Et sane, reintegratio in possessionem a qua exturbatae sunt violenter, pertinet ad ipsarum protectionem; et vidua aut pupillus etsi divites, sunt semper sub protectione Ecclesiae, cum facilius opprimantur.

3. Cum personae sunt pauperes, semper recurrere possunt ad iudicem ecclesiasticum.

473. VII. Ratione iuramenti, specialem adsumunt relationem ad religionem obligationes de cetero spectantes

temporalia. Etsi enim omnis obligatio sit de se seu subiective spiritualis, ideoque eius inobservantia sit peccatum, tamen quae materiam habet temporalem, eius ratione quid temporalis est. Sed accedente iuramento, ea obligatio quae urgebat tantum ex titulo iustitiae vel charitatis, incipit urgere et ex religione; hinc eius transgressio specialiter offendit religionem, et proinde ad iudicem ecclesiasticum deferri potest, ex cap. 3. *de foro competente* in VI.

Ut patet non loquimur de ipso iuramento, quod est causa omnino spiritualis, sed de obligatione cui accedit.

474. VIII. Ob continentiam causae, idest causarum connexionem. Ea haberi potest quadrupliciter; 1. ex dependentia unius vel plurium ab altera; ita principalis ab incidentalī. 2. Ratione generalis actionis quae ad plura porrigitur, ut actio tutelae, vel negotiorum gestorū. 3. Ratione personarum, si plures in eadem causa sint conveniendi. 4. Ratione tituli, seu rei, ex qua plures quaestiones.

Iamvero ad rem nostram facit primum, tertium et quartum caput. Primum, si quaestio temporalis incidat in quaestionem fori ecclesiastici; tunc enim resolutio causae incidentalis est medium necessarium pro resolutione causae spiritualis. Iudex autem ecclesiasticus habet naturalem capacitatem cognoscendi quae sunt ordinis temporalis, cum naturali lumini subiaceant. Fit autem pro iisdem competens, eo quod ex hypothesi referantur ad finem eius, ipsarumque decisio sit medium necessarium ad eundem.

475. Non tamen evenit contrarium, quod nempe iudex laicus valeat iudicare causam incidentem ordinis spiritualis, cum haec sit altioris ordinis et proinde effugiat eius competentiam, cum repugnet auctoritatem ordinis inferioris ius dicere de superioribus.

Hinc necesse est supersedeat, et recurrat ad iudicem ecclesiasticum pro competenti solutione, qua habita, procedet in causa principali. Ita si in causa haereditatis, exurgat quaestio de legitimitate natalium eius qui esset haeres ab intestato, iudici laico conceditur tantum cognitio nudi facti in re spirituali contra laicum; idest an factum extiterit, puta matrimonium; non autem valet factum qualificare spiritualiter si de hoc quaestio exoriat, ut si matrimonium contractum inter determinatas personas fuerit validum nec ne.

476. Secundum caput habetur pro re nostra, si clericus et laicus conveniendi sint in eadem causa ut rei; tunc ob concordiam iuris civilis communis seu romani, cum canonico, admissum est causam non esse dividendam sed apud idem tribunal finiendam. Et cum, ob privilegium fori, iudex laicus sit incompetens adversus clericum, sequitur utrumque reum iudicari ab ecclesiastico. Id sapientissime factum est, tum ne bis eadem causa instituat, idest apud tribunal ecclesiasticum pro clerico, et apud saeculare pro laico; tum ad vitandum periculum contrariae sententiae in eadem causa.

Ceterum sicut ex concordia iuris utriusque id sapienter constitutum est, non tamen offenderetur competentia Ecclesiae si aliter pro laico determinaret lex civilis.

477. Postremum caput est, cum de eadem re, idest eodem titulo vel per consequens, plures oriuntur quaestiones, ut si iudicandum sit de viri adulterio, pro separatione cohabitationis, ex quo consequitur et restitutio dotis, ex cap. 3 *de restitutionibus inter virum et uxorem, et dote post divortium restituenda*. Prima enim causa est de se ecclesiastica, et secunda est necessaria sequela.

Hinc cap. *Per venerabilem* XIII. *Qui filii sint legitimi*, merito Innocentius III. ait: « Non solum in Ecclesiae patrimonio, super quo plenam in temporalibus gerimus potestatem, verum etiam in aliis regionibus, *certis causis inspectis*, temporalem iurisdictionem *causaliter* exercemus ».

478. Ex his apparet quasdam causas etsi circa temporalem materiam, tamen esse competentiae ecclesiasticae ob elementum spirituale adnexum, vel ob specialem relationem ad spiritualia; iudicium sub respectu spirituali exclusive pertinet ad Ecclesiam: respectus autem temporalis aliquando separabilis est a spirituali; et tunc habetur causa mixti fori, quae nempe ab utroque iudice, ecclesiastico et saeculari cognosci potest. Ita quae VI. loco recensitae sunt, idest causae miserabilium personarum; item quae VII. idest obligationes firmatae iuramento; item quae postremo loco continentia causae, ut si in adulterio, non pro divortio (quae causa exclusive est fori ecclesiastici), sed pro aliis poenis applicandis procedendum sit.

479. Iamvero in causis mixti fori, ob supradictam concordiam utriusque legislationis, idest canonicae et romanae, locus est praeventioni; et proinde ille iudex causam definit qui praeoccupavit; et tunc alter iudex abstinere. Tamen agendo de delictis, si crimen non habeatur ut sufficienter punitum in altero foro, potest rursus puniri in alio.

Quod praesertim fit addendo poenam civilem ecclesiasticae, quae solet esse mitior, vel saltem minus efficax, ut si mere spiritualis. Verum aliquando Ecclesia suam addit civili, ex. gr. excommunicationem. Tunc enim utraque auctoritas intendit delictum punire tantum pro fine suo; in qua divisione nullum est inconveniens.

480. Ceterum sicut Ecclesia libenter suscepit causas de se temporales ratione indirectae potestatis, deficiente vel impotente auctoritate civili, veluti tutelam novae incipientis societatis exercendo, easque causas iudicavit donec amicus perduravit spiritus, ita ab eis nunc abstinet immutatis animorum dispositionibus.

Hinc videmus et in praesenti, Romae vicariatum urbis nec amplius cognoscere de causis civilibus in quibus clerici ut rei conveniuntur, sed actori singulis vicibus facultatem impertiri experiendi ius proprium apud tribunal saeculare, si clericus monitus de eius petitione, ei morem non gerat sed putet se bonum ius habere. Item sacrae Congregationes non amplius vident causas temporales incidentes, ut de dote in causa divortii, etsi id praecipiat cap. 3. *de donationibus inter virum et uxorem*.

S. autem Sedes, episcopis communicat opportunas facultates, ut concessionem impertiri possint conveniendi clericos suos apud tribunal laicum.

CAPUT III.

POTESTAS ORGANICA ECCLESIAE.

Ut ministerium et regimen ecclesiasticum sit utile populo christiano, requiritur *organizatio*, quae est duplex; alia *territórialis*, alia *hierarchica*.

§ 1.

ORGANIZATIO TERRITORIALIS.

481. In eo consistit ut Ecclesia universalis quae pro territorio suo habet fines terrae, dividatur in plures Ecclesias particulares, habentes determinatum terri-

torium seu dioeceses, et si opus sit habeatur quoque plurium diocesium unio in maiores societates, puta primo in provincias, et provinciarum in exarchatus et patriarchatus, vel etiam exarchatus in patriarchatus.

Item habeatur subdivisio dioecesis in parochias, vel vel etiam in districtus seu vicariatus foraneos et horum in parochias. Organizatio autem territorialis secumfert necessario organizationem personalem, cum singulis divisionibus territorialibus aliquis pastor seu minister Ecclesiae praeesse debeat cum diverso potestatis gradu. Sed differentia est inter primam originem organizationis personalis et territorialis; illa enim est, generice inspecta, a Deo immediate. Etenim sub Pontifice maximo, ipse Dominus constituit episcopos, qui secundum gradum iurisdictionis repraesentarent. Est igitur iuris divini positivi. E contra divisio territorialis est iuris humani, quamvis ab ipsa rerum natura reclametur; quo sensu iuris divini naturalis dici posset. Etenim attenta humanae naturae indole in concreto, impossibile est magnam societatem, territorium pergrande habentem recte gubernari posse, nisi facta territorii eiusdem congrua divisione. Ex quo factum est ut praeter divisionem in dioeceses, respondentem gradibus iurisdictionalibus divinae institutionis, et aliae sive maiores sive minores fierent divisiones, institutis gradibus iurisdictionis vel saltem potestatis paternae (in parochis) respondentibus. Gradus maiores seu supra episcopales, sunt emanationes summi Pontificatus; gradus infra episcopales esse possunt et regulariter sunt emanationes potestatis episcopalis. Potestas enim iurisdictionis est delegabilis tum transeunter, tum stabiliter, et in qualibet numerosa societate, locum habet delegatio. Per exceptionem habentur et gradus quasi-episcopales, qui pariter sunt emanationes summi Pontificatus.

482. Ecclesiae ius esse liberum et independens organizandi se, patet ex principio generali, ei ius esse liberum et independens ad omnia sibi utilia, cuius utilitatis iudicium authenticum et supremum ad ipsam spectat Ecclesiam. Sed ex dictis, Ecclesiae utilis, imo necessaria est organizatio tum realis tum personalis, et id Ecclesia verbis et factis asseruit. Ergo eius praestandi, Ecclesiae ius est.

483. Hinc sequitur I. Ecclesiam libere instituere posse parochias, dioeceses, provincias; II. fines ipsarum semel constitutos mutare; vel III. eas coniungere, dividere (seu ex una plures facere), dismembrare, imo et suppressere, si totum territorium et populus, extincto eius titulo, incorporetur alteri. Ius enim quod ab initio est liberum et independens, tale perseverat et temporis processu. Hinc intrusio est auctoritatis civilis, quando exigit a se veniam impetrari pro nova parochia aut dioecesi fundanda, vel restringenda aut amplianda.

484. Neque valet obiiicere aliquando id status valde interesse, puta si eadem dioecesis partim sit in territorio unius regni, partim alterius; item quia status subministrat temporalia.

Nam prima ratio ad summum causa esse poterit rogandi Ecclesiam ut accommodet suas circumscriptiones circumscriptionibus regnorum, si vere ex horum inimicitia difficultas aliqua oriatur; sed non evincit ius, neque per modum regulae potest adoptari; ut enim scribebat Innocentius I. patriarchae antiocheno, non convenit ad mutabilitatem rerum humanarum, res quoque ecclesiasticas mutari.

485. Quoad alterum vero, nempe statum civilem aliquando subministrare Ecclesiae redditus temporales, id nullum in eo inducit ius de spiritualibus disponendi,

praesertim cum per huiusmodi temporalium subministrationem, status satisfaciat muneri suo erga Ecclesiam ex dictis.

Item si praelatus sive episcopus sive metropolita, primas aut patriarcha, resideant extra aliquod regnum, dici non potest ipsorum auctoritas regno extranea. Sicut enim suprema Ecclesiae potestas non est alicui regno extranea, ita et inferiores praelati non sunt extranei Ecclesiis sibi commissis.

§ 2.

ORGANIZATIO SPECIALIS RELIGIOSORUM, MIXTA, IDEST TERRITORIALIS ET PERSONALIS.

486. Ex hoc iure organizandi territorialiter Ecclesiam, sequitur quoque ius concedendi specialem organizationem adassociationibus specialibus, puta ordinibus religiosis. Sicut enim hi eximi possunt ab auctoritate episcoporum ut immediate pendeant ipsorum superiores generales a summo Pontifice, ita distribui possunt in provincias distinctas a dioecesium divisione. Praesertim regalistarum restrictiones, in superiores generales ordinum religiosorum directae sunt, cum plurimis in regnis, interdixerint communicationem cum superioribus generalibus, et exegerint constitutionem vicariorum generalium pro regno, qui essent independentes a superiore generali; et aliquando Ecclesia ad maiora mala vitanda, id indulsit.

487. Ceterum ius Pontificis eximendi a iurisdictione ordinariorum viros religiosos apparet cum ipse habeat in omnes Christi fideles immediatam auctoritatem; quod si gradus episcopalis constitutus est qui pariter frueretur immediata auctoritate in partem gregis sibi commissam, id fuit quia ob Ecclesiae universalitatem impossibile erat unicum Pontificem seu episcopum

immediate regere universos; ceterum ius episcoporum non limitat ius Pontificis, et ab eo exerceri potest et per modum regulæ, in negotiis ad quæ ipse sufficiat; cuius rei ipse iudex competens est. Hinc et capitulis aut aliis Ecclesiis potest quas opportunas indicaverit concedere exemptiones. Hoc de iure.

489. Relate autem ad sapientem usum iuris huius in eximendis viris religiosis, apparet ex eo quod sunt veluti copię solutæ ad nutum supremi Ducis, et ex ipsorum universalitate fit ut uniformis habeatur disciplina, et facilius habeantur viri habiles, qui etiam ex una in aliam provinciam mitti possint, prout exegerit necessitas, quæ non haberentur si immediate penderent ab episcopis.

Igitur quoad ordines exemptos verificatur specialis organizatio tum *territorialis* tum *personalis*.

§ 3.

DE ORGANIZATIONE PERSONALI.

490. Sed iam ad organizationem personalem sermonem convertamus.

Haec inspicere potest relate ad episcopos vel ad gradus supra-episcopales. Quoad episcopos, cum ipsorum gradus habeat potestatem subordinatam Pontifici, et limitatam, sed iure divino determinata non sit eiusdem intensitas, sequitur ipsorum positionem iuridicam determinari iure ecclesiastico; hinc limites maiores vel minores habere potest, dummodo semper verificetur eos esse Pastores, ut lib. 2. part. 1. n. 32. dictum est. Igitur pro temporum et locorum circumstantiis poterit summus Pontifex ipsorum auctoritatem ampliare vel restringere; item ponere vicarios apostolicos in Ecclesiis constituendis vel etiam constitutis; sed tunc

ex causa transeunte, ut in iure explicatur cum de his gradibus sermo est.

490. Quoad gradus autem supra-episcopales, ipsi nihil aliud sunt nisi emanationes supremæ auctoritatis, quæ sedi adnexæ sunt si de metropolitibus, exarchis et patriarchis agatur, qui proinde dicuntur gradus supra episcopales reales. Igitur iure delegato procedunt et plus vel minus eis conceditur pro temporum et locorum opportunitate; sed quidquid habent, nomine pontificio habent.

491. Sicut autem Ecclesia organizata est per pastorum gradus, ita et per pastorum collegia; singulis enim gradibus potestatis supra episcopalis respondent collegia pastorum, quæ in conciliis adunata legem dicunt; hinc concilia provincialia sub metropolitana, nationalia sub primate vel patriarcha; quæ pariter collegia cum sint ecclesiasticæ originis, modo ampliorem modo minorem habuerunt auctoritatem, concessione summi Pontificis, prout opportunum iudicatum est. Haec Concilia cum sint institutiones Ecclesiæ, participant eius independentiæ, et absque placito regio celebrari valent et iuris obtinent vigorem.

494. Ulterius nota ex potestate immediata summi Pontificis sequi per modum exceptionis, vel ratione tituli ut in praelatis nullius, vel ex dispositione transeunte ut in hodiernis vicariis apostolicis, posse constitui gradus quasi episcopales territoriales, qui potestate a Pontifice delegata procedant, ut praesertim sit in missionibus, cum tantum ipse habeat apostolatam, seu ius praedicandi evangelium infidelibus; Episcopi enim positi sunt ad regendum populum Dei, non ad Ecclesias fundandas.

§ 4.

IUS MITTENDI LEGATOS IUDICES.

493. Sicut summus Pontifex vocat in partem potestatis suae supra-episcopalis, gradus hierarchicos annexos sedibus, ita et personaliter potest talem potestatem delegare. Cum enim nequeat ipse personaliter invigilare ubique, Ecclesiasque omnes visitare, id per alios praestare potest; inde origo antiquis temporibus a saeculo V. vicariorum apostolicorum qui nomine Pontificis exercebant auctoritatem supra-episcopalem sibi personaliter commissam in determinatis provinciis; quae delegatio cum coepisset renovari in successoribus ipsorum in eadem sede, visa est tempore succedente transire in realem, ex quo origo primatum vel legatorum natorum, quorum auctoritas obtinere coepit praesertim saeculo IX. Recentiori autem aetate nomen legatorum usu venit, qui dicebantur missi, ut a natis distinguerentur, quorum auctoritas ex frequenti delegatione legatorum missorum, imminui coepit saec. XI., donec extincta est aut fere, saeculo XV. remanente titulo honorifico.

494. Recentius autem cum regia auctoritas facta est validior, legati s. Sedis quamvis adhuc sint legati iudices seu cum iurisdictione missi, super provincias sibi adsignatas, tamen plurimum ut legati-oratores, quales et a regibus ceteris mitti solent, praestare coeperunt.

495. Horum graduum specialem originem, vicissitudines et potestatem non exponimus, cum de his quaestionibus in scholis iuris canonici ex professo sermo sit.

Sed de antiquis vicariis apostolicis praestat videre Guillelmum Audisio, *Idea storica e razionale della Diplomazia ecclesiastica*, tit. XI et seqq. In eodem

autem opere, tit. III. et seqq. videas controversiam saeculo XVIII ad finem vergente, a quatuor metropolitibus Germaniae excitatam, contra ius summi Pontificis mittendi legatos. Quorum querelis ut occurreret Pius VI. edidit anno 1789 eruditissimam *Responsionem ad Metropolitanos Moguntinum, Trevirenses, Coloniensem et Salsburgensem super Nunciaturis*. Haec historia omnino addiscenda est ut depravatio saeculi XVIII addiscatur.

Exhibeamus modo adumbrationem evolutionis iuris publici interni.

§ 5.

ADUMBRATIO EVOLUTIONIS IURIS PUBLICI INTERNI.

496. I. Tempore primae propagationis Ecclesiae et persecutionis, necesse fuit maximam autonomiam singulis relinquere episcopis, qui aliunde et sanctissimi esse solebant, utpote vel ab Apostolis vel ab apostolicis viris selecti, vel saltem a falce carnificis imminente purificabatur Ecclesia, ne ad episcopatum adspirarent ex ambitione, sed veluti reluctantes eligerentur digniores. Electio fiebat in qualibet provincia, seu a vicinis episcopis exquisito voto cleri et populi testimonio. Etenim auctoritas centralis non multum influere poterat impedimentis obstricta tum internis (status propagationis religionis), tum externis (status persecutionis); aliunde ea sanctitas quae erat in episcopis electoribus nec non in clero et populo, erat sufficiens argumentum, plurimum eis concedendi.

497. II. Data pace Ecclesiae maior organizatio facta est, tum in membris, tum ex parte capitis et disciplinae. Hinc plurima concilia celebrata saeculo IV. exordiente, non modo ad haereses profligandas, arianorum praesertim, sed et ad disciplinam constabiliendam, per

quam melius quoque attributiones episcoporum determinabantur atque metropolitaram, quamvis in occidente serius obtinuerint.

Item quoad auctoritatem exarcharum et patriarcharum in oriente. Hinc quinque concilia orientis, particularia sed ubique recepta, Gangrense, Laodicenum, Antiochenum, Neocaesareense et Ancyranum per hanc epocham celebrata sunt, imo quaedam et pacem Ecclesiae praecesserunt.

498. Ex parte autem capitis Ecclesiae coepit maior exerceri influxus; et inter institutiones quae ad eum ordinabantur, recensenda est vicariorum apostolicorum introductio.

Item elementum popolare auctum est in electionibus episcoporum, ut fraudes arianorum excluderentur et plebs facilius defenderet pastorem quem sibi elegerat.

III. Vicariis apostolicis successerunt primates vel legati nati in occidente, ut dictum est.

IV. Legatis natis successerunt legati missi.

V. Et deinde obtinuerunt nuntii permanentes. Concilia autem particularia evaserunt minus frequentia et cum minoribus attributionibus.

Item plures causae factae sunt maiores quae olim concessae fuerant vel singulis episcopis, ut beatificationis, vel conciliis provincialibus, ut causae criminales graviores episcoporum.

§ 6,

IUS LIBERAE COMMUNICATIONIS.

499. Ex eo quod Ecclesia sit societas independens, sequitur ius liberae communicationis reciprocae inter fideles et pastores, nec non inter fideles et pastores ex una parte cum summo Pontifice ex altera, vel Pastorum inter se; ex quo sequitur et ius libere celebrandi

concilia. Si haec communicatio fidelium cum summo Pontifice inspiciatur sub respectu iuris Ecclesiae interni, tunc innititur in immediata eius auctoritate in omnes et singulos, ex qua fit ut episcopi non habeant ius exigendi ut ad summum Pontificem recurratur tantum in casu appellationis aut devolutionis, seu ad corrigendos excessus aut supplendos defectus.

500. Tamen aliquando s. Sedes indulget causas minores finire in regno, puta apud concilium provinciale, vel apud tribunal metropolitae vel primatis.

Item aliquando non suscipit causas et graviores nisi antea sint iudicatae apud iudices inferiores, et ad id se obligat promissione. Verum id sapienter fieri potest ad incommoda vitanda quae sive ex appellationibus multiplicatis, sive ex neglectu iudicum inferiorum haberi possunt; sed non ex necessitate praestantur a Pontifice, verum ex voluntate, idest tunc has causas non suscipit non ex defectu potestatis sed voluntatis.

501. Contra ius huius liberae communicationis obiecerunt regalistae, ius esse statui civili cavendi a conspiracyonibus; possunt enim fideles sub specie communicationis religiosae, adversus civilem auctoritatem plura moliri, praesertim si communicent cum eis qui extra regnum sunt, praesertim cum ipse Pontifex erat rex, et multo magis cum ipse partes alterius regis iniunici aut etiam belligerantis sustineret, vel ei subiectus esset, vel etiam bellum gereret adversus principem aliquem. Hinc saltem in his casibus concedendum est ius inspectionis litterarum quae ad Pontificem mittuntur aut ab eo rescribuntur.

Item ius impediendi accessum personalem ad eundem; siquidem nescimus quid accedentes molituri sint; scribant ergo; litterae enim perlegi possunt a statu ut sibi caveat.

Item ius impediendi Pontifici ne nuncios aut officiales alios mittat, vel eos eiiciendi, ut temporibus tum antiquis tum recentibus factum est.

502. Resp. Etsi statui ius sit vigilandi ne contra se conspiratio habeatur, tamen id nequit esse cum laesione auctoritatis maioris. Igitur ita invigilet ne offendant ius Ecclesiae et praecise ius liberae communicationis ecclesiasticae. Ceterum et pro privatis nimia esset vigilantia gubernii si omnes ipsorum inspicere vellet litteras per modum regulae, imo exigere ut peterent licentiam scribendi extra regnum, ut nonnulli status faciebant pro negotiis ecclesiasticis.

503. Verum status in re ecclesiastica neque per modum exceptionis potest impedire liberam communicationem inter fideles et pastores et viceversa, aut inspicere litteras ipsorum, sed tantummodo data certitudine vel etiam probabili suspitione abusus, recurrere ad superiorem ecclesiasticum ut ipse provideat; hinc numquam exerceri potest contra ipsam supremam auctoritatem ecclesiasticam. Et ratio est quia utique ius est statui sibi cavendi, sed salva subordinatione ne impediat fines maioris momenti, ut fieret in casu.

504. Sed dicebatur: quid si Pontifex sit rex? licebit ne subditis alienis libere communicare cum rege extraneo?

Responsio patet; ob negotia ecclesiastica affirmative; ob civilia negative; sed difficultas esse potest aliquando discernendi ob quae negotia quis communicet; iamvero certum est in hoc verificando, quaecumque praecedentes adsumantur cautela, numquam impediri aut vetari posse communicationem ob negotia ecclesiastica, quorum pleraque, ut casus conscientiae, perfectum exigunt secretum; hinc neque accessus personalis ad summum Pontificem impediri potest praesertim Pastoribus Ec-

clesiae qui ex munere et necessitate publica ad s. Sedem adiguntur saepe accedere. Quod si aliquod probabile periculum est detrimenti civilis, in conflictu cum laesione iuris et utilitatis spiritualis cedere debet.

Quae valent etsi Pontifex faveat alteri regi belligerranti, vel etiamsi in temporalibus ipse bellum gereret. Item si subditus, de facto, esset alterius regis.

505. Idem dicendum est de legatis. Summus Pontifex ius habet eos mittendi in quamlibet orbis partem ut ibi exercent potestatem spiritualem; hoc ius habetur et a Pontifice belligerante; ideoque excluduntur tunc legati eius temporales, sed non spirituales. Quod si aliqui legati auctoritate sua abutantur, sibi usurpando temporalia iura regni in quo sunt, erit ipse Pontifex monendus, et interim et licebit defendere se ab ipsis, dummodo ipsorum abusus sit evidens; non autem potest impediri ipsorum ministerium spirituale vel legatus ipse a regno eiici. Ceterum ad prudentiam Pontificis spectat invigilare ne iustis querelis status civilis occasio detur, easque statim suscipere si locum habeant; cum autem Ecclesia sit per se inermis, patet eam non modo ex sancta sua missione, sed etiam ex hoc capite quammaxime inclinari ut abundet potius quam deficiat in deferendo statui civili.

§ POSTREMA.

ADUMBRATIO EVOLUTIONIS IURIS ECCLESIAE CORAM STATU CIVILI.

506. Quoniam controversiae super competentiam Ecclesiae maxime respiciunt eius comparisonem cum statu civili, hinc expedit breviter delineare modum quo Ecclesia processit in evolvenda sua competentia coram statu civili, et ita finem operi imponere.

I. Tempore primitivo durante persecutione, Ecclesia sese dilatat atque organizat non impetrata venia a societate civili, imo ea contradicente; ergo sese considerabat ut societatem iuridicam; item ipsa possidebat, quod et legaliter fiebat, quatenus erat societas funeraria; quae semper libere permissa fuit et abolitis reliquis adsociationibus. S. autem Paulus intimat fidelibus ut in iudiciis quoque civilibus non adeant pagana tribumalia; per id ostendit, auctoritatem Ecclesiae indirecte attingere et res civiles prout tempora exegerint pro bono spirituali fidelium.

II. Data pace Ecclesiae, ipsa aliquantulum defert imperatoribus christianis; sed semper independentiam affirmat quoties ipsi nomine proprio vel quomodolibet indebite sese ingerunt rebus ecclesiasticis. Abundantes probationes attulimus agentes de perfectione iuridica Ecclesiae lib. I.

III. Genitis ad fidem regibus et populis barbaris suscipit eorundem tutelam, et explicat plenitudinem potestatis sibi convenientis in societate quae christiana ratione vult vivere, atque iurium sibi competentium ad salutem curandam societatis christianae cum deficit respectiva potestas civilis; hinc multa trahit ad suum tribunal vel ratione indirectae potestatis vel devolutive.

IV. Finito medio aevo et reorganizata atque vigescente potestate civili, Ecclesia sese retrahit ad ea quae rigore spiritualia sunt, derelinquendo quae devolutive occupaverat, et ipsam indirectam potestatem raro et aegre exercet. Insuper in ipsa materia spirituali et quae directe ad eam spectat, plures concessionem principibus elargitur.

V. Proclamata, quamvis ex parte tantum obtinente, libertate communi, etsi Ecclesia iuste queratur de suis privilegiis per iniuriam abolitis, tamen utitur libertate

communi et hoc quoque sub respectu evolvit suam vitalitatem, ostendendo se esse sal terrae, sanans omnia mala civilia; haec est epocha nostra, quae ostendit nullum aliud fundamentum hominibus datum esse in quo possint aedificare, nisi CHRISTUM DOMINUM CUI LAUS ET GLORIA IN SAECULA SAECULORUM.



INDEX ET SUMMARIUM.

LIBER IV.

PARTIS SPECIALIS SECUNDUS

Quaestiones speciales de directa competentia potestatis ecclesiae.

	PAG.
1. Evolvenda principia generalia, lib. I. proposita . . .	1
2. Quidquid directe refertur ad finem spiritualem, ad Ec- clesiae competentiam per se spectat	»
3. Si ministerium exigit	2
4. 1 ^o Institutio in vera doctrina; 2 ^o in in rectis moribus . . .	»
5. 3 ^o Ecclesiae organizatio	»

CAPUT I.

De potestate ecclesiae quoad fidem seu doctrinam.

ART. I.

De potestate Ecclesiae praedicandi catholicam doctrinam infidelibus et acatholicis.

6. Quoad infideles ius habet mittendi praedicatores . . .	3
7. Missionarios et converti volentes, protegendum sunt vi po- litica principum fidelium	4

	PAG.
8. Idem ius est quoad acatholicos	4
9. Quilibet rationis usu pollens, ius habet amplectendi fidem et unitatem catholicam	»
10. Neque a patre vel a domino impediri potest	3
11. Ex quo non sequitur, recedere posse ab unitate catholica	6

ART. II.

De iure praedicandi catholicis.

12. 1 ^o Ecclesia exclusive proponit auctoritative doctrinam.	7
2 ^o Iure prohibet libros fidei periculosos	»
13. 3 ^o Item moribus inimicos	»
14. Quod saltem timoratis iuvat	8
4 ^o Ecclesia praeventivam quoque iure statuit censuram	»
Item approbat publice de religione docentes	9
15. Censura non opponitur ordinato scientiarum progressui	»
5 ^o Iure Ecclesia compellit ad frequentandam ecclesia-	»
sticam praedicationem	»
16. Praedicationis ecclesiasticae formam iure determinat .	10

ART. III.

De scholis.

§ 1.

17. <i>Ius negativum Ecclesiae in fideles circa scholas</i>	11
---	----

§ 2.

Ius positivum Ecclesiae circa scholas pro laicis fidelibus.

18. Principium generale: Ius Ecclesiae mensuratur a spi- rituali fidelium necessitate	»
19. Patrifamilias fidei ius et officium est filios in catholica religione instituendi	12
20. Ecclesiae ius et officium est designandi quatenam ad ca- tholicam institutionem necessaria sint	»

PAG.

21. Ad succurrendum patribusfamilias scholae institutae sunt	13
--	----

QUAESTIO I.

De scholis primariis.

22. Errores separantium instructionem puerorum a morali educatione, et hanc a religiosa institutione, et quidem catholica	"
23. Refutatur primus error 1 ^o experientia.	13
24. 2 ^o ex unitate necessaria in prima hominis evolutione.	16
25. Refutatur secundus error	"
26. Refutatur tertius error.	"
27. Encyclica summi Pontificis Leonis XIII <i>Nobilissima Gallorum Gens</i>	18
28. Alia encyclica. <i>Militantis Ecclesiae</i> , ad Germanos	19
29. Alia, <i>Affari vos</i> , ad Canadenses.	"
30. Decreta plura S. C. de Propaganda Fide	"
31. Exceptio	20
32. Ius competens Ecclesiae super scholas primarias.	21
33. Confirmatur auctoritate s. Cong. Concilii	22
34. Iura catholicorum in societate non catholica	"

Difficultates.

35. Contra primam partem ex separabilitate obiectiva instructionis et educationis	"
36. Contra secundam partem ex eadem separabilitate educationis moralis et religiosae.	23
37. Instructio tamen religiosa, etsi inseparabilis a systemate scholastico, separari potest loco et tempore a reliquis materiis	24
38. Insufficiencia institutionis religiosae indeterminatae.	"

QUAESTIO II.

De catechista approbando vel designando.

39. Distinctio scholarum	25
------------------------------------	----

I. *De scholis primariis privatis.*

	PAG.
40. Repraesentant auctoritatem paternam	25
41. Ex magistris quidam vicem patris tenent, quidam eum tantum coadiuvant	26
42. Tamen ipse pater pro religiosa institutione suorum, est dependens ab Ecclesia	"
43. Nam finis Ecclesiae est internus familiae, dum finis civitatis proprie est ei externus.	27
44. Parentes sunt naturale organum Ecclesiae pro religiosa filiorum institutione.	"

II. *De magistris substitutis patri.*

45. Magis pendet ab Ecclesia quam ipse pater	28
46. Hinc ab Ecclesia dirigi et corrigi potest	"
47. Tamen non indiget missione Ecclesiae	29
48. Neque regulariter eius positiva approbatione	"
49. Sed attento modo publico quo doceret, magis persentire posset Ecclesiae auctoritatem	30

III. *De magistris coadiutoribus.*

50. Potest esse omnino domesticus, et tunc religiosa instructio est separabilis ab eius munere	"
51. Si e contra doceat modo publico, religio recensenda inter materias obligatorias	31
52. Secus eius efficacia imminueretur	"
53. Auctoritas Ecclesiae magis explicatur in eos qui modo publico catechismum docerent	32

IV. *De scholis publicis popularibus.*

54. Publicae sunt auctoritate etiamsi municipali institutae	"
55. Schola obligatoria laedit ius patris	33
56. Catechistae designatio in scholis publicis, spectat ad Ecclesiam	"
57. Argumentum contrariae sententiae	"
58. Quaedam ab omnibus admittenda.	"

	PAG.
59. Probatur sententia affirmans	35
60. Solvitur argumentum sententiae contrariae	»
61. Ecclesia, exigente necessitate, valet praescribere catechistam distinctum a docentibus reliquis materias	36
62. Status tenetur sustinere expensas catechistae.	»
63. Conditio socialis praesens, magis necessarium reddit interventum positivum Ecclesiae	37

*V. De scholis privatis primariis, quae publicis
assimilatae sunt.*

64. In eis Ecclesiae competit non designatio, sed mera approbatio catechistae	37
65. Si dubia natura publica scholae, adhuc favendum Ecclesiae	»
66. Reassumptio	38

QUAESTIO III.

De scholis secundariis et superioribus.

67. Instructio religiosa oportet sit proportionata culturae	»
68. Scholae mere professionali.	»
69. Per se non indigent peculiari religiosa institutione	39
70. Sed ea indigent scholae secundariae.	»
71. Hinc ius relativum Ecclesiae	40
72. Scholae lyceales absolvunt praeparationem scientificam communem, ideoque et speciali religiosae instructioni consulere debent.	»
73. Ulterior instructio religiosa, utilis esse potest, si non necessaria	»
74. Omnibus semper necessaria frequentia verbi Dei	»
75. Hinc speciales scholasticae praescriptiones utiles	41
76. Quae ab Ecclesia et praecipi valent	»

§ 3.

De scholis clericorum seu de seminariis.

	PAG.
77. Scholae Ecclesiae propriae, 1 ^o pro clericis	41
78. Attendenda specialis instructio; hinc seminaria maiora; specialis educatio	42
79. Cultura generalis, est de se necessaria	"
80. Sed ex necessitate praetermitti potest.	43
81. Usque fere ad nostra tempora, programma scholasti- cum civile in scholis secundariis, erat sufficiens.	"
82. Tamen clerici adhuc indigebant speciali educatione; hinc necessaria seminaria etiam minora	44
83. Nunc indigent non modo speciali cultura theologica, sed et praeparatoria.	45
84. Neque status a clericis iure exigit absolutionem program- matis civilis	46
85-86. Neque iure praescribit aetatem recipiendorum in scholis clericalibus	"
87. Neque tonsuram	47
88. Solvitur difficultas.	"
89. Status conditionate aliqua iure exigit a clericis.	49

§ 4.

De scholis Ecclesiae propriis pro laicis.

90. Scholae institutio vel independenter a lege civili, vel non	"
91. Independentia scholastica non importat independentiam simpliciter	50
92. Scholae propriae sed scholastice dependentes.	"
93. Ecclesiae nequeunt restrictiones speciales apponi	"
94. Multiplices proponuntur quaestiones	51

QUAESTIO I.

*An Ecclesiae sit ius exclusivum instituendi scholas
pro laicis.*

95. Negative	52
96. An ei sit ius, ex titulo commun'.	53

QUAESTIO II.

De libertate instructionis.

	PAG.
97. Auctoritati civili competit I. ius repressivum.	53
98. II. Ius praeventivum ex speciali aliquo titulo.	"
99. Sed quaeritur an ei competat generalis praeventio aut etiam collatio iuris docendi.	54
100. Ratio quorundam affirmantium.	55
101. Quae et ampliatur.	"
102. Conveniunt socialistae.	"
103. Fautores libertatis; I. quidam negant statui ius praeventio- nis generalis.	56
104. II. Quidam eam concedunt extraordinario; imo III. et collationem iuris docendi.	"
105. Cum publica potestas informatur spiritu conservativo, facile ei indulgetur.	57
106. Fautores absolutae libertatis nequeunt eam extraordi- nario coartare.	58
107. In statu anormali, et orthodoxi favent libenter libertati	"
108. Quin sibi contradicant.	59
109. Quamvis absoluta quaedam agnoscant principia.	60
110. Aliquando arguunt ad hominem.	61
111. In mentem revocatur finis civitatis.	"
112. Qui est moderari relationes iuridicas et privatorum in- sufficienciae supplere.	62
113. Ex quo patet privatis licere scholas instituere.	"
114. Quamvis sub vigilantia generali status.	63
115. Licet statui etiam constituere quasdam normas praeventivas.	64
116. Non tamen semper id expedit.	"
117. Privati scholas instituendo, sese statui non substituunt	65
118. Hinc status non confert auctorizationem docendi, sed tantum valet recognoscere idoneitatem.	"
119. Hinc cavendum ab extremis sententiis.	66
120. De <i>instructionis obligatorietate</i>	"

	PAG.
Conditio familiae aliquando exigit aliquam litterariam instructionem	67
121. Aliquando eam exigit et conditio generalis, societatis .	»
122. Tamen oportet salva consistent iura religiosa, et etiam nationalitatum	»
123. Ecclesia saltem titulo communis libertatis scholas instituere valet	68
124. Imo maiorem meretur fiduciam ac privati	»
125. Per se, schola pro laicis est sub vigilantia status . .	69
126. Quaeritur an scholae institutio habeat specialem relationem cum fine Ecclesiae	70
127. Affirmatur et ostenditur	»

QUAESTIO III.

De titulo speciali Ecclesiae competente, etiam in statu societatis normali, scholas pro laicis instituendi.

128. Deducitur generatim ex speciali relatione quam scholae habent ad eius finem	71
129. Ostenditur in specie pro diversis scholarum generibus.	»

APPENDIX.

De convictibus educationis.

130. Cum specialiter referantur ad Ecclesiae finem, ei ius est eisdem instituendi	73
---	----

QUAESTIO IV.

De iure per accidens competenti Ecclesiae, instituendi scholas, in statu societatis anormali moraliter.

131. Proponitur quaestio de statu societatis anormali . . .	74
132. I. Cum scholae publicae imbuuntur spiritu acatholico.	»
133. II. Cum a religione praescindunt	75
134. Ius Ecclesiae in utraque hypothesis	»
135. Iuliani apostatae perfidia	76

PAG.

136. Publicum aerarium teneri potest ad succurrendum scholis catholicis, I. ex pacto 77
 137. II. Ex rei natura »

QUAESTIO V.

138. *De iure Ecclesiae devolutivo instituendi scholas, auctoritate civili deficiente* 78

QUAESTIO VI.

De effectibus civilibus scholarum a privatis et ab Ecclesia institutarum 79

139. I. Ius status pro publicis muneribus »
 140. II. Pro quibusdam professionibus de se privatis »
 141. Utilitas quae saepe exinde derivat 80
 142. Status tamen ius habet tantum recognoscendi idoneitatem »
 143. Hinc nequit exigere frequentationem scholarum publicarum »
 144. Multo minus si catholico spiritu non sint imbutae 81
 145. Quando Ecclesiae scholae sunt unicae, ut quaest. 5., tunc eis tribuenda plena efficacia civilis 82

CAPUT II.

De potestate Ecclesiae quoad mores, idest pro fidelium sanetificatione.

ART. I.

Divisio capitis.

146. Ad salutem praeter rectam fidem, necessaria sunt opera »
 147. Hinc disciplina ecclesiastica, quae est praxis factorum fidei consona 83

	PAG.
Communiter dividitur disciplina in dogmaticam, liturgicam et externam	83
148. Sed logice dividenda est in liturgicam et externam ratione obiecti; et in dogmaticam et non-dogmaticam ratione fontis.	»
149. Liturgia late sumpta complectitur omnem ritum sacramentorum et sacramentalium	84
150. Disciplina externa complectitur cetera omnia.	»
151. Evolvitur eius comprehensio	85
152. Classificatio mediorum sanctificationis	88
153. Divisio capitis	»

ART. II.

De iure Ecclesiae quoad sacramenta.

§ 1.

Generatim.

154. Ad Ecclesiam exclusive spectat iudicare de valida et licita sacramentorum confectione et administratione.	89
155. Damnum temporale sequens ex causa spirituali. pertinet ad iudicium Ecclesiae	90
156. Iniuria punitur minister servans leges Ecclesiae.	»
157. Neque in materiis mixtis subiicitur minister legibus civilibus, cum ipse curet tantum rem et effectus spirituales	»
158. Etiam pro fidelibus nequeunt leges civiles praescribere quae attingunt ipsam rem spiritualem aut effectus eius inseparabiles	91
159. Quae de libertate ministrorum quoad sacramenta, et de reliquo ministerio intelligenda sunt	92
160. Si praetextu ministerii committatur delictum fori saecularis ratione materiae, adhuc servanda immunitas personalis ubi viget	93
161. Sacramenta de quibus specialis sermo est instituendus.	»

§ 2.

De sacramento baptismi.

	PAG.
162. Quisque usu rationis pollens baptizandus est, si velit et sit dispositus	94
163. Invitis parentibus baptizari potest, qui non est sui compos, I. si parentes sint subditi Ecclesiae	»
164. Si unus parentum consentiat, baptizandus est	»
163. II. Invitis parentibus servis, baptizari potest iussu domini	95
In nota exponuntur modi iustae inducendae servitutis	»
Rex nequit cogere subditos infideles ad baptizandos infantes	»
166. III. Inscitis aut invitis parentibus, baptizari possunt filii quos proiecerint.	96
IV. Item in extremo vitae periculo speciali, vel si sint perpetuo amentes; sed per accidens abstinendum si graves timeantur perturbationes	»
167. Abusus plures nonnullorum statuum circa administrationem baptismi	97

§ 3.

De sacramento ordinis.

168. Ecclesiae est sibi constituere ministros	»
169. Eosque efformare	98
170. Independentem a statu	»
171. Et numerum eorundem determinare.	99

A. De immunitate clericorum a militia.

172. Competit primario clericis maioribus	»
Item et clericis minoribus	100
173-174. Inconvenientia contrariae praxis	»
173. Immunitas clericorum non laedit iustitiam	101
176. Ab Ecclesia de rigore iuris immunitas exigi posset pro omnibus animum clericandi habentibus	»

B. De caelibatu ecclesiastico.

	PAG.
177. Eius utilitas	102
178. Nullius ius violat	103

C. De clericis regularibus.

179. Ipsorum utilitas pro ecclesiastico ministerio	
--	--

§ 4.

De sacramento matrimonii.

180. Matrimonium est in ministerium naturae seu Dei, indi- vidui et societatis	»
181. In nova lege est sacramentum	104
182. An contractus distingueretur realiter a sacramento ali- quando disputatum est	»
183. Validitas et licetitas	105

QUAESTIO I.

De iure auctoritatis civilis in matrimonium infidelium.

184. Sententia communis concedit principi ius constituendi impedimenta etiam dirimentia	»
185. Conformis instructio s. Cong. de Propaganda Fide, nec non conformis resolutio s. Officii	106
186. Ratio intrinseca est quia matrimonium refertur directe ad finem societatis	»
187. Etsi primario sit in ministerium Dei	107
188. Tamen non est proprie res religiosa	»
189. Sed in statu naturae, principi ius aliquod esset et in re religiosa	109
190. Sed matrimonium a principe penderet sub respectu sociali	»
191. Societas quamvis historice posterior familiae, tamen huius ius modificat	»

QUAESTIO II.

De iure civilis auctoritatis in matrimonium christianorum.

	PAG.
192. Si contractus matrimonialis re distingueretur a sacramento, nisi obstaret positiva Dei dispositio, adhuc integrum esset ius principis	111
193. Sed haec sententia nunc sustineri nequit ex litteris Pii Pp. IX. ad regem Sardiniae 19 Septembris 1852. »	
194. Item ex Tridentino, sess. 24. cap. I. de refor. matrim., idest ex eo quod antecedentia matrimonia clandestina essent rata; item ubi non est promulgatum	112
195. Hinc causae omnes matrimoniales, spectant exclusive ad forum ecclesiasticum	»
196. Item de sponsalium valore	113
197. Deus cohaerenter principali officio matrimonii, huius legislationem sibi reservavit	114
198. Deus autem mediante Ecclesia, providet et fini individuali ac sociali	»
199. An Status si non contradicere legibus Ecclesiae, saltem eis superaddere possit	115
200. Negatur quoad ipsam substantiam matrimonii, utpote supernaturalizatam	»
201. Item quoad effectus temporales inseparabiles	»
202. Sed quoad separabiles	116
203. Item punire transgressores legum Ecclesiae, huius iudicii	»
204. Non autem punire ipsam positionem actus religiosi	117
205. Ecclesia aliquando habet ut omnino licita matrimonia, quae non satisfaciunt praescriptionibus civilibus, quae proinde privari tantum possunt effectibus civilibus separabilibus	118
206. Aliquas leges civiles Ecclesia laudat quamvis non adoptet. »	
207. A ministro Ecclesiae in suo ministerio, legum tantum ecclesiasticarum observantia exigí potest	119

	PAG.
208. Item in laicis positive puniri tantum potest omissio praescriptionis civilis, separabilis ab actu religioso.	119
209. Status acatholicus nequit rationabiliter in hac materia negare Ecclesiae libertatem	»

ART. III.

De iure Ecclesiae quoad sacramentalia,
praesertim circa cultum divinum.

§ 1.

Generatim.

210. Sacramentalia sunt « signa sensibilia ad cultum Dei ex- ternum et fidelium salutem ab Ecclesia instituta, ob auctoritatem a Christo D. N. acceptam ad gratiam fidelibus eis pie utentibus facilius impetrandam, in- tuitu precum ipsius Ecclesiae, et ad alios supernatu- rales effectus in ordinaria eiusdem Ecclesiae potestate contentos, impertiendos, praeter proprios sacramen- torum et sacrificii eucharistici effectus	120
211. Ecclesia pollet potestate, eadem instituendi, cum invent rem religiosam, et eius preces acceptae sint Deo	121
212. Cum sacramentalia sint quid supernaturale, exclusive spectant ad Ecclesiam	122
213. In conflictu cum societate civili, Ecclesia praevalet	»
214. Sacramentalium divisio	»
215. Subdivisio.	123
216. Divisio articuli	124

§ 2.

*De cultu divino.*Num. 1. *De loco, A. De templis.*

217. Necessitas templorum	»
218. Ecclesia exclusive erigit templa	125
219. Item restaurat collabentia	»

	PAG.
220. Item eorumdem formam determinat	125
221. Proprietas Ecclesiarum consecratarum est ipsius Ecclesiae; si sint tantum benedictae, saltem gravantur perpetua servitute in favorem societatis ecclesiasticae.	126
222. Cum gubernia usurpaverunt templa, et deinde illa restituerunt, praesumendum est restituisse proprietatem, non merum usum	127
Item de reliquis bonis	»
223. Cum lex civilis obligat municipia ad templorum reparationem, non ideo dicendum est, eis tribuisse eorumdem proprietatem	128
224. Templa immunia sunt ab auctoritate civili	»
I. eximuntur ab usibus profanis	129
225. Sed quinam usus sint profani et quinam non, iudicat Ecclesia	»
226. Immerito auctoritas civilis prohibet in templis congressus catholicorum et alia ab Ecclesia permissa . . .	130
227. Argumenta socialia, et oeconomica et alia in concreto connexa cum iuribus et officiis catholicorum, Ecclesia permittente, valent honeste in templis pertractari.	»
228. Causa necessitatis, et usus profani, possunt in templis permitti	131
229. Iniuste coguntur catholici ad promiscuum usum templi cum heterodoxis	»
230. Id nocet fervori religioso	132
231. II. templa immunia sunt a iurisdictione civili . . .	»
232. III. a vectigalibus publicis	133
233. Sed subsunt iustis legibus hygienicis, directive, quamvis non coactive	»

B. De processionibus.

234. Quaedam sunt utilitatis, quaedam necessitatis . . .	135
235. An Ecclesiae ius sit easdem peragendi per vias ac plateas publicas, aliam specialem destinationem non habentes	»
236. Affirmatur, cum sint modus valde efficax cultus divini.	»

	PAG.
237. Leges contrariae considerant religiosa officia ut privata et mere voluntaria	136
238. Multo magis iniustae leges quae processiones et in loco sacro circum Ecclesia, vetant	"
239. Praesertim processiones necessitatis defendendae sunt .	137
240. Obiectiones	"
241-243. Respondetur ad 1. quod viae publicae sint societatis civilis	"
244. Ad 2. quod processiones turbent negotia civilia . . .	138
245. Ad 3. ex periculo irreverentiae	139
246. Ad 4. ex damnis hygienicis	"
247. Legum hygienicarum observantia nequit coactive ab Ecclesia exigi	140
248. Actus quamvis externus, est spiritualis ex scopo . .	"
249. Hinc est competentiae ecclesiasticae exclusive . . .	141
250. Status iudicio suo repellit tantum damna ex causa temporali	"
251. Resp. ad 6. de aequo iure quod competeret sectis dissidentibus, negando paritatem et consequentiam .	"

C. De imaginibus sacris publice exponendis.

252. An tale ius sit Ecclesiae et fidelibus	"
253. Impugnatur a modernis	142
254. Sed competit fidelibus ex licitate cultus publici . .	"
255. Increduli nequeunt impedire manifestationem cultus, credentibus	143
256. Respondetur ad difficultatem, ex periculo rixarum . .	"
257. Item ex periculo irreverentiae	144
258. Limitatio cultus divini, aegre ferenda	"

N. 2. De tempore. A. De diebus cultus divini.

259. Dies festi	145
260. Dies festi dimidiati	"
261. Sanctificatio positiva, adassistendo missae	"
262. Sanctificatio negativa, per abstinentiam ab operibus servilibus	146

	PAG.
263. Exceptis servis proprie dictis, in sui favorem . . .	147
264. Cupiditas saepius causa est adversandi quiescentiae diei festi	"
265. Huius quiescentiae utilitates multae, tum spirituales, tum etiam temporales	"
II. Dies festus sanctificandus et a publicis officialibus .	148
266. In statu mixtae religionis, saltem dies dominica obser- vanda	"
267. Numerus dierum festorum, auctoritate ecclesiastica con- stituitur	"
268. Item dies solemniiores	"
269. Si quae inconvenientia, sequuntur per accidens et su- perantur multis bonis	149

B. *De hora.*

270. Functionum ecclesiasticarum hora, ab Ecclesia exclusive decernitur	150
271. Et Ecclesia sollicita est publicae honestatis	"

N. 3. *De modo cultus divini.*

272. Exclusive ab Ecclesia constituitur	"
---	---

A. *Obiectum.*

273. Obiectum cultus latraticae, iperduliac, duliac; absoluti, primarii, secundarii et relativi	151
274. Exclusive spectat ad Ecclesiam.	"
275. Item superstitiones remove	152

B. *Crimina.*

276. Eadem compescere Ecclesiae competit et laicae aucto- ritati subordinate.	"
--	---

C. *Ritus.*

277. Exclusive determinatur ab Ecclesia	153
---	-----

D. Lingua sacra.

	PAG.
278. Utilitates linguae mortuae et universaliter adoptatae	153
279. Lingua vulgaris in cultu suppletorio.	154
280. Concessio facta Slavis quoad linguam vulgarem	156
281. Item Romenis Transilvaniae ad unitatem Ecclesiae redeuntibus	157

E. Campanae.

282. Auctoritatis laicae abusus	»
283. Ecclesiae ius	»
284. Moderatio servanda.	158
285. Ipsarum sonus est publica fidei professio	»
286. Iniuste privatos non laedit	»

F. Preces publicae.

287. Exclusive indicuntur ab Ecclesia	159
---	-----

§ 3.

De communione cum defunctis.

288. Communio sanctorum	160
289. Praesertim ob fidem resurrectionis, corpora defunctorum sunt religiosa	»

N. 1. De locis in quibus corpora requiescunt.

290. Sunt religiosa sensu christiano	161
291. Ecclesia non profanatur ex defunctorum sepulcris	»

A. De coemeteriis.

292. Sunt immunia ab auctoritate civili	»
293. Apud christianos sepultura non est merum officium humanitatis.	162
294.-295. Leges tamen hygienicae et publicae securitatis, si iustae, servandae	»

PAG.

296.	Alienis a religione catholica. non concedenda sepultura in coemeterio catholico	163
297.	Id eis iniuriam non irrogat.	"

B. De sepulcris in ipsis Ecclesiis.

298.	Antiquitus ab Ecclesia non concedebatur	"
299.	Recentes leges civiles id prohibentes, ab Ecclesia non sunt reprobatae	164
300.	Auctoritati tamen civili non est absolutum ius id ve- tandi	"

N. 2. De modo curandi corpora defunctorum.

301.	Ritum curandi cadavera determinare, spectat ad Ec- clesiam	165
302.	Humatio et crematio historice	"
303.	Rationes a neotericis adductae pro crematione	166
304.	Dissolvitur 1. de significatione ascensus animae ad coelum	167
305.	Dissolvitur 2. de familiari cultu cinerum	"
306.	3. Oeconomia	"
307.	4. Hygienica ex infectione aeris	168
308.	5. Item hygienica ex infectione aquarum	169
309.	Per humationem dissolutio corporis humani est natu- ralis	170
310.	Neque offendit sensum humanitatis	"
311.	Iuvat criminales inquisitiones	"
312.	Ecclesia de iure non teneretur servare leges praeci- pientes cremationem.	171

*N. 3. De iure admittendi vel excludendi
a religiosa sepultura.*

313.	Pertinet exclusive ad Ecclesiam	172
314.	Agitur enim de sepultura quatenus religiosa	173
315.	Et attendenda est verisimilitudo christianae mortis . .	"
316.	Et negatur ob publicam utilitatem	"
317.	Neque laeditur honor ex causa temporali	"

N. 4. *De processione mortuaria.*

	PAG.
318. Ritus ducendi funus est religiosus	174

ART. IV.

Ius Ecclesiae quoad reliqua capita praeceptorum
moralium iuris positivi humani.

319. Praecepta restrictive moralia dicimus quae directe referuntur ad sanctificationem individui	»
320. Referuntur directe ad Ecclesiae finem	175
321. Ipsorum transgressiones si privatae, non muniuntur sanctione fori externi	»

ART. V.

De iure Ecclesiae pro ordinanda publica professione consiliorum evangelicorum, et praesertim pro ordinibus et congregationibus religiosis instituendis.

322. Tria vota substantialia, solemnia vel non	176
323. Proponitur quaestio sequens	»

§ 1.

Thesis. Ecclesiae ius est exclusivum publice recognoscendi vota evangelicae perfectionis eaque pro effectibus socialibus moderandi; et societati civili catholicae officium est leges respectivas Ecclesiae et respondententes actus in ordine civili agnoscendi.

324. Ecclesia praeter leges communes, condit et leges speciales hypotheticas	177
325. Votorum professio externa, laudabilis	178
<i>Nota.</i> Solemnitas votorum repetenda a iure canonico	
326. Et agnoscenda lege civili	179
327. Limitatio in statibus non catholicis	180
328. Contra ius Ecclesiae peccatur; et si votis tribuantur effectus civiles maiores eis quos Ecclesia intendit	»

	PAG.
329. Laus caelibati, remissive ad n. 169	181
Votum obedientiae non est inhonestum neque servile	»
330. Votum paupertatis non fovet otium	182
331. Ordines mendicantes dant exempla fortissimae virtutis	»

§ 2.

Thesis. Ius est Ecclesiae exclusivum approbandi ordines atque congregationes religiosas, eosque easque moderandi atque dissolvendi, omnesque causas de hac re iudicandi; et officium est status civilis, easdem adso- ciationes et respectivos actus recognoscendi in foro civili.

332. Exponuntur partes thesis.	183
--	-----

A. Institutio.

333. Probatur	184
334. Utilitas ordinum et congregationum I. pro ipsis profi- tentibus	»
335. II. Pro societate ecclesiastica	»
336. Vis unita fortior	185

B. Aetas.

337. Ecclesia exclusive constituit aetatem vestitionis et pro- fessionis religiosae	»
338. Sed mutata conditione sociali, grandior aetas exigi potest	186

C. Tempus probationis.

339. Ecclesia exclusive illud designat	187
--	-----

D. Vestes.

340. Ab Ecclesia designantur, et a statu sunt defendendae	»
341. Item pro clericis	188

E. Numerus.

342. Statuitur ab Ecclesia	»
343. Neque impediri potest praetextu damni temporalis	»

	PAG.
344. De necessitate temporali comparate ad bonum spirituale iudicat Ecclesia	189 190
345. Statui non nocet religiosorum multitudo	»
346. Neque immunitatum praetextu coarctari possunt	»

F. Erectio domorum religiosarum.

347. Exclusive ab Ecclesia dependet	»
---	---

348. <i>G. Regulae modificatio</i>	191
--	-----

H. Regimen.

349. Designatio superiorum generalium, iure proprio spectat ad summum Pontificem	»
350. Ab Ecclesia unice pendent	192

I. Dissolutio.

351. Unice ab Ecclesia dissolvuntur	»
352. Non a Statu	»
353. Ecclesia pariter tunc disponit de ipsorum honis.	193
354. Absque ulla liquidatione, praetextu operum publicorum quae praestabant	»

355. <i>L. Interpretatio regulae et iudicium</i>	194
--	-----

M. Recognitio civilis.

356. Est iure necessaria	»
357. Permittenda praesertim dependentia a superiore generali	195

ART. VI.

**Ius Ecclesiae quoad reliquas adsociationes religiosas
et pias operas.**

A. De adsociationibus.

358. Adsociationes ex mera voluntate privatorum initae ad scopum religiosum, subiacent vigilantiae et praeven- tioni generali Ecclesiae	196
---	-----

	PAG.
359. Adsociationes recognosci possunt I. ut merae personae collectivae	196
360. II. Ut vera collegia	197
361. Ius est Ecclesiae vera collegia instituendi	»
362. Etsi careant votis, et pendent exclusive ab Ecclesia, etsi ex laicis componantur	198
363. Persona moralis non collectiva, nequit in Ecclesia poni mera voluntate privatorum	»

B. De piis operibus.

364. I. Pia opera adnecti possunt alicui societati	199
365. Distinguuntur ab operibus mere philanthropicis.	»
366. II. Erigi valent in entia autonoma	»
367. Et Ecclesiae tradi	200
368. Si ad scopum pium, sunt de se sub aliquali saltem Ecclesiae vigilantia	201

C. De libertate naturali adsociationis.

369. Et status non catholicus agnoscere debet ius adsociationis pro scopo honesto, qualis habetur in Ecclesia	202
Item ius haereditandi omnibus honestis adsociationibus agnoscendum est	»

D. De naturali facultate testandi.

370. Intra quosdam limites a iure naturae	204
371. 1. ex iure dominii	»
372. 2. homo ius habet acquirendi et favore aliorum.	205
373. Hinc et mortis causa iure disponit	»
374. Praesertim de productionibus laborum suorum	206
375. Et in favorem personae etiam moralis	»
376. Et condendo legata pia	207

E. Ius naturale instituendi corpus morale.

377. Individua valent constituere personam collectivam, et corpus morale cum limitatione	208
378. Status tenetur concedere et institutionem personalitatis fictitiae ad scopum honestum et proportionatum	209

	PAG.
379. In Ecclesia minus est ius privatorum	210
380. Legata pia nequeunt modificari donec utilia	"
381. Administratores eorumdem sunt sub aliquali saltem dependentia a publica auctoritate	"

ART. VII.

**Ius Ecclesiae acquirendi et libere administrandi
bona temporalia.**

§ 1.

Ius acquirendi.

382. Competit Ecclesiae	211
383. Independentem a societate civili	"
384. Auctis bonis. Ecclesia limitavit propriam immunitatem	"
385. Ius possidendi bona fructifera.	212
386. Valores mobiles per se non sunt praeferendi bonis immobilibus	"
387. Possessio manus mortuae non nocet societati.	213
388. Neque deterius excolitur.	214
389. Nequit princeps auctoritate propria limitem imponere Ecclesiae possessionibus	"
390. Sed potius Ecclesia sibi	215
391. Praedia Ecclesiae subiiciuntur iuri politico principis	216
392. Ecclesia iuste sibi vindicat immunitatem a tributis, si ea indigeat	"
393. Secus, multiplicatis divitiis	217
394. Possidet enim haec more privatorum	218
395. Si omnia Ecclesiae fierent, haberentur quaedam utilitates	"
396. Sed id non verificatur, pluribus de causis	219
397. Attendendi sunt et casus fortuiti	220

QUAESTIO SPECIALIS I.

An ius dominii naturaliter sit illimitatum.

398. Est illimitatum in conditione extrasociali	"
399. In societate potest per accidens limitari	221
400. Sed regulariter non expedit.	"

QUAESTIO SPECIALIS II.

De taxa manus mortuae.

	PAG.
401. Haece taxa exigi nequit intuitu laboris status	221
402. Sed ob participationem publicis expensis, si Ecclesia non vindicet sibi immunitatem a tributis	222
403. Specialis abusus Italiae	223

§ 2.

Ius administrandi.

404. Competit Ecclesiae liberum	224
405. Regalismus stricte sumptus, seu perceptio fructuum be- neficiorum vacantium	»
406. Item abusus collationis regiae beneficiorum non curato- rum, sede vacante	»
407. Ecclesia est corpus morale independens a statu . . .	225
408. Corpora moralia ecclesiastica unice pendent ab Ecclesia .	»
409. Et status tenetur ad ea ut talia recognoscenda . . .	226
410. Ecclesia valet libere sua alienare	»

§ 3.

Ius Ecclesiae imponendi tributa.

411. Temporalia necessaria suppeditanda sunt ab iis in quo- rum favore ministratur	227
412. Melius est si sponte fiat	228
413. Ministerium commune et speciale	»
414. Status specialius ministrat divitibus	229
415. Socii concurrunt expensis publicis pro viribus, quia addieti societati cum omnibus bonis suis	»
416. Subministratio temporalium fieri potest Ecclesiae im- mediate a statu	»
417. Quod Ecclesiam liberat a pluribus molestiis	230
418. Sed fit de facto dependens a statu	»
419. Decimae reales in societate christiana iuste percipiun- tur et ab infidelibus	»

	PAG.
420. Non tamen personales aut tributa personalia . . .	231
421. Oblationes speciales . . .	232
422. Vitanda quaelibet species turpis lucri . . .	"
423. Speciales seu minutas oblationes iuste exigunt et beneficiati . . .	233

§ 4.

Tributa seu oblationes in favorem s. Sedis.

424. Decus et necessitates eiusdem . . .	"
425. Spontaneae oblationes; taxae extraordinariae et ordinariae . . .	234
426. Neque praetextu depauperationis regni impediri possunt subsidia s. Sedi . . .	"

ART. VIII.

**De iure Ecclesiae acquirendi iurisdictiones,
et praesertim de iure summi Pontificis
habendi regnum temporale.**

427. Nihil obstat Ecclesiam acquirere iurisdictiones . . .	235
428. Id factum est medio aevo pro pluribus episcopis et abbatibus . . .	236

§ 1.

Origo historica principatus summi Pontificis.

429. Post datam pacem, Ecclesia romana multa acquisivit patrimonia . . .	"
430. In dissolutione romani imperii vicens superfuit tantum Ecclesia, curam suscipiens plebis in omnibus . . .	237
431. Orta haeresi iconoclastarum, eiecti graeci a media Italia . . .	238
432. Urbs sponte se Pontifici dedit . . .	"
433. Pipinus et Carolus Magnus eius dominia creverunt . . .	"
434. Iuri regio summi Pontificis non obstat patritiatus Pipini et Caroli Magni . . .	239
435. Neque imperatoris dignitas eiusdem Caroli et successorum eius . . .	"

	PAG.
436. Etsi imperator obtineret regnum Italiae, quod comprehendebat tantum regnum longobardicum	240
437. Hinc principatus Pontificis sensim sine sensu coepit	»
438. Saeculo XI. labente, accessit donatio comitissae Mathildis	241
439. Exercebatur autem diversimode, pro temporum indole	»
440. Quod commune fuit et ceteris regibus	242

§ 2.

De legitimitate principatus summi Pontificis.

441. Legitimum fuisse omnes consentiunt	»
442. Neque contraria populorum voluntate, iure aboleri potuit	243
443. Populus enim valet irrevocabiliter conferre ius regium	»

§ 3.

De necessitate civilis principatus pro summo Pontifice.

444. Est necessitas relativa	245
445. Oportet enim summus Pontifex sit plene et evidenter liber	»
446. Quod tantum haberi potest si effective princeps existat	246
447. Et quidem status alicuius momenti	247
448. Neque suppleri potest per alia media	»
449. Quod si ex principatu Pontificis, aliquando dissidia cum aliis regibus ob temporales causas oriri possunt, est quid per accidens	248
450. Non est paritas inter Pontificis et episcoporum positionem	249
451. Conciliorum oecumenicorum et Pontificum positiva decreta de hac re	»
452. Licetitas dominii temporalis ad dignitatem dogmatis elevari posset	251
453. Utilitas et necessitas non, sed pertinent ad catholicam doctrinam	»
454. Legitimitas iudicatur auctoritative ab Ecclesia	252
455. Necessitas refertur ad praesentes circumstantias, quae praesertim in pluralitate regnorum christianorum consistunt	»

	PAG.
456. Donatio Constantini Silvestro papae, etsi historice falsa, est socialiter vera	252
457. Prout status socialis, dissoluto romano imperio, coepit creare necessitatem principatus pontificii, et paullatim efformatus est	253
458. Adhuc necessarius est	»
459. Neque universaliter datur Ecclesiae libertas	254
460. Neque sperabile est	»
461. Et nunc gubernia facta sunt potentiora ad privatorum actus dominandos	255
462. Pontifex providet negotiis quae maxime intersunt et vitae civili	»
463. Neque inveniri potest alius modus qui aequivaleat principatui civili	256
464. Ius nationis italicae ad suam unitatem politicam, non elidit ius Ecclesiae	»

ART. IX.

**Ius Ecclesiae quoad quaedam de se temporalia
ratione specialis relationis ad spiritualia.**

465. I. Subsunt tribunali ecclesiastico delicta cum scandalo.	257
466. II. Contra bonos mores	258
467. III. Ecclesia corripere potest fidelem de quolibet peccato, quod constet in foro externo	»
468. IV. Et ratione peccati, iudicare valet de qualibet controversia	259
469. Et per hoc non usurpat sibi iudicium civile	260
470. V. Videre potest Ecclesia causas temporales inter laicos in casu negatae vel neglectae iustitiae	261
471. Item in casu manifestae iniustitiae	262
472. VI. Causae miserabilium personarum, et etiam viduarum et pupillorum si opprimantur	»
473. VII. Ratione iuramenti	»
474. VIII. Ob continentiam causae: 1 ^o incidentaliter	263
475. Sed iudex laicus nequit iudicare incidentem causam spirituales	»

	PAG.
476. 2 ^o Si laicus sit correus cum clerico	264
477. 3 ^o Si ex eodem titulo exurgat causa ecclesiastica et saecularis	»
478. Causae mixti fori	265
479. Locum dant praeventioni, ex concordia utriusque pote- statis	»
480. Ceterum Ecclesia ad invidiam declinandam, nunc in pluribus limitat suum iudicium	266

CAPUT III.

Potestas organica Ecclesiae.

§ 1.

Organizatio territorialis.

481. Est necessaria in qualibet ampla societate	»
482. Libere ab Ecclesia praestatur	268
483. Tum quoad gradus superiores tum inferiores	»
484. Status potest tantum Ecclesiae exponere quod sua in- terest	»
485. Etsi extra proprium territorium resideat praelatus ec- clesiasticus	»

§ 2.

*Organizatio specialis religiosorum. mixta,
idest territorialis et personalis.*

486. Utilitas exemptionis religiosorum	269
487. Ius episcoporum non limitat ius Pontificis	»
488. Pontifex sapienter exercet ius suum immediatum	270

§ 3.

Organizatio personalis.

PAG.

489. Potestas episcoporum determinatur iure ecclesiastico . . . 270
490. Gradus supra episcopales sunt emanatio summi Pontificatus 271
491. Collegia pastorum specialia »
492. Praelati nullius et vicarii apostolici hodierni »

§ 4.

Ius mittendi legatos iudices.

493. Vicarii apostolici antiqui; legati nati et missi . . . 272
494. Legati oratores »
495. De ipsorum origine et vicissitudinibus remissive ad canonicas institutiones »

§ 5.

Adumbratio evolutionis iuris publici interni.

496. I. Tempore propagationis et persecutionis necessaria magna episcoporum autonomia 273
497. II. Data pace Ecclesiae, magis organizatur in membris et quoad disciplinam per concilia »
498. III. Et quoad caput, successive per vicarios apostolicos, legatos natos et missos; et tandem nuntios permanentes 274

§ 6.

Ius liberae communicationis.

499. Competit pastoribus cum fidelibus et vice versa, et praesertim cum summo Pontifice »
500. Tamen aliquando summus Pontifex non vult minores causas, aut in prima instantia suscipere 275
501. Libera communicatio nequit a statu impediri praetextu damni temporalis »
502. Nequit enim offendere bonum spirituale 276

	PAG.
303. Sed in casu abusus inferiorum, recurrendum ad summum Pontificem	276
304. Etsi Pontifex sit rex, nequit impediri communicatio cum eo in spiritualibus	»
305. Item nequeunt impediri legati Pontificis	277

§ postrema.

Adumbratio evolutionis iuris Ecclesiae coram statu civili.

306. I. Sese constituit repugnante statu	278
II. Conversis imperatoribus, aliquantulum eis defert, salva sua independentia	»
III. Everso imperio tutelam suscipit novae societatis, et quoad plura temporalia	»
IV. Roborata societate civili, insistit in spiritualibus .	»
V. Statu recedente, utitur ea quae conceditur libertate	»



INDEX ALPHABETICUS

RERUM PRAECIPUARUM

N. B. Numerus arabicus indicat numerum marginalem. Intelligitur liber primus nisi alter citetur; citatur autem liber numero romano et citatio eadem subintelligitur in numeris arabicis sequentibus, donec alia ponatur.

Abrogatio legis, 102.

Aceatholici; ipsorum ius publicum, II. 196. seqq. — relationes cum Ecclesia catholica, I. 582. seqq. — cum statu catholico, 563. seqq.

Acceptatio legis, ex parte populi. non necessaria, 101.

Administrativa potestas, 96.

Adsociationes piae, IV. 358; libertas, 369.

Aeternitas poenarum, 136.

Apostolatus, II. 5. seqq. — B. Petri, 12.

Appellatio; 121. — tamquam ab abusu, III. 44. seqq.

Arbitri; 116.

Armata vis; 157. seqq. — Ecclesiae, 336. seqq.

Asylus; III. 110. 183.

Auctoritas; quid? 80; eius formae, 83; origo naturalis, 88. seqq.; in Ecclesia, II. 86. seqq.

Baptisma; IV. 153. seqq.

Bellum; 192. seqq.

Caelibatus; IV. 169. 170.

Campanae; IV. 282. seqq.

Canariae insulae; earum concessio, III. 236. 242.

Catechistae; IV. 39. seqq.

Causae, maiores; II, 25. 26. — fori ecclesiastici temporales, IV. 465. seqq.

Censura; 119. seqq. — IV. 14.

Censurae; 284.

Clerici regulares; IV. 179.

Clericorum institutio, IV. 77. — immunitas a militia, 172. seqq.

Civilis societas; est organica, 52. — eius necessitas, 364. seqq. — finis, 379. seqq. — relationes cum Ecclesia, 396. seqq. — cum falsis religionibus, 584. seqq.

Coactiva potestas; 96, 113. seqq.

Coemeterium; IV. 292. seqq.

Communicatio cum S. Sede, IV. 499.

Communio cum defunctis, IV. 288. vide *Defunctorum*.

Communismus; 382.

Competentia Ecclesiae et status, per se, 387. seqq. — ex factis contingentibus, 633. — directa Ecclesiae, IV.

Conatus delicti, 131. III^o.

Concessio regnorum; III, 236. seqq.; — declarativa, 237; — novarum regionum, 242. seqq.

Concordata; origo, 642; recensio, 650; finis, 652; materia, 654; personae contrahentes, 655; natura, 658. seqq.; errores, 686. seqq.; stipulatio, 700; dissolutio. 701.

Concursus status catholici ad actus falsae religionis, 592.

Conflictus; 179. seqq.; 187.

Congregationes religiosas; vide *Professio*.

Coniugalit societas; est inaequalis et inorganica, 52; necessaria in genere, libera singulis, 68.

Connexio religionis cum moralitate et tranquillitate publica, 452. seqq.

Consilia evangelica; IV. 322. seqq.

Conscientia informata; III. 57. seqq.

Conversio infidelium et dissidentium, quomodo procuranda, 631.

Convictus educationis, IV. 130.

Cooperatio, vide *Concursus*.

- Correctio* legum civilium; III. 197. 198; principum, 199. seqq.
Crematio, IV. 302. seqq.
Crimen vide *Delictum*.
Criteria, iudicialis potestatis, III.
Cultus divinus; locus, IV. 217; processiones, 234; imagines sacrae. 232; tempus, 239; modus, 272; obiectum, 273; crimina. 276. ritus, 277; lingua, 278; campanae, 282; preces publicae, 287.
Cultus, libertas, 511, 584, 589, 591.
Decretales Isidori mercatoris, II. 189. seqq.
Defensio Ecclesiae ad hominem, 32.; praestanda a principe, 472, 497, 501.
Defunctorum communio: IV. 288; loca, 290; coemeteria, 292: sepulcra in Ecclesiis, 298; humatio et crematio, 301; sepultura religiosa, 313; processio mortuaria, 318.
Delictum; 128; praeterlapsum, 132.
Democratia in Ecclesia; errores, II. 38; refutantur, 86. seqq.
Depositio principum. III. 208; imperatorum, 211; regum, 222. seqq.
Diaconi; II. 3. II^o.; electio, 91.
Disciplina, IV. 147.
Dispensatio legis, 102.
Docentes publice de re religiosa, approbandi, IV. 14.
Dominium Ecclesiae, IV. 382. seqq.; naturale; an illimitatum, 398: temporale s. Sedis, 427. seqq.
Duellum, 190, 191.
Ecclesiae notio 204; distinctio a societate civili, 201; divina institutio, 204; iuridica natura, 205; perfectio 206. seqq.; potestas punitiva, 277. — Constitutio, II. 3. Relationes cum societate civili, I. 357, 396; cum statu christiano acatholico, 563; haeretico, 567; schismatico, 568; indifferenti, 570; infideli, 573; cum societatibus religiosis falsis, 582; cum guberniis illegitimis, 578.
Ecclesiae palatinae, III. 137. seqq.
Ecclesiarum proprietates, IV. 221.; usus, 225.
Educatio, non separanda a religiosa institutione, IV. 26.
Effectus civiles actuum religiosorum, 429; sectae toleratae, 609: scholarum, IV. 139.
Electiones, concessae populo, II. 40: historia 116-168.
Episcopalis potestatis natura; II. 32; eiusdem exaggeratio, 179.

Episcopi; pertinent ad hierarchiam iure divino, II. 4; differentiae cum apostolis, 15; gentium, 19; vocantur et presbyteri, 17.

An habeant immediate a Deo iurisdictionem in singulas dioeceses, 53; an collegialem, 59. — titulares, 61.

Error auctoritatis, 76.

Errores, circa formam Ecclesiae, II. 36. seqq.

Ethnarchia medii aevi, III. 255. seqq.

Evolutio iuris publici interni, IV. 496; externi, 506.

Eybel, II. 84.

Executiva potestas, 96.

Exclusiva, II. 169. seqq.

Exequatur, vide *Placet*.

Exercitium functionum supremæ potestatis utiliter dividitur, 163.

Febronius, II. 69. seqq.

Festi dies, IV. 259. seqq.

Fidei prædicatio, IV. 6; susceptio, omnibus defendenda, 9. seqq.

Finis Ecclesiae, 34; societatis civilis, 379. seqq.

Forma regiminis ecclesiastici, II. 34; acatholicorum, 196. seqq.

Fori privilegium, III. 153.

Gallicanismus, II. 76.

Gradus supra episcopalis, IV. 490.

Gubernativa potestas, 96.

Gubernia illegitima, 574-578.

Haeretici, 567.

Hebraeorum religio, 272.

Hierarchia, II. 4. seqq.

Hora cultus divini, IV. 270.

Humatio, IV. 302.

Jansenistae, II. 82.

Imagines sacrae, IV. 252.

Immunitas ecclesiastica; III. 152; summi Pontificis, 190; Clericorum a militia, IV. 172.

Impedimenta matrimonii infidelium, IV. 184; christianorum, 192.

Imperator medii aevi, III. 211; eius depositio, 218.

Indifferentismus, 523.

Infallibilitas apostolorum, II. 6; B. Petri, 12.

Informata conscientia, III. 57.

Iniuriae in personas in secta tolerata qualificatas, 614; in ipsam falsam religionem toleratam, 616.

Inquisitio; 319.

Instructio; eius libertas; IV. 92.

Isidori mercatoris decretales, II. 189.

Judicium civile, criminale, 95.

Jurisdictio, 35; ius Ecclesiae acquirendi iurisdictiones temporales, IV. 427.

Jus; eius notio et divisiones, I. seqq.

Jus patronatus; III. 105; regium, 123.

Jus publicum sectarum acatholicarum, II. 196.

Legati s. Sedis, IV. 493.

Legatia seu Monarchia Siciliae, III. 66. seqq.

Legis definitio et divisiones, 97. seqq.

Liberalismus, 527. seqq.

Libertas cogitandi, 518; loquendi, 521; cultus, 522; quando conservanda, 584; quando concedenda 589. — instructionis, — IV. 97; professionum, 140; adsociationis, 369; communicationis cum s. Sede, 499.

Librorum prohibitio, IV. 12.

Limes auctoritatis ecclesiasticae et civilis, 413.

Liturgia, IV. 147.

Magistratus minores, III.

Magistri; substituti patris, IV. 45: coadiutores, 50.

Magisterium, 35.

Maiestas, 80.

Manus mortuae, taxae, IV. 401.

Marsilius patavinus, II. 38.

Materia legis in genere, 102; mixta, 421.

Matrimonium, IV. 180, seqq.

Missionarii protegendi, IV. 7.

Monarchia seu Legatia Siciliae, III. 66. seqq.

Moralitas, connectitur cum religione, 452.

Naturalismus, 523.

Nominatio regia, III. 34. seqq.

Obligatio seu

Officium; 8; principis erga religionem naturalem, 472; erga reve-

- latam, 497. — Ecclesiae erga civitatem, 358.; catholicorum in societate moderna, 572.
- Opera pia*, IV. 364.
- Ordines* religiosi, vide *Professio*.
- Ordinis* potestas, 35.
- Ordo* sacramentorum, IV. 168.
- Ordo* tractationis. 33.
- Organizatio* societatis. 51; sectae toleratae, 626; Ecclesiae, IV, 481.
- Origo* naturalis, potestatis socialis. 90; principatus civilis s. Sedis, IV. 429.
- Paganorum* religio, 274.
- Palatinitas* Ecclesiarum, III. 137.
- Parochoi*; non sunt formaliter positi a iure divino, II. 46. III^o; — electiones, 134.
- Perfectio* relativa, 72.
- Permissiva* lex, 99.
- Persona*; notio et divisiones, 14; collectiva et corpus morale, 603; eius institutio, IV. 377.
- Petrus*, vide *Primatus*.
- Pia opera*, IV. 364.
- Pistorienses*, II. 82.
- Placet*; notio, III. 2; origo et vicissitudines, 6; iniustitia, 27.
- Poena*; 133. seqq.; ius Ecclesiae, 277. seqq.; capitalis, 307. seqq.
- Poenitentiae*, 281.
- Possessio* honorum temporalium, 63. sectae toleratae, 605; Ecclesiae, IV. 382.
- Potestas* ordinis, iurisdictionis, magisterii, 35.; quoad fidem. IV. 6. seqq.; quoad mores, 137. seqq.
- Praecepta* moralia ecclesiastica, IV. 319.
- Praedicatio* fidei, IV. seqq.
- Praestationes* personales sectae toleratae, 607.
- Praeterlapsum* delictum, 132.
- Praeventio*, 117.
- Preces* publicae, IV. 287.
- Presbyteri*, II. 4. 17.
- Presbyterianismus*, II. 45. 172.
- Primatus* B. Petri. II. 5.; succedit romanus Pontifex, 13.

- Princeps*; eius iura et officia quoad religionem naturalem, 472. et revelatam, 497.
- Principatus* civilis s. Sedis, IV. 429. seqq.
- Principum* correctio, III. 208; depositio, 211. seqq.
- Privilegia*; III. 187. — fori, 153.
- Processiones*; IV. 234; mortuariae, 318.
- Professio* religiosa; IV. 308; ius Ecclesiae, 322. seqq.; recognitio civilis, 356.
- Promotio* actuum falsae religionis, 623.
- Promulgatio* legis, 100.
- Proportio* poenae, 152.
- Protectio* religionis naturalis, 472; revelatae, 497; Ecclesiae in principe est ministerialis, 550.
- Protestantes*, II. 39, 198.
- Quasi-delictum*, 128.
- Recognitio* civilis sectae toleratae, 601. seqq.
- Referendum*, 165-167.
- Regalia*, III. 42.
- Regium* iuspatronatus, III. 105-136.
- Reversales*, I. 650. in nota.
- Richerius*, II. 68.
- Romanus Pontifex*; succedit B. Petro, II. 13, 14; eius potestas, 25; nequit sibi constituere successorem, 63; eius electio, 155-169; plena potestas, 182; plena immunitas, III. 190; ethnarchia, 255.
- Sacramenta*; IV. 154. seqq.
- Sacramentalia*; IV. 210.
- Schismatici*; 569; II. 196, 197.
- Scholae*; IV. 17. seqq.
- Sectae dissidentes*; 582, 584. seqq. II. 196.
- Socialismus*, 382.
- Societas*; notio et divisiones, 38. seqq.
- Seminaria*; IV. 77. seqq.
- Sententiae* ex informata conscientia, III. 57.
- Sepultura*, IV. 313.
- Sepulcra* in Ecclesiis, IV. 298.
- Siciliae* monarchia, seu legatia; III. 66. seqq.
- Status catholici* relationes cum sectis dissidentibus, 584. seqq.

- Talionis* poena, 146.
Taxa manus mortuae, IV. 401.
Templa; IV. 217.
Tempus cultus divini, IV. 259.
Testamentum, IV. 370.
Tolerantia; 584. seqq.
Franquillitas publica; connectitur cum religione, 445-471.
Tributa; ius Ecclesiae; IV. 411; s. Sedis, 425.
Unitas supremæ potestatis, 160.
Urbanum regimen; 123.
Van-Espen; II. 83.
Venia; ius concedendi, 153.
Vestis Clericorum et religiosorum; IV. 340, 341.
Vis armata; 157; Ecclesiae, 336. seqq.
Visura, vide *Placet*.
Votum, 325. seqq.

LAUS DEO.

32463

